



3 1761 04118 5786







MARTINI SCHWARTNER,

BIBLIOTHECAE REG. SCIENT. UNIVERSITATIS PESTANAE
CUSTODIS PRIMI, ET PROFESSORIS DIPLOMATICAE,

INTRODUCTIO

IN

REM DIPLOMATICAM

A EVI INTERMEDII,

PRAECIPUE

HUNGARICAM.

CUM

TABULIS V. AERI INCISIS.

Editio secunde auctior et emendatior.



Annulus Piscatoris.

BUDAE,

TYPIS REGIAE UNIVERSITATIS PESTANAE.

MDCCCII,


MARTIN SCHWARTZ

UNIVERSITY OF TORONTO LIBRARY
130 St. George Street, Toronto, Ontario M5S 1A5

UNIVERSITY OF TORONTO

REMI DIPLOMATIC

A FIVE YEAR



HUNGARY

1968

RECEIVED

RECEIVED

CD

59

14853

102



RECEIVED

RECEIVED

PRAEFATIO.

Quam ante hos annos XII. impetu adhuc juvenili quodammodo actus, vulgaveram *Introductionem in Artem diplomaticam, præcipue Hungaricam*, nunc studiis converſis animoque virili, hortatu amicorum, librumque rei diplomaticæ studioſis efflagitantibus, in lucem publicam emitto iterum. Prodit autem idem prima equidem adhuc priſtini ſui habitus lineamenta referens: at, quod in hominibus fere annis recedentibus fieri obſervamus, mutatus cetera permultum ab illo, qui antea fuerat. Attingam paucis, quid quantumque ille ſecundis meis curis debeat, qui a prima ſui origine, non ſolum civibus noſtris academicis, verum illis quoque deſtinatus erat, quibus educatio aliquando minus liberalis obtigit, quam ut in ſcholis præcepta Artis imbibiffent, cujus in cognoscendo jure, ævi præcipue intermedii, explicandisque fatiſ & viciffitudinibus humani generis, tam frequens, tamque magna eſt neceſſitas. — Ante omnia ergo quam poteram diligentiffime, quid foris in re diplomatica annorum XII. intervallo actum ſit inquiſivi; cujus proventu ſterili cum me minus ſatiatum eſſe ſentirem, ad lectionem & ſtudium aucto-

rum de re diplomatica veterum reversus sum denuo, imprimis vero sic dictum novum opus PP. Benedictinorum e Congr. S. Mauri diplomaticum, quod suo volumine adeuntem deterret, nec rerum dispositione perspicua adjuvat, neque orationis gratia demulcet, at incredibili rerum utilium ubertate turget, a capite ad calcem studiose relegi, avareque ut ita dicam excerptum, in meos meorumque lectorum usus converti. Sed neque alios auctores artis diplomaticæ præstantissimos, qui excellentissimum illud opus sive prægressi sive demum subsecuti sunt, neglectos prætermisi, quorum nomina, dum hoc res deposcebat, ingenue professus sum, eadem brevitatis studio intermittens, quotiescunque ab illis dicta, vel fini quem propositum persequabar non convenire animadverti, vel ab aliis jam occupata esse deprehendi a). — Alterum quod mihi secundam libri editionem adornanti curæ cordique fuit hoc erat, ut jam ab aliis inventa in re codicillari ævi intermedii, cum chartis & diplomatibus domesticis religiose contenderem, studioseque mutuo & invicem accommodarem. Hujusmodi enim rituum & consuetudinum, populorum plurium ejusdem ævi,

a) *Gerkeniana* ex. gr. (præter partem alteram de Sigillis, cujus copiam domi forisque nequicquam quæsi) pleraque omnia legi. Etiam *Arnoldi Miscellanea diplomatica*, ultra nomen & titulum mihi nota erant, quamvis illis parum in rem meam uti potuerim.

inter se facta comparatio, ut mirum quantum
 jucunditatis habet: ita rebus mox hujus
 mox alterius populi sæpe perobscuris, quam
 plurimum lucis affundit. Proderant autem
 mihi talia conanti multum, Tabularia publica
 privataque, quæ mihi illo temporis decursu in-
 spicere licuit, præstantesque illæ Tabularum
 ævi inferioris collectiones, quibus usus sum,
 quarumque in ipso libro est frequens mentio.
 Et in Tabulario quidem secretiore Domus
 Augustæ, de instrumentis Hungariam attinen-
 tibus modeste sciscitanti, thesaurus diplomati-
 cus ostensus est prorsus singularis. Etiam in
 Archivo Exc. Camerae Reg. Ungar. Aulicæ,
 quæcunque salva conscientia Præfecti, viri
 rei codicillaris domesticæ peritissimi, roganti
 exhiberi poterant, liberalitate prorsus singula-
 ri sunt exhibita. Jacent monumenta ævi me-
 dii omni auro pretiosiora, in Archivo antiquis-
 simæ urbis liberæ regiæque Soproniensis re-
 condita, quorum ego pleraque vidi notavi-
 que, precatus ex animo, ut inter eruditos
 urbis hujus cives existat mox aliquis, qui
 magistratus urbani maiori indulgentia fretus,
 captivos illos, in publicum conspectum produ-
 cat, rerum a majoribus gestarum testes locu-
 pletissimos. Nihil oculis meis occultum esse
 voluit Senatus Kesmarcensis; erant magna er-
 ga me humanitate etiam illi, quibus custodia
 copiosissimi Archivi urbis Cassoviensis deman-
 data est, nec sine grandi præda Tabularium
 urbis Posoniensis, ubi unum nonnisi alterum-

que diploma, judicum venia conspicatus sum, dereliquissem, si illi ad quos Tabularii cura proxime pertinebat, ab urbe non abfuissent longius. De collectionibus autographorum privatis nihil adferam, nec illa commemorabo diplomata originalia, quæ Universitati nostræ, ad exhibendum illa obtutui studiosæ juventutis relicta sunt: verum ingratus sim oportet, nisi insignia monumenta studii illius magni non minus quam successu felicitis celebrem, quo aliquando in rem Hungariæ diplomaticam ferebantur, sui que memoriam perennem reliquerunt, duumviri e Societate Jesu longe clarissimi, P. GABRIEL HEVENESSI, & P. STEPHANUS KAPRINAI. Utriusque manuscripta ad peculium pertinent Bibliothecæ Regiæ quam custodio, utriusque amplissima collectione in rem meam usus sum, de utriusque auctore ergo, testandi in pios illorum manes grati animi causa; atque ut præstantiam collectionum istarum, quarum per Hungariam doctam magnum nomen est, etiam alii recte æstimare discant, dicendum aliquid. Censeo autem nostratium neminem fore tam iniquum, quin ultro fateatur, Societatem Jesu de omni literarum genere in patria nostra bene omnino esse meritam; in Historiam certe domesticam, inprimis ecclesiasticam, illius studia & grandia & manifesta erant. Ab hac quippe non tantum subsidia exspectabant ad restaurandam in Regno Hungariæ religionem catholicam, verum cum lege publica Abbatiae & Præposituræ derelictæ, sustentationi scho-

larum, quibus Socios Jesu præfectos fuisse constat, addictæ essent, possetque Rex noster apollolicus, quod sæpe demonstratum inveni, ipsaque bulla Silvestrina dictat, beneficia ab uno ordine religioso transferre ad alium, haberetque *Historia diplomatica* etiam, quæ an. 1700. typis Halberstadiensibus in Fol. prodierat, incitamenti aliquid; non poterant non Patres illi momentum chartarum & diplomatum, cum in foro, tum in annalibus Regni ecclesiasticis, perspicere longe maximum. Eminentissimus *Petrus Pazmannus* ergo, pro singulari illa qua pollebat judicii maturitate, rerumque experientia, primas ædificii duxit lineas; *Inchofer*, *Hevenesfi*, *Kaprinai* cet. materialia quæ vocant congesserunt; in formam artis redegerunt illa, *Péterfi*, *Schmitth*, *Pray*, & illi etiam, qui Regni Historiam vel universam, vel periodum aliquam ejus scribere aggressi, ecclesiæ tamen fatis & juribus recensendis & defendendis potissimum intenti, ecclesiasticam potius Hungariæ Historiam, quam aliam quamlibet scripsisse censendi sunt. Sed redeo ad *Hevenessum*, Hungarum nobilem, religionis quam profitebatur non minus quam literarum amore aliquando († 1715.) flagrantem, virum doctum probumque, qui Collegium *Pazmannianum* S. J. Viennense regebat; Cardinalique *Leopoldo a Kollonits* a sacris erat confessionibus. Hic desiderio continuandi *Annales Ecclesiasticos R. H.* quos *Melch. Inchofer* Romæ 1644. non ultra annum

1060. progressus, vulgare coeperat; scripto typis expresso *a)*, populares suos invitavit & obtestatus est, ut ad continuationem operis prædicti, symbolas sibi Viennam mitterent, e libris jam editis, manuscriptis publicis privatisque, etiam traditione verosimili, unde unde conquiritas. Erant hæc prima collectionis *Hevenesianæ* initia, cujus auctori indefesso, illam dum viveret perpetuo continuanti, sine dubio omnium plurimum proderant, opportunitas loci quo degebat, & patronorum quibus gavisus erat auctoritas. Ejus etenim, ut mihi videtur, precibus & consiliis expugnatus Cardinalis *Kollonitsius*, id apud Cæsarem Leopoldum I. effecit, ut Archivum Exc. Camerae, & Libri Regii paterent sibi, descripturo illinc instrumenta, quævis, Clerum Hungariæ ejusque iura quoquo modo attinentia *b)*. *Hevenessio* quocum hæc omnia *Kollonitsius* communia esse voluit, nunc demum larga chartarum & diplomatum seges sese obtulit, unde Collectaneorum ejus magnitudo valorque inprimis æstimari debent. Enimvero præter plura volumina, quæ diplomata complectuntur e Tabulario Exc. Cam. Hung. & Libris Regiis accepta, quindecim numeravi, quibus testimonium

Car-

a) Legi illud apud *St. Kaprinai*; MSS. B. Tom. XLII. Nro. 66.

b) Decretum Camerae Aulicæ Viennensis anni 1702. ejusque Registratori Camerae Posoniensis facta intimatio, exstat inter MSS. *Hevenessii* Tom. NN. seu L. pag. 395.

Cardinalis purpurati autographon, sigillo communium subjectum est, agente sese, descripta esse eadem illa ex Archivo Exc. Camerae Regiae. Universe *Hevenessiana* Tomos XCIII. in fol. mediae & minoris molis efficiunt a.), quae in sequentes classes tres fortassis non incommode distribuero: ita quidem, ut ad primam referantur acta & documenta, quae iura, quae possessionaria appellamus, ven. Cleri R. H. inprimis Archiepiscopatus Strigoniensis, deinde Abbatiarum & Praepositarum attinent; sequantur iura & Historiam Soc. Jesu in Hungaria & Transilvania illustrantia; Unionis deinde negotium, Protestantium fata, & motus illos infestos superiorum temporum intestinos spectantia. Reliqua, quae in Tomis illis XCI. interjecta occurrunt, tanti non sunt, ut classem peculiarem sibi vindicent.

Hevenessio mortuo, omnes istae manuscriptorum ejus reliquiae, Collegio S. J. quod tunc Tyrnaviae erat cesserunt, Societate Jesu vero extincta, Universitati, quae primam Tyrnaviae sedem habuerat, postea Budam migravit, nunc vero Pestini floret, addictae sunt; sine quarum adjumento nec *Péterfi* sua Concilia, neque *Schmitth* suos Archiepiscopos & Episcopos forte conscripissent, compluraque in *Praii* Operibus passim desideraremus diplomata. Laudibus ergo *Hevenessii* Historia Hungariae, inprimis illa quae Ecclesiam

a) Disparuerunt, non liquet quando, V. & XI.

siam catholicam respicit, tamdiu personabit, quamdiu monumentum illud supererit, quod ipse industria sua sibi posuit, ære perennius.

... *Stephanus Kaprinai*, patre Croata, qui Krapina sedes suas in Hungariam transtulerat, ortus, († 27. Dec. 1786.) post *Hevenesium*, facile primum inter viros ecclesiastici ordinis catholicos locum occupat, qui apud nos ævi veteris monumenta, ad illustrandas res patrias, operose in unum congegesserunt. Destituebatur autem ille potenti ejusmodi patrocínio, quali *Hevenesius* suffultus felixque aliquando erat: at virtuti & industriæ suæ confusus, exemplo docuit, quantum vel unius viri studium pertinax conatusque indefessi valeant. Manuscriptorum ejus sylloge, quam auctor in eleemosynam, celebrandis pro anima defuncti mille missæ sacrificiis, Archiabbatiæ S. Martini in sacro monte Pannoniæ legaverat, sublato per Josephum II. Benedictinorum ordine, Bibliothecæ Regiæ Universitatis Pestanæ, numeratis e Fisco Bibliothecæ in eleemosynam quingentis illis florenis, obtigit. Complectitur illa universe **CLIV.** Tomos, ut plurimum molis mediocris. Horum **LIII.** censentur in folio, complectentes in se, præter *Istvánfi* Historiam in idioma gentilitium commode versam, cui utinam editor obtingeret aliquis! miscellanea omnis generis, Historiam Hungariæ quoquo modo attinentia, expressa & chirographa, ecclesiastica & profana, antiqua & nova. Quædam ex istis vo-

luminibus

luminibus ad *Peterfium*, *Timonem*, *Schmittium* viros clar. aliquando pertinuisse, *Kaprinaii* manus propria testata est. Reddiderunt autem saltem mihi eorundem lectionem non minus iucundam quam utilem; innumeræ quæ per illos Tomos sparsæ sunt narratiunculæ anecdotæ, e recentiori potissimum *Historia* acceptæ, nullibi obviæ: at diplomatum numero & valore, LXI illi Tomi, in forma quam in quarto appellamus, litera B. a collectore insigniti, propriaque plerumque ejus manu conscripti, permultum omnino præstant majoribus illis voluminibus. Qui proxime scopus viri indefessi, in conquirendis illis MSS fuerit, pro certo non scio a). Forte amore rerum patriæ antiquitatisque omnis captus, cum se ipsum minus facilem promptumque in scribendo sentiret, colligere fragmenta, quam illa inter se componere apte solideque maluit. Est mihi namque ex *Historia* ejus *diplomatica temporibus Matthiæ Corv. Regis*, quam scribere vir summe industrius incepit, tantum non verisimile, *Kaprinaium*, dum architectum *Historiæ pragmaticæ* agere vel non auderet vel non posset, anecdota potius, auctorumque & diplomatum loca cumulasse, in litoreque quasi meticuloſe substituisse, altiora non ausum petere. Est porro *Diplomatarium* ejus elemento B. distinctum, profanum potius

a) Quæ *Horanyi V. Cl. In Memoria Hung.* de eodem commemorat, me non fugiunt.

potius quam sacrum. Permulta in eodem occurrunt ex autographis exscripta, deliciis illis comparanda, quæ ipso usu desiderium irritant accenduntque. Cassovienſe certe Archivum, monumentorum veterum bene dives, integrum fere in ſua ſcripta tranſtulit. Idem de Bartphenſi, Eperieſienſi, Szatthmarienſi & Nagybanyenſi dicendum habeo. Exſcripſit etiam ex Archivis illuſtr. & antiquiſſimarum familiarum, Szaraianæ, Csakianæ, Soosianæ cet. præſantiſſima quæque diplomata; ditavit illum ſociosque non paucis, chartarum veterum aliquando non minus dives quam cupidus & intelligens centurio emeritus *Samuel Székely de Doba a)*; in Conventu deinde candidiſſimi ordinis Præmonſtratenſium Leleſzienſi, cujus annales promittebat, admiſſionis prorſus erat intimæ; promiſſo dato, fore, ut quæ ibidem deſcripſiſſet, oculos profanorum ſeu ſecularium nunquam ſubirent. Hoc inter cetera notandus eſt vir omnium quæ patriam ſpectant longe curioſiſſimus; quod innumeris quas undequaue corraſit ævi mediſ literis, locum unde acceptæ ſint, non ſemper adſcripſerit; neque an autographon coram ſe habuerit, interdum vel levi aliquo ſigno teſtatus ſit. Idem diplomata & chartas ex operibus typo expreſſis adeo excerpiſit, e. c. *Lucio, Sommersbergio* cet. quin librorum aucto-

a) Vid. Ign. Comitſ a Batthyán *Leges eccleſ. Regni Hung.* in præfat.

auctorumve nomina indigitaverit. Valet hoc inprimis de illo voluminum novo ordine, itidem in forma quam in quarto appellant, qui literam C. præferret, in quo excerpta e Regestis Vaticanis a), primam & præcipuam omnino partem constituunt. Omnium istorum MSS. pars melior, cum ante hos annos XIII. & quod excurrit, in Tabulario Exc. Cameræ R. H. A. jaceret deposita, inspecta est a *Martino Georg. Kovachich* V. Cl. indeque illi propositum scribendi *Vestigia Comitiorum apud Hungaros* primum enatum est: etiam *Praius* celeberr. R. H. Historiographus, in novissima sua *Historia Regum Hungariæ*, illis usus est; quæ mihi etiam quantum proderant, non uno sed pluribus locis ultro confessus sum.

Talibus igitur subsidiis quam hactenus enarravi instructus, ad novam libri, quam jam exhibeo, recensionem me contuli, quæ quidem quacunque demum sui parte diligentius inspiciatur, ita prodit priore auctior atque emendatior, ut novum quodammodo opus suo jure dici debeat. Nec titulum libri adeo intactum reliqui, qui novæ huicce editioni præpositus, & modestior est, & argumento

a) *Martinus Cseles* e S. J. Hungarus, dum pœnitentiarium in Urbe ageret, eadem Jesuitis Hungaris suppeditaverat. Illustrant illa multum Historiam rei utriusque cum publicæ tum vero præprimis sacre illorum temporum, e quibus velut e naufragio, perpaucata tantum nobis monumenta servata sunt.

libri etiam accommodatior. Illustrabunt illum egregie spero: adjectæ Tabulæ æneæ, quarum primam *Praius* aliquando tironum in gratiam fieri curaverat: intermediæ, quas ne quid vacuum relinquerem pag. 336. interpretatus sum, nunc demum gravibus meis expensis æri inscriptæ sunt: postremas e prima libri editione retinui, mutato in sigillo Mariæ Reginae, hujus habitu, juxta ectypon diligentissime adumbratum, quod *Josephus Car. Eder*, vir incomparabilis, mihiq; & meis studiis addictissimus, offerre mihi sua sponte voluit. Conatus sum autem tabulis quæ intermediæ occurrunt, primum quidem ostendere, quomodo scriptura nostra diplomatica continuo magis magisque degeneraverit, usque dum characterem illum indueret, quem Tab. III. nrus I. repræsentat; deinde literas sub numero prædicto prostantes, integras sculptoris stylo exhibendas esse censui; tum quod hujusmodi scriptura regnans fuerit illo tempore, e quo nobis maxima chartarum copia superest, tum quod lectoribus & auditoribus specimen aliquod exhibendum esse putaverim, quo se legendo ævi veteris monumenta exercerent; quod quidem in priori editione, ingenti lectorum incommodo, neglectum a me fuisse, jam pridem, quin prius malo mederi potuerim, observaveram. Autographon istarum literarum, in Bibliotheca Pestana, juxta cum Nris 4. & 5. Tab. II. nec non Nris 2. & 3. Tab. III. jacet repositum.

Diplomatarium appendicis instar adjunctum, nunc numeris XXXV. constat, absoluebatur illud antea exemplis XII. In illo disponendo rationem temporis habui, non systematis rigorosi, conatusque sum describendo formulas illas, tironibus gustum rei diplomaticæ meliorem instillare, eosdemque ad lectionem monumentorum hujusmodi plurimum allicere; neque enim formularum quas attuli quæpiam talis est, quæ se vel argumento quod tractat, vel rebus tractationi argumenti quomodocunque interjectis, magnopere non commendaret. Id unum dolere satis non possum, illam quæ agmen ducit, non meis curis e protographo desumptam esse.

Operæ & oleo ergo in libro perficiendo perpoliendoque non peperci, quem cum ultra compendii fines extendere nollem, brevitati studui, ita tamen ut paucis interdum plura dicere contenderem. Etiam stylo cultiori tantam quantam potui impendi operam: sed longius tractando, diplomata, fieri fortasse potuit, ut ipse latine dedidicerim. Errorum certe, quorum veniam iterum iterumque peto, expers libellus iste non est; quorum pars aliqua chalcographo & typothetæ debebunt tribui; quibus, etsi certatim lectori mihi que complacere studuerint, omnem attamen lapsum declinare, me ipso ope-

operas illorum quam diligentissime inspiciente & dirigente, non fuit possibile. a)

Quæ singillatim adhuc monenda supersunt, monere suo loco non neglexi; qui ad scribendum omnino inductus sum, non lucri qualiscunque spe incerta, sed patriæ amore, verique studio. Scrib. Pestini, in Bibliotheca Reg. Scient. Universitatis, die 3. Augusti, MDCCCII.

a) Pag. 20. pro *latiatue*, *latiatuc*; pro *adarnut* *Adamut* legi debet. — Pronunciatione præpostera factum est, ut pag. 179. & 198. *Fennena* Reginae nomen, *Fennena* scriptum sit. — Pag. 220. novi Op. dipl. Tomi VIII. §. 189. pro *Spho* 139. rescribatur necesse est. — Etiam præstantissimi Operis perill. *de Martensii*, præter Supplementorum tomos duos, non V. (ut pag. 231. habet) verum VII. jam prostant volumina.



PROLEGOMENA.

D E

DIPLOMATIBUS, ET ARTE DIPLO-
MATICA GENERATIM.

SECTION I.

DE DIPLOMATIBUS UNIVERSE.

§. I.

Quo longius in historia hominum populo-^{Origo Diplo-}
rumque, qui vel nunc per orbem terrarum^{matum.}
florent vel olim floruerunt, regredimur, eo
minorem atque minorem continuo reperimus
monumentorum scriptorum, quorum largissimo
proventu Europæ plerique populi iamiam labo-
rare premique incipiunt *a)*, copiam; donec
illa tandem, inquirentibus in ultimam gentium
originem & historiam, sive ob artem scribendi
universe nondum inventam, sive ob eandem
populo alicui nondum cognitam, dispareant
penitus *b)*. Hoc illud erat tempus *mythicum*,
plerisque omnibus populis aliquando com-
mune *c)*, quo magnarum rerum memoria, car-
mine & narratione *d)* ad posteros propagaba-
tur, dextraque data & accepta fortissimum erat
jurium & obligationum vinculum. Interve-
niente subinde meliori hominum vitæque cul-
tura, cognitisque literarum usu & secretis,
consuetudini carmine & narratione rudi famam

ad nepotes transmittendi, *annales scripti* succedere, *diplomataque* condi cœperunt solemnia.

- a) In provinciis regis Prussiæ, præter clarissimos librorum auctores & artium magistros, exercitus illorum, qui describendo, e. c. in judiciis, stipendia annua (Flor. septiesdecies centenorum millium) merent, est 25000; ut proinde de singulis 280. incolis unus censeatur amanuensis, seu, stylo ævi intermedi, *atramentarius*. Chartæ 12500 majoribus scapis (Riefz) illis opus est, (BIESTER'S *Berlinische Blätter* 1797. Nro. 13.) quales typographi Franco-galli nunc 2,800,000. (?) anno quolibet in bonos pravosque usus prelo subdunt. (*Deutsche Reichs-Staatszeitung* 1798. Nro. VIII.)
- b) Juvabit hic comparisonem inter fœcunditatem Hungariæ doctæ præsentis, & sterilitatem antiquæ, sæculis XI. XII. XIII. post C. N. instituere.
- c) Conf. Illustris CHR. G. HEYNE, *de fide historica ætatis mythicæ*; in *Commentationibus Societatis Regiæ Scientiarum Göttingensis*. Vol. XIV. pag. 107. & seqq.
- d) „ Si tam nobilissima gens Hungariæ, primordia
 „ suæ generationis & fortia quæque facta sua ex
 „ falsis fabulis rusticorum, vel a garrulo cantu jo-
 „ culatorum, quasi somniando audiret, valde inde-
 „ corum & satis indecens esset.“ *Anonymus B. R. Notarius, in prologo.*

§. 2.

Definitio.

Diplomata (ita illorum ambitum definiente illustri quondam viro CHRISTOPHORO GATTERER) sunt formulæ scriptæ jurium & obligationum, vel rerum etiam in factis positarum, solemnibus verbis conceptæ, signisque solemnibus corroboratæ. Ex hac Diplomatis notione adæquata omnino & frugifera sequentia profluunt axiomata:

1.) Tot possunt esse diplomatum formæ externæ, quot formularum scriptarum externæ cogitari possunt species.

2.) Non sola privilegii a principe expectandi concessio, argumentum unicum constituit diplomatum.

3.) Neque diplomata universe a solis tantum proficiscuntur territoriorum principibus; cum

4.) Præter principes, alii quoque e. c. Capitula, & privati quoque cives e. c. condendo testamenta, cet. auctores esse possunt diplomatum.

5.) Sunt diplomata, quæ nudam rei alicujus gestæ historiam complectuntur, e. c. literæ statutoriæ in Hungaria.

6.) Formula scripta qualiscunque inter diplomata referenda non est, nisi eadem solemnibus verbis concepta, signisque solemnibus roborata sit.

§. 3.

In *Solemnibus*, id est certis, lege vel consuetudine probatis, verbis & ritibus observandis, quibus omissis, aut temere mutatis, nullus actus civilis valebat, Romani veteres imprimis copiosi non minus quam diligentes erant. Hujusmodi ritus fuere: auris in testationibus attrectatio, in domini translatione æs & libra, in nuptiis aqua & ignis, in repudiis clavium ademptio. Formularum autem & verborum solemnium usus inter Quirites usque adeo longe lateque patuit, ut nulla vitæ pars, neque publicis neque privatis, neque forensibus neque domesticis in rebus, illis vacaret.

Solemnia.

ret a). Horum solemnium similia illa sunt, sine quibus diploma ævi intermedi — ævum enim duntaxat intermedium in arte diplomatica respicimus — validum & legitimum esse nequit, iterum a lege vel consuetudine populi, a quo diploma aliquod ad nos transmissum est, repetenda. Accensebantur autem illis: formulæ bene precandi, honorum tituli, subscriptiones nominum, cruces, chrismon, sigillum, literarum vel imaginum in margine diplomatum facta dissectio, investituræ symbola, nodi appendiculis innexi, cet. *Hæc tamen nec in quolibet diplomate singula, neque omnino eadem in chartis omnium gentium quæsieris.* Sufficit omni tempore & ubique illorum quædam viguisse, a quibus diplomata robur & auctoritatem suam accipere debebant, ita jubente vel expressa lege, vel antiqua consuetudine.

a) Conf. BERN. BRISSONII *de Formulis, & solemnibus populi Romani verbis Libb. VIII.* Francof. 1592. Fol.

§. 4.

Diplomatum
variæ species
& nomina.

A consuetudine veterum formandi diplomata in modum tabellarum duplicium, eadem nomen græcum trahunt, quod civitate romana donatum, ea potestate qua in arte quam tractamus adhibetur, apud auctores romanos rarius occurrit, subinde autem ævo intermedio prorsus exolevit, neque in contextu diplomatum ipso uspiam adhuc observatum est. Alternant ibidem *chartæ, paginæ, testamenti, instrumenti, literarum patentium, literarum privilegialium* a) cet. nomina; sunt, quæ interdum pro ratione argumenti *notitiæ* appellantur, *præcepta*,
au.

auctoritatis praecepta, placita, donationes, series donationis, auctoritatis regiae testimonium, Sanctio pragmatica, (WAGNER *Analecra Scep.* I. 263.) *decretum, intimatum, cet.* A sigillis *bullarum* cognomen existit; occurrit etiam *cyrographorum* diserta mentio, ut reliquas diplomatum species, harumque denominationes, quas omnium diligentissime PP. Benedictini, in opere diplomatico (*Neues Lebrgebäude der Diplomatie* Tom. I.) mox collaudando, enuclearunt distinxeruntque, taceam.

2) A Szec. XIV. regum Hungariae literis donationis communiter haec formula subiecta est: „Harum „nostrarum vigore & testimonio *literarum* median- „te, quas in formam *privilegii* redigi faciemus, „dum nobis in specie fuerint reportatae.“ Quod inter *litteras* (*patentes* communiter dictas) & *privilegium* regis discrimen interfit, infra e doctrinae de sigillis apparebit.

*) Andreæ I. Regis fundationales literæ Abbatis de Tyhon an. 1055. *chartalis testamenti* nomen gerunt. Legi Mariæ Reginae an. 1587. diploma, quod *carmen* nuncupatur. — Ferd. II. in diplomate confirmationis privilegiorum urbis Szokolczenfis 1624. inter cetera ita: „exhibuerunt nobis — Alberti „Regis — literas (1459) *cum iusti* nuncupatas“ a primo videlicet *literarum* commate: „cum *iusti* „pro iniustis — non debeant quoquo modo im- „pediri cet. conf. Decr. 1609. art. 75. §. 20.

§. 5.

Usus diplomatum sine dubio inventioni Diplomatum antiquitas.
literarum ævo par est. Quæ Moses suis libris
intexuit diplomata, vetustiora sunt omnibus il-
lis, quæ vel auctorum antiquorum libris inser-
ta, vel in tabulariorum carceribus inclusa su-
per sunt. Neque Græcis instrumentorum fides

ususque fuit incognitus, utpote quorum tabulas solemnes Thucydides, Xenophon, Demosthenes & alii, interdum *ex assè* operibus suis intulerunt, sæpissime vero *summatim* tantum de *illarum* argumento commentati sunt *a*). Inter Romanos tandem, quamvis Deorum templa foederum ac legum tabulis custodiendis patuisse constat: ætas tamen, quæ vocatur media, diplomatum numero & varietate romanam priscam longissime superare debuit; aucto inter barbaros, Imperii romani victores, in immensum schedarum inprimis privatarum numero, cum ob legum in casibus obviis defectum, tum ob Christianorum in suos sacerdotes copiosam liberalitatem literarum testimonio comprehensam, monachorumque scribendi & conservandi codicillos istos industriam *b*). Romani cives in literis rarius contraxisse videntur, quod ritibus potius solemnibus, quod aliis spondebant, sibi vicissim ab iisdem stipulati sunt.

a) De re diplomatica Ebræorum, Græcorum & priscorum Romanorum universe quædam nec indocte præcepit illustris quondam SCIPIO MAFFEI in *Istoria Diplomatica, che serve d' introduzione all' arte critica in tal materia*. In Mantova, 1727. 4. Specimen vero diplomatarii antiquitatis græcæ. romanæque adornare conatus est BARBEYRAC in opere: *Histoire des anciens Traités repandus dans les auteurs Grecs & Latins & autres monumens de l' antiquité, depuis les tems les plus reculez, jusques à l' Empereur Charle magne*, P. I. II. Amsterdam 1739. Fol. Exstat illud inter supplementa notissimi operis: *Corps universel diplomatique du Droit des Gens*, par I. DUMONT.

b) Conf. I. PETRI LUDEWIGII *Reliquiæ manuscriptorum omnis ævi diplomatum cet.* Francof. & Lips. 1720. 8. in præfat. p. 7. seqq.

§. 6.

In papyro ægyptiaca vel membrana scri- ^{Causa interi-}
ptum diploma nullum adhuc produci potuit, ^{tus multorum}
quod sæculo post C. N. quinto esset antiqui- ^{diplomatum.}
us. *a*) Italia reliquiarum hujusmodi, (quarum at-
tamen nullæ, vel ob materiæ, in qua configna-
tæ sunt, fragilitatem, charta utpote Nilotica,
vetustatis tabidæ insidias plane evaserunt,) ma-
ter & conservatrix est; cum in Galliis nullæ
sint inventæ literæ, a prima manu profectæ,
quæ sæculum VI. ætate antecederent *b*). In
regni Daniæ Tabulariis antiquissimum protogra-
phon (latinum, SCHÖNEMANN. *System der Diploma-
tik* I. 286.) est anni 1140. *c*) quo non minus,
quam omnibus reliquis Hungariæ chartis, ve-
tustius diploma illud est, quod S. Stephanus
Rex Abbatæ S. Martini Benedictinorum in
monte Pannoniæ concessisse creditur, & quod
ab injuriis temporis & fortunæ intactum, in
Tabulario Excelsæ Cameræ, quod Budæ est,
inclusum vitro conservabatur hætenus. Tem-
poris edacitas *d*), hominumque mox socordia *e*),
mox invidorum malitia, iniquorumque pos-
sessorum alieni patrimonii justus metus, Martis
deinde Vulcanique furores *f*), ut taceam im-
piam illorum barbariem, qui annosa hujusmo-
di antiquitatis monumenta, quisquiliarum loco
habentes, ad pipër condendum, librosque in-
volvendos sæpe adhibuerunt, rei diplomaticæ
in Hungaria quoque adeo fuerunt perniciofa,
ut e sæculis XI. & XII. paucissimas habeamus
chartas (WERBÖCZII Tripart. P. II. Tit. 14. §.
9.) nobis a prima manu reliquas. Crescit
apud nos quoque illarum numerus, quo pro-

pius ad ætatem nostram accedimus. Sigismundo rege, nullus Hungariæ regum, ad Ferdinandum I. in edendis diplomatibus & privilegiis fuit copiosior g).

- a) Vetustissimum omnium, quæ quidem in manus Mabillonii venerant, authenticum instrumentum confectum est Consulatu Theodosii junioris & Albini, id est anno 444. in gratiam Sisinnii, cui res a Tranquillo extortæ fuerant, sed per Pyrrhum tribunum jussu Imperatoris (commonitorium) restitutæ. MABILLON. *Iter Italicum* Paris 1687. 4. p. 24. conf. MAFFEI l. c. p. 52. & 130. *seqq.*
- b) *Neues Lehrgebäude der Diplomatik Bd. I. §. 120. 563.* E naufragio attamen, quod per inundationem Imperii romani per barbaros inde a sæc. V. res literaria & etiam codicillaris passa est, plura omnino fragmina servata, atque ad nos dimissa fuissent „se „ tutto cio che spettava a Gentilesimo, & della „ falsa religione facea memoria, non fosse stato „ da Cristiani o come inutile gittato, o come „ dannoso distrutto “ MAFFEI l. c. p. 53. *Diplomatum venerandis istis reliquiis, vix ullus codicum, qui ex ultima antiquitate adhuc supersunt, est antiquior, (N. L. d. Dipl. II. §. 136, & seqq.) nisi volumina papyracea illa in censum vocemus, quæ e ruderibus Herculani & Pompejorum eruta, parteque aliqua jam etiam evoluta sunt. (Allg. Lit. Zeitung. 1796. Nro. 43.) Consumsit ergo tempus edax rerum, Prophetarum & Apostolorum non minus, quam Græcorum Romanorumque aureæ ætatis autographa. Inter Codices saltem hebræos, qui nostra memoria curis KENNICOTTI, & sociorum opera, per omnem Europam exquisiti sunt, inventus nullus est, qui sæculo post C. N. decimo esset antiquior. I. D. MICHAELIS Orient. und Exeg. Bibliothek. Th. XVIII. S. 100.*
- c) SUHM'S *Geschichte von Dänemark Bd. V. Kopenhagen 1792. Vergl. Götting. Anzeigen 1793. St. 169.*
- d) Conf. I. G. HEYNE de interitu operum, cum antiquæ tum senioris artis, quæ Constantinopoli fuisset memorantur, ejusque causis, commentatio II. in *Commentationibus Soc. Reg. Scient. Götting. Vol. XII.*
- e) Sigis-

- e) Sigismundus diplomate 1599. urbis Kesmarcensis literas immunitatis, a Bela IV. & Stephano V. regibus concessas, confirmavit: „ quamvis eadem, „ *propter malam & negligentem earum conservationem,* „ in ugillo & serie disruptæ ac corrosæ habeantur: „ tamen easdem diligenti examinatione præhabita, „ veras “ &c. — Anno 1757. Comiti Leop. Nádasdi a rege in commissis datum erat, ut inspiceret Tabularium apud Præmonstratenses Jázovienſe, ubi stillicidium & notarium certatum literas regnicolarum corrumpere ferebatur.
- f) Archivum Kesmarcensium Hussitæ 1455. diripuerunt, Leutfoventium vero fatale incendium 1550. delevit penitus.
- g) Elisabetha vidua Alberti R. H. an. 1440. Transilvanos ad fidem filio Ladislao conservandam argumento hocce stimulavit: „ cum vix aut minime „ aliqua domus cujuscunque reputationis in dicto „ regno Hung. reperiri posset, quæ non senserit „ ejusdem genitoris nostri (Sigismundi) largissimam beneficentiam, & amplissimam gratiosissimamque remunerationem. “

§. 7.

Repositoria diplomatum ætate intermedia, Tabularia æ-
ad sæc. fere XIII. ubique fere sola fuerunt tatis intermedia
monasteria & templà Deo & sanctis tutelari-
bus sacra diz. Quæ, cum asyla essent superiorum
temporum, mœnibus non minus quam dirarum
& execrationum minis, adversus quamcunque
vim & impressionem fortissime munita, commodissimum quoque ac maxime securum thesauris
illis literariis hospitium præbere potuisse manifestum est. Accedebat magna, quam omnis
ætas christiana de integritate fidei Sacerdotum,
& puritate conscientiarum illorum habuit, opinio,
quæ quidem tanta erat, ut & testes in propria
causa agere, nec ad jusjurandum emittendum
obligarentur monachi; profanorum deinde legendi

gendi & scribendi ignorantia, quæ effecit, ut privati superioris ævi homines non facile alibi, quam coram sacerdotibus contraherent. Hungaria, ab antiquissimis, quorum annales meminerunt, temporibus, complura sacra ejusmodi loca, olim sacris interdum virginibus habitata, *b)* quæ *credibilia* appellamus, censuit, quæ adhuc usque nobilium vicinorum *c)* chartas custodiunt, instructa sigillo autentico, cujus jus perpetuo habuerunt, ex usu & lege regni publica. Latet vero in Europæ & Hungariæ quoque tabulariis publicis privatisque infinitus adhuc diplomatum ineditorum numerus, quæ ex tenebris & pulvere, tinearumque ac blattarum societate in lucem protracta, jus ævi prisce egregie sine dubio illustrabunt, historiamque plurium civitatum Europæ, novam expectare jubent faciem.

a) Archivum in regno Galliæ publicum ante sæc. XIII. nullum erat, imperiale sub Maximiliano I. primum exstitit. Sub Sigismundo, (Vid. Registrum de Thurocz anni 1391. in fine) Matthia Corvino, & Wladislao II. in *ædibus tavernicalibus* (Camera regia) diplomata publica privataque, annales adeo regni fuisse reconditos, diplomatum fide certum est. De *libris regis* Exc. Cancellariæ Hung. qui sub Ferdinando I. scribi cœperunt, nihil attinet hic loci dicere. — Archivum Exc. Cameræ regis aulicæ, diplomatum ævi intermedi longè ditissimum, quod itidem sub Ferdinando I. dirutis per Turcas ædibus Tavernicalibus, restauratum est, inter regis peculia censetur, diversumque est ab archivo regni seu regnicolarum, quod sub regimine Caroli VI. Imp. & Regis denuo colligi cœpit.

b) Rex Wladislaus II. anno 1511. *Conventui sacrarum Virginum Ordinis Præmonstr.* in oppido Vászárhely usum sigilli autentici concessit, quo possint literas „fessionales, procuratorias — communire“ Privilegium

legium istud prostat in Bibliotheca R. Universitatis Pestanæ inter MSS. P. KAPRINAI Tom. III. B. Nro. 52.

- c) *Fassions* enim — ut diplomata loquuntur — in locis credibilibus remotioribus peractæ, erant invalidæ, quod, si hic locus esset, exemplis pluribus docere possem.

§. 8.

Diplomatum alia primam manum referunt, Diplomata signis solemnibus instructa, (*autographa*, *proto-autographa*, *grapha*, *originalia*) alia secundis curis ex his *apographa*. descripta sunt, (*apographa*, *copiæ*, *exempla*, *antigrapha* scilicet *δικαιώματα*, *ιστοτυποι* cet.) idque vel publica auctoritate, vel fide tantum privata. Illa *copiæ vidimatæ*, *vidimus*, *inspeximus*, *copiæ authenticæ*, *transumta* appellantur: hæc *copiæ* duntaxat *vagæ* sunt atque *simplices*, *par*, *paria* dictæ. Ad Transumta pertinent diplomata, quæ a sæculo potissimum XII. — nam mos iste jam etiam Romanis Imperatoribus prisca, a Tiberio inde frequentatus erat a) — secundis regum vel successorum literis vel summatim nonnisi, (*sensualiter* hoc fieri dicebant veteres) vel integra & verbatim inferuntur b), more, ad fraudes olim committendas & occultandas, inprimis idoneo c). Scilicet priusquam legibus, inprimis scriptis, mutua principum ad suos ipsorum subditos ratio, in pluribus Europæ regnis fuisset undequaque diligenter definita, id egerunt, qui prius jam privilegiis & donationibus gavisi erant, ut regis mortui successor, privilegia sibi ab antecessoribus collata renovaret confirmaretque; ne in dubium vocari posset vel novi principis ad observanda promissa decessorum obligatio, vel vetustiorum
lite-

literarum sincera veritas. Contigit autem superiori ævo, in Anglia & alibi etiam, sæpenumero, ut Principes, quo Fiscum novis redditibus ditarent *d)*, subditis suis necessitatem impetrandi privilegiorum confirmationem imposuerint. Docte, ut solebat, differuit peculiari commentatione, *de Diplomatribus confirmationis*, & horum variis formis ac generibus, Christoph. GATTERER in *novis Commentariis Soc. R. Scient. Goetting.* Tom. VII. an. 1777.

- a) „ Natura benevolentissimus (Titus), cum ex instituto Tiberii omnes dehinc Cæsares, beneficia „ a superioribus concessa principibus, aliter rata „ non haberent, quam si eadem iisdem & ipsi „ dedissent, primus præterita omnia uno confirmavit edicto, nec a se peti passus est. “ Suet. in *Tito* c. 8.
- b) Matthias Corvinus anno 1464. viginti circiter diplomata, urbem Posoniensem attinentia, quorum vetustissimum ab Andrea III. 1291. 4. Nonas Dec. concessum erat, rogatus a civibus excerptis, excerpta confirmavit „ decernentes — ut ubicunque „ præfens privilegium aureæ bullæ munimine consignatum in judiciis vel extra — exhibitum fuerit, nunquam ad exhibenda originalia — committi possit & cogi valeant. “ Iidem cives rogarunt Wladislaum II. ut literas eorum privilegiales — quarum complures prodixerant — „ ratas „ gratas & acceptas habere, ac quatuor ex eis, „ unas videlicet Domini Matthiæ regis, tres vero „ quondam Ludovici regis præsentibus literis & „ privilegiis nostris *verbaliter* inferi & inscribi „ facere, ex aliis autem — articulos & contentias excerptere, excerptosque sub compendio „ literis nostris privilegialibus inferi & inscribi „ facere, easdemque — innovantes — nostro „ dignaremur privilegio confirmare. “ Annuit hinc Posonienfium precibus indulgentissimus rex an. 1498.
- c) Confirmabant sæpenumero Principes literas, quæ in se complectebantur res ridiculas & prorsus

fus incredibiles, decepti cum suis Cancellariis simplicitate & credulitate sui sæculi. Ita post Henricum IV. & Rudolphum I. Fridericus III. Imperator privilegia Julii Cæsaris & Neronis, quibus Austriam aliquando ornavisse credebantur, anno 1455. confirmavit, quamquam (ut Petrarcha, de illis sententiam dicere jussus, in epistola sua ad Carolum IV. Imp. scribit,) totidem mendacia, quot verba habeant. Vide P. LAMBECHII *Commentar. de Bibliotheca Cæs. Vindob.* curis ADAMI KOLLÁR Lib. II. p. 884. & seqq. Diploma confirmationis ipsum habet LÜNIG. *Teutsches Reichsarchiv.* Part. Special. Continuat. I. Abth. IV. Abf. IV. pag. 55. Commenta hujusmodi diplomatica in Hungaria non minori numero, quam alibi, sunt obvia.

- d) *Neues Lehrgebäude der Diplomatie B!.* I. §. 196. — Fuere ætate media Principes, qui ære, quod e literarum confirmatione redibat dotulitium uxoribus suis constituebant, atque ob immodica id genus vendigalia, a summis pontificibus metu infamiae coerciti sunt. — Vid. Op. cit. Tom. VI. §. 369.

§. 9.

Ejusdem diplomatis plura interdum autographa exarabantur, quod e. c. in pacis foederibus, & contractibus privatorum describendis, hodieque fieri latet neminem. Plura hujusmodi specimina autographa chartæ *paricla* seu *paricula* veteribus dicebantur a), confectæ majoris securitatis causa, quotiescunque plurium eandem chartam retinere intererat. Hinc sine dubio celeberrimum illud Andreæ II. Regis Hungariæ Decretum, septies descriptum, atque toties aurea bulla roboratum est b). Plura bullæ aureæ Caroli IV. Imp. anni 1356. exempla protographa etiamnum supersunt. Quod vero de Chartæ libertatis Henrici II. Regis Angliæ pluribus exemplis, & horum celeri interitu legitur, singulare propemodum est,

atten-

attentione in re diplomatica plus iusto credulorum non indignum: HUME *Geschichte von England*. T. I. p. 208.

- a) *Literæ Nobilium Hung.* sic dictæ *fassionales*, chartis pariclis accenseri debent, utpote quarum exemplum authenticum unum (*paria*) in *Sacristia* seu conservatorio ecclesiarum capitularium & conventualium *more solito* reponebatur olim, & nunc etiam reponitur, alterum autem paciscentibus redditur. Illinc ad sic dictas *requisitorias* regis vel iudicum regni majorum seu ordinariorum, quoties necesse est, e. c. si incendio (ignis voragine) chartæ privatorum consumptæ sint, transumpta exhibentur, cavendo, prout id formula in requisitoriis a sæc. XIV. fere monet: „*ne fraus, vel dolus in hac parte, eveniat aliqualis.*“ In apographo 1192. hanc legi clausulam: „hujus igitur causæ definitio facta est, Veszpremi & literarum apicibus corroborata, & *paginae præsentis dimidietas* (cirographum) commendata est in *Comoram* (cameram) Veszpr. Ecclesiæ.“
- b) „Et ut hæc nostra tam concessio, (verba sunt Decreti 1222. art. 31.) quam ordinatio sit nostris nostrorumque successorum temporibus in perpetuum valitura, eam conscribi fecimus in *septem paria literarum*, & aureo nostro sigillo roborari. Ita quod unum par mittatur Domino Papæ, & ipse in regeſto suo scribi faciat; secundum penes hospitale, tertium penes templum, quartum apud Regem, quintum in capitulo Strigoniensi, sextum in Colocensi, septimum apud Palatinum, qui pro tempore fuerit, reservetur.“

§. 10.

Cirographa.

Speciem chartarum pariclarum *Cirographa* (Kirographa, Cyrographa) constituunt, quæ sunt protographa in eadem membrana vel papyro bis pluriesve descripta, forficibusque ita a se invicem dissecta, ut sectione facta per medias

medias alphabeti literas, verba, vel imagines, (e. e. crucifixum *a*) quæ inter bina exempla descriptæ erant, ex harum reliquiis in specimine uno appareat, quantum in altero restare debeat. Cirographa ad lineam rectam facta, chartæ *partitæ* audiunt, quibus *dentatæ* opponuntur, quarum sectionis forma ex ipso nomine intelligitur. Si chartæ ita dissectæ, collatione invicem facta, apte componi poterant, idem robur habebant, quod aliis a sigillo accedebat. Non mirabimur ergo cirographa sigillis destituta, qualia ante sæc. XII. potissimum inter Anglo Saxones in usu erant, immo ad hoc usque tempus, ad fidem privatorum pactis faciendam, ab Anglis Americæque borealis civibus passim retinentur *b*); neque amplius sigilla ad omnium omnino diplomatum solemnitatem postulabimus. In Hungaria illorum usus neque incognitus, neque infrequens aliquando fuit, quod ex pluribus Capitulorum sæc. XIV. & XV. instrumentis, quibus pacta & conventiones privatorum continentur, & quorum ipse plura in autographo vidi, colligo. Sigillis omnia munita sunt. Formula cirographica fere talis est: „ in cuius rei testimonium perpetuamque „ firmitatem præsentibus contulimus, sigilli nostri „ authentici & pendentis munimine roboratas, „ ac *alphabeto intercisas* “ vel „ *per modum alphabeti intercisas*. “ Ab hac formula non multum discrepat illa, qua Belæ III. privilegium absolvitur: „ Anno ab incarnatione M. C. octogesimo primo *hoc cyrographum factum* est a P. „ Ultrasilvano Episcopo. “ SPIESZ *archivische Nebenarbeiten* P. I. p. 141. In scidis ærarii regii (Schedis bancalibus) signandis, eandem

Tab. III.
Nro. I.

rationem retineri, nostratium quisque meminit.

a) *Neues Lehrgebäude der Diplomatie*. Tab. I.

b) SCHLÜZER'S *Staatsanzeigen*. Bd. XVI. S. 117. 18.

§. II.

Forma diplomatum varia.

Quoad formam, alia diplomata *tabularum*, seu *literarum patentium*, interdum vix picto quo luditur folio majorum; alia, præcipue forensia, *voluminum a)* (rotulorum), ad plurium pedum longitudinem sæpe protensorum; alia, inprimis recentioris ævi, *codicillorum* habent speciem. Quam plurima ætatis mediæ instrumenta literæ patentes sunt. Codicillorum formam habent Decreta Regum Hungariæ, quæ inde a sæc. XIV. Comitibus Regni recedentibus, sigillo, & serius subscriptione etiam Regis communita, Regni Ordinibus ad sua quibusque loca, saltem ad annosque 1765. missa sunt. Eadem forma diplomatum est, quibus plurium privilegiorum (e. c. Archiepiscopatus Strigonienfis 1465. urbis Posonienfis 1464. & 1498. Saxonum Transilv. 1493. & 1552.) inest confirmatio. *Chartularia b)*, *Diplomataria*, *Pantochartæ* (Panchartæ), in Germania circa finem sæc. XIII. alibi vero jam a X. inde sæc. scribi cœperunt. Communiter eadem *per modum libelli* confecta sunt, solentque ad modum exemplorum, in *authentica* & *vaga*, seu *incerta*, dividi.

a) Prolixius diploma Mabillonius nullum vidit Benedicti III. diplomate, quod in papyro ægyptiaca scriptum (membranea enim nulla vidit insolitæ magnitudinis) latitudine duorum pedum erat, altitudo vero porrigebatur ad pedes unum & viginti.

MABIL-

MABILLON. I. c. p. 40. 436. — In Bibliotheca Universitatis Regiæ Hungariæ conservatur Capituli Strigoniensis an. 1575. instrumentum, in charta vulgari nostra descriptum, 18. philyris conglutinatis constans, altum pedes 15½. Excrescebant autem, cum volumina tum diplomata etiam veterum in charta conscripta facile in tantam molem, quod ut plurimum non fuerint *ονισογραφα*.

- b) Matthias Corv. 1486. rogatus ab Osvaldo Episcopo, duo Ecclesiæ Zagrabiensis confirmavit instrumentorum literalium volumina (chartularia) apographa, quorum unum alterius, ob vetustatem jam attriti, exemplum fuerat. HEVENESSI MSS. Tom. E. p. 125. In Hungaria libri hujusmodi, quos Germani *copiales* nuncupant, vix sæculo XIV. antiquiores sunt.

§. 12.

Ratione argumenti, alia diplomata sunt *ecclesiastica*, alia *civilia*. *Publicis privata* opponuntur, *actis documenta*. Si diploma publicum civitates plures attineat, *Tractatus*; si unam duntaxat respiciat, *Constitutio* appellabitur. *Actis* res in facto positæ contineantur, *Documentis* vero inest iurium & obligationum declaratio.

Argumentum
multiplex.

§. 13.

Profunt diplomata I.) Historiæ & plenius *usus Diplomatum* I.) *historia* & curatius cognoscendæ. Enimvero præter bella & prodigia, & beneficia viris locisque sacris collata, omnia fere alia, quæ historiam & jucundam & utilem reddunt, in scriptoribus ætatis plumbeæ (mediæ) desideras. E diplomatibus contra cognoscuntur, & quidem ea qua fieri potest cum certitudine, non solum bellorum eventus, plerumque funesti, verum etiam, quæ reipublicæ facies fuerit formaque

pacis tempore, quæ civium studia, quæ isti pietatis, fortitudinis bellicæ, fidei, industriæ, aliarumque virtutum exstare apud posterum voluerint documenta; quæ sint ætates rerum, qui locorum situs antiqui, qui limites provinciarum; quæ fuerint incunabula, quive nexus illustrium familiarum, quæ signa gentilitia. Quidquid denique ad opinionem ævi veteris, atque ad ritus & instituta majorum publica privataque cognoscenda & intelligenda pertinet, diplomata abunde suggerunt. Suggesterunt vero hæc talia, non nisi cum iudicio & gustu bene præparato, id quod rectum est a curvo discernentibus, atque quantum æra lupinis distent, probe intelligentibus. Id genus documentis, tamquam armis ad illud usque tempus ignotis, saltim rariuscule adhibitis, in conflictu cum auctoribus centuriarum Magdeburgensium, in primis usus est eminentissimus aliquando CÆSAR BARONIUS, & illi, quos continuatores annalium suorum nactus est, fuitque historia ecclesiæ omnino norma & exemplum, ad quod subinde historia civilis componi scribique cœpta est. In Hungaria, post MATTHIAM BELIUM, GEORGIUS PRAY, STEPHANUS KATONA, DANIEL CORNIDES, & JOS. CAR. EDER ita asserta historica diplomatum auctoritate corroborare docuerunt, corroboraruntque ipsi, ut Hungaros de rebus suis antea actis sine diplomatum testimonio loqui scribereque jamjam pudeat.

§. 14.

Non minus præsidii e diplomatibus accedit Juri Civitatum cum publico tum privato, II.) In Juris prudentia ecclesiastica, & civili. civili & ecclesiastico, ut quo plus in diplomatum studio cujuslibet civitatis aliquis profecit, eo accuratius juris utriusque capita intelligere, feliciusque adplicare debeat. Quid mirum ergo Germanorum animis tantum insidere artis diplomaticæ amorem, cum usus seu observantia, ex diplomatibus haurienda, e primis sit juris publici illorum cognoscendi fontibus? Et jus publicum privatumque Hungariæ, inprimis ævi veteris, unde purius pleniusque quam e diplomatibus publicis privatisque ejusdem ævi deduxeris? Unde, nisi e tabularum hujusmodi serie continua, jus Patronatus quod vocant Regum Apostolicorum, erues? Quibus argumentis tandem titulos juraque a majoribus in te derivata demonstrare conaberis, nisi literæ tibi adsint, testes jurium locupletissimi; quibus te prædia pagosque tuos optimo jure sive possidere, sive ab aliis repetere doceas? Diplomatum ergo studium juris patrii candidati inprimis sibi habere debent quam commendatissimum. Sed nec ille, qui ingenii humani, morumque humanorum fata vicissitudinesque scrutatur, a lectione id genus documentorum vacuus recedet; „jucundum enim est ad solemnia admitti, ritus „observare, mutationes rerum, formularum, „morum, jurium ab aliquot sæculis agnoscere, „& in ipsa veterum simplicitate & solœcismis, „humani ingenii & linguarum vicissitudines „mirari “ LEIBNITIUS *in præf. ad Cod. juris Gentium.*

*) *Literarum græcarum & latinarum studiosus interpres, qui e codicibus ævi intermedii, textum auctorum classicorum, ignorantia & negligentia scribarum sæpe miserrime depravatum, restituere conatur, (cum auctorum illorum autographa nulla supersint, interpretatio vero omnis recta, integritate textus nitatur) inspectis diplomatibus protographis, iisdemque cum codicibus diligenter collatis, de auctoritate, saltem de antiquitate codicum multo rectius judicabit illo, qui spreto hoc adminiculo, in ætate MSS. definienda laborat. Diplomata per pauca scripta sunt sine die & consule, codices plerique omnes sine omni temporis nota expliciunt.*

§. 15.

usus diplo-

matum porro illi certe perspexisse, hodieque perspicere videntur, qui ostenditur.

Usum ac dotem multiplicem diplomatum

I.) Diplomata, sive singillatim, sive in unum collecta plura, pluribusque ac magnis in voluminibus, incredibili sæpe studio & labore, modisque interdum etiam parum probacis & illicitis e squalore tenebrarum in lucem publicam protraxerunt. Longum esset hic loci omnia recensere opera, quibus celeberrima sua nomina præmiserunt: *Zach. Messocius, Goldastus, Cæs. Baronius, Rainaldus, Londorpius, Besoldus, editores Actorum Sanctorum (Bollandistæ), Ughellius, Jo. Lucius, Chiffletus, Dachery, Guichenon, Baluzius, Mabillonius, Schatenius, Leibnitius, Edm. Martene, Thom. Rymer, Leuckfeld. Lambecius, Lünigius, Durandus, Muratorius, Ludewig, Pez, Aub. Miræus, Schannat, Du Mont, editores Bullarii magni, Eckhart, Sommersberg, Waddingus, Scipio Maffius, Falkenstein, Gattula, H. C. de Senkenberg, Her-gott, Anderson, Gudenus, Dreger, Mansi,*
ab

ab *Hontheim, Schoepflin, Falk, Menard, Fr. van Mieris, Dogiel, Car. Wagner, Collectores Monumentorum Boicorum, Dähnert, ab Erath, Gerken, Gerbert, Pray, Würdwein, Spieß, Bondam, Ignatius Battyani, Katona, Kovachich, &c.* a) Ut insignes diplomatum, magna parte anecdotorum adhuc, collectiones domesticas P. Gabr. quondam *Heveness, P. Kaprinai, Exc. Com. Franc. Széchényi, Com. Ladislai Teleki, L. B. Alexandri Pronai, L. B. Joannis Jeszenak, Nicolai Jankovits, Godofrédi Kéler &c.* taceam.

2.) Qui schedas hujusmodi veluti Sibyllæ folia custodiunt absconduntque, atque, ne in lucem publicam & conspectum aliorum veniant, omnimode impediunt b).

3.) Qui denique falsa diplomata procudere, aliisque foetus spurios pro legitimis, neglecto honoris, fortunarum, vitæque ipsius periculo, obtrudere veriti non sunt. Sæcula, quæ ævum intermedium suo orbe complectitur, præcipue XI. & quæ hoc continuo excipiunt, hujusmodi mercium commentitiarum inprimis erant feracia, quamvis nullum sæculum, ne quidem novissimum c), a libris & schedis apocryphis, & Isidoris peccatoribus immune atque exemptum fuerit; adeo quidem, ut per Europam vix aliquod exstet Tabularium publicum, ab imposturis diplomaticis prorsus vacuum. — Abbatia, S. Dionysii in Gallia, & quæ sita est in Monte Cassinensi in Italia, in primis hujusmodi spuriorum liberorum matres olim fuisse a multis perhibentur. Quid? Quod, testante Mabillonio ipso monacho, monachi & horum superiores illorum temporum, nec a confingendis & adulterandis Bullis summorum Pontificum manus

facrilegas abstinerint. Hinc factum est: ut INNOCENTIUS III. P. M. novem modos enarraret, quibus homines nequam & perfidi diplomata Pontificum vel confingebant, vel adulterabant, legesque traderet aliquas, (Lib. V. Decr. Tit. 20. cap. 5.) quarum ope bullæ genuinæ a falsis, integræ a corruptis discerni debeant. Nimirum ut a PAPEBROCHIO sacerdote S. I. (siquidem hic loci ejus testimonio uti licet) observatum est „ undecimo christianæ æræ „ sæculo & sequentibus, dum Ecclesiæ Romanæ pacem tot undique schismata sectionesque turbarent, ea erat morum corruptela, ut qui Dei famulatum erant professi, & videbant a potestatibus sæcularibus *d*) accidi immunitates & possessiones suas, non magno crimini sibi ducerent, pro ipsis tuendis commenta cudere “ *e*). Ceterum, nisi iniqui in monachos, literarum & librorum ævo illo obscuro conservatores, esse velimus, fateamur oportet, non solum monachos nefarii istius criminis fuisse reos, quo se polluebant omnis status, conditionis, sexusque adeo utriusque nequam homines.

a) Conf. GATTERER. *Praktische Diplomatiek*, Göttingen 1799. 8. pag. 199. & seqq.

b) Quo invidia, & devorandi ac concoquendi alieni patrimonii sacra fames mortalia cogere possit pectora, quantumque fidem & testimonia diplomatum horreant, illius enimvero exemplum inveni extraordinarium ac prorsus singulare in literis Capituli ecclesiæ Baciensis anni 1410. ad Sigismundum Regem querulis, in quibus Ladislaus de K. accusatus est, quod feria secunda proxima post Festum S. Trinitatis, excusso de manibus Canonici scribentis diplomate, juribus ut credebatur suis adverso, idem

idem dentibus dilaniasset, sigillumque ita corros-
sum cum scripturæ parte aliqua devoravisset etiam.

- c) F. HAGER *Nachricht von einer merkwürdigen literarischen Betrügerey auf einer Reise nach Sicilien im Jahre 1794. Wien 1799. 4. 88. S.*
- d) Addere debuisset: vel ab alterius ordinis sacri viris; id enim passim evenisse, vel domestico exemplo doceri potest. Vid. KOVACHICH *Supplem. ad Vestigia Comit. apud Hung. Tom. II. p. 381. & seqq.*
- e) Vid. *Propylæum ejus antiquarium*, in BARINGII *clave diplomatica* p. 301.

§. 16.

Cudebantur etiam in Hungaria literæ & Falsarii dipl.
in Hungaria.
privilegia commentitia, non minori, quam aliis
in regnis numero. Equis enim adeo credulus,
ut omnia & singula S. Stephani Regis diploma-
ta, quæ circumferuntur, ab omni prorsus sus-
picionem corruptionis esse libera sibi persvadeat?
Vel qui privilegio Colomanni Regis, in quo
Martino Lapsanovich Comitatum Cettinæ dona-
vit, & quod se scriptum esse ait Jadræ, per Cancel-
larium Dalmatiæ Petrum Beriszlevich, anno in-
carn. Salvatoris nostri 1105. fidem adhibeat a)?
Equidem dignus est, qui pueris deridendus
proponatur, qui diploma Visa Duci a S. La-
dislao datum Budæ anno Sal. 1092. Nono Cal.
Jun. in campo electorio Râkos, stupide confin-
xit, in eodemque ceram, quam hispanicam
appellamus, insigniaque gentilitia commemo-
rare non erubuit b). Nec illæ literæ Ludovici
I. Regis, editæ Budæ in regia Budensi Hun-
gariæ die I. Nov. an. Domini 1344. melioris
frugis sunt, quarum auctoritate idem rex Va-
lentini Nagy nomen in *Balintiz* commutasse,
„ (siquidem jam communis fortis homines

„ etiam adeo vulgariter cœperint se hoc nomine *Nagy* compellari facere, ut &c. “) eundemque Baronatu, novisque insigniis auxisse perhibetur, quamvis easdem subinde in Transilvania auctoritate publica confirmatas esse non ignorem c). Sunt imposturæ hæ diplomaticæ adeo crassæ, ut illas vel tironibus artis indicasse sufficiat: sunt aliæ bene multæ ita callide structæ adornatæque, ut omnibus Diplomaticæ subsidiis ad illas detegendas & convellendas opus habeas: — Procudebantur vero instrumenta falsa intra monasteriorum & Capitulorum muros, & extra. In epistolis INNOCENTII III. (Lib. I. Ep. 544. ed. BALUZII) Abbas de Földvár convictus de confictione privilegii duplicis occurrit. Matthias Corvinus porro 1464. Episcopum Nitriensem Thomam de Debrenthe, castro homonymo & pluribus pagis ad idem pertinentibus exuit, parique pœna Nobiles quosdam de Hym Remethe & de Papa affecit, quod se absente, in regno spolia exercuissent „ nec non sigillis, a quibusdam literis regalibus fraudulentè distractis, & eisdem, aliis literis per eosdem — dolose fabricatis, impressis, cum iisdem in nonnullis causarum suarum processibus, nomine literarum regalium usi exstitissent “ d). Sub eodem Matthia rege 1486. conventus Fratrum minorum Ordinis S. Francisci Agriensis literæ duplices (fassionales & statutoria, illæ quidem Nicolai de Gara Palatini, hæ nomine Capituli Agriensis 1375. editæ, possessionem dictorum Fratrum — quod mirum videri potest — dimidiæ partis pagi Lövö attinentes,) a iudicio regio (personali præsentia regis) falsæ pronun-

nunciatae, atque „ tanquam male, inique & „ fraudulenter fulminatae & fabricatae “ rejectae sunt. In ipsis deinde adeo regni Comitibus (Decr. 1486. art. II.) Abbatiae & Praepositurae falsitatum in literis exarandis accusatae sunt. — Famosus est praeter aliis omnibus impostor ille *Gabriel literatus de Zömlén*, qui, circa tempus regiminis Alberti & Vladislai I. Hungariae regum, quatuor supra quadraginta & amplius instrumenta & privilegia spuria exclusit vendiditque, subinde vero hanc suam nefariam aliis imponendi libidinem, mortem subiturus, *ad puritatem suae conscientiae* ore confessus, scriptoque complexus est e): at isto nihilo segnior erat infamis ille doli fabricator *Johannes literatus maledictae memoriae*, qui sub Sigismundo rege, literas & privilegia commentitia, per Thurocziensem provinciam, tot numero sparserat, ut ad jurium & titulorum confusionem, quam inde sequi necesse erat, tollendam, secernendaque vera instrumenta a mendacibus, Emericus Bebek Judex Curiae Regiae, legatus regio nomine in provinciam mitti debuerit; qui 1391. in Generali Ordinum Comitatus de Thurocz Conventu, omnes omnium Nobilium literas inspexit & recensuit, confecto-que solemnii illarum indice, (*Registro de Thurocz*) qui a prima manu profectus adhuc dum superest f), veritati non minus, quam celebritati Nobilium illius Comitatus profuit, & adhuc usque prodest. Haec omnia sine dubio, & *larvatorum* (cum praeter se fert aliquis, quod non est) adhuc audacia & doli, quos in legibus & diplomatibus domesticis saepe notatos reperiatis g), occasionem fecerint inferenda

dæ literis confirmationis regum nostrorum inde ab initio sæc. XV. solemni formulæ: confirmari videlicet literas oblatas non nisi „ eatenus , „ quatenus eadem rite & legitime existunt „ emanatæ, viribusque earundem veritas suffragatur. “

- a) KATONA in *Hist. crit. Regum Hung. stirpis Arpadianæ* Tom. III. p. 210. de veritate hujus diplomatis cavere noluit. KERCHELICHUS illud in *Notitiis prælim. de regnis Dalm. Croat. Sclavonicæ* p. 114. e croatico a se latine redditum primus vulgavit, „ *recognitum*, (ut addidit,) *per eminens Di-casterium aulicum, ac pro legitimo acceptatum authenticatumque.* “ Inscriptum (intimatum) idem est omnibus, singulariter autem “ *populo nostro gloriosæ nationis Sclavonico:* “ majori vero fide dignum commentum hocce non est privilegio Alexandri Magni, quo eundem itidem *inclytam gentem Slavicam* donasse olim sibi plerique omnes persuadebant, hodie vero nemo sanæ mentis sibi persuadet amplius.
- b) Transmisit illud Capitulum Posoniense 1685. die 7. Augusti. Fragmentum vero ejusdem vulgavit Georg. PRAY in *Diatrise in Dissert. Antonii Gá-noczy de S. Ladislao Hung. Rege.* p. 59. Integrum legi in MSS. Steph. KAPRINAI Tom. VI. B.n. 79.
- c) MSS. KAPR. Tom. IX. C. nro. 76. 77.
- d) KAPR. Tom. I. B. Nro. 74.
- e) WERBOECZI l. c. Part. II. Tit. 14. §. 50. — 82. Cum nomen Gabr. Zömlen quamvis infame, in Tripartitum W. opus, ac proinde Leges Hungariæ & Transilvaniæ irrepperit, operæ pretium faceret, qui nobis undecunque infelicitis viri notitiam procuraret. At enim credetne hominum ventura propago, nos in tanta literarum luce, & in tanto advocatorum numero, Werböczii adeo vitam, ad imitationem Schröghii Plutarchi Germanorum, ad hoc usque tempus nequicquam expectasse?
- f) Insigne hoc est antiquitatis Hungariæ documentum, cujus similia frustra alibi quænaveris. Legi ego illud in protographo, dum mense Novembri 1798. Pestini auctoritate Tabulæ, quæ, quod regis

nomine jus dicat, *regia* nuncupatur, transumptum est. Materia illius pergamena est, forma libelli quam in quarto dicimus. Foliis utrinque inscriptis, filoque e pergamena confutis, decem conitat; scriptura in eodem sola monastica est, seu neogothica, abbreviaturarum vero maximus numerus. Sigillo, de filo serico pendente, Emerici Bebek (textus Bubek habet) communitum est; & demta postrema pagina, in qua pleraque omnia epilogi verba oblitterata sunt, integrum & sic satis bene conservatum est. Causam & occasionem edendi istius instrumenti in textu allegavi. *Registri* nomen in epilogo accepit, Titulus in fronte (Registrum de Thuroch) serius, ut videtur, inscriptus est. Pertinuit diploma hoc porro inter chartas sic dictas pariculas, cum ex epilogo exemplum illius (par registri præsensis) in domo tauarnicali fuisse depositum cum certitudine possit erui. Distinctum est, si prologum & epilogum demas, septuaginta membris (paragraphis.) Horum cuique argumentum breve præmissum est, membrumque quodvis novus versus orditur. Præter Comitatus Thuroczienſis familias nobiles, etiam Arvenſium Nobilium jura & titulos respicit; Comitatum Arvenſem enim illo tempore districtum (hodie processum dicimus) Thuroczienſis fuisse, vel ex hoc instrumento manifestum est. Recensentur in illo CLXVII. literæ veræ, ut ibi appellantur, justæque, falsarum nulla in specie facta est mentio. Omnium antiquissimum, quod ibidem, in Transumpto attamen duntaxat Capituli Strigonienſis, commemoratur diplomam Andreæ II. Regis est *de anno gratiæ* 1230. præter quod alia adhuc duo ejusdem regis annorum 1233. & 1235. adnotavi. Regem Belam IV. numero XXXI. auctorem præseferunt; unicum Stephanum V. 1271. (non Stephanum II. 1171. ut BELIUS in Cottu Thurocz. retulit) — XII. Ladislaus Cumanus elargitus est; VI. Caroli Rob. regis sunt; XXIV. Ludovico tribuuntur; a Conventu Thuroczienſi L. profecta sunt. Sigismundi regis perpauca, & Judicum Curia Regia, cet. prætereo. Plerisque omnibus istis regum literis, libertatis a jugo servitutis, ordinisque equestris & agrorum inest collatio. Falluntur vero vehementer, qui vulgari traditione decepti, Belam IV. post cladem a Tataris

acceptam, in angustias Comitatus Thurocziensis compulsam, hic ultimæ plebis homines, vel pro tantillo beneficio ab iisdem accepto, equestri axioma donavisse credunt. Neque enim rex, Austriam in fugâ petens, longius inter Thuroczienses substitit, neque privilegium in registro quodpiam reperit, quod fatali illo universæ Hungariæ anno datum esset. Sed neque universæ Belæ IV. literæ, Thurocziensibus tunc concessæ, nobilitares sunt, in quibus largiendis Belam IV. saltem ante an. 1241. difficilem fuisse, aliunde (KOLLÁR *Amoenit. Hist. jur. publ. Regni Hung.* P. II. p. 182. 83.) meminimus. Habuit adhuc Thuroczium jam & ante hæc tempora, ab origine inde regni, equestres suas familias, quas non Bela IV. primum tales creavisse putandus est. — Id tandem adhuc, de registro hoc vel maxime memorabili quæri posset: nihilne Bebekius censor literarum, quæ ibidem non ex æsse, sed summam tantum exhibentur, in nonnullis comprobandis humani passus est? — Utinam aliquis rerum patriarum studiosus, antiquitatisque hungariæ amans & peritus, in lucem publicam protraheret incomparabile illud monumentum perpetuo commentario illustratum. Fieret id sane magno rei diplomaticæ & genealogicæ, historiæque & juris commodo.

- g) Adest coram me diploma per P. Kaprinaium olim ex autographo desumptum, anni, ut apparet e contextu, 1322. (centenarius enim in temporis notatione omissus est) sententiam Curialis Comitatus (Vice-Comitatus) & quatuor judicum provinciæ Csalloköz, (Comitatus Poson. minoris) in Petrum & hujus patrem Jacobum filium Almud in se continens, qui quidem quod plebeiorum conditionis hominibus, mentito Udvornicorum nomine, prædium quoddam suum coram Capitulo ecclesiæ Posoniensis vendiderint, ignitis clavibus castrî, imitando (ut sententia habet) *judicium plenæ provinciæ* (majoris Comitatus) & eorundem Udvornicorum, in faciebus suis notati, bonisque eorum universis in Fiscum Comitatus redactis, continuoque venditis, provincia pulsi sunt. — Quanta ad intelligenda juris antiqui capita vel hoc unum diploma suggerit!

§. 17.

In tanto igitur diplomatum falsorum numero, attentione & iudicio opus est, prius quam instrumento aliquo in rem tuam utaris, ne falsum pro vero habeas, fœtumque suppositivum pro genuino & germano foveas. Cavendum hoc erit eo diligentius, quo major omni tempore impostorum erat vasrities *a)*, & quo major sæpenumero vel ex uno & singulari aliquo diplomate falso, temere pro vero & genuino habito, rerum ac personarum nascitur confusio. „ Recepto enim mentito instrumento, „ jus commune violabitur, prædiis suis injuste „ ejicientur legitimi successores, veterum annalium series interturbabitur, pervertetur „ ordo temporum, historiæ fides concidet “ *b)*. Cum verò diplomata antiqua commode legere, eadem intelligere, deinde fraudes impostorum & insidias evitare, non sit possibile, nisi regulæ in promptu sint, quæ lectorem diplomatum studiosum, censoremque veri justique tenacem juvent & dirigant, seu nisi idem præceptis artis diplomaticæ rite imbutus sit; de hac in universum quædam commentabor, priusquam ad ipsam artis pertractationem perveniam.

- a)* „ Olim non defuere falsarii, inquit MURATORIUS, „ tam acuti ingenii tantæque industriæ, ut in „ confingendis præcedentium sæculorum monumentis, neque contra chronologiam, neque contra „ historicam eruditionem, aut notariorum formulas quidquam peccarent, & probe imitari nescissent veterum characteres & notas, aut eorum „ tantummodo apographa confingere. Si quando „ eorum fœtus occurrunt; neque enim quisquam „ neget, quin talia efformari potuerint, & ex iis „ aliqua superesse possint, frustra interdum artis „ cri-

„criticæ subsidia adhibentur ad falsas ejusmodi
 „merces a veris secernendas.“ MURAT. *Antiquitates Italicae medii ævi*, Tom. III. Dissert. XXXIV.
 Col. 30. — Hæc equidem proxime ad Scepticismum diplomaticum dicta sunt; enimvero legibus inveniendæ veritatis id omnino adversatur, omnes veri justique characteres in instrumento aliquoprehendere, illudque nihilominus pro fictio habere.

b) BARTH. GERMON. *Discept.* II. P. IV. c. 2.

SECTIO II.

DE ARTE DIPLOMATICA GENERATIM.

§. 18.

Artis Definitio.

GATTERER *Diplomaticam artem* scientiam esse dicebat diplomatum intelligendorum, dijudicandorum, applicandorumque. Mihi hæc artis definitio latius, quam deberet, patere videtur; non quod diplomatum intelligentiam in illorum Censoribus requirat, quis enim sobrius de re quam non intelligit judicet? verum quod scientiam illa, quorum tam varia ac multiplex dos est, applicandi etiam (in historia, jure, *cet.*) urgeat. Infinitus est, qui arti hac definitione attribuitur, ambitus *a*), quem nec Gatterer nec alius quisquam adhuc emensus est, in cujus ego finibus regundis & circumscribendis, cum artis etiam genesim, ad quam in notione adferenda inprimis attendi debet, respicerem; morum, legum, & institutorum ævi intermedii nunquam immemor, retinendam putavi modestam illorum auctorum
 artis

artis diplomaticæ definitionem, qui illam potissimum ad dijudicanda diplomata referunt, atque cum hoc sine habitu eadem legendi interpretandique fieri non possit, plenius illam artem esse pronunciant, quæ regulas legendi, intelligendi, discernendique vera diplomata a falsis suppeditat. Campus hic quo se humani ingenii vires cum laude fructuque maximo exerceant peramplus est, fungeturque artis istius peritus sæpe

vice cotis, acutum

Reddere quæ ferrum valet, exfors ipsa secandi.

- a) Equidem laudabo jureconsultum, qui natura simul & arte ad id comparatus est, ut e diplomatibus idoneos ad locupletandam artem quam colit calletque flores decerpere, intraque tectâ comportare possit: neque tamen ea propter e. c. antiquitatis & historiæ studiosum a Tabularum ævi præteriti inspectione arcendum esse quisquam putabit, quod nempe a Themidis sacris alieni, (e. c. PP. Benedi-ctini) illud quod jura in vetustis membranis attinet, ipsi in usum forensem deducere non intelligant. Diplomaticorum interest fontes e quibus jurisconsulti, historici cet. hauriant, suarumque disciplinarum campos rigent, indagare, recludere, probare. Qui ultra progreditur, quamvis duplici laude dignus, alienum attamen jam, etsi vel maxime contiguum, territorium ingressus est.

§. 19.

Natales artis diplomaticæ in sæculum XVII. Natales artis incidunt. Inveniendæ, subinde excolendæ inter bella di-etiam plenius & accuratius, occasionem præ-plomatica. buerunt controversiæ de fide & authentia primum quidem singularium tantum quorundam diplomatum, donec tandem audacior hostis factus tantum non omnibus chartis ævi veteris bel-

bellum indixit. Principes in bellis istis diplomaticis (quo nomine frugiferas illas controversias notare placuit) agebant ex parte una doctissimi quidam e Societate Jesu presbyteri *a*), ex altera vero antiquitatum omnis ævi, præcipue intermedii, peritissimi sodales ordinis sacri, qui a S. Benedicto nuncupatus est. Neutris amici & foederati deerant. Sequebatur autem S. Ignatii institutum DANIEL PAPEBROCHIIUS, qui, post P. HENSCHENII similes conatus, docte & subtiliter indagando discrimen veri ac falsi in vetustis membranis, primus erat, qui propylæum artis diplomaticæ aperuit *b*): S. Benedicti contra regulam profitebatur JO. MABILLONIUS, ordinis non minus quam sæculi sui ornamētum, qui dum Papebrochii regulas severe examinaret, veritatisque inveniendæ studiose adaptaret, opus diplomaticum a Papebrochio cœptum, applaudente orbe literato, feliciter ad fastigium eduxit. — Nutare videbatur antiquitatis inprimis Mërovin-gicæ fides, post HENSCHENII, PAPEBROCHII, HARDUINI & sociorum gravissimos in eam factos impetus: tuebantur illam alii, præsertim PP. Benedictini, in Gallia & extra illam, e. c. JOSEPHUS PEREZIUS in Hispania, facem & signa Mabillonio præferente *c*), non minus fortiter quam feliciter. Equidem in P. Papebrochio mireris oportet insigne veri studium, modestiamque singularem, quam celebri illa epistola, anno 1683. 20. Julii ad P. Mabilonium data, testatus est, qua nimirum & sententiam suam retractare, & victoriæ laudem adversario attribuere non erubuit, confessus: „ sibi in sua de eodem argumento lucubra-
„ tiun-

„ tiuncula (*Propylæo antiqu.*) nihil jam amplius
 „ placere, nisi hoc unum, quod tam præclaro
 „ operi & omnibus numeris absoluto (JO.
 „ MAB. *de re diplom.*) occasionem dederit. “
 Induciæ hæ erant duntaxat doctarum litium,
 impensæ, ut fere fieri solet, comparandis ma-
 joribus adhuc belli apparatusibus. Epistolam, in
 Supplemento Mabilloniani operis, & nova hu-
 jus editione expressam, exhibent etiam *Anna-
 les Benedictinorum* Tom. I. p. 577.

- a) Jesuitas e composito monumenta antiquitatis ho-
 rumque fidem labefactare & evertere studuisse,
 quod originis novitiæ sui ordinis sibi conscii, &
 vetustatis gloriam, & diplomata antiqua, quibus
 tabularia præsertim Benedictinorum refertissima esse
 norant, iisdem inviderent, seque ipsos hac ratione
 in partem prædæ venturos esse sperarent, vulgaris
 est post PETRUM LUDEWIGUM (*in Præf. ad Re-
 liquias Manuscriptorum omnis ævi* Tom. I. p. 27.
 & seqq.) plerorumque etiam hodiernorum aucto-
 rum sententia: quam attamen iniquam esse, parum-
 que doctam, profectam a malevolis Societatis Jesu
 obtrectatoribus, egregie demonstrare conatus est
 auctor anonymus (MICH. DENIS) in libello:
*Kurze Erzählung der Streitigkeiten über die alten Ur-
 kunden. Frankf. u. Leipzig (Heidelberg) 1785. 3.*
- b) Scripsit PAPEBROCHIUS (natus Antverpiæ 1628.
 17. Martii, mortuus 1714. 28. Junii) *Propylæum
 antiquarium circa veri ac falsi discrimen in vetustis
 membranis*, hocque libello, si non primi artis di-
 plomaticæ parentis ac inventoris laudem sibi pro-
 meruit, saltem condendæ novæ arti occasionem
 dedit. Prostat ille in AA. SS. Tomo II. mensis
 Aprilis, Antverpiæ 1675. Fol. ob vastitatem & ra-
 rityatem operis, cui insertus est, recusatus in DAN.
 BARINGII *Clave diplomatica*, Hannoveræ 1754. 4.
- c) Propylæo Papebrochii opposuerat JO. MABILLONIUS,
 presbyter ac monachus Ordinis S. Benedicti e
 Congregatione S. Mauri, celeberrimum opus suum
de re diplomatica sex libris comprehensum, Paris.
 1681. fol. Libro I. veterum instrumentorum anti-
 C qui-

quitas, materia & scripturæ explicantur. Ildi Argumentum est diplomatum stylus, subscriptiones, sigilla & notæ chronologica. Illio Quædam adversariorum objecta diluuntur, tum notitiarum & chartariorum expenditur auctoritas. IV. Agitur de Francorum Regum Palatiis, villisque regiis, in quibus diplomata condita sunt. Hæc palatia numero CLXIII. totidem sectionibus ordine alphabetico commemorantur, & illustrantur. V. Exhibentur & explicantur veterum Scripturarum varia specimina, tabulis LX. comprehensa. Primo specimina veterum codicum & inscriptionum cum variis alphabetis. Secundo specimina diplomatum regiorum a Dagoberto I. usque ad S. Ludovicum. Tertio specimina chartarum ecclesiasticarum. VI. Continentur ducenta & amplius diplomata & instrumenta, pleraque desumpta ex archetypis, ad præcedentium librorum probationem. — Observare vero convenit, Mabillonio præcipuam fuisse curam antiquitatis ejus maxime, quæ ad illustrandam regum Francorum primæ & secundæ stirpis memoriam spectat. In Regum tertiæ stirpis diplomatibus illustrandis processit oratio auctoris præclari duntaxat ad S. Ludovicum, († 1270.) in quo ut consisteret, persvaserat nova rerum facies, quæ in diplomatibus post eum conditis ejusmodi visa est, ut Mabillonio argumentum alterius operis esse videretur, aliis, quod pertractarent, relinquendum. — *Secunda operis Mabillonii editio cum supplementis auctoris & præfatione THEOD. RUINARTI*, post mortem Herculis illius literati (natus erat Rhemis 1632. 23. Nov. mortuus 1707. 27. Decembris) prodiit, itidem Parisiis 1709. in Fol. reg. — *Tertia vero Dissertationibus variorum locupletata, notisque illustrata a Marchione JOH. ADIMARI T. I. II. Neapoli 1789. fol.*

§. 20.

Progressus art-
tis a) in Gal-
lia.

Insignem hanc de Papebrochio victoriam
iniquo animo ferebant, quicunque conatibus
ejus antea faverant. Quare non multo post
bellum

bellum diplomaticum magna utrinque animorum contentione recrudit, classicum hac vice canente BARTHOLOM. GERMON, iterum Jesuita, in disceptatione *de veterum Regum Francorum diplomatibus, & arte secernendi antiqua diplomata vera a falsis*. Paris 1703. 12. Hac disputatione non sine ingenii acumine causam malam defendit sagacissimus auctor, repræsentata a Mabillonio autographorum ævi Mërovingici atque Carolingici specimina sublesta fidei insimulans, regulasque ejusdem ad judicium de fide & sinceritate diplomatum ferendum parum esse fidas atque idoneas, ac proinde pleraque omnia ævi veteris monumenta pro spuris & adulterinis, saltem pro dubiis esse habenda contendens, inter cetera usus captiosa similitudine, a domibus, quas exposititiis infantibus educandis christiana pietas destinavit, deducta, quarum unam inquit: „ si quis ingrediatur, „ quia degentes illic infantes plerosque esse „ spurios novit, incertos omnes pronunciat, „ neque ex illis quemquam pro legitimo habet, quin ille legitimum se certissimis signis „ demonstravit: ita etiam, quia vetustissima „ quæque tabularia adulterinis diplomatibus „ mixta esse novimus, omnia, quæ illinc „ prodeunt instrumenta, pro dubiis & incertis „ habere debemus, donec illa manifestis argumentis „ mentis vera & legitima esse probentur. “

Laceffitus hac adversarii petulantia MABILLONIUS, *Supplementum Librorum suorum de Re diplomatica*, Parisiis 1704. in fol. edidit, ibique Germoniani nominis nulla mentione iniecta, certitudinis gradum, qui circa diplomata ævi veteris obtinere potest, curatius definivit,

Archivique S. Dionysii integritatem, unde specimina sua depromferat, defendit, tandem asserta etiam quædam a se antea candide retractavit, pleraque vero novis argumentis probavit, confirmavitque. Aperte magis, minorique cum indulgentia in confutandis Germonii & amicorum dubiis versati sunt, præcipue JUSTUS FONTANINI, RUINART, LAZZARINI, alii. Horum athletarum egregiis conatibus, quamvis post iteratos etiam Germonii a) & aliorum tumultus, monumentorum antiquorum fides & auctoritas vindicata fuerit: fuerunt tamen etiam postea, qui fidem diplomatum temere vellicare, de lubrico artis diplomaticæ differere, ipsaque artis fundamenta hostiliter aggredi veriti non sunt. Pyrrhonistæ isti diplomatici *Germonistarum* notantur cognomine, quo tamen signare nollem, modeste & cum ratione interdum de legitimis natalibus chartarum & librorum ævi veteris dubitantes; quemadmodum RICHARDUM SIMON, LENGLETUM du FRESNOY, ipsumque HICKESIUM b) aliquando dubitasse constat, nequicquam conquerentibus de horum Scepticismo illis, quibus dubitatio omnis quantumvis sobria pro delicto est.

- a) Disceptationes illius in unum collectæ, Viennæ nuper recusæ prodiderunt, cum præmissa earundem historia, e gallico in latinum versa. Viennæ 1790. 4.
- b) GE. HICKESIUS in *Linguarum veterum septentrionalium Thesauro grammatico-critico & archæologico*, Oxoniæ 1705. in Fol. non reticendum esse puravit, quæ in Canonibus Mabillonii diplomaticis incerta ac lubrica sibi visa sunt, mediusque inter severum Papebrochii rigorem, nimiamque Mabillonii laxitatem in veteribus instrumentis examinandis, subsistere voluit. Censuram & animadversiones doctissimi illius Ecclesiæ Anglicanæ presbyteri non omnino spre-
viffe

visse amicos bonæ causæ, patet vel ex præfatione Ruinarti doctæ, quæ novæ operis Mabilloniani recensionis præmissa est. Excerptis Hiccesiana etiam Germonius, quamvis doluerit se patronum suæ causæ hominem hæreticum nactum esse. LUDEWIG. l. c. p. 34.

§. 21.

Tumultus diplomatici, quemadmodum ma- b.) in Ger-
turius in Germania magno ingeniorum motu & mania.
jurisconsultorum strepitu surrexerant: ita prius
etiam ibi, quam in Gallia sopiti sunt. Longa
est illorum series, variusque in supremis Impe-
rii tribunalibus litium fuit exitus. Equidem
ad pacem inter litigantes Germanos procuran-
dam, id certe plurimum conferre debuit, quod
bella, quibus Germania vexabatur diplomatica,
forensia fuerint, in Gallia contra *literaria* tan-
tum & *umbratica*. Neque enim in jure sive
publico sive privato, diplomata & rerum gesta-
rum seriem operose evolvere ibi referebat, ubi
morum & legum a majoribus acceptarum vix
aliqua jam fuit reverentia, omniaque ab unius
dependebant nutu & arbitrio a). Belligeranti-
bus ergo adhuc Gallis, Germani Mabillonii &
commilitonum nec non adversariorum inventa
ad rem suam accommodarunt diplomaticam,
novisque locupletarunt accessionibus. Fecit
hoc in primis GODEFR. BESSEL, Abbas Monaste-
rii Benedictinorum Gottwicensis in Austria, qui
in Tomo prodromo *Chronici Gottwicensis* 1732.
typis Tegernseensibus in fol. reg. edito, vesti-
giis fratris sui Mabillonii insistens, rem anti-
quam librariam & diplomaticam, præcipue
Germanicam, post tempora Imperatorum stirpis
Carolingicæ, FRANC. JOSEPHO HAHNIO (†

1748.) in laboris societatem adscito, egregie illustravit *b*). Horum jam Benedictinorum operibus adjuti, Germanorum alii breviora artis compendia contexuerunt; qualibus CHRIST. HENR. ECKHARDUS & JO. FRID. JOACHIMUS de juventute academica bene meriti sunt *c*); alii *sigilla* examinare, alii *abbreviaturas* explicare tentarunt, elaborarunt alii in enodandis *monogrammatibus*, & combinandis inter se *temporum notis* & rationibus: fuerunt, qui in *singulorum Imperatorum & Regum* immo & *Imperatricum* diplomata commentati sunt. Dicam de his omnibus plura, ubi locus & materia me monuerint.

- a) Seriem bellorum diplom. quibus Gallia Germania-
que flagrabant, illorumque causas & eventus va-
rios, docte non minus quam eleganter ad sua us-
que tempora pertexuit I. PETR. LUDEWIGIUS,
Academiæ Fridericiæ, quæ Halis Saxonum floret,
quondam Cancellarius, in præfatione longiori, quam
Reliquiis manuscriptorum atque diplomatum omnis ævi
præmisit. Francof. & Lips. 1720. 8. Neque tamen
quemquam illa etiam legisse, & cum Ludewigianis
contulisse pœnitebit, quæ in prologo Tomi III.
Actorum pacis Westphalicæ, Hannoveræ 1755. fol.
a viro quondam perillustri I. GODEFR. A MEIERN
de *bellis diplomaticis* scripta sunt. Qui artis diplom.
historiam literariam nuper ediderunt, de contro-
versis diplomaticis recentioribus consulendi sunt.
- b) Tomus iste prodromus, qui partibus duabus, toti-
demque justæ molis voluminibus absolvitur, pro fa-
ciliori intellectu annalium dicti Monasterii, qui
sequi debuissent quidem, verum secuti sunt nun-
quam, chronico præmissus est. Agitur in hoc splen-
dido, multis tabulis æri incisis illustri, omninoque
bonæ frugis opere (paucis enim, quas alii nota-
runt, quis offendatur maculis?) de codicibus antiquis
manuscriptis, de Imperatorum ac Regum Germa-
niæ (a Conrado I. usque Fridericum II. † 1250.)
diplomatibus, de eorundem palatiis, villis & cur-
tibus

tibus regiis, atque de Germaniæ medii ævi pagis. Sunt, qui, nescio quibus inducti rationibus, non Bessellum, verum Fr. Jos. HAHNIUM auctorem operis nuncupant; e prologo Abbatis id tantum certum est, virum reipublicæ literariæ factum, eidem egregiam opem & operam in hoc operæ condendo, in emendandis amanuensium apographis, in regendis chalcographis, aliisque quam plurimis commodasse. Utrique sententiæ circa verum operis auctorem adversatur FR. ROBERTI in *Polymathia*, quæ Romæ 1782. 8. expressa est, ubi Italus auctor P. I. p. 157. in hunc modum: „De Diplomati-
ca item Alemanniæ sapientissimos Canones ediderunt, re Cl. viri Eckhard & Barring, nec non GODWIEK
„ in suo chronico.“ (!)

- e) C. H. ECKHARDI *Introductio in rem diplomaticam præcipue Germanicam*, cujus editio altera Jenæ 1755. 4. curis Jo. Chr. BLASCHE prodiit, styli quoque se commendat puritate & elegantia. Ad hoc compendium proxime bonitate sua accedit I. FRIDR. JOACHIM'S *Einleitung zur deutschen Diplomatie*, qui liber Halis 1785. tertium recursus est. Doctrina illius recensio prostat in *der allgem. deutsch. Bibliothek* Vol. LXIX.

§. 22.

Vastissimum simul etiam doctissimum opus præfens artis de re diplomatica, & ex quo plerique auctores præsentis ævi, velut ex penu bene instructa, compendia & prolusiones suas academicas depromunt, duum viri (CAR. FRANC. TOUSTAIN & TASSIN) iterum Benedictini e Congregatione S. Mauri intra annos 1750 — 1765. voluminibus sex in 4. ediderunt. Inscriptum illud est: *Nouveau Traité de Diplomatie, où l'on examine les fondemens de cet art, on établit des règles sur le discernement de titres, & l'on expose historiquement les caractères des bulles pontificales, des diplômes donnés en chaque siècle, avec des éclaircissements sur un nombre considérable de points d'*

historie, de chronologie, de critique & de discipline; & la refutation de diverses accusations intentées, contre beaucoup d'Archives celebres, & sur tout contre celles des anciennes eglises, par deux religieux Benedictins de la Congregation de S. Maur. Paris Tom. I. 1750. Tom. VI. 1765. Versiōnem priorum trium voluminum germanicam adornavit cel. JO. CHRISTOPH. ADELUNG, quam subinde in IX. volumina dissectam continuavit ANT. RUDOLPH, in agro primum, deinde in ipsa urbe Erfordienſi ſacrorum apud Evangelicos miniſter a). JO. CHRISTOPH. GATTERER Hiſtoriarum Profeſſor Göttingenſis, primus erat, qui mole hac magna & indigeſta, at theſauris eruditionis vaſtæ raræque reſertiffima, prudenter uſus eſt, jam prius ab eruditione diplomatica celeberrimus, evulgando: *Elementa Artis Diplomaticæ univerſalis* Vol. I. Göttingæ 1765. 4. cum XII. Tabulis æri inciſis. Tulit autem liber hic omne punctum intra Germaniam & extra illam, quod & novo, quem in hanc diſciplinam induxit, materiarum ordine, juſtaque partium ab aliis diſſectarum diſpoſitione, perſpicuitate proinde ſua, rerumque quas tradidit utilitate & veritate, ſe ſuis lectoribus maximopere commendaret. Neque ergo cœci alicujus partium ſtudii, quo diſcipulos in ſuos magiſtros identidem ferri experimur, me quiſquam accuſabit, ſi veri reverentia ductus, artis diplomaticæ in *juſtum ſyſtema* vocatæ, hunc primum auctorem fuiſſe pronuc'averō. Id vero una mecum dolebunt omnes, qui bonitatem libri uſu aliquando experti ſunt, deſiderari Volumen illius alterum, cujus potiundi auctoris morte (5. Aprilis 1799.) ſpes omnis inter-

intercisa est *b*). Debitum saltem illud, quod contraxerat vir longe doctissimus, in omnique Historia hujusque studiis subsidiariis vere princeps, promittendo iterum iterumque continuationem præstantissimi sui operis, ex asse non exsolvit, edendo *Delineationem Diplomaticæ*, (*Abriss der Diplomatiek*) Goettingæ 1798. 8. continuoque emittendo *Diplomaticam applicatam*, (*Praktische Diplomatiek*) ibidem 1799. 8. In illa enim inuentis a se pridem perpauca addidit, lectorumque expectationem in parte libri ultima prorsus destituit: in hac vero quæstiones resolvit & explanavit, systematis rigore neglecto, quarum resolutione theorematum partis theoreticæ continuo dilucidanda erant potius. Post Gattererum inter Germanos artis præcepta libris compendiariis complexi sunt JO. SCHWAB & GREG. MAX. GRUBER, quibus adhuc JER. JAC. OBERLIN Argentoratensis Professor addendus est *c*). Eminuit inter hos GRUBERUS e Scholis piis, Viennæ non ita pridem adhuc Diplomaticæ Professor, († 1799.) qui Gattererum feliciter imitatus, illis Diplomaticæ capitibus præcipue operam impendit, quæ in hujus Elementis adhuc deerant. Novissimè tandem operis diplomatici, quo nos Germania donavit, auctor est CAR. TRAUG. GOTTL. SCHÖNEMANN, iterum Prof. Goett. cujus Volumen I. nuper admodum hoc titulo prodiit: *Versuch eines vollständigen Systems der allgemeinen, besonders älteren Diplomatiek*, Hamburg 1801. 8. Fœtus hic est ingenii elegantis, judicii subacti, lectionis vastæ. In primis in eo elaboravit auctor clarissimus hoc volumine, quod maxima parte prolegomenis absolvitur, & quod duo
adhuc

adhuc alia excipient, ut novis artem limitibus circumscriberet; unde priores antiquos mox latius protulit, mox arctius contraxit iterum. In operis progressu, remi diplomaticam juribus & statutis ævi medii cognoscendis, atque in usum forensem deducendis, omni studio adaptare constituit; quem in finem jam antea librum: *Codex für die praktische Diplomatie. I. Th. Götting. 1800. 8.* commentationemque duplicem: *Ueber den Umfang der Diplomatie als Wissenschaft, 1798.* atque *de Finibus artis Diplomaticæ practicæ regundis an. 1800.* ediderat. Auctori cultissimo ceterum, vindicanti Jurisprudentiæ Diplomaticæ principem in hac arte nostra locum, jam HEUMANNUS quodammodo proluisse videtur; (*De re dipl. Imp. Tom. II. præf. p. XXIII. & seqq.*) quid vero majus inde Historia juris ævi intermediæ diplomatica enasci poterit? — Fuerunt ergo *Germani* Gallorum, quibus suos natales & maxima incrementa ars diplomatica in acceptis refert, præcipui nec impotentes æmuli. Præponi vero hoc respectu ex utroque populo multis, gentilibus vero suis omnibus debet LUD. ANT. MURATORIUS *d*). Quæ enim FONTANINI, LAZZARINI & alii contra Germonium vulgarunt, quæ Scip. MAFFEJUS scripsit, quæ MANNI de sigillis collecta edidit, quæque TROMBELLI *e*) de ætate codicum definienda differuit, pulchra bonaque sunt: at si doctrinæ ambitum spectes, rei que codicillaris, omnisque antiquitatis intermediæ scientiam, illis, quorum Muratorius auctor est, nullatenus æquiparanda. Systema porro Diplomaticæ integrum nullus Italarum condidit, cujusmodi libro, rei suæ diplomaticæ accommodato, nec Britan-

Britanni, neque Hispani adhuc usque gaudent; etsi alias in Historia Diplomaticæ literaria antiquiori celebrantur HICKESII, ANDERSONII, RUDIMANNI, RYMERIQUE Britannorum nomina, neque PERESIIUS & RODRIGUESIUS Hispani ignoti sint. Reliqui Europæ populi, quamvis diplomata ad annales suos conscribendos, e. c. inter Danos SUHMIUS, affatim adhibuerint, de ipsa arte nihilominus, si Hungaros excipias, inter quos providentia suorum Regum etiam artis diplomaticæ dignitas sustentatur, perparum philosophati sunt.

a) Titulus operis translati in germanicum idioma est: *Neues Lehrgebäude der Diplomatie, welches in Frankreich von einigen Benediktinern von der Congregation des heil. Mauri ausgefertigt worden. I. Th. Erfurt 1759. 4. — IX. Th. Erfurt 1769. cum 100. Tabulis æneis.* Cum originali istius operis editione caruerim, versione usus, hanc posthæc ubique allegaturus sum.

b) GATTERERI — clarum & venerabile nomen gentibus! — elogium recitatum in confesso Societatis Regiæ Scientiarum Goettingensis, 20. Apr. 1799. in quo merita & virtutes, quibus ille inter Historicos eminuit, expenduntur, exstat in *Commentationibus ejusdem Societatis*, Vol. XIV. Goettingæ 1800. 4.

c) Prodivit auctore JO. SCHWABIO, Philosophiæ in Universitate Heidelberg. Professore: *Brevis introductio in rem diplomaticam* Heidelbergæ 1776. 4. Caret compendium hoc Tabulis æneis non minus, quam artis, cujus præcepta docet, definitione; cujus auctor, ut ipse in præloquio ingenue confitetur, nec vetera emendare, nec nova quæpiam adferre ausus est. Retinuit ergo idem post Eckhardum partitionem Introductionis suæ illam, quæ inde a primordiis artis diplomaticæ a criteriis instrumentorum internis & externis desumpta fuerat, in auxilium vocatis sæpe multumque GATTERERI notionibus & Elementis. — OBERLINUS in *Artis*

Diplomaticæ primis lineis, Argentorati 1788. 8. Tabulis XI. quid in arte diplomatica doceri debeat, ostendere conatus est; disposuit proinde tantum artis capita, quæ summatim indicavit, uberius illa oretenus expositurus suis auditoribus. GRUBERI tandem notissimi sunt libri duo, primus: *Lehrsystem einer allgemeinen Diplomatik, vorzüglich für Oesterreich und Deutschland I. II. III. Theil. Wien 1783. 8.* alter: *Auszug aus dem grössern Diplomatischen Lehrsystem zum Gebrauch der Vorlesungen. Wien 1784. 8.* cujus Compendii editio nova eaque emendata, Viennæ 1789. 8. procurata est.

d) LUD. ANT. MURATORIUS, Bibliothecæ Ducis Mutinensis aliquando præfectus († 1750.) inter præcipuos bonæ frugis polygraphos præteriti temporis collocandus est. Inerat huic viro Antiquitatum omnis ævi, præcipue intermedii, quam amplissima ejus opera testantur, notitia extraordinaria; notari vero hic loci inprimis debent ejusdem: *Antiquitates Italicæ mediæ ævi.* Mediolani 1738. seqq. Fol. Vol. I—VI. E volumine hujus splendoris operis tertio, multa rei diplomaticæ studioso proficua didici, cujus auctor Ecclesiis, quos appellant, accensendus, a nimia credulitate tamen, quam Pyrrhonismo diplomatico aberat longius.

e) JO. CHRYSOST. TROMBELLI scripsit: *La Diplomatica, o sia l' arte di conoscere l' età ed autenticità de' Codici Latini e Italiani*, Bononiæ 1757. Edit. 2. Neapoli 1780. 8. Equidem titulus Diplomaticæ arroganter nimis huic libro attributus est, qui codicum duntaxat ætatem investigat, diplomatum, quorum tamen ad veteris ævi manuscriptorum antiquitatem definiendam sæpe non leve momentum est, nulla ratione habita. Est porro illius auctor conjecturarum ferax, rei literariæ recentioris, (quam saltem G. M. PORCELLI qui secundam libri editionem procuravit, negligere haud debuisset,) ignarus, Germanorum adhuc contemptor iniquus, lectione attamen non indignus.

§. 23.

Fata Artis Di-
plomaticæ
in Hungaria.

Inter litigantes in supremis Regni Hungariæ tribunalibus, controversiæ de fide & integritate

tegritate diplomatum, quibus jura sua evincere conantur, admodum frequentes sunt; memoriam istarum controversiarum, lite per judicem decisa, Archivum, quod *Curiale* vocamus, recipit custoditque. Quæ vero publice inter nos gesta sunt bella diplomatica, libris typo expressis, ad forum commune librarium deducta, *tria* fere sunt, quorum primum plene terminatum est, reliqua sopita potius, quam plane extincta videri possunt. Materiem omnibus dabant diplomata argumenti gravissimi, quæ ut vera sinceraque laudabantur ab his, ut falsa contra nulliusque fidei vituperabantur ab illis. Et *primum* quidem bellum diplomaticum inter nos succendit, opportunitate loci quo degebat fretus, GODOFR. SCHWARZ Iglovia Hungarus, qui originem & fidem famosissimæ bullæ Sylvestri II. Pontificis anni M. qua regnum Hungariæ & hujus symbolum S. Regni Corona S. Stephano Regi a dicto Pontifice collata sunt, & quam MELCH. INCHOFER e S. I. in *Annalibus eccles. Regni Hungariæ*, Romæ 1644. Fol. primus in lucem publicam emisit a), ceu spuriam atque commentitiam argumentis pluribus acriterque aggressus est b). Hoc facinus Schwarzii audax, etiam initia religionis Christianæ, nec non sacram Regni Coronam, Constantinopoli in Hungariam traducendis, gyaris & cæco carcere dignum multis visum est. Enimvero ex omni Historia Regni Hungariæ literaria non memini auctoris cujuspiam, cujus placita a doctis indoctisque scriptoribus, puerorumque jejunis interdum magistris, adeo frequenter fuissent in medium prolata, proscissa, convulsa, dirisque devota, quam istæ eadem theses

Schwar-

Schwarzii. Sine dubio STILTINGUS Hagiographus Belga *c)*, & Patres Soc. Jesu Historiographi Hungari *d)*, quibuscum aliquamdiu idem agebat KOLLARIUS *e)*, doctissimi erant opinionis novitiæ adversarii, acerrimique bullæ, de cujus sinceritate agebatur, vindices. Permultum de hujus fide detraxit BALTH. KERCHELICH Canonicus Zagrabiensis, indigitando incunabula instrumenti controversi commentitia, trahendoque etiam Kollarium in alia omnia. Hodie, vulgarem bullæ textum qui defendat, nemo est amplius.

Majori multo cum artis diplomaticæ apparatu, hujusque vicissim lato incremento, *bellum secundum diplomaticum* a civibus nostris gestum est. Dederat huic ansam diploma S. Stephani Regis, anni MI. in protographo superstes, quo Abbatiam S. Martini Benedictinorum in monte Pañnoniæ prope ad Jaurinum condidit. Natales spurios diplomati huic objecerunt, fidemque ejus in foro & scholis evertere cónati sunt, qui semper latere voluit, doctissimus DAN. CORNIDES, & qui hujus opera & consilio sedulo usus est, JOS. BEN CZUR *f)*. Utrisque se mox opponebant, viri multis non minus nominibus, quam rara eruditione insignes: Comes IGN. BATTYÁNI Præpositus tunc major Capituli Agriensis, non multo post Episcopus Transsilvaniæ, ANT. GÁNOCZI, & JO. CHRYSOST. NOVÁK; quibus iterum iidem illi duumviri responderunt, scriptis *Libellis, quibus Anonymus, authenticam diplomatis de anno MI. in dubium vocans defenditur*. Viennæ 1780. 8. Mirabantur hoc tempore Germani copiam eruditionis diplomaticæ in oris Tibisco & Marusio vicinis *g)*, cujus re-

gulas

gulas celeberr. aliquando Regni Hung. Historiographus GEORGIUS PRAY († 1801.) primus in Hungaria publice docuit.

Tertium tandem bellum diplomaticum civile commovit LAD. KÖVESDI Jurisconsultus Hungarus, impetendo fidem & sinceritatem instrumentorum, quibus Rex Bela cognomento cæcus Præposituram Præmonstratensium Bozokiensem anno 1135. fundavit, Bela subinde IV. 1262. confirmavit, condemnando Transumtum etiam utriusque hujus diplomatis, quod jubente Judice Curiae Andrea Báthory, ad preces Georgii de Fancz, Conventus S. Benedicti de juxta Gron anno 1566. edidit. — In dubium porro vocaverat idem, Capituli Budensis literas anni 1471. quibus metæ Præposituræ prædictæ definitæ sunt, nec non & Præposituræ Saaghiensis cum fundamentale pervetustum diploma, tum Stephani V. 1270. istius confirmatorium, Jesuitis Patribus spurios illos fœtus attribuens, inprimis P. JOANNEM TRSZTYANSZKY nefarii doli accusans, asseverando: hunc detracta de diplomatibus veris civium Carponensium & Zoliensium sigilla, assuiffe privilegiis fictis ac mendacibus h). Nihil ad hæc talia respondendo sprevisse videntur Jesuitæ, ad quos extincta societate alioquin hæc lis jam non pertinet, has opponentis parum eloquentis argutias, quas doctè & non sine petulantiae salibus, neglecto attamen eo quod caput rei erat, resoluit dissipavitque causæ sociorum Jesu amicissimus DAN. CORNIDES, in *Epistola ad L. K. i*) quæ, ut epistolis obscurorum virorum inferatur, est dignissima. Quamvis vero non defuerit adversario animus continuandi porro quo-

quoque certamen hocce literarium *k*), non tamen inventus est quisquam, qui porro cum eodem in arenam voluisset descendere, vel quod diplomata Bozokiensia defensione non egere, quæ regni Iudices probant *l*), putaverint, vel quod victoriæ laudem modicam admodum ex hoc certamine sperari posse judicaverint.

Fundatio Monasterii Rutheni Munkatsiensis, per Theodorum KORIATOVITS, dictum Ducem de Munkács, anni 1360. dignam *quarto bello* diplomatico intestino materiam suggerit. Præluserunt illi jamjam Com. IGN. BATTYANI, & JOANNICIUS BASILOVITS : ille explodendo diploma, (*in LL. eccles. R. Hung. T. I. p. 514. 15.*) quod defensoribus omnino opus habet; hic tuendo illud, dubiis attamen criticorum etiam posthæc adhuc obnoxium, in *Brevi Notitia foundationis Theodori Koriatovits olim Ducis de Munkács*, cet. P. I. II. III. Cassoviæ 1799. 4.

Non sine fructu fuisse concertationes istas diplomaticas, ut bellum fere omne, quantumvis cruentum, emolumenti tamen habet aliquid, certum est. Acuerunt illæ concertantium ingenia, fugataque credulitate ignava, in scholas *m*) & prætoria artem introduxerunt, quæ diplomata rectius intelligere, & cautius dijudicare docet. Cum autem methodi illius, quæ Diplomaticam universalem ævi intermediæ accommodat ad chartas nostras domesticas exponit, tenuia nonnisi adhucusque existent initia; illud enim, quod P. MANCINI *n*) hac in re præstitit, oppido parum est, ipsaque hæc introductio vestibulum duntaxat est Diplomaticæ specialis Hungaricæ : utamur posthæc etiam

etiam oportet Gallorum & Germanorum in diplomatibus nostris examinandis opera, adhibitis in auxilium regulis, quæ a chartis indigenis abstractæ, in operibus indigenarum passim sparsæ sunt: donec filius patriæ existat aliquis, qui ad modum MABILLONII, BESSELI & HEUMANNI, rem diplomaticam Hungariæ illustret confirmetque; quod ego quidem eo certius futurum esse confido, quo major illius artis in Historia Hungariæ, hujusque Jure cum publico tum privato est necessitas, quo major Hungarorum animis amor patriæ, jurisque & consuetudinum a majoribus acceptarum amor insidet, & quo magis populares nostri rerum solidarum cognitione delectantur, præ rerum futilium nugarumque lectione & studio.

- a) Hoc illud erat, quod huic operi imperfecto, nec multarum rerum diviti, in Hungaria, priusquam Posonii 1795. 8. denuo recusum esset, non ubivis obvio, immodicum conciliaverat pretium. Debemus vero novam illam operis recensionem studio Spect. & literatissimi viri IGN. ST. HORVÁTH, qui fragmen continuati operis in autographo nactus, hoc etiam vulgare constituit.
- b) In opusculis, quæ inscripta sunt: 1) *Initia Religionis Christianæ inter Hungaros, Ecclesiæ orientali adserta, dissertatio historico - critica, auctore GABRIELE de juxta HORNAD, Hungaro. Francof. & Lips. 1740. 4.* — 2) *Entlarvte Bulle Pabsts Sylvester des II. die er an den h. Stephanus König in Ungarn abgeschickt haben soll, von D. GOTTFR. SCHWARZ in Rinteln. Lemgo 1777. 4.*
- c) In vita S. Stephani Regis, quæ *Actis Sanctorum Antverpiensibus* ad diem II. Septembris inserta est, recusa vero in Hungaria, Jaurini, 1747. Fol.
- d) Vel hoc facto Jesuitarum Hungariæ manifestum est, quam viles sint nenix illorum, qui sibi aliisque persuadere volebant, Patres Societatis Jesu e composito in elevanda & destruenda veterum instrumentorum fide laborasse.

- e) *Pertinaciter hic bullam Sylvestrinam defenderat in Historia diplomatica juris Patronatus Apostolicorum Hungariae Regum, Vindobonæ 1762. 4. a KERCHELICHIO vero non multo post ad partem oppositam traductus, sententiam suam retractavit in libro: de Originibus & usu perpetuo potestatis legislativæ circa sacra Apostolicorum Regum Hungariæ. Vindobonæ 1764. 8.*
- f) *Ex epistolis, quas ante annos fere triginta amicis suis scripserat CORNIDESIUS intellexi, eundem multo prius argumenta ad convellendum diploma hoc S. Stephani collegisse, quam eidem aperte bellum indixit anonymus (JOS. BENCZUR) in libello: Schreiben an einen Freund, darinn einige Zweifel wider die Aechtheit der Stiftungsurkunde, welche der h. Stephan erster König von Ungarn dem Benedictiner Kloster auf dem h. Martinsberg ertheilt haben soll, den Gelehrten zur Prüfung vorgelegt werden. Wien 1779. 8. Sine mora contra hunc insurgendum sibi putavit, non cum tenui doctrinæ apparatu, IGN. C. BATTHJANI, qui sub nomine AGAMANTIS PALLADII, Responsa ad dubia Anonymi adversus privilegium S. Stephani proposita 1779. 8. publicavit. Succedebant huic continuo RR. VV. ANT. GANOCZI, & CHRYSOST. NOVÁK, quorum ille Libellum castigatum, seu refutationem argutiarum edidit, quas scriptor anonymus cet. Magno - Varadini 1779. 8. hic vero Vindicias diplomatis — conscripsit, Budæ 1780. 8. impressas. Doctæ deinde idem diploma adhuc examinarunt, & ab objectionibus adversarii vindicare studuerunt: Summe Rev. JOS. KOLLER, in Historia Episcopatus Quingueeclesiensis, Posonii 1782. 4. Tom. I. p. 357. & seqq. atque GREG. GRUBER im Lehrsystem einer allgem. Diplomatik. P. II. p. 359 — 367.*
- g) *Vid. Allg. deutsche Bibliothek. III. Anhang zu den BB. XXXVII — LII. p. 1317.*
- h) *Conf. Status ac Synopsis Processus novi simplicis Familiae Dacso contra — Præposituræ Bozokiensis possessores quoad — cum appendice, de Auctoribus fundationem Bozok examinantibus. Auctore L. K. (Pest. 1784. 4.)*
- i) *Vid. GEORG. PRAY, STEPH. KATONA & D. CORNIDES. Epistola exegetica in Dispunctionem ANTONII GANOCZI, — cum appendicula ad L. K. Pestini 1784. 8.*

k) *Conf.*

- k) Conf. ejusd. L. K. *Continuationem Synopsis, cet. & Examen Verböczianum*. Pestini 1785. 4.
- l) Vellem, Lectores omnes relegerent illa, quæ PAFEBROCHIUS in *Propylæo* post AL. WILTHEMIUM speciose disputat de diplomaribus talibus, quibus sua fides & auctoritas coram prætore & assessoriis manet, quamvis eadem merito rejiciant eruditi a testimonio ferendo in re historica.
- m) Anno 1777. primus Diplomaticæ Doctor in Universitate tum Budæ confidente constitutus est.
- n) P. ANT. MANCINI *Compendiaria politioris literaturæ notitia*. Pars II. Posonii 1779. 8.

§. 24.

Si diplomatum usus tam magnus est atque multiplex, quam prius ostensum est; quantam esse putabimus præstantiam & utilitatem artis illius, quæ circa thesauros istos ævi veteris intelligendos, examinandos, & juste æstimandos versatur? Sane ex quo Historiarum fidem, diplomatum auctoritate recte definita & rite vindicata metimur, ridemus illorum commenta, qui, vel ex ignorantia, vel turpi assentiendi libidine, origines gentium & familiarum superiorum quam par est reducunt, privilegia Alexandri Magni a), Cæsarum Romanorum, Attilæ b), cet. contestantur, somniaque male sana, pro eo quod verum est, venundant: vel qui e converso, vana ac temeraria suspitione laborantes, supposititias falsariorum lacinias ubique metuunt. — Universe, fraudis hodie minus fit; e patrimoniis suis non amplius exturbantur legitimi hæredes falsarum literarum testimonio; — Historiæque testi temporum & luci veritatis integritas sua candorque restitui cœpit, ex quo ars diplomatica perpetuus illius custos & rigidus satelles est.

Usum, vel maximam potius illius necessitatem, experiuntur illi quoque, qui e Codicibus antiquis lectiones variantes auctorum sacrorum & profanorum operose excerpunt, editionesque Classicorum, aut SS. Patrum (ad modum Benedictinorum e Congr. S. M.) emendatiores procurant. Ipsum denique subitarium incrementum artis haud ita pridem inventæ, incremento artis cujusvis alterius majus, nos de præstantia & utilitate ejus optime sperare jubet.

a) „ Probabile est — inquit PETR. de REWA, de
 „ *Monarchia, & S. Corona Regni Hungariæ*, apud
 „ SCHWANDTNERUM in *Scriptoribus rerum Hung.*
 „ *Tom. II. p. 829.* Slavos, hoc ipso nomine, ini-
 „ tio Monarchiæ tertiæ Græcæ, & ante claruisse;
 „ quod Alexander M. Græci Imperii fundator pot-
 „ entissimus, eorum in bellis strenua usus opera
 „ fuerit, eos collatione plagæ meridionalis auxerit,
 „ & nomen eorum decorum, *eximio illustraverit*,
 „ *privilegio*, quod jam sequitur, tum in honorem
 „ eorum appositum, tum quod publice me conscio
 „ non exstaret. “ — In pluribus jam libris ob-
 „ viam fabulam inspidam, hic vel leviter attigisse
 „ fatis esto.

b) Teste EDERO V. C. Valachi Transilvaniæ, nostra
 admodum ætate, in publico illius provinciæ Tribu-
 nali, ad literas metales Attilæ, in charta lineæ,
 hodierno Valachorum idiomate, atque hodiernis
 ipsorum characteribus scriptas provocarunt, iisque
 vetera sua jura in cujusdam pagi territorio confir-
 mare adnisi sunt. Vid. *Supplex Libellus Valachorum Transilv.* — cum notis historico-criticis I. C.
 EDER. Claudiopoli, 1791. 4. p. 59.

§. 25.

Partitio Artis

Diplomaticæ.

Absoluitur ea tribus partibus: *Graphica*,
Semiotica, & *Formularia*. Et Formularia quidem
 criteria tradit, quæ autographa cum apogra-
 phis habent communia; priores contra partes,
 circa

circa characteres versantur, solis autographis proprios. Etenim *Graphica* (*Schriftkunde*) literarum, & vocabulorum, cum singulorum, tum plurium etiam in eadem serie decurrentium, scripturam cuique ævo propriam, nec non instrumenta scriptoria demonstrat; *Semiotica* vero, (*Diplomatische Zeichenkunde*) solemnia diplomatum signa recenset & examinat. Ad *Formulariam* pertinet, verba & dictiones diplomatum solemnes enarrare, earumque structuram & dispositionem cuique ævo propriam explicare. Omnium harum rerum, nonnisi primas lineas in hoc libro ducere studui.

*) Retinendam esse putavi hanc Artis Diplomaticæ partitionem, a GATTERERO primum adhibitam, de cuius bonitate ipso usu diuturno edoctus sum. Contra vero displicet mihi etiam nunc Diplomaticæ in *theoreticam* & *prædicam* divisio, quam in præfatione ad introductionis hujus editionem primam jam repudiavi, & quam artis indoli parum convenire vel e collatione Diplomaticæ prædicæ, quam nuper GATTERER edidit, cum Diplomatica ejus theoretica manifestum evadit. An OBERLINI V. C. methodus tabellaris, ad speciem subtiliter Diplomaticam adumbrans, imitatores nata sit aliquos, nescio. — GR. GRUBER, (*in Programmata didactico, super optima methodo scribendi discendique artem diplomaticam*, Viennæ 1795. 4.) facilius multo disposuisse videri potest, qui, retenta artis definitione GATTERERO propria, Diplomaticam quatuor sectionibus voluit absolui, ita, ut in *prima* tirones docerentur diplomata legere, in *altera* eadem intelligere, in *tertia* dijudicare, in *quarta* demum parte eadem adplicare, „*permiffa continuo cum theoria praxi.*“ Hoc ergo, cum in parte qualibet fieri debeat, quæ adhuc necessitas partis quartæ esse poterit?

§. 26.

Qui libri cuique capiti illustrando & con- Bibliotheca
firmando serviant, semper, ubi locus me mo- diplomatica.

nuerit, dicturus sum. Plerique in BARINGII *Clave diplomatica* ad annum usque 1754. recensiti sunt, quorum catalogum suis spicilegiis suppleverunt continuaruntque H. G. FRANKE a), OBERLIN l. c. WILL b). Omnium horum opera in rem suam usus est F. AUG. HUCH, († 1794.) scribendo: *Versuch einer Literatur der Diplomatik*, Erlang. 1792. 8. Cujus libri sectione prima, fata Artis diplomaticæ auctor prosecutus est, altera vero Bibliothecam diplomaticam adornavit, seu auctores, qui sive de re diplomatica univérse, sive de singulis ejus capitibus aliquid ediderunt, interdum cum adjecta crisi, recensuit. Decennio proxime præterito, opinionum conflictu & belli tempestatibus sævo, pauci erant, qui Arti diplomaticæ nomina sua dederunt, eratque illius proventus, si SCHOENEMANNI nuper admodum inceptum opus demas, quo auctor præstantissimus novissima etiam artis opera complexus est, exilis, collatus cum ubertate superiorum temporum. Qui magna & multa volumina horret, multorum lectione supersedere potest, si BARINGII, GATTERERI, GRÜBERI, SCHOENEMANNIque libris sedulo & diligenter utatur: rem diplomaticam contra penitus scrutari nulli licebit esse tam felici, nisi in Bibliotheca bene instructa habitet, ad tabulariorum præterea penetralia admittatur, prudenterque utriusque frui possit beneficio.

a) Adjecta est hujus compendiosa bibliotheca diplomatica, HOFMANNI & OBERKÄMPII lucubrationibus de re diplomatica. Lips. 1758. 4.

b) Vide hujus *Kleine Beyträge zu der Diplomatik und deren Literatur*. Altorf. 1783. 8.

DIPLOMATICÆ P A R S I. G R A P H I C A.

CAPUT I.

DE LITERARUM SCRIPTURA.

§. 27.

Quamquam literarum usus, secundum Plini- Literarum in-
um tam vetustus est, ut de ejus determinata ventio.
origine nihil quidquam constare possit: prope
tamen ad verisimilitudinem accedit, inventio-
nis literarum, humanum ingenium propemo-
dum superantis laudem, Phœnicibus attribuen-
dam esse. A Phœnis & Aegyptiis illarum co-
gnitio ad Hebræos & Græcos, a Græcis ad
Romanos, a Romanis tandem ad Germanos,
reliquosque Europæ populos barbaros transit.
Ad Hungaros monachi itali germanique simul
cum doctrina christiana illam propagarunt.

*) Initio non scribebantur verba, sed exprimebantur
potius res ipsæ pictura qualicunque. Scriptura *rea-*
lis proinde, cum pluribus suis speciebus, multo anti-
quior *literali* est. Universe rem hanc egrègie illu-
strarunt, ANT. JO. GOGUET, libro a juventute
studiosa inprimis diligenter consulendo: *Von dem*
Ursprunge der Gesetze, der KK. und der WW.
Th. I. S. 171. & sequ. atque GATTERER in *Ele-*
mentis Artis Diplomaticæ §. 72. Quibus addi de-
bet HEUMANNI *Conspéctus reipublicæ literariæ*, re-
cogni-

cognitus a I. N. EYRING. Hannoveræ 1791. 8. P.
I. pag. 259 — 279.

**) Vetus est inter Hungariæ & Transilvaniæ eruditos quæstio: an Hungari sacris christianis nondum initiati, ac proinde priusquam alphabetum latinum quo nunc utimur adoptarunt, literas scripturæque literalis usum tenuerint? Adfirmavit id omnium doctissime & pertinacissime, argumentis undequaque collectis, atque, præter morem suum, invidiose adeo contra dissentientes propugnavit, immortalis MATTHIAS BELIUS, in exercitatione, quam scripsit, de *vetere Litteratura Hunno - Scythica*, Lipsiæ 1718. 4. Aegerrime vero idem exemplis Scripturæ illius, quam *Hunno - Scythicam* appellabat, caruit, cujus ne minima quidem fragmenta, omni adhibita cura & animi contentione, in præmium magni laboris sui reperire potuit: quamvis Bibliothecam ill. Collegii quod Debrecini est, librum hujusmodi, vetustis literis hungaricis, orientalium more a dextra sinistram versus scriptum, olim possedisse narrent, fragmentumque libelli cujusdam ascetici, vetustis hujusmodi characteribus descripti, literatissimus aliquando DAN. CORNIDESIUS amicis pluribus contemplandum obtulerit. (WALLASZKY *Conspectus reip. lit. Hung.* p. 47.) Quid? Quod nuper admodum SAM. GYARMATHI V. C. in Grammatica linguæ Hung. (*Okoskodva tanító Magyar nyelv mester.* I. Darab, Kolosváratt 1794. 8.) specimen inscriptionis parietinæ literis istius modi obsoletis conceptæ, lectorum oculis, incisum ligno, exhibuerit. At enimvero omnium horum testimoniorum auctoritate rem ad liquidum deductam necdum esse oggerunt alii; cum ipsa adeo societas erudita Hung. Debrecinensis, in Grammatica lingv. Hung. (*Magyar Grammatika*, Bétsbenn 1795. 8.) quam eidem debemus, sine ira & studio inscriptionem a Gyarmathio prolatam, hungaricis literis factam esse neget, interpretes vero illius GYARMATHI & KATANCSICH, (vid. hujus *Comment. de Istro ejusque adcolis*: Budæ 1798. p. 309.) se mire torquentes, argumentum illius vel maxime dissonans & diversum eruant, nec reliqua testimonia dubio omni majora sint. Vulgarunt equidem Auctores etiam novi operis diplomatici, Tom. II. §.

53. Not. D. & §. 159. Tab. XIV. duplex alphabeti veterum Hunnorum exemplum, quorum alterum ex HICKESII *thesauro* desumptum, aliquantum a Beliano diversum est, sed nullo de valore illius adjecto iudicio, nisi esse illius cum Runico quandam similitudinem, id quod PRAJO etiam placuisse videtur, qui alphabetum Belianum ad Gothos Transilvaniae aliquando incolae pertinuisse suspicatus est; (Conf. INNOC. SIMONCHICZ *Dissert. de Numismatica Hung. Diplomatica accommodata*. Vien. 1794. 8. pag. 112 — 115.) desiderante FRERETO (*Memoires de l'Académie Roy. des Inscriptions*, Tomo VI. pag. 618.) vel minimum cognationis nexum, spectatis literarum figura, ordine, nomine & potestate, inter alphabetum illud Hiccesianum & omnia reliqua, quæ eidem aliquando erant cognita. — Ea certe, quæ THURÓCZIUS, BÓNFINIUS, & OLÁHUS narrant de bacillis ligneis, quibus Siculi Transilvaniae notas incidunt adhuc usque, quibusque ad instar dicarum utuntur, ad adstruendam BELII hypothesein parum conferunt, ut adeo porro quoque digni vindice nodi remaneant: an Hungari ante admissam in Hungaria fidem christianam, revera proprios sibi literarum characteres, quos subinde adscitis latinis, in detestationem ethnicæ superstitionis dimiserunt, adhibuerint? Nonne potius hoc statuantes alphabetum quodpiam peregrinum perperam hungaricum esse sibi aliisque persuaferint? Distinxerintne porro auctores & defensores huiusmodi alphabeti acute satis scripturæ realis classes omnes a scriptura, quæ literalis est? Et si eisdem humani fortassis contigit aliquid, nonne exercitationes de *Literatura Hunno-Scythica* eodem loco habendæ sint, quo habentur Commentationes illæ, quæ de *Bibliothecis & Societatibus Scientiarum antediluvianis* scriptæ sunt?

§. 28.

Omniū ergo Nationum, quotquot ad huc cognovimus alphabeta, a punico, tamquam communi stirpe, suam trahunt originem. Nec obstat, ut exemplo aliquo utar, magna literarum hebraicarum a latinis differē-

Diversitas formæ literarum,

rentia; cum hæ non longius forma distent ab illis, quam a latinis scriptura Germanorum cursiva, certissime ab romana vetere descendens. Mutantur calami literæque sicut pilei. Nobis ad literarum latinarum variationem tantum, quæ ævo medio contigit, attendendum est. Hanc, cum ratione connectendi literas inter se invicem, quæ itidem variabat, qui probe tenuerit, næ ille cujuscunque sæculi ætatis mediæ scripturas legere, atque de illarum ætate judicare poterit.

§. 29.

Quare alpha-
beti latini
duntaxat ratio
habetur?

Vix esse potest cuiquam obscurum, quare Diplomaticæ præcipue Hungariæ studiosos, de variatione literarum latinarum tantum sollicitos esse jubeam. Hungariæ enim Reges ad Josephum II. (qui idiomati teutonico favebat) nullam nisi latinam linguam in diplomatibus conscribendis admiserunt, nec posthæc aliam (nisi Hungariæ iste honor obtingat) facile admiffuri sunt. Characteres adhæc, quibus Hungari, Germani, Slavique nostri utuntur, dum in vernacula scribunt, latinæ sunt originis. Id una mecum doleas oportet, linguam hungaricam, numero, & svavitate, nec non verborum pondere, & flexionis facilitate, multis Europæ linguis anteponendam, serius & negligentius quam debuisset scribi colique cœptam esse. Antiquissima, quæ supersunt, styli Hungarici specimina, non sine voluptatis sensu, a GE. PRAY ex vetusto Codice sæc. XIII. desumpta, in JO. SAJNOVICS *Demonstratione idioma Ungarorum & Lapponum idem esse*, Tyrn. 1770. 4. p. 4. & seqq. & in RR. KOLLER — qui ipsemet

codicem eundem recensuit — *Historia Episcopatus Quinqueecclesiensis* Tom. I. p. 414. legis a). Antiquissimum typorum hungaricorum specimen quod in Bibliotheca Pestana ostentatur, *Epistola S. Pauli* sunt, quas BENED. KOMIATI in gentis suæ idioma convertit, atque Cracoviæ 1533. 8. edidit. Idem ego antea pro primo etiam habui: est autem ætate multo superius illud, quod oratione & carmine sacro inventionem manus dextræ S. Stephani Regis celebrat, & quod Parochia Jegenyensis in Transilvania possidet, utpote quod Norimbergæ jam anno 1484. typis expressum est b). In diplomatibus tandem & chartis, gentis Hungaricæ idioma, a solis, quantum memini, Transilvaniæ sæc. XVI. & XVII. Principibus c), & privatis Hungaris d), ab utrisque vero rarius nonnisi, ut plurimum solæcismis & barbarismis inquinatum e), frequentius autem multo, quod mireris, a Turcis, populi Hungarici & libertatum ejus injustis & barbaris oppressoribus, fuit adhibitum f). Unicum diploma regium hungarice conscriptum illud est, quo Josephus II. an. 1789. die 18. Dec. Hungaris Comitia proxime indicenda est pollicitus. — *Germani* Hungariæ cives, sæculo XV. & prouti non temere suspicor maturius adhuc, literis contraxerunt dialecto ipsis propria g). Nec regum adeo ejusdem ævi, e. c. Elisabethæ Alberti regis viduæ, defunt literæ Germanicæ, quas vel Germanis jure civitatis hungaricæ gaudentibus inscripserunt, vel quæ ab illis, e. c. Matthia Corvino, ad vicinas Germaniæ provincias, ad Regni Hungariæ Coronam tunc pertinentes, datæ sunt. — *Bohemii* sæc. XV. sub auspiciis Giskræ ducis domesti-

mesticis bellis, quibus Hungaria dilacerabatur, sese ingerentes, idiomatici slavico inter majores nostros propagando permultum profuerunt. Vidi autographas literas privatas an. 1453. in Comitatu Scepusiensi bohemico idiomate scriptas; adsunt etiam Regum Hungariæ diplomata slavica *h*). Inter rariora denique antiquitatis hungariæ monumenta pertinet, diploma S. Stephani *græcum*, quo monasterium sacrarum virginum in valle Vesprimiensi condidit transfutum a Rege Colomanno, expressum in *PRAII. Vita S. Elisabethæ viduæ & B. Margaritæ Virginis*. Tyrn. 1770. 4. p. 221.

- a) Desumptum est specimen hoc, quod adhuc inventum est primum, e Codice missali membranaceo Bibliothecæ Insignis Collegiæ Ecclesiæ Posoniensis ad S. Martinum, inter liturgicos Nro. LXII. Judicio RR. KOLLERI idem circa finem sæc. XII. initiumve XIII. scriptus est: eademque erat *PRAII*, scrutatoris talium rerum sagacissimi (lib. cit. pag. 249.) de ætate illius sententia. Versus finem ibidem legitur: *Sermo sacerdotis super sepulchrum*, hungarice conceptus, brevis ille quidem, at si antiquitatem ejus spectes, usumque loquendi & scribendi Hungarorum, qui tum obtinuit priscum, ab hodierno non minus abhorrentem, quam stylus XII. Tabularum a stylo ævi Ciceroniani abhorruit, quam maxime memorabilis. Inter tot ergo, quot nunc Hungaria docta censet Doctores Linguae & Literaturæ hungariæ, optandum est, ut aliquis existat, qui e. c. munus Professoris sibi delatum adeat, scripto in parænesim illam funebrem docto & perpetuo commentario. Exordium ita habet: *Latiatue feley m zuntuchel mic vogmuc. Ysa pur es chomuv uogmuc. Meny milosthem terumteue eleve miv isemucut adornur etc.* — Digna est attentione & studio philologorum Hung. etiam *vita B. Margaritæ Virginis*, Regis Belæ IV. filia, cujus auctor ætate ad obitum illius proxime accedere videtur, & quam
- ex

ex exemplari apographo, sæc. ut suspicatus est XV. PRAY lib. cit. pag. 251 — 577. edidit.

b) Testis est hujus rei loci Parochus (ANT. BARTALIS) in *Notitia Parochiæ Jegenyensis*. Claudiopoli 1794. 8. pag. 122. 125. Carmen incipit: *o deucheo-seeges zenth iob keez, mel'et' magiar ohaitua neez, draagha genche neepeunknec, nag' eorcome ziusunknec. cet.*

c) Huc pertinent horum diplomata legum in Comitibus Transilvaniæ latarum confirmatoria, quale illud est Joannis II. anni 1565. quod I. C. EDER V. C. in amplissima sua diplomatum & scriptorum Historiam & Jus utrumque Hungariæ & Transilvaniæ illustrantium collectione possidet. — GABRIELIS BETHLEN plura & ipse legi protographa.

d) Inter literas familiæ de KAZA proprias, charta prostat, quietantiam vulgo dicunt, Abbatis de Tyhon anni 1478. hungarice scripta, qua ego quidem antiquiorem nullam scio. Sæculi XVI. adeo chartæ hungariæ raræ adhuc sunt.

e) Immiscebantur nimirum vocabula germanica, slavica, præcipue latina (inspice *approbatas*, & *compilatas* etiam, *Constitutiones Regni Transilvaniæ*) orationi & dictionibus hungaricis, flexione & terminatione ad leges Grammaticæ hungariæ facta, id quod Germanis etiam haud ita pridem adhuc solemne fuisse notum est. Vidi recentioris ævi haud pauca diplomata, quorum prologus & epilogus latino idiomate scripti sunt, hungarico textus reliquus. Sunt, quibus hodie puritatis studium in loquendo scribendoque lingua patria jam nimium esse incipit.

f) In Hungaria & Transilvania, inter alias dominationis Turcicæ reliquias, chartarum etiam, cum turcica tum hungarica dialecto scriptarum, tantus adest numerus, ut operæ omnino pretium faceret diligens ille Hungarus, qui *Diplomatarium Hungarico Turcicum* ederet. Videntur autem Turci, qui cum imperio in Hungariam mittebantur, ut plurimum Rascianos Neogræcosque habuisse ab epistolis, ferè suæ dominandi libidinis interpretes.

g) Est mihi in manibus instrumentum originale germanicum anni 1416. statuta & consuetudines collegii textorum (*die Wollenweberzunft*) in tribus
Sce-

Scepusii urbibus, Leucsoviensi nimirum, Kesmarcenti & Leihicenti, in se continens; quod hic loci tam ob argumentum quod tractat, quam ob stylum, quo ineunte sæc. XV. Scepusienses usi sunt, commemorare debui.

- b) Instrumentum illud slavicum vel potius bohemicum prostat, in copiosa rerum ad Historiam Hung. illustrandam pertinentium collectione, NIC. JANKOVITS viri spectabilis, antiquitatum Hungaricarum non minus periti quam amantis, cujus testimonio fidedigno id, quod paullo ante (not. d) de instrumento hungarico notavi, quo nempe nullum adhuc innotuit antiquius, nititur. Bohemiam attinent, quæ SOMMERSBERG in *SS. rerum Silesiacarum* vulgavit Regum Hung. e. c. Ludovici II. diplomata *bohémica*. In Tabulario tandem gentis Illyricæ, jam civitate Hungara donatæ, Carlovicensi, vidi auream bullam Stephani reguli Servizæ an. 1348. lingua & charactere literarum genti illi propriis exaratam; quo vero tempore dialectus *Croatica* simul esse cœperit diplomatica, id eruditis Croatiæ civibus definiendum relinquitur. — De instrumentis *Valachica* (romana rustica) conscriptis, nihil habeo, quod pro certo adferam.

§. 30.

Latini idio-
matis late pa-
rens domina-
tio.

Etiam in alias Europæ linguas scholastico-
rum idioma sævit, minus attamen, nec tem-
pore tam longo, quam in Hungaricam, ut ex-
cusari non possint Ludovicus I. & Matthias
Corvinus Reges, qui culturam & dignitatem
idiomatis gentilitii negligentes, istud a sæva
linguæ latinæ tyrannide tantum non penitus
opprimi passi sunt: quemadmodum illa linguam
græcam oppressit, quæ Siculis & Neapolitanis
diutissime erat diplomatica, magna e sæc. XI.
XII. XIII. diplomatum græce scriptorum copia
in archivis utriusque Siciliae adhucdum super-
stite; nec non *arabicam*, quæ in Hispania &
Sicilia sub Arabum imperio in diplomatibus

itidem viguit. Soli *Russi* a), & qui præter hos ritu græco sacra faciunt ab ecclesia latina diffidentes b), diplomata latine scripta & olim ignorarunt, & adhuc ignorant, secuti Byzantinorum exemplum, e quorum re diplomatica sub Phoca tyranno (602.) dialectus romana perpetuum exulare iussa est. Inter Christianos Romanæ ecclesiæ affeclas, *Anglosaxones* in Anglia primi erant, qui lingua ut dicebantur *laica*, chartas & diplomata scribere tentarunt, testantibus id documentis, quæ e sæc. VIII — XIII. supersunt. Ibidem a sæculo XI. ad XIV. lingua Wilhelmi conquestoris *francica* cum anglica & latina de principatu quasi contendebant, triumphante tandem vernacula, quæ edicto Eduardi III. 1362. forensis & diplomatica facta est. — Pro vetustissimo instrumento, quod superest idiomate teutonico, GATTERER c) post WIGUL. HUNDIUM chartam habuit divisoriam inter Waldeckios Bavariæ regionis dominos anni 1170; SCHOENEMANNUS contra d), nullum an. 1217. agnoscit antiquius. Neque apud *Batavos*, *Hispanos* *Italosque*, diplomata nativa dialecto supersunt, quæ sæculum XIII. ætate anteverterent. — Lingua *Bohemica* sæc. XIV. ad dignitatem diplomaticæ pertigit e); In Gallia, vero chartis vestigia linguæ *romane rusticæ* jam sæculo IX. observantur: at lingua Gallorum hodierna diploma scriptum antiquius an. 1133. inventum nondum est. Quamvis autem subinde linguarum latinæ, francicæ hodiernæ, & romanæ rusticæ in chartis & diplomatibus Gallia usus promiscuus & arbitrarius fuerit: dominari latinæ, jubentibus ita Ludovico XII. præcipue

Fran-

Francisco I. Regibus, e foris & cancellariis regni Galliæ proscripta, gentilitiæ locum omnem cedere debuit *f*). — Omnium scilicet populorum Europæ, quos barbaros Latium nuncupabat, idioma maternum, diu admodum, minus cultum minusque politum erat, magisque ab grata sermonis latini pronuntiatione abhorreere videbatur, quam ut Grammatici illorum temporum sibi persuasissent, fieri posse, ut illud vel alphabeti romani characteribus exprimi, vel artis legibus comprehendendi posset. Id quoque fortunæ, & propagationi linguæ romanæ ævo medio non parum profuit, quod clerici fuerint, armis agrique cultura aliis relicta, qui chartas describebant, atque Cancellariarum tenebant subsellia. Habebant isti linguam latinam sibi aliunde familiarem, cui ubique conservandæ & propagandæ, nunquam non omnem impenderunt operam.

- a) Inde a cognito literarum usu, Russis lingua nativa nunquam non simul erat diplomatica; commemorantur ergo in annalibus jam sæc. X. tabulæ solemnes idiomate genti proprio descriptæ. Originale, quod velut e fluctibus superiorum temporum servatum est, primum, alii circiter anni 1150. esse dicunt, alii (*Götting. Anzeigen* 1801. St. 35.) anni 1262.
- b) Legi Regulorum Rasciæ sæc. XV. latinas literas, legi itidem Principis Moldaviæ & Valachiæ Radulii Michniæ diploma solemne anni 1617. hungaricum. Sunt vero hæc talia exceptiones nonnisi a communi regula.
- c) Vide hujus *Commentationem de linguæ Germanicæ epocha diplomatica*, in *Commentat. Soc. Reg. Scient. Götting.* per an. 1779. Vol. II. Götting. 1780.
- d) Facit vero hoc vir sagacissimus, quantum adsequor, nequaquam temere. Vid. Ejusd. *Versuch eines vollständ. Systems der Diplomatiek. I. Bd. S. 290. & sequ.*

- e) FR. CARL. ALTER *Beitrag zur praktischen Diplom-
matik für Slaven, vorzüglich für Böhmen, Wien 1801.*
8. Vorbericht S. XVIII.
- f) Uberius hæc discussa sunt, in novo opere dipl. (N.
L. G. d. Diplom.) VI. §. 504 — 527. quocum
conferri debet SCHOENEMANN l. c. pag. 261. &
sequ.

§. 31.

Characteres literarum primos simplicissimi Variatio for-
mos fuisse dubitari nequit. Tales Augusti quo- ma literar. ab
que Imp. ævum tulit; quod uti de eo, quod Augusti ævo
elegans & pulchrum est, aptissime omni- ad nostrum
no judicabat: ita inferioris ævi obtorta, & usque.
fucata literarum forma, delectari potuit mi-
nime. Lineas ergo, quibus literarum partes,
ætas romana incorrupta adhuc expressit, non
inepte ductus literarum appellabimus *origina-
rios & primitivos*, quibus opponemus *adventi-
tios*, quorum accessione temporis progressu li-
terarum species, a prima sua simplicitate con-
tinuo magis magisque degenerans, tandem in
crispatam monstrosamque illam, opinione ævi
barbari elegantem, formam descivit, quam
vulgus *gothicam* appellat, & quæ in scriptura
Germanorum hodieque, dum vernacula scri-
bunt, est conspicua. Stupendus ille labor
erat, quo alphabeta pleraque omnia cum ve-
teris tum inferioris ævi delineata, imprimis
autem literarum latinarum mutationes & vicis-
situdines sigillatim, prolixius forte & operosius
quam optes, adumbratas a) in novo opere di-
plomatico cernimus. Scopo, quem in hoc
libro propositum habeo, suffecerit alphabeti
latini illas metamorphoses cognovisse, quas
Tab. I. exhibet; usus instrumentorum origina- Tab. I. Nro. 5.
lium, cuique in talia penitus inquirenti, plu-

ra dabit, in scholis vero supplebit tabellam illam literarum latinarum genealogicam, reducendo illam ad Augusti usque ævum, fidelis juventutis, annisque & captui ejus accomodata institutio.

a) Vid. *N. Lehrs. d. Diplom. II. §. 162. — 439. III. §. 1. & sequ. cum Tabulis æneis huic Tomo annexis XX — XXIII.*

§. 32.

Literæ 1) majusculæ, 2) minusculæ.

Dividuntur literæ in *majusculas* & *minusculas*. Hæ ab illis non tam magnitudine, quam ductuum, e quibus coalescunt, forma discrepant. Majusculæ lineis rectis acutisque distinctæ, *Capitales* appellantur; quæ si a celeritate in scribendo, cui lineæ curvæ præ rectis opitulantur, rotundam nanciscantur speciem, *Uncialium* passim cognomen accipiunt, quarum formam & a capitalibus distantiam, facile, ut reor, quisque concipit. An vero novem duntaxat Uncialium habitum possint induere, quod PP. Benedictinis visum est; (Tom. III. §. 33.) vel duodecim præcise, quod mihi etiam antea præeunte GATTERERO placuit, vel plures adhuc? In id vero longius inquirere, ni docte nugari lectoribusque nauseam movere velim, operæ pretium non est.

§. 33.

Minusculæ a), minutæ b), cursivæ.

Minusculæ, vel nexu inter se continuo scriptæ sunt, vel sine omni connexionе subsistunt. Has *minutas*, illas *cursivas* appellare placuit. Cursivis, dum calamo scribimus utimur; conveniunt minutæ cum hodiernis typographorum literis. Ex quadruplici hac literarum

rum forma, quadruplex etiam scriptura existit: *Capitalis, Vncialis, Minuta, & Cursiva*, quarum quælibet vel *pura*, vel *mixta* esse solet.

*) JUST. LIPSIUS, RICHARDUS SIMON, & plerique omnes archæologi superioris ævi, veteribus Romanis, ad incursiones usque barbarorum, non nisi majuscularum literarum usum fuisse cognitum, contendunt. Hæc sententia jam hodie placere nulli potest; etenim præter scripturam majusculam, etiam minuscula usos fuisse Romanos veteres, evictum est.

§. 34.

In Hungaria 1.) Diploma nullum prostat omnino descriptum literis majusculis, quæ quidem in diplomatibus Angliæ ante sæc. VIII. in Galliæ vero, Germaniæ atque Hungariæ chartis atque diplomatibus nunquam dominatæ sunt. Contra vero

Epochæ istarum literarum in Hungaria.

2.) Inscriptiones operum artis e. c. sigillorum, lapidum, cet. ad sæc. usque XV. factæ sunt literis majusculis. Minusculis literis factam perigraphen vidi in sigillis Elisabethæ reginæ, Wladislai I. Joannis Hunyadi, & Matthiæ C. secreto. In numis Hung. majusculæ nunquam non sunt adhibitæ a).

Tab. V. Fig. 9.

3.) Fuisse aliquando usum aliquem etiam *literarum longiorum* in diplomatibus domesticis, exemplo sunt literæ S. Stephani an. 1001. in quibus verba versus primi, invocationem Dei regisque nomen & titulum exprimentia, nec non subscriptio, longioribus literis, minusculis attamen, quibus paucae duntaxat majusculæ interjectæ, descripta sunt. Eundem morem secutus est Notarius Andreæ I. in hujus, quod unicum a Rege isto superest, protographo an.

Tab. II.
Nro. I.

1055. nisi quod in hoc diplomate literæ graciles in longum protractæ eæque majusculæ lineam primam integram occupent; in S. Stephani vero, post Regis titulum, in primo versu adhuc prologi verbis aliquot, caractere quem reliquus contextus habet scriptis, locus datus sit. In literis Andreæ II. quæ vidi tribus quatuorve, eandem hanc observavi lineam primam absolvendi consuetudinem, in quibus attamen longiores literæ jam cum auspicii formula desinunt; eademque ista formula, cum regio BELÆ (IV.) nomine, in hujus diplomate anni 1252. bulla aurea corroborato, singulari elegantia coloreque diverso, literis non jam amplius longioribus, majoribus attamen & rotundis picta est. (Vid. sequ. §. 46.) Subinde sola initialis nominis regii, sæpius initiales etiam regnorum quæ in titulo recensentur, reliquis eminentiores sunt *b*), constructæ & intricatæ, ut vix agnosci possint, ad leges gustus gothici (Germanis: Fraktur,) cujus formæ literis sæc. XV. interdum primus ordo diplomatum continuo scriptus est, quarumque usus in bullis vel novissimis summorum Pontificum est adhuc aliquis.

Tab. II. Nro.

1. 2. 3.

4.) Literæ minutæ, quantum e paucissimis, quæ nobis e sæc. XI. & XII. supersunt, chartis autographis, atque analogia cum exteriorum chartis *c*) judicare licet, ad Andream II. immo Belam usque IV. præ cursivis dominatæ sunt, irrepentibus subinde in diplomata continuo majori numero cursivis, donec tandem

Tab. II. Nro.

4. 5.

5.) Ab exitu inde sæc. XIII. scriptura (minuscule) cursiva ceu jure postliminii, cum antea jam sæc. V. & VI. in antiquissimis, quæ supersunt, chartis, fuisset dominata, denuo regna-

regnare cœpit, admixtis eidem rariuscule c. c. in principio capitum & versuum, literis alterius speciei.

6.) Character scripturæ istius cursivæ ille est, quem sæc. XVI. *longobardicum*, subinde *gothicum*, id est *barbarum*, dixere, quem vero rectius *scholasticum*, seu *neogothicum*, etiam *monasticum*, appellaveris. Sæviebat hoc cincinnatum, apicibusque otiosis deforme scribendi genus sæc. XIV. & XV. in omnes literarum species, cum in diplomatibus publicis, tum *inprimis* in chartis privatorum librisque manuscriptis, & artis operibus d), placuitque Europæis non minus, quam habitus ædificiorum templorumque, quæ ex illo tempore supersunt, gothicus, cujus magna est similitudo cum literarum neogothicarum specie. Absterisit squallorem hunc tandem de notis alphabeticis, quem ævo barbaro contraxerant, ars typographica; impediri tamen non potuit, quo minus in ipsos typos adeo, gothicus ille horror irreperet, ut veteres editiones sæculi adeo jam XVI. librorum de jure utroque, Scholasticorumque argutiis palam faciunt.

7.) Excipi ab hac regula debent solemnia nonnulla diplomata Caroli Roberti & Ludovici I. Regum sæc. XIV. in quibus scriptura, *Italica*, quam dicunt, elegantiam sectatur, traductis nimirum in comitatu illorum Regum melioribus scribis, e regno Neapolitano in Hungariam e).

a) Conf. Tabulæ æri incisæ, quibus *Notitiam Reipublicæ Hungariæ* Budæ 1801. 4. illustravit STEPH. SCHOENVISNER, Abbas RR.

Tab. III.

Nro. 12.

- b) Vidi diplomata regia sæc. XIII. in quibus prima nominis Regii diploma exordientis litera deest; vidi in Tabulario urbis Soproniensis instrumentum Belæ IV. 1269. in quo nomen & titulus Regis ita expressa sunt: *ela Dei gratia, ungarie, almatie, roatie, ame, ervie, allicie, odomerie, umanieque rex*. Negligentiæ, vel etiam defectui callographorum, quos passim distingui a communibus scribis meminimus, & quorum intererat initiales literas reliquis ornatius depingere, hiatus isti debent tribui.
- c) GATTERER *Elementa* A. D. §. 73.
- d) In calicibus, patinis, campanis cet. inscribendis, artifices multum exercuerunt ingenium male sedulum. Inscriptiones in metallo factas caractere gothico, difficillimas lectu semper expertus sum.
- e) Vidi legique huiusmodi diplomata ex archivo Comitum de BALASSA, possessionem dynastiæ *Kékkö* attinentia. conf. *N. Lehrgebäude d. Dipl. T. III. §. 172.* & GATTERERI *Elem.* §. 73.

§. 35.

Literæ i & y.

Ad literarum confusionem evitandam, exunte sæc. X. litera i accentu acuto (í) notari cœpit, circa sæc. XIII. vero finem puncto etiam identidem distincta deprehenditur. Hinc tria i (i, í, i.) haud raro in iisdem chartis recurunt, duravitque hæc scribendi ratio instabilis ad medium usque sæc. XVI. ex quo tempore solum i puncto notatum restitit. — Ab antiquissimo porro inde tempore a) litera y (hoc caractere i geminatum scribebant ævo intermedio) sæpius punctis uno vel duobus superne notabatur, ad discernendum eam ab u, præferente sæpe eandem speciem. Sæculo XV. hæc consuetudo, ceu jam minus necessaria dimissa est. Sæculo XII. & XIII. circello u interdum notatum observatur, unde in scriptura germanica semicircellus literæ u imponendus, sine dubio suam trahit originem. Id adhuc monere debeo,

debeo, existare non pauca ævi veteris instrumenta, in quibus literæ i & y non a prima manu, verum serius accentibus & punctis notatæ sunt. Fecerunt hoc passim imprudentes hujusmodi chartarum possessores, & illarum custodes, ad facilitandam sibi illarum lectionem, immemores, quantum momenti vel exile puncti signum, ad firmandam vel refellendam diplomatum sinceritatem sæpe habeat.

- a) Conf. GATTERER *de methodo ætatis Codd. MSS. definiendæ*, in *Commentat. Soc. R. Scient. Götting.* Vol. VIII. p. 107.

§. 36.

Subjungam huic capiti sequentia axiomata: Confectaria.

1.) Omnium scripturarum est aliqua inter se cognatio, regressusque continuus in istarum genealogia, a nobis ad prima & antiquissima usque monumenta quæ supersunt, est possibilis. Vana proinde sunt HARDUINI, de impostoribus, quos sæc. XIII. affingit, somnia.

2.) Inter prima & præcipua antiquitatis & sinceritatis criteria, genus characterum pertinet, quò monumentum aliquod scriptum est.

3.) Primo soloque obtutu agnoscere ac definire velle ætatem scripturarum, ceu annos prætereuntium nos hominum, lubricum est.

4.) Cum literarum characteres vario tempore varii fuerint, necesse est, ut scripturæ certæ quædam constituentur periodi, utque dividantur in sua genera.

5.) *Linnaeismo* GATTERERI *graphico*, quem subtilius adhuc elaboratum cum PP. Benedictinis communem habet, plus inest doctrinæ &

subtilitatis, quam utilitatis, majorque nominum, quam rerum copia.

6.) Ridiculum est scripturas secundum sæcula partiri, velleque cuique sæculo diversam scribendi rationem attribuere. Quis enim sanus in annum 1801. novam scripturæ epocham defigat, quod idem novi sæculi primus est?

7.) Ipsa adeo scriptura ejusdem hominis diverso tempore diversa esse potest. Magnus in scripturam hujusque varietatem, vel calamorum & atramenti diversi influxus est; multo majorem vim ætatis & morborum in manuum robur ac imbecillitatem experimur. Cautè ergo scriptorum comparatio, ad veritatem & antiquitatem enucleandam (*verificatio*) debet institui.

*) *N. Lehrgebäude d. Dipl.* Tom. III. §. 55. & seqq.

C A P U T II.

DE VOCABULORUM SCRIPTURA IN DIPLOMATIBUS OBSERVATA.

A.) *De scribendi ratione ævi medii (Orthographia).*

§. 37.

Ca. 1æ negle-
& Orthogra-
phiz. *Ætate media, quum bonæ artes omnes, antiquitatisque studium sepulta jacerent, Gothique & Longobardi proprii idiomatis facie & dialecto, linguam latinam temerarent, atque barbaro suo ore linguam latinam loquerentur atque scriberent, utique necesse fuit rectam etiam scribendi rationem, seu orthographiam, corrumpi atque temerari. Neque tamen ævum illud, omni prorsus scribendi lege caruit; quod suspicari, constans quædam scripturarum, æta-*
te

te parium, similitudo & consensio prohibet. Neglecta certe orthographia in vetustis membranis non ut earundem fidem infringat, eandem non leviter confirmat potius.

*) FONTANINI *Vindiciæ antiquorum diplomatum* p. 104.

§. 38.

Inficiebatur vero tribus modis accurata illa Errandi mo-
veterum scribendi ratio, per *adjectionem*, *de-* dus triplex.
tractionem, & *commutationem* literarum, prop-
pullulantibus innumeris, sæpenumero lepidis, in
scribendo erroribus, præcipue ex barbara latina
vocabula pronunciandi ratione, quæ adhæc pro
diversitate gentium & dialectorum barbararum
omnino diversa esse debuit, linguæque latinæ
supina ignorantia.

§. 39.

Pronunciatio vocabulorum latinorum, sæ- Adjectio lite-
culis barbaris propria, distento interdum ple- rarum.
nioreque fiebat ore, atque literarum adjectio-
nem in scripturam induxit, cui grammatici ævi
adhuc romani intercedunt, & cujus neque ho-
die in pronunciando quisquam inter nos usus
est. Specimina, adjectionis literarum ejusmodi
otiosæ, sunt: *michi*, *nichil*, *habundare*, *here-*
mita, *perhennis*, *habeis* pro *ab eis*, *interhemit*,
hÿs pro *his*, *hostia* pro *ostia*, *Hungaria* pro *Un-*
garia seu *Ungria*, *Haustria* pro *Austria*, *super*
hetera pro *super æthera*, *columpna*, *tamptum*,
temptatio, *dampnum*, *consumptus*, *Zemplin* pro
Zemlin, *auctum* pro *actum*; quo etiam consonan-
tes duplicatæ in principio verborum *Lladislaus*,
Llewchovia, *ffamiliaribas*, *fferdinandus* cet. refe-
rendæ sunt.

§. 40.

§. 40.

Detraçtio literarum.

Idem os gothicum interdum se contraxit arctius; hinc detraçtio literarum, in vocabulorum scriptura accidit, quæ potissimum in verbis, in quorum medio litera geminanda esset, observatur, e. c. *eicit*, *reicit*, *amulus*, *elemosyna*, *consuerunt* pro *consueverunt*; item *poplo*, *domni*, *dinoscitur*, *caracter*, *exortor*, *exilarat*, *actenus*, *ypotheca*, *Spania* pro *Hispania*, *Storia* pro *Historia*, *edis* pro *hædis*, *orreis* pro *horreis*, *esterno*, *erbofa*, cet.

§. 41.

Commutatio literarum.

Literas porro, quarum pronunciatio aliquid similitudinis habet, sæpissime inter se esse commutatas, diplomata vel leviter intuenti facile apparebit. Scriptum namque sæpissime legimus: *optineat*, *Kloria*, *set*, *karissimus*, *Karolus*, *atfero*, *charte*, *æcclesie*, *memorie*, *ymo*, *poctius*, *prether*, *iobemus*, *cognuscat*, *gracia*, *redemcio*, *ydoneus*, *indiccio*, *Dannuius*, *cottidianus*, *multiplharios*, *phas* pro *fas*; *ecus* pro *equus*; *longincum* pro *longinquum*; *dym* pro *diu*; *defastare* pro *devastare*; *præsbyter*, *ydiote*, *ryuulus*, *Wana* pro *Bana*; *secuntur* pro *sequuntur*. *Omode* pro *Amade*; *Apor* pro *Opor*; *Orod* pro *Arad*; *Beszprim* pro *Veszprim*; *Budrug* pro *Bodrog*; *Comani* pro *Cumanis*, *Wulgaria* pro *Bulgaria*; cet. Hæc omnia, & ut postea ostendam adhuc majora, sermo latinus per Francos, Gothos, Longobardos cet. passus est.

*) Fuit aliquando tempus, quo verba diplomatum & codicum nexu describebantur continuo, nullo vel tantillo spatio inter duo verba relicto. Facilis hac

hac ratione lectio nimium quantum impediri debuit; quare subinde secreta sunt vocabula a se invicem. Evenit autem ignorantia scribarum, ut secretionem hanc sæpenumero infitterent præpostere, adjungentes vocabulo vicino literam unam vel plures, de prima vel postrema syllaba verbi alicujus decerptas, ut: *bonorum eorum* pro *bonorum meorum*; *dictari debes* pro *dicta ridebis*, cet. Annexionem hanc literarum & syllabarum ineptam, nonnulli e. c. FONTANINI l. c. novum eumque quartum esse dixerunt modum desleendi a recte scribendi legibus.

§. 42.

Sequentium observationum generalium, in Observationes dijudicanda scribendi ratione ævi medii, ac generales. proinde in secernendo etiam diplomata vera a falsis, permagnus usus est:

1.) Quo magis ratio scribendi in chartis ævi intermedii hujus ruditatem & Notariorum imperitiam sapit, eo major, ceteris paribus, chartarum fides est.

2.) Inter chartas illius ejusdemque ævi aliæ aliis correctius, & ad orthographiæ leges accommodatius scriptæ sunt. Quo magis scilicet interdum monachus scriba dexteritate & doctrina præstabat aliis, eo etiam scribebat illis emendatius.

3.) Orthographia in uno eodemque instrumento interdum diversa est; imprimis autem

4.) Nominum propriorum scriptura omni tempore & inter omnes populos varia fuit & inconstans. *Colomanni* a) certe, *Geyse* b), & *Emerici* c), immo & *Stephani* d) regum Hungariæ nomina, tam varie inflexa, obtorta, & terminata occurrunt, cum in annalibus & numis, tum in diplomatibus, ut mirum non esset,

set, si quispiam peregrinus in serie regum Hungariæ illius ævi, cum novo nomine novum etiam regem sibi detexisse videretur. Nec in *locorum & urbium* nominibus exscribendis sibi magis constant ævi intermedii monumenta. Fuit autem scribarum hæc inconstantia in Hungaria major adhuc, quam alibi, ubi in tot nationum, quæ regnum a primordiis suis incolebant, confluxu, scribarumque e provinciis vicinis colluvie, nominum præcipue propriorum pronunciandi & scribendi ratio incerta & instabilis esse debuit. Diversimode ergo e. c. *Sümegh, Szabolts, Szeyszard e*), cet. scripta sunt. *Kesmarci* vero nomen plusquam viginti modis variatum legitur; occurrit namque scriptum: *Kesmarkt, Kaszmark, (Cæsoforum, Cæsareoforum,) Kaismarkt, Kaisersmarkt, Kesmarg, Kezmarg, Kesmargkt, Kesmarkth, Kezemargk, Kazmarek, Kezmark, Kasmarkh, Kiesmarck, Kesmarc, Kasmarc, Kazmerk, Kièrsmark f)*. Scilicet secundum variarum linguarum genium, & populi mores, nomen unius hominis, & loci, nonnunquam diversis modis efformatum, terminatum aut conscissum audiebatur & describebatur. MURATORI *Antiqu. Ital. med. ævi Tom. III. p. 746.*

Tab. II. Nro.
3. 4. 5.

5.) Diphthongus *ae*, ex chartis sæc. XIII.

XIV. immo & XV. *constanter fere* exulat, (exempla certe in contrarium ab unius alteriusque sigilli inscriptione desumpta rarissima, e diplomatibus prolata, nulla prorsus sunt) dominante *e*

Tab. III.
Nro. I.

simplici; cui sæc. XI. XII. in diplomatibus e. c.

Tab. II. Nro.
1. 2.

S. Stephani 1001. interdum hæc nota *e* in antiquissimis codicibus jam occurrens, ad diphthongi potestatem denotandam subjuncta est. In eodem

eodem diplomate diphthongus æ coarctata (æ) pluries recurrit, quæ coarctandi ratio in numis romanis, nec non codicibus antiquioribus, immo in sigillis etiam quibusdam perpaucis post annum 1072. in diplomatibus vero nusquam observata est a Mabillonio & ejus sodalibus g). Est autem verisimile, compendiose scribendi studio, e simplex in libris scholasticorum substitutum fuisse duplici; mox vero ad diplomata etiam solemnia, sigillorumque inscriptiones diligentissime factas, diphthongi loco admissum, turpem illius ævi prodit ignorantiam.

6.) Verba origine græca erronee communiter expressa sunt.

7.) Non desunt e. c. codices ævo isto barbaro ad leges orthographiæ diligentius, quam putares, descripti, quos ex antiquioribus aliis, scribendi ratione antiqua eaque rectiore retenta, religiose desumptos esse, caret dubio.

- a) DAN. CORNIDES *Genealogia Regum Hung. qui sæc. XI. regnare.* Poson. 1778. 4. p. 105. 6.
- b) JOS. KOLLER *Commentarius de Sacra Regni Hung. Corona,* Quinqueecl. 1800. 4. pag. 66.
- c) ST. KATONA *Historia critica Regum Hung.* Tom. IV. p. 460.
- d) *Ungriſches Magazin Bd. III. S. 367.*
- e) CORNIDES l. c. p. 349.
- f) Conf. N. *Lehrgebäude d. Dipl. T. VI. §. 498.*
- g) MABILLON. l. c. p. 59. N. *Lehrgebäude d. Diplom. V. §. 152.*

§. 43.

In re diplomatica Hungarica speciatim porro observare convenit: Observationes speciales.

I.) In diplomatibus domesticis sæc. XIV. XV. XVI. literam s sæpissime poni pro sch, pro s vero usurpari z; in cujus locum postea substitue-

tuerunt sz. e. c. *Genges, Kuesd*, pro *Gyöngyös, Kövesd*, in quibus s ad instar Græcorum σχ efferitur. *Zylffa, Bornemyza, Zarazwelgh, Zengurg*, ab Hungaris hodie scribuntur: *Szilvsa, Bornemisza, Szárazvölgy, Szentgyörgy*, cet.

2.) Antiquiores Hungaros geminasse in multis vocabulis vocales, per quod significabant, syllabas esse producendas, e. c. *Kaald, Baach, Zaaz, Chaak, Zent Paal*, cet.

3.) Accentus in Scriptura Hungarica circiter exitum sæc. XVI. adhiberi cœptos esse; (PRAY in *vita S. Elisabethæ* p. 250. not. A.) Editio certe Bibliorum in vernacula princeps, (Visolban, 1590. Fol. interprete CASP. CÁROLI) jam accentus habet.

4.) Ufos fuisse literis Ch vice Tsch vel Tſ. ut *Chitnik, Chetnek, Cherertekhel, Chazar, Chwda* pro *Tsuda*, &c.

5.) Nomina patronymica originis Serbicæ & Croaticæ hodie in *its* desinentia, sæc. XV. XVI. in *th* desinunt, ut *Keglewith, Bakyth, Stanfith, Petromyth* &c.

6.) Eodem tempore pro *gy* in verbis hungaricis ponebant *gh* e. c. *Nagh, Haghinas, wewlgh*, cet. sæc. XIII. exmissio *h* & *y* scribebant: *Mogorfalm* pro *Magyarfalu*, *Kemewelg* pro *Keményvölgy* cet.

7.) Iidem loco diphthongi *ö* adhibebant literas *ew*, e. c. *Gewmer, Gewr* pro *Györ*, *Tharkew, Pelfewz, Werbewz, Zewlewſy* de *Emrs, Kiralewrdeuwe*, cet. In MSS. sæc. XVI. pro *ö* vidi *o* cum commate suffixo positum.

8.) Ab iisdem vocalis *u* in vocabulorum medio communiter geminata est: e. c. *Twra, Bwda, Hwnyad, Dlwgosch, Hwzythe, Thwrcas* cet.

9.)

9.) Orthographia linguæ Hungaricæ non nisi exeunte sæc. XVII. & ineunte XVIII. studio inprimis JO. TSÉTSI ad certas regulas revocata, constansque facta est. (PETR. BOD in præf. præmissa Dictionario FR. PÁRIZ PÁPAI, Cibinii 1767.) Nec magis possunt veteres linguæ illius reliquiæ, ubique & continuo de litera ad literam legi, quam verba scripta linguarum Francicæ Anglicæve, ni monstra in verborum scriptione & pronuntiatione quærere ac invenire velis.

*) Conf. TIMON. *Imago novæ Hungariæ*. Cap. II.

B.) *Brachygraphia, seu Doctrina de Abbreviationibus.*

§. 44.

Ad inconstantem illam ac vitiosam ævi ^{Abbreviation-} ^{nes quare ad-} ^{hibitæ?} ~~medii~~ scribendi rationem accesserunt, in vocalibus describendis, infinita adhuc scripturæ compendia, seu *abbreviationes*, quarum ævum illud, ob typorum defectum, scribarum impatientiam & paucitatem, materiæque in qua scribebatur præstantiam, omnino erat feracissimum. Equidem nec Græcis & Romanis, nec orientis populis scribendi compendia ignota aliquando erant, neque diplomata ad sæc. XII. ab iisdem sunt prorsus libera: scholasticorum attamen inprimis solertia factum est, ut post sæc. XII. in immensum illorum creverit numerus, dominante in Scholis & Academiis prava lectiones dictandi consuetudine, clericis vero, seu scholasticis, verba magistrorum præcipiti penna adsequi anxie contendentibus a). Cum clericis e. scholis illius ævi in regum & principum aulas

Tab. III.

aulas compendiose scribendi ille modus, atque in diplomata publica privataque transit, qui in istis circa finem sæc. XV. derelictus, in operibus Theologorum & Jureconsultorum, nec non Medicorum etiam circa annum 1500. immo serius etiam, typis adeo jam expressis, non minus quam in MSS. sæc. XIV. & XV. fœde dominatus est.

a) *La Diplomatica* di TROMBELLI pag. 112. & sequ.

§. 45.

Modi, quibus
oriebantur.


Oriebantur autem abbreviaturæ: 1) ex literis coarctatis, 2) omissis; & quidem vel sine discrimine, addito tamen omissionis signo aliquo, (*abbreviaturæ proprie dictæ*;) vel ita, ut initiales sive primæ literæ retinerentur eundem, sed sine omni omissionis signo. (*Siglæ*.) 3) e literis coarctatis, & omissis simul; ex quo modo contrahendi, *notæ Tironis* seu *Tironicæ* natæ sunt.

§. 46.

Abbrev. ex li-
teris coarctatis.

Literis coarctatis, Romani ævique medii scribæ, ubi spatii angustia, literas vocabuli aliqujus singulas non capiebat, usi sunt. *Coarctari* enim tum dicuntur, cum duæ pluresve literæ, ita in angustum coguntur, ut unius tantum literæ speciem præ se ferant, aut unius etiam literæ spatio contentæ sint. Diversi, quibus id fiebat, modi, ad quatuor revocari possunt a). Coarctabantur nempe 1) *contignatione*, e. gr. Æ, E, V, MR, AE pro ante, AR pro Aurelius 2) *innexione* seu implexione, e. c. S 3) *insertione* R H 4) *columnatione*, quem modum in solemni diplomate

mate foundationis Præposituræ Thurocziensis Belæ IV. regis an. 1252. observavi, in quo verba invocationis divinæ, nec non nomen Regis, literis columnatis scripta sunt, in hunc modum:



(In nomine sanctæ Trinitatis & individue Unitatis amen. Bela)

a) Vid. GATTERER. *Elementa artis dipl.* p. 47.

*) Vocula et ætate media coarctabatur varie; adhibebatur adhæc coarctata, ad vocabula exscribenda, quorum partem aliquam syllaba et constituit, e. c. *hab&*, *re&in&*, *possid&*, qui modus scribendi in diplomatibus domesticis, e. c. S. Ladislai pro PP. Benedictinis S. M. P. achronon, non infrequens, in confinio sæculorum XII. & XIII. derelictus est.

§. 47.

Dum literæ aliquæ, sive in principio, sive in Abbreviaturæ fine, sive denique in medio vocabuli, sine discrimi- proprie ita ne omittuntur, omissionis signo addito, *Abbreviaturæ* ad sunt *proprie sic dictæ*: e. c. st' sunt; *nt* nobis; *g* sessu confessum; ep's episcopus; kma ca-

&

rissima; v° vero; b³ bus; nra nostra; tam³ tamen; *gtulim*⁹ contulimus; *g*° commissio; cet. quarum tantus in chartis atque codicibus sæc. præcipue XIII — XV. censetur numerus, ut omnino sufficiat sæpius, ad repellendos pusillanimes atque ignavos, a gravissimarum rerum lectione & intelligentia. Quid? Quod in solvendis istis nodis adhæserint interdum illi adeo, qui in hoc artis genere erant exercitatissimi. (N. *Lehrg. d. Diplom. III. §. 104.*) Pauca,

F

quas

Tab. I. Nro. 7. quas Tabula I. abbreviaturas exhibet, e chartis domesticis sæc. XIV. & XV. desumptæ, tiro-num in gratiam collectæ sunt.

§. 48.

Regulæ in le-
gendis Abbr.
observandæ.

Plerique, quorum tabulas antiquas legere, ac proinde abbreviaturas ibidem obvias resolvere interest, usu & exercitio diuturno legendi hanc artem sibi propriam reddere consueverunt, de regulis generalibus, quarum complexus systema abbreviaturarum constitueret, lectionis veritatem confirmaret, improbun-que illum laborem quodammodo faciliteret, nihil solliciti. Sed quærere suo jure posset aliquis: systema hujusmodi existetne aliquod? Equidem ego, qui abbreviaturas ævi intermedii, cum Hebræorum scriptura vocalium punctis destituta, hæc vero cum signis omissionis comparare soleo, illarum theoriam, saltem relate ad diplomatum scripturam, possibilem esse jam pridem persuasus sum; perfectam vero inter desideria adhuc refero diplomatica: quamvis me non lateant eruditi conatus CONR. MANNERT, Professoris Altorfini, Scriptoris Geographiæ antiquæ præstantissimi, qui condendi hujusmodi systematis abbreviaturarum, nuper felix faustumque aliquod fecit initium a). Hoc usque dum uberius perficiatur, usum, optimum adhuc legendi magistrum, porro quoque consulamus, adhibitis regulis usu abstractis, usuque roboratis. En tibi istarum aliquas:

- 1.) Contractionis in scribendo, uti nunc observantur, ita ætate quoque barbara regulæ quædam observatæ sunt. Hinc factum est sine dubio, ut eodem tempore literæ syllabæque aliæ

aliæ constanter exprimantur, aliæ constanter desint. Exempla huic regulæ adversa, aut calami errores sunt, aut scripturæ scholasticorum talium, qui sine certa lege promiscue decurtarunt omnia.

2.) Differunt omissionis signa. Præter lineolas enim, sive transversas, sive perpendiculares, ad modum s formatas, adhibebantur ad scribendi compendium indigitandum etiam literæ, notæ numerales, ductus arbitrarii, vacula *et* coarctata (&), cet. Exempla (§. 47.) ubivis occurrunt.

3.) Quo antiquiora sunt diplomata, eo pauciores abbreviaturas habent. Indiplomatibus ergo Hungariæ sæc. XI. XII. pauca notabis scribendi compendia, quorum major jam numerus censetur sæc. XIII. quam maximus vero sæc. XIV. ad finem usque XV. in chartis vero privatorum & codicibus ad dimidium fere sæc. XVI. plena sunt omnia.

4.) Nota 9 in locum syllabæ vocem terminantis *us*, sæc. XI. (immo jam & X, quamvis rarissime) passim adhiberi cœpit, inferiori autem ævo constanter est adhibita. Ad discernendam scripturarum ætatem non minus vetus nota 3 pro syllaba *con*, itidem in fine sæc. X. utut initio rariuscule conspicua, ex plurium sæculorum exilio quasi redux; valet; quæ subinde ad restauratas usque literas, immo etiam longius adhuc, particulam illam nunquam fere suis elementis exscribi passa est /.)

5.) In abbreviaturis enodandis, diligentia, & cautione maxima opus est, ne conjecturis falsis atque temerariis, in argumento diplomatibus eruendo, a vero aberres, ipsumque adeo

Tab. II.
Nro. 1. 2.

Tab. III.
Nro. 1.

diploma, in fuspicionem falsi atque supposititii inducas. Origo Ducum Sabaudiaë Saxonica, illorumque cum Saxonia Ducibus cognatio, sola præpostera annalium veterum lectione, confusioneque nominis utriusque nititur; nec ergo fabula cordatis scriptoribus placere potest amplius c). Ita porro observante BARINGIO, l. c. præf. p. 13. & seqq. e verbo contracto kma, in dipl. Erici regis Daniae an. 1278. alii eruerunt *Annam*, alii *Katharinam*, alii *Beatam*, contendentes, eandem in serie genealogica Ducum Brunsvicensium, desideratam fuisse ad inventionem usque diplomatis, quod perperam legerunt, & interpretati sunt. Sine dubio errore simili etiam Carolo Rob. Regi Hung. conjux *Catharina*, quam nunquam habuit, attributa est. Conf. KATONA *Hist. crit. RR. H.* Tom. VIII. p. 278. & seqq. Etiam *centesimæ* loco *cæmenti* in Wladislai II. Decretum VII. art. 3. anni 1514. lectione præpostera illatae sunt. HORÁNYI in *appendice ad Chronicon* SIM. de KEZA, Vien. f. a. 8.

- a) Vid. *Miscellanea meist diplomatischen Inhalts, bearbeitet von C. MANNERT.* Nürnberg 1795. 8. 124. S.
- b) MANNERT. l. c. p. 38. 39. conf. lectu & studio dignissimi hujus libri docta recensio, in *den Götting. Anzeigen* anni 1795. pag. 949. In chartis domesticis sæc. XIII. nota o cum co & con alternat. Sub majori sigillo Caroli Rob. in diplomate anni 1338. quod Sopronii lustravi, verbum *commisso* integre scriptum est.
- c) CAR. DENINA *Geschichte Piemonts u. d. übrigen Staaten des Königs v. Sardinien: übersetzt von FRIDR. STRASZ.* Berlin 1800. 8. conf. *Götting. gel. Anzeigen* anni 1800. pag. 1492.
- *) Ad habitum in contractionibus enodandis sibi comparandum, observatis aliorum, exemplorum usu, & exercitio indefesso opus est. Facilitabit operam tironibus DAN. BARINGII *Clavis diplomatica*, Hannoveræ

noverat 1754. 4. nec non *Praktische Anweisung zur Diplomatiek, und zu einer guten Einrichtung der Archive; aus dem Französischen der HH. Le MOINE und BATTENEY*. Nürnberg, 1776. 4. cum Supplementis, quæ ibidem 1777. sunt edita. Exemplorum numero omnibus præstat JO. LUD. WALTHERI *Lexicon diplomaticum*, Ulmæ 1756. fol. a bonitate vero præceptorum inprimis commendari debent. MANNERTI *Miscellanea*.

§. 49.

Inter Scripturæ compendia *Sigla* porro seu ^{Sigla} *Sigla*, quas Cicero *litteras singulas* appellabat, referuntur, cum initiales tantum seu primæ literæ, plerumque semper capitales majusculæ, ad exprimendum vocabulum describuntur, sine omissionis signo aliquo. Adhibebantur illæ ab antiquissimo inde tempore a), & e sæc. XII. XIII. etiam in Hungariæ chartis larga illarum seges superest.

- a) Scriptores, qui de siglis veterum Græcorum Romanorumque exposuerunt, recensuit HUCH l. c. pag. 269 — 272.

§. 50.

Dividuntur sigla in *verbales* & *numerales*. ^{Divisio Siglarum.} Hæ numeros, illæ verba quæcunque alia denotant. S. P. Q. R. & Friderico III. Imperatori familiares quinque vocales literæ, siglarum verbalium exempla sunt. Adhibebantur potissimum nominibus propriis indicandis a), inprimis in Pontificum romanorum ævi medii literis, in quibus regum & principum adeo, nec non episcoporum cet. nomina, vel punctis duobus jacentibus (...) vel initiali duntaxat litera expressa sunt. Sequebantur hunc morem alii quoque publici privatique homines.

- a) In diplomate Belæ III. Regis an. 1181. e proto-grapho per illustr. quondam PH. E. SPIESZ (*Archivische Nebenarbeiten* P. I. Halle 1785. p. 140. 41.) evulgato, regium nomen sola initiali *B.* & ad eundem modum, Notarii quoque *Pauli*, Episcopi dum diploma ederetur jam Ultrasilvani, nomen, semel plene descriptum, mox itidem primo duntaxat hujus elemento *P.* notatum est. Esse hunc anonymum illum Belæ Regis Notarium, annalium domesticorum auctorem antiquissimum, e collatione diplomatis hujus, & siglæ *P.* cum initialibus Chronici verbis (*P. dictus Magister*) perperam lectis, typoque expressis, cum verisimilitudine aliqua colligitur. At verisimilitudinis ratio aliunde adhuc quam e solo nomine repeti debet potestque; vid. DAN. CORNIDES, eruditionis laude, præcipue amplissima Historiæ & antiquitatum Hungaricarum notitia clarissimi, *Vindiciæ Anonymi Belæ Regis Notarii*, opus posthumum, quod dum jam hæ paginæ prelo subderentur, curante celeb. I. CHRISTIANO ENGEL, hujusque supplementis auctum, Budæ 1802. 4. luce donatum est.

§. 51.

Siglæ simpli-
ces, compo-
sitæ.

Verbalium siglarum aliæ *simplices* sunt, aliæ *compositæ*. *Simplices* singulis literis singulas voces declarant, e. gr. *G.* pro *Geysa* vel *Gregorio*; *A. A. A. F. F.* pro *ære, auro, argento, stando, feriundo*, quales in formulis populi romani solemnibus inprimis frequentes sunt; in *compositis* duarum vel plurium initialium literarum concursu, ad significandum verbum simplex opus est. Tales sunt: *LAD.* pro *Ladislaus*, *KAL. JAN.* pro *Kalendis Januarii*, & innumeræ aliæ, præcipue in inscriptionibus veterum Romanorum obviæ. Compositarum species sunt siglæ *repetitæ*, quibus dualis pluralisve denotantur numeri, e. gr. *CAESS. AUGG.* *Cæsares Augusti duo*, *VVV. BBB. viri boni tres*.

§. 52.



In diplomata Siglæ sæc. IX. admiffæ sunt. Siglarum di-
Sæc. XII. & fequentibus frequentiffima illarum ^{plomaticarum} exempla occurrunt a). Sæculo tandem XVI. ^{Epocha}, &
confuetudo hæc fcribendi incerta, e chartis difficultas.
exulare debuit. Eft tamen adhuc siglarum ufus
aliquis, in numis fignandis, atque in infcriptio-
nibus concinnandis, quæ ævi noſtri monumenta,
haud minori cum difficultate olim poſteri le-
gent, quam illa eſt, quæ nos vexat, defudantes
ſæpenumero, in diſſolvendis hujusmodi diplo-
matum ævi veteris ænigmatibus. Quid mirum
ergo Juſtinianum Imperatorem confuetudinem
fcribendi per ſiglas lege prohibuiſſe b)? Neque
alia de cauſa, quam ut errandi minus periculi
ſupereſſet, ſiglæ nominibus feminarum indican-
dis, inverſæ in antiquitatis monumentis paſſim
ſunt conſpicuæ. Scribebatur ſiquidem W pro
Marca; C pro *Caja*; CT pro *Caja Liberta*; cet.

- a) In formulis Notariorum ævi mediæ, quas *ſtylum*
Cancellariæ (e. c. ſtylum Cancellariæ Matthiæ Regis
per Thomam de Nyir Kallo) nuncupabant, quas-
que inter diplomata vere edita referendas eſſe caret
dubio, quod eadem exemplo tantum eſſe deberent,
nominibus perſonarum & locorum veris, ſiglæ ar-
bitrariæ T. N. cet. ſubſtitutæ ſunt. INNOCENTII
III. P. Rom. *Decretales* atque aliæ *Epistolæ*, Romæ
1545. expreſſæ, ſiglis nominum propriorum ſunt
refertiffimæ. Occurrunt ibi bene multæ literæ ad
Regem & Episcopos Hung. e quibus ſexcenta ſigla-
rum exempla facile excerpteris. Suffecerit ſequens:
„ N. Strig. Aepiſcopo, N. Pataviæn. & N. Cen-
„ dienſi Episcopis. Cum Ven. frater noſter Epi-
„ ſcopus, & dilecti filii B. Præpoſitus, M. Cantor,
„ S. & M. Canonici Varad. eſſent in noſtra præ-
„ ſentia conſtituti. “ — — —

- b) Cod. L. I. tit. 17. de veteri jure enucleando. Ibidem
L. 2. §. 22.

§. 53.

Sigla numer-
ales:

Sigla numerales numeris exprimendis serviunt. Sunt vero notæ numerales, in config-
nandis diplomatum calculis adhibitæ, duplicis
generis, *romanæ*, & *arabicæ*, quas vulgo *Zi-
phras* appellamus. Romani numeri pro literis
alphabeti vulgo habentur, ideoque siglis adnu-
merati, hoc loco pertractari debent; de ziphris
vero, earumque in diplomatibus epocha, non
alio quam hoc loco commodius agitur. M,
mille; C, centum; L, quinquaginta; D, quin-
gentos; X, decem; V, quinque valere, nemo
ignorat. Ex  unciali D, & ex  qua-
drato L, tanquam dimidias partes prodiisse,
argute fatis traditur. I. II. III. IIII. V. pri-
mam & simplicissimam, secundum digitos con-
numerandi rationem produnt. V, figuram ma-
nus, seu complexum quinque digitorum adum-
brat; X, seu duæ manus verticaliter oppositæ,
illius duplum valent. Alii notarum harum ori-
ginem aliter exponunt; mihi illa, quam de-
scripsi, reliquis videtur faciliior, atque adeo
etiam ad veritatem propior.

*) Conf. HEUMANNI *Conspectus reipublicæ literariæ*, ed.
EYRING. P. I. p. 268.

§. 54.

De numerorum notis romanis in antiquis
membranis hæc teneto :

Ufus numero-
rum Romano-
rum in Diplo-
matibus.

I.) Numerus e. c. annorum, personarum
cet. rotundus, nonnunquam pro incompleto oc-
currit a).

2.) Interdum in chartis domesticis, neglectis siglis numeralibus, annus & numeri quicunque, disertis literis expressi sunt, quod quidem in primis sæculis XIV. XV. XVI. in chartis, quas inspexi, observasse mihi videor. Fiebat id sine dubio, confusionis, quam ingruentes Ziphrae parere identidem debebant, evitanda causa.

3.) Millenarius numerus sæpe, sæpissime vero numeri infra denarium, disertis verbis exscripti leguntur, reliquis per siglas expressis.

4.) Universe in chartis & libris ævi medii, interdum numerus millenarius, aliquando centenarius *b*), nonnunquam utrique omissi, atque non nisi sæculi currentis anni adnotati sunt.

5.) Numeros tandem punctis lineisque interjacentibus distinctos, superaddito passim *o* ad terminationem indicandam, sæpe legeris. Exempla

sunt: $\overset{\circ}{M}$. $\overset{\circ}{C}$. $\overset{\circ}{C}$. $\overset{\circ}{C}$. septimo. — $\overset{\circ}{M}$. CC. IXXX. tertio. $\overset{\circ}{M}$ — CC — LXX nono.

5.) Unitas vulgo punctum sibi habet impositum, atque in fine communiter protrahitur. e. c. vj. iiij.

a) *N. Lehrgebäude der Diplomatik*. V. §. 92.

b) Instrumentum Comitatus Posoniensis, quod §. 16. Not.g.) commemoravi, datum Posonii in Festo S. Joannis Bapt. anno Domini MXXII. (elisis, de quo dubitari nequit, tribus centenariis) anno MCCCXXII. non potest esse antiquius. Ad idem sæculum referendæ sine dubio sunt literæ illæ, quas indulgentiarum appellamus, quas G. A. WILL haud ita pridem vulgavit, quasque idem, spectando notam temporis scriptam, anno Domini MLXXXVI. ceu primum & antiquissimum reipublicæ Norimbergensis monumentum, felici casu a se inventum, attribuit. Est nimirum humani quid passus Vir jam pie defunctus, cum centenarium numerum in temporis

poris nota omisſum eſſe non animadverteret. Vid. ejusdem: *Kleine Beiträge zu der Diplomatik. Altdorf 1789. p. 22.*

§. 55.

Notæ nume-
rales arabicæ.

Ziphrarum origo ex oriente, ab Indis procul dubio, repetenda eſt, quod ipſum nomen prodit, modusque illas a dextris ſiniſtram verſus exhibendi confirmat *a*). Ex oriente Arabes in occidentem illas traduxerunt, ubi circa finem ſæc. X. & initium XI. ab Europæis in ſodalitium numerorum romanorum, inprimis per GERBERTUM (ſubinde PP. SILVESTRUM II.) aſſumptæ eſſe videntur. Ac primum quidem Ziphræ hæ in libris tantum mathematicorum, deinde in annalibus etiam, in calendariis, aliſque libris, nec non in artis operibus uſurpatæ cernuntur *b*), tandem vero etiam in diplomatibus fiunt conſpicuæ.

a) KAESTNER. *Gefchichte der Mathematik* Vol. I. Götting. 1796. p. 31. & ſeqq. Vol. II. ibid. 1797. p. 695. & ſeqq. conf. *Allgem. Lit. Zeitung*, 1799. Nro. 45.

b) GATTERER. *de methodo ætatis Codd. MSS. definien-
da*; in *Commentat. Soc. reg. ſcient. Götting.* Vol. VIII. p. 109. *N. Lehrgeb. der Diplomatik* V. §. 115. cf. Tom. VI. in prologo.

§. 56.

uſus Ziphrar.

in dipl. Hung.

In Hungariæ diplomatibus ſæc. XV. notæ numerales arabicæ romanis ſucceſſerunt. Quamvis enim veſtigia illarum inter Hungaros jam ſæc. XIII. in modo abbreviandi (e. gr. „*2dum* „*antiquam conſuetudinem*“ in literis Ladislai Cumani Regis 1283.) videre mihi videar, exemplum tamen, quod uſum earundem diplo-
mati-

maticum demonstraret, nullum inveni, quod ævo Ladislai Posthumi Regis († 1457.) esset antiquius; in cuius ego sigillo simplici secreto, annum arabicis notis ad pedem scuti expressum ipsemet observavi, in cuius præterea sigillo duplici majestatico, perigraphen utriusque partis, annus 1456. iterum arabicis notis exaratus terminat a). Ad eundem modum etiam sigillum majestaticum Wladislai II. annum 1490. inscriptum sibi habet b). Exempla consuetudinis hujus plura, in Regum Hungariæ diplomatibus sæc. XV. non inveni, quæ in chartis & literis privatorum illius temporis, & artis operum inscriptionibus c) adhuc rara sunt. Vidi sæc. XVI. adeo codices accepti & expensi, in quibus posthabita, qua se commendant, Ziphrarum commoditate, numeri romanis characteribus expressi sunt d). Diligentia ceterum magna in utrisque legendis, ob formam, quam diverso tempore diversam induerunt e), opus erit; (variat enim illa non minus, quam literarum species) idque vel eo majori, quo plus numeros recte legisse sæpe interest.


- a) Inscriptio literis majusculis monasticis sequens est: *Ladislau Dei gratia Hungariæ, Bohemiæ, Dalmatiæ, Croatia, &c. Rex, Austriæ, Stirii, & Luxemburgi Dux &c. Moraviæ Marchio* 1456. Vid. *Offervazioni istoriche di DOM. M. MANNI sopra i sigilli antichi de' secoli bassi*. Tom. VI. Sig. 1. nec non *Neu. Lehrgeb. der Diplom.* Tom. III. §. 372. Tab. XXXII. MANNIUS sigillum istud Wladislao I. († 1444.) adscripsit, PP. Bened. vero annum 1451. expressum esse putaverunt. Utrumque perperam; conf. GRUBER *Lehrsystem seiner diplom. Kollegien*, edit. 2. *Wien*, 1789. 8. p. 172.


- b) Vidi plura exempla sigilli hujus magnifici originalia, in quibus notæ numericæ 1490. more nobis proprio commode scriptæ sunt. Ejusdem imago in IGN.



C. BATTHYANI *LL. eccl. R. Hung. Tom. I. p. 568.* expressa est.



- c) Volui librum, in quem acta publica magistratus Bartphenfis, (Protocollum vocant) relata sunt, annorum 1433. & seqq. in quo annorum numeri plerique omnes, vulgaribus notis scripti sunt. Eandem scribendi rationem observavi in nonnullis Procerum Hungariæ sæc. XV. epistolis, notisque similibus annus 1470. (1280) turri urbis Budensis principi inscriptus est.

- d) „ Anno 1526. proventus e fodinis Neosoliensibus


erant fl.  (187725); Lucrum

regis exinde fl. . — Cuprum

cusum vendebatur fl.  den. ; rotundi

vero centenar. fl. ; fusum fl. ; pro te-

aura domus factum fl. ; simplex seu rubrum

cuprum fl.  den. . — Ad conservatio-

nem coquinz regiz (Ludovici II. regis) ad singulos dies per flor. vigintiquinque, demtis conviviis suæ Maj. exponebantur per annum fl.


; ad emtionem vinorum pro ore Re-

giz Majestatis per annum fl. . “

- c) Docte hac de materia differuit STEPH. SCHOENVISNER V. Cl. vid. *Ungar. Magazin* Vol. IV. Fasc. 2. Tabulæ certe, in quibus varietatem illam WALTHERUS l. c. PP. Benedictini Tab. 60. & GATTERERUS l. c. Tab. III. adumbrarunt, diligenter in auxilium adhibendæ erunt.

§. 57.

E literis coarctatis & omissis simul, signisque arbitrariis, ortæ sunt *Notæ Tironis* seu *Tironicæ*, quæ summæ in scribendo velocitatis adjunctrices, abbreviaturarum abbreviaturæ dici quodammodo possunt. Quidquid certe ingenium humanum compendiosi in scribendo unquam excogitavit, id omne in scriptura Tironica reperias. Præter signa enim arbitraria, omnia scripturæ & literarum genera, hic in societatem vocata; miscentur literæ græcæ latinis, concrescunt unciales cum minutis, minutæ cum cursivis, modis innumeris, variis & multiplicibus. Convertuntur deinde literæ, mutilantur, inclinanturque in partem illam, in quam impetus volentem tachygraphi manum rapuit. Exemplum esto:



Lingua mea calamus scribe, velociter scribens.

§. 58.

Vetus est hæc compendiosissima scribendi *Historia notarum* consuetudo, Græcis non incognita. Hoc uti *rum Tironis* suspicari licet e literis græcis, quæ notis Tironicis implexæ observantur: ita auctoritas scriptorum & exempla, rem extra dubium collocant. Enimvero utebatur illis sapiens XENOPHON, cujus ætatem an præcesserit notarum harum usus apud antiquitatis populos, in utramque partem disputatum est. A Græcis ad Romanos migrarunt hæc scribendi ænigmata, inter quos, quod TIRO, libertus Ciceronis, notarum nume-

numerum auxerit, easdemque ad orationes, quæ vel in senatu, vel iudicio, & concione populi habebantur excipiendas, commode adhibuerit, cognomen *Tironicarum* nactæ sunt. Placuisse illas CICERONI constat; quibus etiam TITUS Imperator quam velocissime potuit scribere. SENECAM quemdam (diversum omnino a *Marco & Lucio* homonymis) ferunt, digesto & aucto notarum numero, opus effecisse in quinque millia. Ampliavit illud deinde CYPRIANUS Carthaginensium præsul, adjiciens notas christiano loquendi usui necessarias, fuitque notarum usus sæc. III. & IV. in iudiciis & concionibus sacris longe maximus. Ab notis, hac ætate, qui illis utebantur, *Notarii* cognominati sunt. — Ex codicibus tandem in ipsa diplomata, præcipue primas illorum delineationes, quas primos conceptus appellamus (*minuta*), subscriptionesque solemnes, (quæ subinde a nonnullis pro characteribus arabicis sunt habitæ) translata sunt intricatissima illa scripturæ compendia, quorum nonum sæculum a) omnibus aliis fuit patientius, quorumque vestigia in abbreviaturis vulgaribus c. 9. &c. colligimus. Sæculo X. e diplomatum contextu evanescent; recte vero intelligi, non ita pridem adhuc cœpta sunt.

- a) D. P. CARPENTIER O. S. B. in *Alphabeto Tironiano, seu notas Tironis explicandi methodo*, Lutetia Parisiorum, 1747. fol. quinquaginta quatuor vulgavit diplomata, folius Ludovici pii Imperatoris, notis Tironis descripta, quorum lectionem vocabula nonnulla plene inserta, & formulæ illo ævo solemnes diplomaticæ, utcunque faciunt. Observarunt alii, locum quoque, super quo sigillum expressum est, notis hujusmodi oblitum, quæ circum sigil-

figilla etiam, & in subscriptionibus Cancellariorum sæc. adhuc XI. sunt adhibitæ. GRUTERUS in *Cor-pore Inscriptionum* Tom. II. P. II. Amst. 1707. fol. viginti quinque notarum expressit millia, in quarum tamen serie, una eademque recurrit sæpius. CARPENTIER l. c. explicandarum auspiciato aliquod fecit initium, quo multo felicior fuit TUSTINIVS in celebrato opere diplomatico Tom. V. ex quo historia, & exempla etiam (§. 57.) excerpta sunt.

§. 59.

In Hungariæ diplomatibus, quorum nullum Noræ Tironia sæc. XI. est vetustius, ænigmatum horum nul- in chartis hun- lum prorsus exstat vestigium. Codicem nam- garicis. que notis Tironis descriptum, quem auctores novi operis diplom. Tom. V. §. 172. Cardina- lem BEMBO, Rom. Pontifici JULIO II. e Tran- silvania misisse, post GRUTERUM narrant, hunga- ram fuisse progeniem dubito; quippe qui alibi prognatus, in Hungariam transplantari potuit. Inquirent, spero, curiosius in illum, qui cer- tiora aliquando de Literatura Hunno-Scythica dare voluerint.

§ 60.

Adhuc de *Steganographia*, seu *Cryptogra-* Steganogra-
phia (scriptura occulta, *Zifferschrift*) dicendum phia, seu Cry-
hic loci esse putavi aliquid, cujus præcepta, ptographia.
accommodate ad Europæ hodiernæ dialectos,
certatim auctores dare video. Constat vero illa
scripturæ ratio, literarum characteribus, ad ar-
bitrium delectis, quos alius non intelligit. Ve-
tus hoc est occulte scribendi artificium, ho-
dieque per aulas principum, imprimis belli
tempestate, late patens. JUL. CÆSAR solebat,
si quid secreti cuipiam per literas significaret,
quantum semper elementum in scribendo, pro
eo,

eo, quod sumi debebat, sumere; AUGUSTUS secundum: ne obvia literarum lectio esset cuivis. BONIFACIUS Germanorum Apostolus, & RABANUS MAURUS delectabantur hujusmodi scripturæ arcanis; quorum hic quidem, in vicem vocalium, mox puncta, mox consonantes pro arbitrio selectas adhibuit. Erat ergo scripturæ occultæ ætate intermedia usus aliquis. Viri eruditi recentioris ævi, & quidem TAYLORIUS in Anglia, BERTINIUS in Gallia, MOSENCEIL & HORSTIGIUS in Germania, in delectu characterum, horumque ad idioma suæ gentis applicatione, compendii præcipuam habent rationem, unde etiam artem suam *Stenographiam*, quam *Steganographiam* appellari malunt.

*) De Cryptographia veterum & arte deciftratoria, vid. *N. Lehrgeb. der Diplom.* V. §. 73 — 75. nec non TRITHEMIUM, BREITHAUPTIUM, GRAVESANDIUM cet.

C A P U T III.

DE SCRIPTURA VOCABULORUM, SEU ORATIONIS, IN SERIE CONTINUA.

§. 61.

Argumentum
Capitis.

Duo hoc capite illustranda habeo. Primum quidem, directionem in scribendo variam, olim usitatam, nec hodie exteris incognitam, attingam; de interpunctionibus tandem (*Stigmeologia*) agam, quibus veteres, posteaquam verba in scribendo separare incepissent, sententias, ad ambiguitatem orationis evitandam, lectionemque illius facilitandam, secernere a se invicem soliti fuerant.

A.) De directione in scribendo varia.

§. 62.

HUGO, in libro de *prima scribendi origine*, Triplex ver-
sus incipiendi
modus.
quatuor & viginti modos versuum incipiendorum, in tabella proposuit. Possibiles illos tamen duntaxat dixerim: quæ vero usitata aliquando erant, & nunc adhuc sunt, ad tria revocari possunt, versus & commata incipiendi genera.

1.) Primum genus est *Scriptura horizontalis*, dextrorsum sinistrorsumve ducta, itemque mixta, *Βασσοφῆδος* (boviversura) a Græcis olim vocata, quæ a dextra ad sinistram, & vicissim ab hac ad illam redit. Ægyptii, Phœnices, Hebræi, & plerique omnes orientis populi, a dextra ad sinistram, & olim versus ducebant, & adhucdum ducunt; & eundem scribendi modum Hunnis quoque Ungrisque veteribus, haud scio quam vere, nonnulli attribuunt. Nostro more calamus regebant Romani, præeuntibus Græcis, postquam scilicet hi, derelicto sinistrorsum scribendi modo, etiam *Βασσοφῆδος* scribendi methodum dimisissent, qua Solonis Tabulæ descriptæ erant, & alia adhuc, quæ passim superesse narrantur, antiquitatis græcæ monumenta exarata sunt.

2.) *Scriptura perpendicularis*, cujus plures constitui possunt species. Sinensium, ac Japonensium, descendit ad lævam: Ingurensium (Tartarorum) ad dextram. Ferunt dextrorsum adfurgere scripturam illam, quæ in insulis quas Philippinas vocant obtinet.

3.) *Orbicularis Scriptura* nusquam longius obtinuit. Referri tamen huc debent inscriptiones, quæ ob formam materiæ, in qua fiunt,

in orbem duci debent, e. c. in numis, & sigillis; quibus insanas adhuc quorundam poetarum, qui in orbem, sine initio & fine, scribunt, adnumeraveris.

*) *Neues Lehrgeb. der Diplom.* Tom. II. §. 48—62. conf. HEUMANN l. c. p. 279.

B.) *Stigmeologia Diplomatica.*

§. 63.

Uusus Stigmeo-
logia.

Grammaticorum est interpunctionis præcepta dare, ejusque usum laudare, diplomaticorum vero historiam & fata illius in tabulis antiquis, præcipue diplomatibus tenere, quæ res ad veri falsique discrimen in vetustis membranis, & utilis est & necessaria.

§. 64.

Ubi observa-
tur?

Observantur distinctionis signa 1) in monumentorum inscriptionibus, 2) in codicibus antiquis, 3) in diplomatibus. Non omnibus hisce locis eodem tempore cœperunt esse obvia; operæ ergo pretium est tenere, quando, qua forma, quaque lege ubivis compareant.

§. 65.

I. Puncta in
monumentor.
inscriptioni-
bus.

Historiam interpunctionis in inscriptionibus antiquis, auctores novi operis diplom. Tom. V. §. 4. his fere propositionibus complexi sunt:
1.) In illis vocabula ad sæc. usque V. separatim a se invicem scripta occurrere.

2.) Singula fere punctis fuisse distincta, imprimis siglas, & scripturæ compendia. Contra verò

3.) Desiderari puncta, in fine sententiarum, & versuum.

4.) Communem punctorum formam, vel vulgarem esse nostram, vel speciem trianguli referre, cujus basis sursum erecta est.

5.) Non deesse punctorum formas plures, varias, atque inconstantes.

*) Conf. JANI CRUTERI *Inscriptiones antiquæ totius Orbis Romani*. Tom. I. II. in 4. voll. Amstel. 1707. fol. opus splendidissimum.

§. 66.

Interpungendi rationem aliquam, diversam attamen haud parum a nostra, diversam etiam ab illa, quæ in monumentorum antiquorum inscriptionibus, ubi singula verba punctis distincta fuisse diximus, etiam in libris MSS. a veteribus fuisse observatam, & quidem inde ab ARISTOPHANIS Grammatici Alexandrini tempore, qui Olympiade CXLV. vixit, prosodiamque primus excogitavit, & accentus invenit, sic satis certum est. De eo Grammatici certent, num Romani, a quo tempore, & qua lege interpunctiones adhibuerint; quibus S. HIERONYMUM Scripturæ S. libros, simplicium consideratione plectum, distinxisse scimus, & quas aurea Romanorum ætate, nec ignotas, neque prorsus neglectas fuisse, est verosimillimum. Exolevisse tandem hac parte librariorum diligentiam necesse est; antiquissimi enim qui supersunt codices sacri profanique, literis uncialibus descripti, interpunctiones ignorant, in quibus continua verborum compage oratio cohæret, nisi quod novam sententiam seu periodum, in vicem punctorum, novus versus (στιχος)

II. In libris
MSS.

seu linea incipiat, vel etiam litera reliquis eminentior *a)*, ut adeo verborum separatim scriptorum numerus, vel nullus plane sit, aut exiguus ad sæc. VII. major aliquanto jam sæc. VIII. donec tandem sub Carolo Magno, PAULO WARNEFRIDO & ALCVINO Diaconis peritissimis rem procurantibus, pedetentim omnia & singula verba, dirimi a contiguis studiosius, sententiarumque punctorum notis distingui cœperunt diligentius. Sunt codices perquam antiqui, quos librarii recentioris manus distinctionis signis illustravit, quod indicasse hic sufficiat.

- a)* Hinc consuetudo, continuo post signum puncti collocandi literam majusculam, etiamnum vigens, sine dubio repetenda est.

§. 67.

Ad sæc. usque IX. interpunctionum in codicibus (si quæ omnino adsint) forma & usus variant. Omnium signorum potestatem punctum sustinuit, quod interdum simplicem speciem refert, interdum vero ad instar rosæ, racemi, cordis, crucis, stellæ, nec non lineolæ transversæ & perpendicularis pictum est. Accedit huc interpunctiones sæpissime adeo negligenter & præpostere esse adpositas, ut peccatores librarios operæ indormire videas. A sæc. IX. ad XV. seu ad MANUTIÓS usque, quibus hodiernam interpungendi rationem debemus, DONATI Grammatici legem, saltem a diligentioribus scribis, utcunque observatam cernimus, quæ puncto ad summam literam posito, puncti nostri finalis; ad mediam literam impresso, coli; ad imam denique literam detruso, commatis nostri potestatem tribuit. At impar tamen lex fuit,

Punctorum
forma in li-
bris MSS.

fuit, omni, & omnium librariorum negligentia & stupori depellendo: quare in legendis libris, imprimis illis qui a sæc. XIII. ad restauratas usque literas descripti sunt, cum radio negligentiam amanuensium sæpe detestaberis.

§. 68.

Subjiciam adhuc observationes aliquas, antiquitatum & diplomaticæ etiam studiosis, non minus jucundas, quam utiles:

1.) Præter enarratum punctorum usum, fuerat illorum alius adhuc, isque varius, & multiplex. Adhibebantur enim ad scripturæ compendia indicanda, ad rescindenda verba, quæ præpostere textum irrepsent, ad carminum modulationem regendam, (cui scopo literæ alias serviebant,) ad acta subsignanda, cet.

2.) Vulgaris auctorum, sive sacrorum sive profanorum, in capita & paragraphos divisio, librum inferioris ævi manu descriptum esse prodit.

3.) *Signaturæ*, quas typographi nostri dicunt, numeris romanis exprimi solebant, & semper fere paginæ fasciculorum ultimæ suffigebantur, idque per sæc. V. VI. VII. VIII. A sæc. inde IX. omittebantur sæpius. Ad extremam paginæ oram positæ, inscitia compactorum sæpius rescissæ sunt. Fasciculus a phylarum, ad summum quinque, simul compactarum numero, dicebatur *binio*, *ternio*, *quaternio*, *πεντάδιον* (quinternio).

4.) *Custodes* a sæc. XI. initio, crebrius autem a sæc. XIV. usurpati cernuntur. Plerumque in veteribus libris subiciebatur custos ulti-

mæ tantum fasciculi paginæ, qui rarissime, vel nunquam potius, in principio lateris subsequenter repetitus est.

5.) Cum abundantes literæ ab extrema parte versus alicujus, in alterum versum transferendæ fuerunt, additum est haud raro *signum verbi divisi*: quod quidem signum, si est lineola horizontalis (—) sæcula IX. medium, X. XI. XII. prodit; si est accentus acutus (') sæcula XII. & XIII.

6.) *Citationis signum* („) *Guillemet* ab inventore dictum, post inventam typographiam, a Gallis primum adhibitum, ab aliis paulo post receptum est.

7.) Provocationis nota ·|. nobis hodie adeo familiaris, jam in codicibus sæc. VI. VII. exstat. *N. L. G. der Dipl* IV. §. 805. Tab. 58.

8.) *Paragraphi signum* a sæc. VIII. variat; vulgaris ejus species (§) a sæc. XV. adhuc usque obtinet.

*) Cum illis, quæ inde a §. 66. hætenus de codicum scriptura & interpunctionibus attuli, conferat, qui plura cognoscere cupit, eruditus TROTZII notas ad librum HUGONIS *de prima scribendi origine*, Trajesti ad Rhenum 1738. 8. *N. Lehrgeb. der Diplom.* T. V. §. 5—49. & *Commentationem GATTERERI de methodo ætatis codicum MSS. definien-* dæ; in *Commentat. Goetting.* Tom. VIII. an. 1787.

§. 69.

III. Interpunctio
Diplomat.
tum.

In Cancellariis omni tempore consuetudinum antiquarum magna fuit reverentia, quæ, quod hodieum fieri observamus, a diplomatibus horumque stylo & scriptura novationes qualescunque, probabiles etiam, longius prohibuit. In illorum medio contextu sub Pipino, Caro-

Caroli M. patre, primum verba intervallo aliquo distinentur, neque tamen omnia, & constanter; cum sæc. X. ad finem jam vergente (e. c. an. 988.) diplomata inveniantur passim adhuc, in quibus non pauca textus vocabula concreta adhuc sunt; ut adeo in fine tantum sæc. X. verborum in diplomatibus separatio perpetua & constans facta sit. Etiam Punctorum usus in diplomata serius, quam in libros manu scriptos introductus est. Antiquissima enim, quæ supersunt diplomata, punctis carent, nisi quod notæ chronicæ punctis interdum distinguantur. Eadem a medio inde fere sæc. VIII. ad initium X. occurrunt quidem, sed paucissima. Sæc. X. hæc puncti forma (∴) fuit usitatissima. Licet vero coli quoque nostri, nec non commatis etiam occurrant formæ, has tamen puncti vices sustinere, dubitari nequit, cum sæcula illa ignorent discrimen, quod nos inter punctum, colon & comma facere solemus. Sæc. XI. mox comma nostrum, mox colon cum suffixo commate (∴) mox tria puncta iterum sibi imposita (e. c. ad quodvis verbum in subscriptione S. Stephani 1001.) pro puncto usurpantur. Sæc. XII. etiam in Germania subscriptionis regię quodvis verbum adjectum sibi punctum habet, adhibebaturque interpunctio sæculis prioribus diligentius, quamvis inepte interdum posita, orationis nexui vim interat. A sæculo inde XIII. ad XVI. in Hungariæ diplomatibus & chartis, punctorum nec eadem semper erat forma, nec idem usus. Commatis signum, quod mox puncti, mox coli, mox commatis etiam nostri vices sæculis istis sustinebat, sæc. XIII. cum puncti signo vulgari alternare cœ-

pit, interdum vero huic stat impositum, (!) ita, ut speciem signi exclamationis referat, quod scribæ dubii, utrum rectius adhiberetur, utrumque potius conjungendum esse rati sunt. Vidi diplomata nitidius scripta, & diligentius interpuncta, quam putares; vidi Sigismundi e sæc. jam XV. literas complures, ut nihil de privatorum chartis dicam, in quibus verba equidem discreta a se invicem sunt, periodos etiam litera major aperit, at ubi ceterum nullum, nisi in fine diplomatis, distinctionis signum qualecunque est conspicuum. Neque Matthiæ Regis tempore interpungendi ratio certis legibus fixa, & uniformis erat; commatis certe & puncti signa adhibebantur exeunte sæc. XV. promiscue. Exstant præterea ætatis illius literæ e. c. Magistratus Budensis an. 1488. in quibus omnis interpunctio omissa est. Vulgarem puncto finali sæc. XIV. XV. & ineunte XVI. apud nos formam duo puncta dabant adjuncto commate:

*) *N. Lehrgeb. der Diplomatie* V. §. 50. & seqq. *GATTERER. Elementa A. D.* §. 54. 55.

§. 70.

Hodierna interpungendi ratio.

Auctor interpungendi legis magis perfectæ, quam hodie sequimur, est ALDUS MANUTIUS typographus incomparabilis, qui anno 1490. Venetiis sede defixa, in exprimendis correcte non minus, quam eleganter libris, instituentisque in arte, quam ipse exercebat, filiis, ea diligentia versatus est, ut de re tam literaria, quam libraria sit optime meritis. Extruxit idem e libris, quos prelo suo subiciebat, scripturam monasticam, literasque, novo typorum characterem invento, (*cursevo seu italico; romanum,*

num, qualicum *Antiqua Chronica Hungarorum* Budæ 1473. Fol. min. per ANDR. HESS expressa sunt, CONR. SWEYNHEIM & ARN. PANNARZ jam prius invenerant,) pristinæ suæ pulchritudini restituit, sententias nostro more, punctis, colis, semicolis, cet. distinxit, hocque modo arti novitiæ novum decus addidit, auctoribus vero antiquitatis græcæ & romanæ reuiuiscens, detracto ævi barbari, quo sepulti jacuerant, squalore, habitum, illorum personis nostroque sæculo dignum induit a). Hoc MANUTIORUM beneficium magni æstimabit omnis, quicumque difficultates aliquando sentiet, quibus lectio *incunabulorum*, ut vocant, laborat, in quorum expressione typographi characteres manu scriptorum, e. c. *de utroque jure*, exacte secuti sunt; vel qui in bullis, quæ ex sic dicta Pœnitentiaria sacra, quæ Romæ est, a tribus inde fere sæculis proveniunt, incidet. Horrent illæ literis neogothicis, nullum distinctionis signum, nulla diphthongus in illis obvia, omniaque in iisdem, vel congesta, vel omissa sunt, quæcunque lectionem illarum facilem, fraudesque impostorum impediunt. Paucissimi, qui hujusmodi impetrarunt literas, legendis & intelligendis illis pares sunt b). Quod enim ipsemet in lectione bullarum (Brevia enim, quæ vocantur, scribendi rationi cujusque sæculi accommodata sunt) sæculi jam XVIII. expertus sum: præter cryptographa, & notas Tironis, nihil e medio ævo proponi potest illis lectu difficilior.

Tab. III:
Nro. 3.

a) Conf. HEUMANN l. c. & DENIS *Einleitung in die Bücherkunde* I. p. 156.

- b) De Negotiatoribus (Scambiatoribus) Curia Romanæ, illisque regni Gallia argentariis, (Trapezitis, *Wechsler*) qui ad sæc. usque XVII. Gallis bullas Romanas legerunt & interpretati sunt, vid. N. *Lehrgebäude der Diplomatie* III. §. 833. 34.

§. 71.

Scripturæ nationales cum suis Epochis.

Hoc tandem loco, satis commode opinor, dici aliquid potest, de præcipuis quibusdam *Scripturis nationalibus*, earumque Epochis, saltem quoad earum cognitio, rei diplomaticæ inprimis *Hungariæ* studioso, utilis & necessaria est.

I.) *Scriptura Romana vetus*, dominata est in toto Imperio Romano, duravitque ad migrationem usque gentium, seu sæc. V.

II.) *Scriptura Romano-barbara*, a sæc. V. vel VI. ad instauratas literas, seu finem sæc. XV. Hujus, præeunte MABILLONIO a), complures constituuntur species; (præter *Merovingicam* enim, commemorantur cum suis epochis, *Anglo-Saxonica*, *Wifigothica*, *Longobardica*, cet.) Nobis sequentes adnotasse sufficiat:

1) *Scriptura Franco-Gallica*, seu *Merovingica*; orta est hæc e Romana veteri, dominata est in Gallia & Germania, duravitque ad Caroli M. tempora.

2) *Scriptura Carolingica*, filia fuit Merovingicae, quam ad Romanæ veteris elegantiam, Carolus M. emendare jussierat. Duravit hæc a Caroli M. inprimis tempore, ad exitum fere sæc. XIII. in Gallia, & Germania; in Anglia præsertim a Wilhelmi Conqu. tempore; in Hispania ab exitu Sæc. XI. Etiam ab Italis in societatem *Longobardicæ* admissa fuerat. Eadem

dem sæc. XI. per viros religiosos, præcipue ex familia S. Benedicti, ex Italia & Germania in Hungariam traducta fuit; unde ad sæc. XIII. scripturam Hungarorum, cum scriptura Germanorum, unam eademque fuisse, atque utroque, ad iudicium de illa ferendum, communibus opus habere subsidiis, manifestum est. A Caroli Roberti in Hungariam adventu, ad Ferd. I. scripturæ genus in Hungaria exstitit mixtum aliquod, & inconstans, scribendi magistris undequaque, ex Italia, Germania, Polonia, cet. in Hungariam confluentibus, scripturamque Hungarorum, ad normam Italicæ, Germanicæ, cet. exigentibus. Universe tamen accedebat quam proxime, immo eadem fuit, cum

3) *Scriptura Neogothica, Monastica, vel potius Scholastica*, multifariam ad subtilissimam, ac male omnia ornantis sæculi gustum penitus corrupta. Dominata est hæc in tota fere Europa. Tenuia ejus sæc. XII. (e. c. in *Tabula Peutingeriana*) observantur initia, quæ demum exeunte sæc. XIII. invaluit, duravitque usque ad finem XV. immo initium adeo XVI. sæculi. -- Germani hodie, cum Bohemis, quibus etiam Slavos Hungariæ adnumeraveris, in vernacula scribentes, nec non Finni & Letti, interdum etiam Sveci & Dani, gothico hoc delectantur literarum charactere: qui bullis vel novissimis Rom. Pontificum est proprius; ab Anglis vero & Belgis in librorum titulis nunc demum derelictus est. Svaderem adeo omnibus, quibus expedita veterum instrumentorum lectio curæ est, ut a lectione scripturæ vulgaris theodiscæ legendi initium facerent, ad quam quo propius scriptu-

scriptura diplomatum scholastica accedit, quantumvis recentior ea sit, eo tamen difficilior lectu est.

III.) *Scriptura Romana vetus restituta*, h. e. ad veteris Romanæ elegantiam reformata. Dominatur inde a restauratione literarum, & gustus melioris, in omnibus Europæ prouinciis, ubi literis quas dicunt latinis scribitur.

- 2) MABILLON. *de re diplom.* p. 45. & seqq. conf. GATERER II. cc. — In opere Benedictinorum diplomatico Tomo III. §. 155 — 59. item Tom. IV. & V. §. 1 — 410. speciosa doctissimi MAFFEI argumenta, quibus idem MABILLONII divisiones scripturarum secundum Nationes impetierat, crisi subiecta sunt.

C A P U T IV.

DE MATERIA, IN QUA ET EX QUA SCRIPTA SUNT DIPLOMATA, SEU, DE INSTRUMENTIS SCRIPTORIIS.

§. 72.

Materia in qua scribebant, I.) e Regno minerali.

Quæ prima fuerit materia, in qua literæ scriptæ, definiri nequit. Erat illa sine dubio ubivis obvia, non diu multumque exquisita, tractabilis adhæc, sed rudis, qualem ipsam scriptionem initio fuisse necesse est. Non multo magis stylus, quo literæ sive in saxo, sive in ligno, sive in arborum foliis scriptitabantur, perpolitus fuerit; ignorantibus primis literarum inventoribus instrumenta plura scriptoria, quæ subinde materiæ, quæ ad scribendum sumebatur, diversitas exegit, luxusque & mollities scribarum induxit. Enimvero, postquam cognovisset antiquitas artis scriptoriæ usum multiplicem,

eem, fuissetque illa meliori vitæ morumque cultura imbuta, nihil fere intactum relinquebat, ex omnibus, quæ naturæ appellamus, regnis, quod literis scribendis non accommodasset. Lapideis tabulis Decalogus moſis incisus fuerat; laterculis coctilibus a Babyloniiſ observationes inſcribebantur ſiderum; in marmore denique Græci Romanique multarum rerum memoriam ad nos tranſmiſerunt; quo e. gr. marmora ſic dicta Oxoniienſia pertinent, copioſæque lapidum inſcriptiones Romanæ, quas GRUTERUS collegit, quorumque etiam Pannonia vetus bene dives eſt. E metallis plumbum flexile ſine dubio ante omnia ſcripturæ inſerviit; æri æternaturo ſubinde inſculpebantur e. c. leges publicæ, & fœdera gentium; fuitque omnino æris in rebus majoris momenti exarandis, inter Romanos tantus uſus, ut T. Flavius Veſpaſianus (SÆTON. c. 8.) ærearum Tabularum, tria millia, quæ ſimul conflagraverant, reſtituenda ſuſciperet. Tandem neque auri, & argenti pretium, neque gemmarum durities, ferreum antiquitatis ſtylum obtundere potuit.

§. 73.

Scribendi moſ in *foliis arborum*, e. gr. palmarum, quem Indi adhuc uſque retinent, auctoribus PLINIO & VIRGILIO, pervetuſtus eſt; certe *foliorum* nomen, quibuſvis fere linguiſ ad membranas & chartas tralatum, antiquitatis ejus ultimæ teſtis eſt. Sed nec reliquas arboris partes neglexit ſcribarum induſtria, ſuſſectis in locum foliorum *libris arborum*, id eſt tunicis interioribus corticis. *Lignum* ipſum inter primas ſcribendi materias pertinet, tabulæque

que de ligno tiliæ, quercus, cet. fabrefactæ, adhibebantur legibus, suffragiis, &c. exscribendis. Ab illis *pugillares* nostri ortum trahunt, qui initio erant *lignei*, postea, cera ligno affusa, *cerati*, tandem *membranei*, gypso aut creta illiti, atque deletiles. Fit librorum *linteorum* etiam frequens, præcipue apud LIVIUM mentio, qui illos in antiquissimis gentis Romanæ annalibus commemorat. Tales Sibyllini quoque erant, & hujusmodi libris linteis MOSEM Pentateuchum suum inscripsisse, nisi hoc in papyro ægyptiaca factum fuisse putemus, est verisimile.

§. 74.

Charta Ægyptiaca, corticea, cottoncea. E regno vegetabili nulla materia ad inscribendum desumpta, ad inventam usque chartam nostram vulgarem linteam, *Papyro ægyptiacâ*, quam etiam nude *chartam* appellaverè, fuit usitatior. Fiebat autem hæc charta nilotica, modo, quem PLINIUS (H. N. Lib. XIII. c. 11. 12.) & BAUHINUS delineaverunt, e planta papyro (*Berd* Ægyptiis, *Βίβλος* Græcis, *Cyperus Papyrus* LINNÆO dicta) in palustribus Ægypti locis succrecescente. Imago fruticis apud PR. ALPINUM & alios occurrit, multo exactius autem apud DOMINIC. CYRILLUM, (*de Cypero Papyro*, Parmæ 1796. Fol.) expressa est. Chartam contra lucem intuenti, jacentes sulci seu fibræ, secantes se invicem cum stantibus apparent. Initia illius obscura sed perantiqua sunt. Quæ majoris formæ, & præstantior ceteris erat, *hieratica* dicebatur, cujus generis *claudiam* præstantissimam habuerunt. Vilissima omnium fuit *emporetica*, mercibus involuendis relicta. Adhibebatur

batur in Europa diplomatibus etiam describendis ad sæc. usque XI. quamquam in Hungaria usus diplomaticus ejus nullus fuerit. Teste EUSTATHIO (vixit circ. 1160.) *ad Odyss.* φ. iam suo tempore ars præparandi illam derelicta fuit; diplomata ergo in charta nilotica descripta, sæc. XII. anteriora sint, necesse est.

Papyro multo magis injuriis temporum expositus est *cortex* arborum *crudus*, primis scribendi materiis accensendus, & quæ ab illo diversa est, *charta corticea*. Fuisse hanc veteribus usitatam evictum est. De eo tantum quæri posset, num vetus aliquod monumentum in corticea charta consignatum superstes adhuc sit? Id in confesso est, admodum difficile esse, discernere chartam hujus generis, a charta ægyptiaca.

Chartæ Cottonæ (gossypinæ, bombycinæ) usum, Arabes jam sæc. post C. N. VIII. tenuisse videntur, qui aliquanto serius per Græcos in Italiam, quam inferiorem dicimus, propagatus est. In regno ergo utriusque Siciliæ, diplomata in bombycina scripta, non pauca supersunt, nullum tamen quod sæc. XI. esset antiquius. Vulgaris chartæ istius usus hodie promiscue apud Turcas & alios orientis populos obtinet.

§. 75.

Ars, non e bombyce ipsa tantum, verum *Charta lintea*, e tela quoque pannoque bombycino, conficiendi chartam cottoneam, alterius mox artis mater erat, parandi scilicet e pannis lineis detritis, vulgarem hodie *chartam linream*. In hujus primis originibus detegendis, laborarunt viri quique præstantissimi, & adhuc laborant, præmiis etiam

etiam aliquando a Regia Scient. Societate Gœttingensi ad id excitati, quæ quidem bene memor, quam egregie divina illa inventio, artibus & scientiis renascentibus obstetricata fuerit, dignum vindice hunc modum proposuerat. Neque tamen adhuc res omnis ad liquidum perducta est, ob magnam, quæ est inter chartam e gossypio confectam, & eam quæ ex linteo fit, similitudinem. Sunt, qui Italiæ inventionis honorem deferunt, utpote quæ jam anno 1340. linteam fabricata est, Germanisque primam anno 1390. chartariam erigentibus, peritos rei suppeditavit operarios. -- Ad sæc. XV. nullum hujus artis apud Gallos Hispanosque erat exercitium. In Transilvania an. 1546. in Hungaria vero 1613 (?) primæ papyrificinæ structæ sunt a.) Sententiam tuentur intermediam, eamque sine dubio tutissimam, qui prima chartæ e pannis lineis confectæ vestigia, non cum MONTEFALCONIO sæc. XI. exquirunt, sed neque cum LUDEWIGIO ad sæc. usque XIV. desiderant, colligentes illa post GUDENUM & SCHWANDTNERUM, non sine magna verisimilitudine, sæculo tertio supra decimum, quamvis certiora specimina in sæculi demum XIV. initia incidant. Hoc eodem tempore, ab Italis cum Rege Carolo Roberto in regnum commigrantibus, etiam Hungari usum linteæ istius chartæ edocti sunt, qui tamen in regum privilegiis, capitulorum investituræ literis, majorisque momenti diplomatibus describendis, ad sæc. XVI. nusquam observatur, ad literas minoris momenti tantum relegatus, privatisque adeo civibus ad illud usque tempus, in pergamena, id quod pacti inter se erant, describentibus.

- a) „ Anno 1613. primus in Scepusio, immo in hoc
 „ Hungariæ Regno (?) officinam chartaceam sive
 „ Papyrificinam extruxit, Dominus SAMUEL SPIL-
 „ LENBERG, Medicinæ Doctor Leutschovienſis, in
 „ pago Leutschovienſi *Teplitska.*, Verba ſunt Chro-
 „ nici *Scepuſienſis*, ex quo Excerpta vulgavit P.
 „ CAR. WAGNER, in *Analectis Scepe*. P. II. p. 22. “
- *) Signum publicum (*Stempel*), quod in Hispania &
 Hollandia, chartis in quibus diplomata describun-
 tur, ab anno 1555. inprimitur, Galliz an. 1673.
 aliis Europæ civitatibus paulo ſerius, aliis au-
 tem, veluti Hungariæ, nunquam complacuit. Ha-
 bet vero etiam noſtra charta lintea notam char-
 tariæ, e qua dignoſcitur, ubi & a quo præparata
 fuerit, quæ quidem in literis dubiis examinandis,
 vel eo minus debet negligi, quo certius ex eadem
 falſitas interdum poteſt coargui. Conf. L. K. (KOE-
 VESDI) *Examen Verböczianum*, Peſt. 1785. 4. p. 117.
 & 184.
- **) Conatus indefeſſi, virorum noſtri & ſuperioris
 ævi, præparandi chartam ſcriptoriam e pluribus ve-
 getabilium materiis obviis, ſæpe abjectis, enarran-
 tur, in der *Neuen allgem. deutsch. Bibliothek*, Bd. LII.
 in recensione libri: *Die älteste Urkunde der Papier-
 fabrikation in der Natur entdeckt, nebst Vorschlägen
 zu neuen Papierstoffen*; von G. A. SENGER. *Dortm.
 und Leipz.* 1799. 8.

§. 76.

Membranæ, quarum uſus ætate media tam III.) E regno
 late patuit, & adhucſque magnus eſt, inter animali.
 ſcribendi materias e regno animali primum
 locum depoſcunt. Vulgare illarum nomen
Pergamena, ſcil. charta, ab urbe Pergamo acce-
 ptum, non quod ibi primum reperta eſt, ſed
 quod æmulatione circa Bibliothecas regum
 Ptolemæi & Eumenis, illo chartas Ægypto ef-
 ferri vetante, hic domi majorem juſſerit co-
 piam fieri membranarum, earumque meliorum,
 quam antea. Eſt nempe corii uſus in ſcriben-
 do vetuſtiſſimus, ut adeo plenior ſolummodo

& perfectior ejus elaboratio, Eumeni Pergamiorum regi in acceptis referenda sit. Ætatem pelles illæ, ovium, vitulorum, cet. membris deglubitæ — si saxa & metalla demas, — ex omnibus scribendi materiis præcipue ferunt, temporisque edacitati resistunt quam longissime; quanquam diploma inventum adhuc nullum est membraneum, quod sæc. VI. esset antiquius, cum aliquanto antiquiora in charta existent ægyptiaca; codicibus vetustissimis, qui supersunt, descriptis in pecudum exuviis. Hungaria ad sæculi XIV. initia, præter membranas, nulla alia scribendi materia in diplomatibus usa est, quas universe eo antiquiores esse perhibent, quo tenuiores, læviores, candidioresque sunt, ita ut digitis interceptæ, suapte in volumen coëant; protensæ, observante GUDENO, *in præf. ad Syllogen I. Diplomatarior.* p. 3. quoad formam externam, ad sæc. usque XI. (ut dipl. S. Stephani 1001. & Andreæ I. 1055.) magis ad latitudinem (altitudinem,) quam longitudinem.

§. 77.

Continuatio.

Serviebant adhuc scribarum usibus, præter membranas, elephantorum omenta, draconum intestina *a*), coria piscium. Nec cuti adeo humanæ pepercisse narrantur scribæ seduli, ut nihil jam de tabulis veterum eboreis, Diptychis, Triptychisque, cet. commemorem. Id præterire non possum; detestabilem morem *rescribendi* codices, id est, describendi illos membranis, quarum vetustiore scripturam, vel *spongia* prius abluerant, vel *pumice* depurgarant, duravisse inde a sæc. VI. vel VII. ad XIV.

XIV. immo ad XV. usque *b*). Hoc tandem tempore publice prohiberi debuit consuetudo illa, ad interitum tot librorum utilissimorum comparata. Diplomata equidem rescripta nunquam ipse vidi, neque ab aliis commemorari memini: attamen nec ista monumenta scribarum effugere potuisse, non scio avaritiamne dicam, vel stuporem & negligentiam, e verbis, in quæ Notarii sequiori ævo jurare cogeantur, nimirum, quod „ in charta unde alia abrasa „ fuerit scriptura, instrumenta sua publica „ non conscribent „ fit verisimile. — Codicillos veterum *palimpsestos*, e membrana vili communiter confectos, causaque parsimonie usitatos, hic nominasse satis esto.

a) Quod CEDRENUS & ZONARAS, ille XI. hic autem XII. sæculi scriptores Græci narrant, Basilisco Imperatore († 477.) ortum fuisse Constantinopoli incendium, quo Basilica cum Bibliotheca conflagravit, in qua librorum millia CXX. erant reposita, atque hos inter exstitisse etiam draconis intestinum pedes CXX. longum, cui aurea Homeri poemata, Ilias & Odyssæa, aureis literis inscripta fuerant, una cum Historia rerum ab Heroibus gestarum; id fabulam equidem græcam sapit, confictam attamen ad verisimilitudinem.

b) In Bibliotheca, olim regia, Parisiensi, codex adservatur, sæc. VII. sine dubio descriptus, in quo sub opusculis EPHRÆMI SYRI græcis, fragmenta Vet. & Nov. Testamenti latent. Similia barbariei ævi intermedii portenta plura, in Bibliothecis Europæ majoribus, Mediolanensi, Guelpherbytana, & aliis supersunt.

§. 78.

Communis, maximeque vulgata materia, Materia ex qua veteribus pingebantur literæ, atramen-qua —
tum erat. Antiquus hujus conficiendi modus,

e fuligine furni cum gummi subacto, differebat a nostro, possetque adeo in falsi suspicionem venire diploma, quod ante sæc. X. hodierno vulgari nostro atramento scriptum esset. Hungari liquore hoc atro & communi, in diplomatibus & chartis, solo fere tantum & semper usi sunt; nisi quod in literis regum, quas *armales* dicimus, a sæc. inde XV. & XVI. primus literarum versus, nec non personæ privilegium impetrantis nomen, in contextu recurrens, ut plurimum *liquore aureo* distincta sint. Auro itaque prima linea scripta est armalium, quibus an. 1436. Sigismundus Posonium exornavit; auro etiam fulget primus diplomatis Matthiæ regis anni 1486. versus, quo privilegia Saxonum Transsilvaniæ ab Andrea II. an. 1224. accepta rata habuit *a*). Vidi & miratus sum solemne diploma regis Belæ IV. diversicolor *b*); memorque sum instrumenti alterius adhuc, quod scriptum esse videbatur liquore cæruleo *c*). Plura, quæ prima specie viridem rufumque colorem simulabant, accuratius inspecta, atramentum prodiderunt male temperatum, quod diuturnitate temporis in colorem a primævo paulo diversum degeneraverat. Sunt autem plura præcepta, quæ scripturam diplomatum, vetustate languidam & emortuam renovare, ac, ut ita dicam, in vitam revocare docent; sed magna eatenus cautione opus est, ne vel tantillum, quod adhuc supererat, penitus oblitteretur, vel ne ipsum diploma arte recreatum, ceu nuper procusum, in falsi suspicionem deveniat.

Præ ceteris tincturis, quibus veteres scribebant, *purpureus* liquor habebatur nobilior, apud Byzantinos solis Imperatoribus aliquando refer-

reservatus, qui PLINII tempore e muricis cruore fiebat, serius vero e cocti muricis & triti conchylii ardore componebatur, unde *encausti* nomen accepit; quod cum Imperatoribus in subscribendis literis esset proprium, *sacrum* seu imperatorium appellatum est. Pro purpura *minium* etiam, vulgo *cinnabaris*, ab iisdem Imperatoribus in literis & diplomatibus signandis est adhibitum, concessa serius filiis etiam & cognatis minio scribendi venia: ad quorum imitationem, præter perpaucos Germaniæ Augustos, etiam Serviæ reguli, durante adhuc Imperio Byzantino, rubro charactere in subscribendis literis usi sunt. Quod porro miniata fuerint juris, quod Imperatores Constantinopolitani dicebant capita, *Rubricæ*, (unde *Rubrum* & *Nigrum* Jureconsultorum) dicta sunt. Librorum deinde titulos minio notare, novumque caput rubrica ordiri, solemne fuit librariis romani & inferioris ævi, retineturque eadem consuetudo in missalibus, martyrologiis, breviariis cet. exprimendis adhucusque. De scriptura sanguine humano rutilante, nihil attinet hoc loco dicere; id tamen præterire non possum, ad dictis & factis majus robur procurandum, in scriptionibus ævi veteris, identidem de latice calicis sacri fuisse aliquid atramento additum, quod in hæresibus, e. c. Monotheletarum, condemnandis factum fuisse, aliunde meminimus, atque in signo sanctæ crucis in diplomatibus describendo, interdum observatum est. MABILLON. l. c. p. 170.

- a) Vetustus mos est scribendi liquore aureo. Ætate media codices, præcipue sacri, in purpureis membranis, illo scribebantur: sed nec diplomata desunt

chrysographa, cujusmodi in Italia, Angliæ & Germaniæ Tabulariis passim ostentantur. *Argenteo* liquo-
 re notissimus ULPILÆ codex, & alii descripti
 sunt; diploma vero adhuc nullum inventum est,
 cujus scriptura argento corruscasset.

- b) In specimine scripturæ quod §. 46. ex aurea ista
 bulla Belæ IV. regis, opera xylographi adumbravi,
 cæruleus literarum color cum rubeo continuo al-
 ternant. Idem observavi in initialibus regnorum,
 quæ ibidem in titulis regiis recensentur, literisque
 illis omnibus, quæ novam diplomatis prolixi perio-
 dum aliquam incipiunt.
- c) Est illud constitutio procuratoris, per Vice Comi-
 tem & Judices nobilium Comitatus de Thorontal.
 Datum feria 4. proxima post Festum B. Lucie Vir-
 ginis & Martyris, anno Domini 1450.

§. 79.

Instrumenta

script. reliqua.

Ut materiæ, in quibus olim scribebatur,
 diversæ & multiplices erant, ita instrumenta
 etiam, ope quorum in eisdem literæ effin-
 gebantur, varia fuisse necesse est. *Stylo*
 ergo, qui primum ferreus fuerit, postea osseus,
 vel eburneus, interdum argenteus etiam, in
 cera exarabantur literæ, qui obtusus erat par-
 te altera, ut inverso, præpostere ceræ inscri-
 pta, obliterari possent commode. *Calum*, seu
Cætes ad literas in metallo effingendas servie-
 bat; Chartæ vero Niloticæ, membranisque inscri-
 bendis, *memphitica* tellus *calamos* (arundines)
 habiles dabat, quibus tamen magis adhuc pro-
 babantur *Gnidii*. Ab orientis populis, Persis
 Turcisque, calamorum usus ad præsens usque
 retinetur, qui in occidente exolevit, aptatis
 ad scribendum avium, præprimis anserum,
pennis, quas sæc. VII. inter instrumenta scri-
 ptoria pertinuisse ex ISIDORI HISP. Orig. Lib.
 VI. cap. 14. certum est. *Penicillo* (*Pinfel*) Si-
 nen-

nenses hodieque scribunt, cujus usus in libris linteis olim conscribendis fortassis erat aliquis. De atro carbone, putrique creta, plumboque scriptorio (plumbagine) differant illi, quibus hæc talia amplius illustrare est propositum. Coronidis loco id adhuc adnotasse neminem pigeat, veteres secundum *Canonem* seu *regulam*, mox *stylo*, mox *plumbo* *rubricaque* præsignasse lineas parallelas, cum in diplomatibus, tum in codicibus, ad quas Notarii & scribæ scripturam dirigerent. In extremitate versuum hinc sæpius crassa circini, spatium interlineare dimetientis, exstant vestigia. Exemplis, quæ ubivis occurrunt, res non opus habet. GATTERER (in *Comment. de ætate codicum* cet.) PP. Benedictinos secutus „Lineæ, inquit, dirigendis versibus ac columnis, si ductæ sunt „ stylo, innuunt sæc. V — XIII. si plumbo, sæc. „ XI — XIV. si colore rubro, sæc. XIV. XV. “

*) Indicabo libros, e quibus cognitu non minus jucunda, quam utilia, quæ hoc capite exposui, potissimum excerpta sunt. Fuerunt illi: MABILLON l. c. N. *Lehrgeb. der Diplomatik*, Bd. I. II. — CH. GOTTL. SCHWARZII *de Ornamentis librorum veterum disputationes* VI. Altorfii 1705 — 1725. habitæ, recusæ Lipsiæ 1756. 4. — *Chronicon Gottwicense*; HUGO *de prima scribendi origine*, ex edit. TROTZII Traj. ad Rhenum 1758. 8. — IM. BREITKOPF *Versuch den Ursprung der Spielkarten, die Einführung des leinen Papiers, und den Anfang der Holzschnidekunst in Europa zu erforschen* T. I. Leipz. 1784. T. II. Leipz. 1801. 4. *Palæographia Græca* BERNH. de MONTFAUCON Parisiis 1708. Fol. GATTERERI ll. cc. quibuscum conferri possunt debentque: WEHR'S *über das Papier*. Halæ 1789. nec non HEUMANNI, & DENISII ll. superius collaudati.

§. 80.

Problema.

Definire secundum Graphicæ regulas, ætatem diplomatis dati, ita, ut exinde simul authenticitas ejus appareat.

I. Character diplomatis
dati (an. 1273.)

II. Sæcula, quæ characterem illum ferunt.

1.) Literæ cursivæ, minutis rarius admixtæ. §. 34.

.. 12 13.

2.) Litera i rarius puncto, sæpius accentu acuto notata, sæpissime utroque signo carens. §. 35.

.. .. 13 14 15 16.

3.) e constanter pro æ positum. §. 42.

.. .. 13 14 15.

4.) Abbreviaturæ multæ. §. 48.

.. .. 13 14 15.

5.) Punctum figuram signi exclamationis habens. §. 69.

.. .. 13.

6.) Scriptura parum ad Neogothicam accedens. §. 71.

.. .. 13.

7.) Membrana magis longa, quam lata. §. 76.

.. 12 13 14 15.

Hi characteres omnes & singuli (quos quilibet, dum opus erit, majori adhuc numero excerpere, excerptos cum artis regulis conferre poterit) in solum sæc XIII. cadunt; ad istud igitur, diploma datum, referendum est: quod ad-

adhæc verum ac sincerum esse debet, cum nota temporis diplomati subscripta, sæculum XIII. referat, ac proinde per omnia cum charactere instrumenti, hoc vero cum legibus Graphicæ concordet, nec reliqui diplomatis characterismi, ab oratione, sigillo, cet. deducti, contrarium suadeant.

DIPLOMATICÆ

P A R S II.

S E M I O T I C A.

DIPLOMATICA.

§. 81.

Alteram Diplomaticæ partem constituit *Semio-Obiectum Semiotica*, ab græco σημεῖον ita dicta, signa diplomioticæ diplomatum solemnia exponens, & examinans. In diplomaticæ horum censum, præter *Chrismon* & *Cruces*, *Cancellariorum* & *Notariorum signa*, *Monogrammata* tandem, & *Sigilla* veniunt. Sunt illa diplomatibus tantum originalibus, (quæ ab eisdem potissimum, inprimis a sigillis, sanctionem ac robur suum accipiunt,) propria: & quod sæpissime, ad iudicium de authenticia diplomatis, de quo quæstio agitur, ferendum sufficiant; non præpostere in censura diplomatum, ab illorum characterum examine, fiet initium. In analysi enim, principiis prius bene imbuti, sæpe in-

verso

verso ordine procedimus, quod in artis pertractatione, seu theoria, bonæ methodi leges, facere prohibent.

C A P U T I.

CHRISMOLOGIA, SEU DE CHRISMIS.

§. 82.

Chrismi origo & definitio.

Solemne id fuisse meminimus omnibus olim antiquitatis populis, ut rem nullam graviorem, nisi auspicato, invocatoque prius Deorum auxilio, adgrederentur. Etiam Christiani, & quidem, ut credere par est, non tam ducti antiquitatis superstitiosæ exemplo, quam sacrarum pandectarum auctoritate moniti, mature admodum, ad exhibendum religionis suæ symbolum, atque ad antevertendam fortunam adversam, conciliandamque dictis & factis suis fidem & auctoritatem majorem, ritus verbaque solemnia, ex institutis & sacris eorum repetenda, adhibere inceperunt. Inprimis sacrosanctum ipsis nomen Jesu Christi, fini huic accommodatum, atque pietate, qua in Servatorem ferebantur, dignum censebant, quod in exordio magnarum rerum, fronteque & subscriptione tam instrumentorum, quam etiam codicum, vel crucis symbolo declararent, vel, quod fortassis a solis Christianis illud intelligi vellent, siglis tantum inter se flexis & coarctatis, potissimum in exordio diplomatum, & ante nominis subscriptionem depingerent. Vocatur nota ista religiosa nomine neogræco *Chrismus*, seu *Chrismon*, a Christi nomine, quod destinatione sua designat, deducta, exhibens interdum

dum illud solum & unicum, interdum copulatum cum siglis, formulam piam aliquam brevem in se continentibus.

§. 83.

GATTERERUS ordinarias Chrismi, quod in ^{Chrismi Epoc} Germaniæ chartis a sæc. V. usque XIII. obser- ^{chr.} vatur, formas, ad tres revocavit classes :

I.) Primæ classis chrison exprimebatur siglis J. C. N. atque a sæc. V. ad IX. usque obtinuit. Quem sensum siglæ istæ recondant, a BARINGIO, JO. GEORG. ab ECKHARD, & aliis disputatum est, triumphante hujus sententia, qui siglis istis formulam *in Christi nomine* reconditam teneri statuit; quam subinde Auctores etiam novi systematis diplomatici, hujusque felix epitomator GATTERERUS ingressi sunt. Si quid video, siglæ illæ initio elementa græca erant, complexæ formulam græcam $\overline{\text{IC}} \overline{\text{XC}}$, id est $\text{I}\eta\varsigma\epsilon\varsigma \text{X}\epsilon\iota\varsigma\omicron\varsigma$, vel elemento græco N. addito, $\text{I}\eta\varsigma\epsilon\varsigma \text{X}\epsilon\iota\varsigma\omicron\varsigma \nu\iota\kappa\alpha$, quæ inferiori ævo, latinis literis scripta, latine legebatur; *in Christi nomine*. Fuerunt autem hujusmodi tesseræ christianæ, majori aliquando numero apud Græcos, quam inter Latinos Christi affeclas, siglis ut plurimum conceptæ, sensum sæpe habentes absconditum, ab ipsis interdum Christianis, latino ritui addictis, intellectæ præpostere. Huc monogramma Christi ✠ pertinet, adnexis interdum græcis α & ω (principium & finis) literis; huc formula vetus, e disciplina arcani veterum Christianorum sine dubio repetenda, $\text{I}\chi\theta\upsilon\varsigma$; huc nomen Jesu IHS. initialibus tribus literis expressum, quod Latini sequiori ævo, per *Jesus Homo Salvator*, utut minus recte interpretati sunt

sunt. Præ multis aliis, formulam $\text{Ἰησοῦς Χριστός νικᾷ}$, familiarem Christianis aliquando fuisse oportet, quod victoria Servatoris, de hostibus humani generis deportata, salutem suam inniti pie crederent, deportandamque adhuc de persecutoribus doctrinæ ejus cœlestis firmiter sperarent. Eadem ceu tessera divinitus præscripta, a Constantini M. tempore, omnium usitatissima, inter Christianos, præcipue Græcos, esse debuit, inscripta una cum signaculo crucis, templis arisque, vexillis & armis, codicibus & diplomatibus. Et de diplomatibus quidem græcis id multo magis adhuc confirmabitur, ubi res diplomatica Byzantinorum aliquando luculentius exposita & illustrata fuerit. Qui vicini aliquando erant Byzantio reguli, præcipue ritu græco sacra facientes, Imperatores græcos in solemnibus verbis & ritibus diligenter imitati sunt, erantque horum illi non minus, quam hi, quod constat, tenacissimi. Atqui vero in Archivo Carolovicensi quod jam commemoravi, solemne diploma custoditur Stephani reguli (Czár) Serviæ, anni 1348. $2\frac{2}{3}$ ulnas vien. longum, $\frac{1}{2}$ ulnam vien. latum, bulla argentea, intus vacua, afflata auro, communitum, cujus frontem crux duplicata coloris rubei coronat, cum perigraphæ $\overline{\text{IC}} \overline{\text{XC}} \overline{\text{NI}} \overline{\text{KA}}$. Ab instrumento hocce, occasionem interpretationis novæ siglarum J. C. N. me accepisse, non diffiteor.

2.) In Chrismo secundæ classis, C majusculum inprimis est conspicuum a sæc. IX — XI: ita tamen, ut j longioris reliquiæ in apice & in basi literæ dominantis C adhuc observentur. Videntur istæ ornatus tantum causa retentæ esse, calligraphis de solo *Christi* siglo jam tantum cogitantibus.

3.) A

3.) A sæc. deinde XI. ad XIII. seu ad Ottonem IV. majuscula C sola tantum restitit, post hujus vero tempora, e diplomatibus Germaniæ regum, in quibus Chrismi signum imprimis usitatum erat, penitus omissum est.

§. 84.

Non incognitum fuisse Hungaris Chrismi signum, diploma S. Stephani Regis, an. 1001. nec non Andreæ I. 1055; S. Ladislai sacro monti Pannoniæ collatum, quod ipsemet inspexi, immo & Andreæ II. non pauca, quæ monogramma Christi in fronte gestant, testatum faciunt. Est autem illius usus, vita horum Regum circumscriptus, neque tamen in omnibus Regum sæculi XI & XII. quas quidem lustravi literis (e. c. Belæ cæci, Stephani III. Emerici) obviis. Literis græcis, quibus S. Stephanus monasterium sacrarum virginum in valle Veszprém constituerat, Chrismi loco, crucem simplicem præfixam stare, SZEGEDI, (*in Andrea II. Hierosolymitano* p. 117.) qui illas se vidisse, & cum veneratione legisse narrat, testatus est. Illud vero Chrismon, quod antiquissimo omnium diplomatum domesticorum, præpositum est, & quod meis oculis in Tabulario Exc. Cameræ Regiæ sæpe & diligenter sum intuitus, secundæ Classis est, atque monogramma Christi, seu Labarum Constantini infertum sibi tenet. Ad amussim illud delineari curavit RR. NOVÁK in *Vindiciis diplomatæ* dicti Budæ 1780.

Chrismi usus
in Hungariæ
diplomatibus.

Tab. IV.
Fig. I.

*) Exempla Chrismi occurrunt apud MABILIONUM, in *Chronici Gottwicensis* Tomo prodromo, in WALTHERI *Lexico diplomatico*, in BARINGII *Clave diplomatæ*

plomatica p. 186. *N. Lehrgebäude* Tom. VI. Tab. 70. nec non in GATTERERI *Elem. dipl.* Tab. II.

CAPUT II.

STAUROLOGIA.

§. 85.

Nexus cum
prac. Capite.

Doctrinæ de Chrismo non inepte subiungitur doctrina de signo crucis in diplomatibus obvio; quamvis nec illis intercedere velim, qui huic priorem in systemate locum attribuerint. Eadem enim religio, quæ chartis & diplomatibus Chrismon adpinxit, Crucibus quoque in iisdem locum fecit. Consuetudo certe omni tempore & loco, ad omnem actum & incesum, pingendi signandique crucem, ut omnium, quas antiquitas Christiana sectabatur, est antiquissima, ita hodieque inter Christianos quam plurimos vel maxime solemnitas est.

*) Præcipui de venerabili signo Crucis auctores, præter novum Systema diplomat. T. VII. sunt: JAC. GRETSERUS de *S. Cruce*, inter opera ejus omnia, quæ Ratisbonæ 1734. Tomis XVII. Fol. recusa sunt, Tomo I — III. CAR. DUFRESNE *Glossarium ad Scriptores mediæ & infimæ latinitatis*, voc. *Crux*. GATTERER *Elem. A. D.* p. 183. — 204.

§. 86.

Locus & potestas
Crucis
in diplomati-
bus.

In diplomatibus cruces potissimum in fronte illorum positæ, subscriptionibusque additæ reperiuntur. Et exordio quidem diplomatum præfixæ, eandem quam Chrismon potestatem habent, Christique appellationem tacitam significant. Quod cum ita sit, mirari non possum non, cruces juxta cum Chrismis progressu temporis

poris hoc loco omiffas effe, quas tamen a *ſæc.* XVII. ad hoc usque tempus, epistolas privatorum, præcipue Sacerdotum, iterum coronare cernimus. — Subscriptionum formulis vel præfixæ, vel postpositæ, vel interjectæ etiam; chartis & instrumentis illam vim & auctoritatem conciliabant, quam eadem a nominis subscriptione manu propria facta, accipiebant, fuitque signi illius venerabilis ea omnino sanctitas, ut eum jurisjurandi loco haberetur idem, *συνεπεται* audirent illi, qui a subscriptione sua resiliabant temere. Vulgaris hæc erat ad *ſæc.* XI. immo ad XII. usque, instrumenta subscribendi ratio, cum apud Græcos, tum apud Latinos, in diplomatibus ecclesiasticis & civilibus, præcipue privatorum literis obvia, originem trahens primam a pietate hominum, sustentata, & propagata præcipue, ab incredibili, qua ævum medium laboravit, ignorantia. Cum enim præter Clerum omnes alii rudes & ignari literarum essent, impares exscribendo nomini proprio *a*), notarii ministerio ad hujus descriptionem usi sunt *b*), adpingentes ipsimet, more hodieque inter plebejos passim vigente, signum Crucis, quod gravi tremulaque manu qualitercunque distortum, ita jubentibus Cæsarum, (*Cod. just. tit. 30. leg. 22.*) & Conciliorum (*N. L. G. der Dipl. VII. §. 126.*) legibus, juxta cum subscriptione propria, auctoritatem in foro habuit. Interdum, quod in testium subscriptionibus inprimis observatur, ne signum Crucis adeo testium, qui nuncupantur, est idiogram, sive id factum sit ob pigritiam & fastum, sive ob consuetudinem sæculi *e. c.* in diploma-
te Andreæ I. an. 1055. Quid? Quod formula
sub.

subscriptionis (*Signum N. N.*) retenta, signum tamen Crucis, quod expectare jubebaris, omis- sum sit, donec tandem ipsa quoque formula vetus omissa est, testium nuda recensione epi- logo instrumenti inserta, signorumque vicem sigillis obtinentibus.

- a) Si Reges adeo illius ævi analphabeti erant, quod pluribus exemplis apud MABILLONIUM p. 163. certum est, quantam privatorum ignorantiam fuisse necesse est? Exempla peregrina, quæ illam in viris principibus & nobilibus etiam, ut nihil de plebe dicam, produnt, prostant innumera, dome- stica inferius adferam. Præjudicata scilicet illa ævum medium occupaverat opinio, literarum cul- turam, quæ mores feros emollit, interitum attulisse Imperio Romano, esseque virtuti bellicæ noxiam. Abest ergo ab oblectatione, quod de Galliarum No- bilibus sæculi XIV. legitur (FROISSART, *Histoire & Chronique*, Tom. III. p. 83.) „ Les seigneurs sont „ gouvernés par le clergé; n' ils ne sauroient vivre, „ & feroient comme bestes, si le clergé n' estoit “ quorum nec sæculo XV. major fuerit eruditio, cum huic ævo par auctor (COMINES), supinæ adhuc illos ignorantie arguat, „ de nulle letre ils n' ont „ connoissance “ Sed nec alibi gentium majus erat literarum studium. Narrat PETRARCHA (sæc. XIV.) se in urbe Germaniæ Leodiensi, atramenti aliquid reperire, & id croco simillimum, magno nonnisi la- bore potuisse. (MEINERS *Histor. Vergleichung — des Mittelalters — mit unserm Jahrhundert I — III. Band, Hannover 1793. 8.*) Anno vero jam 1524. cum pacem cum Russis confectam, Legatus Regis Sveciæ subscribere ipse non posset, (*Götting. Anzeigen St. 55. 1801.*) vicaria sacrorum, quem habebat, ministri ad id opera usus est. Abhorrent hæc talia a sæ- culi nostri institutis, juventutisque etiam illius edu- catione, cui non est equus, & pater, & res: at majori adhuc multo admiratione dignum est, fuisse olim etiam homines sacris ordinibus additos, apud quos tamen solos alias omnis erat legendi scri- bendique potestas, quinimo Episcopos etiam passim inven-

inventos, Musis adeo inimicos, ut nomen suum pingere non valerent. MABILLON l. c. p. 165.

- b) Magnopere ergo est cavendum, ne, quum nomen alicujus literis subscriptum legis, hoc manu propria factum esse putes, utut exempla in contrarium etiam non prorsus nulla sint. Stephanus Báthori Judex Curia Regia sac. XV — quæ dignitas in regno Hungaria post Palatinatus honorem prima est, — scribendi erat nescius. Occurrunt tamen literæ nomine ejus subscripto communitæ, sed, quod advertendum, amanuensis opera. Conf. *Neues Lehrgeb. der Diplomantik*, VII. §. 145. & seqq.

§. 87.

Otiosum esset de Figura, qua Crucis signum veteres cum in diplomatibus, tum alibi etiam effinxerunt, hic longius differere. Pen-
Figura & color signi Crucis.
debant hæc olim, ut hodie fere, ab hominum arbitrio, illiusque, quod elegans & pulchrum esse opinabantur, studio. Occurrunt ergo præter cruces ordinarias, *Andreanæ*, *compositæ*, *vestitæ*, *rhombatæ*, cet. Figura vulgaris maxime frequens est. Etiam color, quo idem signum pingebatur, erat varius. Imperatores Constantinopolitani pingebant illud colore purpureo: nec defuerunt Principes, qui illos in hoc imitati sunt. In Angliæ diplomatibus ante Wilhelmum conquestorem, veteri consuetudine, cruces aureæ manu Regum depictæ, in principio literarum, ante nomen regum stabant positæ, firmabanturque Anglorum cirographa, neglectis ceris, sola subscriptione testium, cum crucibus vulgo aureis, quæ alibi gentium vulgari atramento ut plurimum ductæ sunt.

§. 88.

Cruz in char-
tis domesti-
cis.

In Hungaria figura crucis ordinaria, quantum e paucis subscriptionum exemplis colligi potest, perpetuo obtinuit, colore nullo unquam alio quam atro & vulgari depicta. Exempla ista (nisi Dalmatiam etiam respiciamus, ubi sæc. XII. adhuc frequentia sunt) e solo fere tantum sæculo XI. superant; quamvis enim sæc. XII. testes subscriptos adhuc passim in instrumentis domesticis observaverim, *laudantes & confirmantes* argumentum eorundem *d*), eodem tamen adhuc sæculo, immo XI. adeo jam mos receptus est, solemnis postea per plura sæcula, cum in Regum Cancellariis, tum Capitulorum etiam & aliorum *Scriberiis*, (sic Cancellarias vocabant,) ut Notarius in epilogo literarum, continua serie, testium, præsentium prius tantum, postea, prouti e. c. in solemnibus Regum nostrorum diplomatibus, id hodieque in Episcoporum & regni Optimatum recensione observamus, absentium quoque nomina recenseret, nullo crucis signo addito, communiter etiam sigillis testantium & contrahentium absentibus; sigillis Judicum regni, Capitulorumque & Conventuum, coram quibus contrahere, Hungaris nunquam non solemne erat, factum omne abunde comprobantibus, donec tandem ritus subscribendi, ab illo, quem hic attigimus, paulo diversus, & de quo alibi dicendi locus erit, sæc. XV. & XVI. revivisceret iterum.

a) LUCIUS de regno Dalmatiæ & Croatiæ Lib. III. cap. IV. FARLATI *Illyricum sacrum*, Tom. III. p. 174.

CAPUT III.

MONOGRAMMATICA.

§. 89.

Cum monogrammata subscriptionis loco in Definitio.
 diplomatibus sint adhibita, de usu illorum diplomatico, continuo post Staurologiam differendum esse putavi, idque, quantum fieri potuit, compendiose; tum ideo, quod monogrammatum usus in re diplomatica Hungariæ perexiguus fuerit, tum etiam propterea, quod talia subtilius exquisita, & operosius deducta, abhorrere videantur a sæculi nostri gustu & studiis. Est autem *Monogramma* (chiffre, *Nähmenszug*,) figura seu character, singulas unius vel plurium etiam verborum literas, per coarctationem, ordineque vario dispositas exprimens. Quotcunque ergo modis, coarctari possunt literæ, constructa etiam fuerunt monogrammata; quæ ex literis *contiguis*, *innexis*, *insertis*, atque *columnatis* exstiterunt, ad quas interdum accedebant *adjunctæ*, præter illas, ad complementum vocis necessariæ. Figuras hujusmodi, Notariorum artificiosa astutia, sæpe ita coagmentatas, ut interdum nec MABILLONII ingenium extricandis sufficiat, inter crepundia ætatis mediæ refero; quæ talibus quidem calami-stratis figuris, factu lectuque difficilibus, haud scio quantum ingenii, & artis inesse olim opinata est. Post G. LEONH. BAUDISIUM, qui de analysi monogrammatum Germaniæ Imperatorum ac Regum duas commentationes edidit a), ob easdemque architecti Monogrammatologiæ laude a GATTERERO insignitus est, CH. HENR.

ECKHARDUS hoc Diplomaticæ caput egregie perpolivit *b*), GATTERERUS vero omnibus aliis idem pertractavit & plenius & accuratius.

a) G. L. BAUDISII Prof. Brunsv. († 1760.) exstant.

1) *Præparatio ad analysim Monogrammatum Imp. & Regg. Germanicorum*. Lips. 1737. 4. 2) *Monogrammatum Imp. & Regum, a Carolo M. usque ad excessum Conradi III. analysis, & usus in probationibus*. Lips. 1737. 4.

b) In *Introductione in Rem Diplom.* p. 67 — 80.

§. 90.

Dissolutio
Monogram-
matum.

Ad dissolvendas texturas illas artificiose contortas, quæ interdum intelligi potius, quam legi possunt, 1) ad stamen illarum, seu fundamentum attendendum est; eliciendum deinde 2) erit argumentum, quod uno; interdum pluribus etiam verbis absolvitur.

§. 91.

Divisio Mo-
nogramma-
tum a.) ra-
tione funda-
menti.

Fundamentum monogrammatum, interdum lineæ, interdum literæ constituunt, utraq; eatenus *ductus* appellantur *fundamentales*, quatenus illis tanquam fundamento, omne reliquum monogrammatis insistit ædificium. Erunt ergo, si ductus fundamentales spectes, Monogrammata, vel *linearia* vel *literaria*. Linearia omnia fere sunt *cruciformia*: & quidem *simplicia*, si simplicem & ordinariam crucem sistunt, singulis literis ad extremam linearum partem adhaerentibus; *composita*, si præter simplicem crucem, etiam decussatam fundamenti loco habeant, literis orbiculari figura apices linearum tenentibus. Inter cruciformia censentur etiam *rhombata*, in quibus medius pro centro rhom-

rhombus, supplet locum vocalium in ipso nomine occurrentium.

*) Linearia monogrammata fere omnia cruciformia esse dixi. Excipiuntur ab hac regula nonnulla quædam, quæ quadratam formam præ se ferre videntur, nec non *circularia*, seu circulis inclusa, ad quorum classem rotas quas dicunt Regum Hispaniæ, nec non orbiculos Leonis IX. PP. & successorum referunt, qui tamen, dummodo orbiculis his rotisque illis monogrammatis notio conveniat, non inepte etiam cruciformibus adnumerari poterunt.

§. 92.

Monogrammata literalia ut plurimum *quadrata* sunt, quamquam nec cruciformia desint, quorum fundamentum litera X est. Quadriformium literæ fundamentales, quadrati speciem quodammodo præferunt, ut H. M. N. T. T. (duplex T copulatum) | - [(L & C copulata) &c. Eadem interdum *nuda* sunt, interdum *partita*; interdum *decussata simpliciter*, vel *dupliciter*; nonnunquam *partita* & *decussata* simul. Monogrammata literalia.

GATTERER l. c. p. 207. & 210.

§. 93.

Ratione argumenti seu contentorum, monogrammata dispescuntur in *nominalia*, *titularia*, *verbalia*, & *mixta*. Ratione argumenti. *Nominalia* nomen solum continent; *Titularia* præter nomen proprium, titulos etiam complectuntur; *Verbalia*, sententia aliqua absolvuntur; omnia vero concurrunt ad complicanda *mixta*.

§. 94.

Formulae diplomatum solennes, quæ Monogramma respiciunt, *monogrammaticæ* appellantur. Formulae monogrammaticæ.

I 3

lan-

lantur, earumque altera *commemorationis* vocatur, quod in epilogo diplomatis monogramma commemoret, & expectare jubeat; *indicationis* altera, quæ ad utrumque monogrammati latus infra textum collocati, interdum ad alterutrum tantum descripta, expresse declarat, cujusnam nomen monogrammati inscriptum lateat. Exemplum utriusque formulæ, ex diplomate S. Stephani an. 1001. adfero: „ Quod ut verius cre-
 „ datur, hanc paginam *manu propria roborantes*,
 „ (formula commemorationis,) sigillari feci-
 „ mus. — *Signum Domini Stephani inclyti Regis*“
 (formula indicationis.)

*) In diplomate Andreæ I. an. 1055. formula commemorationis, & monogramma adsunt equidem, desideratur tamen indicationis (expositionis) formula; sine dubio quod nomen (ANDREAS) ibi coarctatum, diserte literisque majusculis adjecto Regis titulo (REX), sit lectu facile. Sed eadem ista formulæ etiam in aliorum Regum & Principum chartis nonnunquam omissa est.

§. 95.

Oxigo Mono-
 grammatum.

Antiquissimum monogrammatum usum, numi græci (ipso Romano Imperio vetustiores) familiarumque Romanarum loquuntur. Sed non in numis tantum, verum etiam in vexillis, sigillis, templorum theatrorumque aulæis & parietinis, usurpata deprehenduntur. In diplomatibus multo serius eadem fiunt conspiciua; quippe quæ Theodericus Ostrogothorum Rex, ad chartas roborandas primus, quantum constat, adhibuit. Exemplum illius imitati sunt Reges alii, sed pauci & raro; ut certior, & constans monogrammatum in diplomatibus usus, a Caroli demum Magni ævo obtineat.

Huc

Tab. IV.

Fig. 3.

Huc illum principum scribendi imperitia induxit, propagavit vero insolens omnia ad gustum illius ævi cincinnandi & exornandi studium. Sane, qui Carolum M. scribendi rudem fuisse, saltem fero parvoque cum successu literas pingere tentasse tradunt, atque ut imperitiam hanc honesto ritu suppleret, monogrammatis usum loco propriæ subscriptionis promovisse, cum MABILONIO contendunt, nec EGINHARTI narrationi *a)* vim inferunt, nec quidquam statuunt, quod vel a genio sæculi illius abhorreret, vel quo in ipsum Carolum, omnium consensu magnum, essent injurii. Artis ergo scribendi experts, diplomata monogrammatibus vel ipse roboravit, vel quod verosimilius est, per alios firmari jussit. Neque enim existimandum est, Principes ipsos, omnia quæ ostentantur, manu propria, contexuisse monogrammata; nisi forte tabella aliqua stabili seu stampilla, vel lamina interrasili, cui monogrammatum elementa insculpta erant, ut per illa velut per sulcos stylus duceretur, eadem efformaverint. Pleraque Notariorum opera efficta sunt, Principibus, fortassis etiam scribendi peritis, ex usu sæculi, quadraturæ monogrammatis nihil, præter punctum aliquod leve, vel lineolam *manu propria* inferentibus *b)*, quod quidem illos interdum fecisse, in *Monumentis Boicis* Tom. VI. p. 156. & 162. evictum est.

a) Vide EGINHARTI *Vitam & gesta Caroli cognomento Magni*, inter LEUCKFELDII *SS. rer. germ.* & in aliis passim *SS. medii ævi collectionibus*.

b) Sensus Formulæ *manu propria corroborare*, interdum in chartis ævi medii hic est, quod illi, a quibus charta aliqua profecta est, quamvis a Notario scripta & subscripta, ut subscriptionem nominis sui

a Notario factam ratam haberent, eandem manu sua attigerint. Exempla MABILLONIUS habet l. c. p. 168. „ Chartam hanc sigillo auctoritatis nostræ „ (Theobaldi Comitis 1085.) impresso, cruce au- „ tem facta, manu nostra roboravimus, & fidelium „ nostrorum *manibus tangendo corroborandam dedi-* „ *mus* “ — „ Præsentibus istis subscriptis ac *sibi* „ *invicem pellem porrigentibus.* “

§. 96.

Potestas Mo-
nogramma-
tum.

Cum monogramma loco subscriptionis sit, apparet ratio variorum ejus cognominum. Mox enim *signum* audit, mox *propria manus*, *manus propriæ nota*, *character nominis* &c. In promptu ergo jam erit ratio, ob quam tam multa crucis signo innitantur; neque hoc obscurum esse potest amplius, quare monogrammatibus tantam vim ad diplomatum robur & auctoritatem tuendam, antiquitas attribuerit; & quare deinde ad calcem diplomatum rejecta sint.

§. 97.

Ubi, & quam-
diu in usu fue-
rint?

Ufus monogrammatum in Hispania & Hungaria rarus, in Britannia nullus fuit. Viguerunt illa potissimum in Gallia, Italia, & Germania. In Gallia sæc. XIII. exoleverunt penitus. In Germania ad Ottonem II. seu annum 974. pleraque omnium Imperatorum ac Regum nominalia fuere, ab hoc vero inde tempore titularium usus, ad Fridericum I. seu annum 1152. vixit, post cujus tempora, monogrammatum usus arbitrarius fuit, donec tandem Maximiliano I. Imperatore e vita decedente, e chartis Germanorum quoque omissa sunt. Fuerunt autem illa non tantum Imperatoribus & Regibus propria, utpote quibus etiam infe-

rioris

rioris fortis homines e. c. Nobiles , Notarii , Magistratus; & inter ecclesiasticos, præter Romanos Pontifices, Episcopi, Abbates &c. usi sunt.

§. 98.

De Pontificum Romanorum monogramma-^{Monogram-}tibus, quæ ex ædibus sacris (parietaria), & ^{mata Pontifi-}non ex illorum diplomatibus producta sunt a), ^{cum.} differere, non huc pertinet; nec illud me morabitur monogramma Silvestri II. PP. quod præter nomen, etiam titulos ejus complectens, cum subjecto sibi monogrammate Ottonis III. Imperatoris, diplomati 1001. inscriptum est b). Exemplum hoc est monogrammatis titularis pontificii singulare & unicum, incognitum MABILLONIO, qui in bullis ante Leonem IX. (ab anno 1049 — 1055.) se nullum monogramma pontificium vidisse fassus est. Fuit autem LEO IX. auctor monogrammatis verbalis, quod vetere Pontificum Rom. solemnî formula, eaque finali, *Bene valete* absolvitur, nec non mixti illius, quod *Orbiculos Pontificales* appellamus. In utroque adhibendo successores illum imitati sunt, adeo quidem diligenter, ut illud e literis Pontificum, quas panchartas dicunt, ad sæc. usque XV. exulare nequeat c): hoc vero etiam nunc, in bullis consistorialibus & maxime solemnibus, inter Pontificis & Cardinalium subscriptiones, medium locum occupet, exhibens inter duos orbes, a crucis, manu Pontificis vulgo adjectæ, signaculo procurrens lemma aliquod biblicum, in areæ vero circuli, per signum crucis majus quadripartitæ, arcolis duobus superioribus, SS. Petri & Pauli AA. nomina, (hæc quidem auctore Urbano

II.

II. † 1099.) inferioribus vero regnantis Papæ nomen & titulum d).

a) Exempla in Glossario CAR. DUFRESNE ad voc. *Monogramma æri incisa* occurrunt.

b) Vulgavit illud una cum diplomate MURATORIUS in *Antiquitatum Italicarum mediæ ævi* Tom. V. 991. conf. GATTERER l. c. Tab. VIII. Num. 72.

c) *N. Lehrgeb. der Diplomantik IX.* §. 1161.

d) Lemmata illa, symbola alias dicuntur, ut plurimum e Psalmis desumpta sunt. Leonis IX. erat: *Misericordia Domini plena est terra*; Pii II. *Protektor noster aspice Deus, & respice in faciem Christi tui*. Benedicti XIV. *Da mihi sedium tuarum assistentiam sapientiam* N. L. G. d. *Diplom.* Tom. VII. §. 633. & seqq. Id adhuc observare debeo, in orbiculis illis, ad dextram nomen S. Petri stare positum.

§. 99.

Monogrammata in chartis Regum Hungariæ.

Tab. IV.
Fig. 2.

Duorum tantum adhuc Hungariæ Regum monogrammata prolata sunt, S. Stephani nimirum, & Andreæ I. Utrumque sæculo XI. rebus Hungarorum præfuisse notum est. Et S. Stephani quidem monogramma, quod in diplomate anni 1001. descriptum cernitur, literale est, pro fundamento habens literam X intermediam, cum extremis I & E (aut etiam G.) linea horizontali copulatam. Idem ratione contentorum titolare est, verba complectens: STEFANUS REX AUGUSTUS a). Quod cum ita sit, mirari debeo simplicitatem monogrammatis, in diplomate Andreæ I. Regis, quo anno 1055. cœnobium & Abbatiam in loco *Tychon super Balatin* fundavit; quippe quod literale quadriforme literæ N. innixum, *nominale* tantum est, nudum *Andreæ* nomen exprimens; trajecto spatio intermedio, quod sigillum deciduum occupabat, titulum

Tab. IV.
Fig. 3.

REX,

REX, sine omni coarctatione, sibi habens appositum. Conf. GÁNOCZY *Dissertatio histor. critica, de S. Ladislao* p. 9.

a) Putabam antea fundamentum monogrammatis Stephanei literam N esse, partitam & decussatam dupliciter. Dimisi tamen sententiam, postquam schema monogrammatis denuo longius & diligentius fuisset intuitus. Nec GATTERERO (*Abriss der Diplomantik* p. 147.) proinde assentiri potui, qui literam H pro fundamento habuit, verbaque collegit: *Stephanus Rex Hungariae*. Etenim *Ungaria* & *Ungria* scribebatur sæc. XI. quæ paulo serius *Hungaria* dicta est. Etiam titulus *Regis Ungariae* illi temporis minus convenit; cum Reges S. Stephano coævi, ipseque S. Protorex, in diplomate, de quo agitur, a populis potius, quos regebant, quam a provinciis, titulos suos derivaverint, appellantes sese *Reges Romanorum, Francorum, Ungorum*, nequaquam vero *Franciæ, Ungariæ* cet. Ob eandem causam nec plenior monogrammatis exegetis: *Stephanus Rex Ungariae Augustus*, adoptari potest: etiamsi literarum elementa edendæ formulæ suppetere. An ego exinde *Augusti* elogium, in monogrammatibus Imperatorum, ab Ottonis II. tempore (ab an. 974.) obvium, recte eruerim, dijudicent alii. INNOC. DESERICIUS (*de initiis ac majoribus Hungarorum* Tom. V. p. 103.) resoluit monogramma illud in hæc verba: *Stephanus primus Rex Hungariae*. At imperfectum est schema monogrammatiss, quod idem Clar. aliquando Vir l. c. exhibuit, nec interpretatio ipsa magis probabilis.

*) Præter hæc duo Regum Hungariæ monogrammata, duo adhuc alia Protoregis nostri vulgarunt, CAR. PÉTERFI in *Conciliis Regni Hungariæ* Tom. I. p. 4. & 5. & IGN. Com. BATTYÁNI in *Legibus eccl. R. Hung.* Tom. I. p. 381. & 387. Unum diplomati fundatæ Abbatæ B. M. V. de radice montis ferrei (PÉCHVÁRAD) an. 1015. inscriptum fuisse ferunt, alterum in privilegio Monasterii S. Mauritii de Bakonbél, an. 1037. occurrisse tradunt. Utraque differunt a monogrammate an. 1001. quod enodare conatus sum; differt adhuc unum ab altero: utriusque tandem alius character est apud PÉTERFIUM, alius &

& diversus iterum in BATTYÁNIO expressus est. Sunt illa ex apographis desumpta, (omnia enim S. Stephani privilegia, quæ novem numero Com. BATTYÁNIUS edidit, duobus demtis, secundis tantum curis descripta supersunt,) scribarumque incuria sine dubio multum immutata, atque depravata, quæ in concordiam redigenda & enodanda, aliis relinquimus.

§. 100.

Regulæ ali-

In resolvendis & examinandis monogram-
 quot solven- matibus, sequentes adhuc regulas teneamus oportet: 1.) Eadem litera in eodem monogramma-
 judicandorum te interdum sæpius repeti debet. In Rom. Pon-
 Monogramm. tificum verbali *Bene valete*, literam E. quater repetendam esse, manifestum est.

2.) Litera fundamentalis non semper est prima nominis litera; neque necesse est, ut literæ monogramma constituentes, naturali ordine se excipiant.

3.) Literarum character a scriptura illius ævi, quo monogramma constructum est, abhorreere nequit.

4.) Etiam argumentum monogrammatum, e. c. tituli, sæculo, ad quod monogramma refert, respondere debet.

5.) Genuinum erit illud, licet alia manu, atramentoque alio, quam ipsum diploma, scriptum sit.

6.) Nec illud monogramma repudiarem statim, in quo ab Orthographiæ legibus aberratum est; erroneam enim fuisse illorum temporum, quibus maxime monogrammata viguerunt, scribendi rationem, aliunde adhuc meminimus.

§. 101.

Sæculo XV. invalescens per literarum con-^{Causæ exole-}
 sequentiam, nominum etiam regionum subscri-^{scantis usus}
 ptio, Principes ætatis illius secreta literarum^{Monogram-}
 cognovisse, extra dubium ponit. Efflorescen-^{matum.}
 tes adhæc eodem tempore literæ, & artes bo-
 næ, gustusque hominum melior, non poterant
 non ex diplomatibus extrudere characteres,
 quos in dies intricatiores reddebat, ingenium
 Notariorum male sedulum, & minus tolerabiles.

CAPUT IV.

SPHRAGISTICA, SEU DE SIGILLIS.

§. 102.

Sphragistica JO. HEUMANNO a) Altorfino^{Nomen, & de-}
 nomen, JO. MICH. HEINECCIO b) artis formam^{fnitio.}
 debet. Respondet vero Græcorum σφραγίς, Ro-
 manorum *Sigillo*; quod vocis signi diminutivum,
 interdum instrumentum significat, quo sigilla
 fiebant, seu typarium; (petsét nyomó) inter-
 dum, quamvis rarius, diploma ipsum, cui si-
 gillum vel appressum, vel appensum est c):
 (prout a bullis appensis diplomata bullas ap-
 pellamus,) sæpissime vero signum illud, (petsét)
 quod materiæ ad id aptæ impressum, chartis
 aliisve rebus, majoris fidei ac firmitatis. causa
 est additum. Hoc significatu sigilla in arte
 diplomatica respicimus, quorum doctrina *Sphra-*
gisticam, utilem non minus quam jucundam
 diplomaticæ partem, constituit.

a) JO. HEUMANNI duplex opus celebratur de re di-
 plomatica: 1) *Commentarii de re diplomatica Impe-*
ratorum ac Regum Germ. inde a Carolo M. No-
 rimb.

- rimb. Tom. I. 1745. Tom. II. 1755. 4. — 2) Ejusdem *Commentarii de re diplom. Imperatricum & Reginarum Germaniæ*, Norimb. 1749. 4. — Ad HEUMANNI exemplum, utinam Hungariæ civis aliquis eruditus, rem diplomaticam Caroli Rob. Ludovici I. Sigismundi, & Matthiæ Regum singillatim illustrandam susciperet. Talis autem huic operi optandus esset auctor, qui & apparatu ad id diplomatum largo gauderet, (largiori, quam ipsi HEUMANNO aliquando suppetebat) iudicio adhæc acri, ut sciret, quid dici debeat quid non, qui dicendi tandem ea facultate præditus esset, qua HEUMANNUM auctorem cultissimum eminuisse aliquando, utrumque opus, quod nunc laudavi, testis est.
- b) J. MICH. HEINECCII *Syntagma historicum de veteribus Germanorum, aliarumque Nationum Sigillis*. Francof. & Lips. 1719. fol. non nisi cum ipsa Sphragistica intercidet.
- c) *Leges S. Ladislai* Lib. I. cap. 42. & Lib. III. cap. 26. atque *Colomanni regis* Lib. I. cap. 6. obtemperare jubent *Sigillo iudicis*, per quod aliquis in jus vocatus est. DUFRESNE & Auctores N. O. Dipl. (V. §. 420.) id de epistola iudicis intelligi volunt; MABILLONIUS l. c. p. 127. dubius est; BATTYANIUS vero in *LL. eccl. R. Hung.* Tom. I. p. 59. 60. sigillum fuisse contendit, quin definiat, typarium ne fuerit ipsum, vel exemplum tantum typario expressum. Mihi typarium sigilli judicialis fuisse, vel annulum signatorium, in argumentum fidei & auctoritatis publicæ ostensum, est verisimile.

§. 103.

Populi, qui sigillis usi sunt.

Cum meliori vitæ morumque cultura, cum legibus & institutis, ab Ægyptiis ad Hebræos, Græcos, & Romanos, ab his vero post fata reipublicæ romanæ, ad omnes fere Europæ populos se propagavit annulorum, (annulis enim primum sunt usi veteres pro sigillis) & sigillorum usus, ita quidem, ut si innocentiam & simplicitatem fraudis ignaram, ætatis, quam auream dicunt, populosque ab humanitate & melio-

melioribus institutis prorsus alienos, demas, difficilius sit populos invenire, qui sigillorum usum vel olim ignoraverunt, vel adhuc ignorant, quam qui eodem, & olim gavisi sunt, & adhuc gaudent.

§. 104.

In Hungaria, quousque in re diplomatica ^{Auctoritas sigillorum.} regni hujus regredi licet, summa fuit semper sigillorum auctoritas. Cum enim reges nostri diplomata domestica, ad Ladislaum usque posthumum, nec nominis subscriptione per litterarum consequentiam muniverint; neque, si unum alterumque sæculi XI. privilegium monogrammate corroboratum excipias, ullo alio solemnī signo, nisi sigillo literas suas firmaverint; facile ratio apparet, ob quam in literis ipsis, singulari plerumque formula, earundem fidem & robur, a sigillo adnexo repeti voluerint; quare porro nec olim diploma quodquam in foro produci potuerit, neque hodie in judiciis quidquam valeat, nisi illud sigillo, saltem indubitato sigilli fragilis, attamen genuini vestigio munitum sit *a*). Valent hæc de literis etiam Judicum regni, quos ordinarios appellamus, nec non Capitulorum & Conventuum Hungariæ, (cirographis adeo,) quæ inde a primordiis regni, perpetui testes & interpretes voluntatis alienæ fuerant. (§. 7.) Tam grande sigillorum in re codicillari momentum, causa fuerit severæ illius legis an. 1498. art. 14. in Regni Comitibus perlatæ, quæ stigmate sigilli igniti in frontibus & utraque facie notare jussit Capitulares & Conventuales, qui vel ipsi falsas

falsas literas (sigillo authentico) obfignarunt, vel talia agentibus adfuerunt.

a) *Op. Tripart. P. II. Tit. 17. §. 2.*

§. 105.

Sigilla loco

subscriptionis.

Sed non Reges tantum & Capitula, subscriptionis loco sigilla sua usurparunt, quæ, ut ita dicam, summam omnium reliquorum solemnium complexa sunt: verum ex quo sigillorum usus magis communis esse cœpit, ita ut nobiles etiam & privati cives sigilla adoptarent, vicem subscriptionis & testimonii istorum quoque sigilla suppleverunt, ad illud usque tempus, quo hodiernus subscribendi mos vulgaris factus est. In Tabulario vetustæ gentis de Butka in provincia Sarosienfi, diploma conservatur Ladislai Cumani, an. 1278. editum, de cujus membrana, ad latus sigilli regii pendentis de filo sericeo utrumvis, quaterna dependent sigilla regni procerum, vinculis alligata membranaceis. Scilicet subscriptionis loco, majorisque fidei & firmitatis causa, Episcopi & regni Barones, qui in contextu recensentur, sigilla sua adjunxerunt regio a). Ita porro solemne electionis diploma Uladislai I. in Regem Hung. datum Budæ in ipso die SS. Petri & Pauli AA. anno 1440. sigillis 88. veluti totidem subscriptionibus corroboratum est: instrumentoque illi, quo coronationem ejusdem regis, factam corona ex reliquiis S. Stephani detracta, ratam habuerunt Regni Ordines, sigilla 65. adnexa sunt b). Exemplum autem querulæ illius Bohemorum epistolæ, quam Patribus Concilii Constantiensis anno 1415. firmatam 350. sigillis obtu-

obtulerunt, quamvis sit extraordinarium, quod iudice HEINECCIO (l. c. p. 10.) vix sibi par in omni historia inveniatur, non tamen singulare dici potest atque unicum; inter MSS. enim Bibliothecæ, quam custodio, instrumentum vidi legique, chirographis & sigillis 412. annularibus illorum, qui ecclesiæ græca derelicta Romano Pontifici se obstrinxerunt, communitum. Subscriptionibus hæc verba duntaxat aliquot, professionis fidei loco stant præposita: „ *Subscri-
ptiones Dominorum Boiaronum & Nobilium
Unitorum Districtus Fogaras. In anno 1711.
die 20. Julii* “ c).

- a) In testimonium gratiæ, qua Ladislaus Rex Stephanum Banum filium Stephani Bani perduellionis reum donarat, diploma hoc datum est. Imperitus illam erat Rex iurejurando, qui ut reum sibi adhuc magis devinceret, eidem „ iudicatum Curia Re-
giz, & Comitatum Musuniensem, milleque mar-
cas pro stipendio annuali “ promiserat, promissorum complementum Primatibus Regni, quorum sigilla regio iungebantur, pro rege spondentibus. De sigillis istis tria adhuc, oblitterata quamvis epigraphæ, reliquorum autem vincula nonnisi adhuc supersunt.
- b) Diplomata hæc ex autographis descripsit, jurisque publici fecit MATTHIAS DOGIEL Cler. Reg. schol. Piar. in *Codice diplomatico Regni Poloniæ & Magni Ducatus Lithuanicæ* Tom. I. Vilnæ 1758: fol. pag. 55. 56. præter complura alia, quæ illustrandæ Historiæ patriæ, rei que ejus diplomaticæ egregie inserviunt. In Hungaria excellentissimi hujus operis, cujus nonnisi Tom. I. IV. atque V. prodierunt, suppressis reliquis, quantum ego scio, vix tria quatuorve reperiuntur exemplaria. Illud, quo ego usus sum, ad Bibliothecam pertinet Illustr. L. B. ALEXANDRI PRÓNAI de TOTH PRÓNA, viri literatissimi, literatorumque amantissimi.
- c) Inter MSS. GABR. HEVENESSI Tomo HHHH. seu XXXIV. Manus in subscriptionibus illis raro variat,

frequentior est sigillorum variatio. Subscripti plerique omnes Valachi erant Transilvaniæ incolæ.

§. 106.

Typariorum
custodia.

Cum ergo tanta sigillorum fuerit cum alibi, (præcipue a medio sæc. XII. a) tum in Hungaria auctoritas, non potuerunt non typaria sigilli regii servanda committi viris, qui & integritate summa essent, & summo in republica loco positi. Ut plurimum hæc cura, ævo intermedio, viris ecclesiasticis dignitate inter ceteros conspicuis, erat demandata; utpote qui Regibus erant ab epistolis. Solebant hi priscis temporibus, Reges, vel suas provincias obeuntes, vel etiam a regno longius recedentes, pace non minus quam bello, instructi sigillis illorum authenticis comitari, eisdemque mox ad comuniendas Regum quas edebant literas uti, mox iterum eadem illa, ad augenda quæ agebantur solemnia, ceu symbola præsentis auctoritatis regiæ, honorisque quo ipsi fungebantur, circumferre b). Exempla amissi ita Typarii regii c), causa fuerit dimissæ postea consuetudinis, exponendi typaria Regum tot viarum periculis, obijciendique illa fraudulentorum hominum malis artibus d).

- a) *N. Lehrs. der Diplom.* T. VI. §. 109. & 371. De sigillis Episcoporum & Comitum id præprimis intelligi velim, quæ ante medium sæc. XII. admodum rara, sed ad diplomatum confirmationem ad illud usque tempus nec necessaria erant. Sunt adeo literæ Regum Galliæ ante sæc. XII. solo signaculo crucis communitæ. In Hispania sigillorum usus universe vix ante sæc. XII. invaluit (*N. L. G. Tom. V. §. 725.*) A medio vero inde sæc. XII. in Gallia saltem, sigilla summe censebantur necessaria, „ ubi donationes pias malitia illorum dierum non „ recepit, auctoritate evacuans, quas non sigilla-

„ tas

„tas conspexit.“ Non fuit scilicet eadem in Gallia, quæ in Hungaria nunquam non erat, Capitulorum fides & auctoritas.

- b) Secundum aureæ bullæ Caroli IV. Imp. an. 1356. sanctionem (SCHMAUSZ *Corp. jur. publ. S. R. I. p. 53.*) in convivio solemniori Cæsareo, Electori Moguntino sigillum Cæsaris majus, de collo pendulum, ad finem usque cænæ gestandum, deinde vero in generoso equo ad Cancellarium remittendum est. Etiam in Hispania, sigilla regia in pompis solennioribus equo vehendi mos, saltem antea viguit; ubi illa transferenda de loco in locum, imponebantur equo tam sumtuose instructo, ac si rex ipse illum consensurus fuisset, comitantibus eundem Præside, Senatoribus, aliisque Cancellariæ Ministris, cum tubis & musicis instrumentis. HEINECCIUS l. c. p. 12.
- c) Apud Belæ IV. Regis Cancellarium, qui in funesto illo, an. 1241. cum Tataris commisso prælio occubuit, sigillum Regis, ROGERIO teste, a Tataris repertum, inque nefarios usus est adhibitum. E sexcentis diplomatibus confirmationis Ludovici I. Regis ab anno 1364. constat, Nicolao Archiepiscopo Strig. & Cancellario, cum Rege ad extirpandas hæreses, cum exercitu in Bosniam profecto, ibidem utrumque par sigilli regii authentici furto fuisse ablatum, atque, ut THUROCZIUS narrat, post tempus aliquod, per ipsos fures in Bisztricia cuidam auri fabro venditum.
- d) Sigismundus literas, quibus Pragæ 1456. Judæorum Hungariæ privilegia antiqua probavit amplificavitque, (jubendo inter alia Christianos „pro usu, „ra de singulis centum denariis ebdomadatim Judæo denarios duos“ solvere) sigillo communicavit minori, quo ut Romanorum Imperator usus erat „aliis, ut ibi legitur, „ nostris sigillis tam scilicet majori duplici, quam etiam minori secreto, quibus „uti Rex Hung. utimur, tempore exitus nostri de „Regno nostro Hungariæ ad Bohemiæ partes nuper facti, apud fidelem nostrum Ven. Dom. Mathæum summum Cancellarium R. H. nostræ Majestatis, certis & rationabilibus ex causis dimissis & derelictis.“ — KAPRINAI *Hist. dipl. Mathiæ Regis P. I. p. 474.* — Luculentius de hac Re-

gum consuetudine Ferdinandus I. 1528. Ratisbonam ad Comitia Imperii abiturus Bartphenſibus ſcripſit: „ utque res noſtræ commodius ac majori „ authoritatē poſſint adminiſtrari, ſigillum noſtrum „ ſecretum, penes præſatum Cancellarium noſtrum „ reliquimus, literæque noſtro nomine & ſub hoc „ ipſo ſigillo, perinde ac ſi præſentes eſſemus ſcribentur. Quod nemini mirum aut novum videri „ debet; res enim toto fere orbe chriſtiano uſita- „ tiſſima, ut dum Principes neceſſitate aliqua, fines „ regnorum ſuorum egrediuntur, ſigilla domi & „ in ſuis regnis relinquant, ut perſonæ duntaxat „ eorum abeſſe videantur, authoritas vero inter „ ſubditos præſens & aſſidua maneat.“ Vid. CAR. WAGNER *Diplomatarium Comitatus Saroſienſis*, Poſonii 1780. 4. pag. 162.

§. 107.

Faſarii Sigil-
lorum.

Quamvis vero non modo laude, ſed admiratione etiam digna ſit veterum in cuſtodien-
dis ſigillis, præcipue publicis, diligentia; quæ
ut ſacrilegas manus impoſtorum evaderent,
mortuo, ad quem pertinuerant, Principe, con-
tinuo vel Tabulariis & locis ſacrationibus infer-
re, vel confringere *a)*, vel una cū poſſeſ-
ſoribus humo mandare ſolebant *b)*: non pote-
rant tamen etiam graviffimarum pœnarum ſan-
ctione, fraudes dolosque omnes antevertere *c)*.
Errant, qui crimen iſtud in ſolos Monachos re-
jiciunt, quo ſe paſſim contaminabant olim
Sycophantæ etiam civilis ordinis. (§. 15.)
Neque vero ad fraudes ope ſigilli committen-
das, nova ſemper typarii eaque operoſa ſculptu-
ra opus fuit, cum inter plures nefarios modos
abutendi ſigillorum testimoniis, illa præcipue
ſupereſſet facilior, ac proinde etiam multo
frequentius uſurpata aliis imponendi perversa
ratio, ſubtrahendi nimirum ſigilla genuina de
diplo-

diplomatibus indubijs, eademque applicandi literis spuriiis atque commentitiis. Hac fraude nulla latius paruit. HEINEC. l. c. p. 175.

- a) Perpetuo hoc fit in exequiis Rom. Pontificum. Idem cum forma signatoria bullarum Joannis XXIII. PP. in Concilio Constantiensi factum est. Observatum id aliquando est etiam in Hungaria; mortuo etenim Matthia I. (1490.) „ ne quid interregni „ tempore fraudis malique doli, ex literis Majesta- „ tis Regiæ falso obsignatis, committi posset, rega- „ lia sigilla, in medio Senatu, præsidente regina „ Corvinoque, diffracta sunt. “ BONFINIUS *Rer. Ungar.* Dec. IV. Lib. VIII.
- b) HEINEC. l. c. p. 14. — *N. Lehrg. der Diplom.* VI. §. 595. Quæ cum ita sint, thesaurum prorsus singularem illum fuisse dicamus, quem A. FRID. GLAFEY († 1755.) olim possederat. Complesebatur ille 290. formas signatorias authenticas (typaria), a SERTORIO URSATO Nob. Veneto ex diversis Europæ regnis coactas. Vid. A. F. GLAFEY in *præfat. ad Specimen Decadem Sigillorum completum.* Lipsiæ 1749. 4.
- c) Juxta veteres Hungarorum leges, notam infidelitatis incurrebant sigillorum (publicorum & authenticorum) falsarii, ejus criminis, quo atrocius LL. domesticæ ignorant, mors est & fortunarum confiscatio. Conventum Cruciferorum domus Hospitalis Ecclesiæ B. Regis Stephani Aibensem, locum, ut in Hungaria nuncupantur, olim credibilem, aliquando hoc crimine infamem fuisse reperio. Idem enim sub Wladislao II. 1506. ob usum sigilli adulterini, ad amissionem sigilli & pœnam perduellionis, a judicibus regni condemnatus, accepta ab Wladislao II. (literis sigillo spurio expeditis, tempus Conventualium damnatorum antecedentibus) delicti venia, anno 1557. Canonicum Collegiatæ Ecclesiæ B. V. M. de Alba, Petrum Esztergáros antea Cruciferum, ob sigillum falsum quod authentico sigillo Conventus supposuerat, in vinculis apud se detinebat, accusandum in publicis regni Comitibus. HEVENESSI MSS. I. 288. & *seqq.* — E lege regni 1725. art. 11. falsarii morte puniuntur, bonis quæ habent, ad justos hæredes transeuntibus.

§. 108.

Typariorum
variatio.

In diplomatibus Regum Europæ ante sæculum XIII. nulla typarii immutati exstat memoria. Ex quo verò diplomatum robur domi forisque in sigillis poni cœpit, ob eandemque causam etiam fraudes sphragisticæ frequentiores exstiterunt, frequentior utique esse debuit, & typariorum variatio, & quod securitatis publicæ maximopere intererat, variationis hujus intimatio. Hungariæ ergo Reges, præcipue sæc. XIV. & XV. solemni edicto id sine mora promulgabant, quotiescunque illorum sigillum vel casu erat amissum, vel ob quamcunque causam aliam a) reformatione indiguit. Et prima quidem sigilli novi, ob perditum antiquum, mentio, diplomate fit Andreæ II. Regis an. 1216. quo *Thomæ C. Nitriensi donationem terræ Bozyn, sub priori sigillo, quod in occisione reginæ Gertrudis fuerat perditum, factam, sigillo novo confirmaverat b)*. In literis Belæ IV. nuspiam sigilli innovati exstat memoria, quamvis in infelici illa cum Mongolis ad amnem Sajó pugna, typarium sigilli regii, barbarum detinuisse, annalium fide (M. ROGERIUS *de Destructione Hung. per Tartaros facta*, cap. XXXI.) exploratum sit. Mutavit etiam Ladislaus Cumanus sigillum suum c); omnium vero sæpissime in judiciis allegantur sigillorum Caroli I. Ludovici I. & Sigismundi Regum innovationes illæ, quas WERBOECZIUS in *Tripart. P. II. Tit. 14.* commemorat d). Horum enim privilegia vi omni carent, nisi e præscripto legum sigillis eorundem novis approbata sint: quæ cum conditio virtuti privilegiorum Regum sæculi XIII. priori

prioribus horum sigillis obfirmatorum adjecta non sit; apparet ratio, ob quam WERBOECZIUS historiam mutatorum sigillorum, non altius quam inde a Carolo Rob. Rege exorsus est. — Cum porro sigillorum capitularium auctoritas inter nos magna sit: necessaria quoque erit metamorphoseon sigilli cujuslibet capitularis e) cognitio.

- a) In diplomate Sigismundi Regis anni 1419. titulorum & insignium augmentum, ceu ratio typarii prioris rejecti adducitur: „Rektor. Capellæ S. Spiritus de Leybicz exhibuit nobis — — — & aliam nostram patentem sub appensione secreti sigilli nostri, quo ut Rex Hungariæ utebamur, nuper propter augmentum tituli nostri imperialis, sub quo aliud sigillum nostrum in alia forma similiter secretum sculpi fecimus & fabricari, per nos rupti, & in partes dissecti, confectum “ WAGNER *Analecæ Scepusii* Tom. I. p. 274. — INNOCENTIUS PP. IV. alterum bullæ suæ typarium, quo capita AA. P. & P. expressa sunt, diutinæ malleationis percussuris confractum, renovari curavit, idque ipsum ne fraudi occasio præberetur, 1252. literis minori bulla obsignatis promulgavit. *N. L. G. der Diplom.* VI. §. 586.
- b) Didici hoc e monumentorum ævi medii collectione manuscripta, clar. olim JOSEPHI BENCZUR, quæ post fata viri, in eruderandis & applicandis istiusmodi monumentis indefessi († 1784.), jure emtionis ad Illustr. L.B. ALEXANDR. PRONAI transit.
- c) „Præsentes concessimus literas duplicis sigilli nostri, novi, quod propter bonum, pacificum, & perpetuum statum regni nostri, de Prælatorum & Baronum nostrorum consilio fecimus innovari, priora & authentica sigilla nostra, propter dissensiones & turbationes regni nostri, quas ipsum regnum nostrum & nos perpessi sumus, propria in persona confringendo, munimine roboratas. Datum — — anno Domini 1288. “ WAGNER *Diplomatarium Comitatus Sarofiensis* p. 304.
- d) „Rex Carolus, — inquit ille — tria sigilla habuit, quorum duo per eundem fuerunt revocata, &

„ privilegia sub illis emanata non servantur, nisi
 „ per tertium posterius fuissent roborata. Quod
 „ quidem tertium sic agnoscitur, ut e partibus
 „ clypei in area sigilli exsculpti, (in quo vide-
 „ licet clypeo duplicata crux continetur,) sint duæ
 „ figuræ draconis. — Item Ludovicus Rex, ipsius
 „ Caroli filius, duo sigilla habuit, quorum primum
 „ in partibus Wzuræ deperditum, & Reverendissi-
 „ mo Domino Nicolao Archiepiscopo Strigoniensi
 „ Cancellario suo subtrahum, non tenetur, nisi
 „ per secundum novum fuissent literæ sub priori
 „ sigillo editæ, postea confirmatæ. Sub quo novo
 „ sigillo, tam literæ ejusdem Regis Ludovici, sub
 „ ipso priori sigillo suo confectæ, quam etiam præ-
 „ dicti Domini Caroli Regis patris sui, sub duo-
 „ bus prioribus sigillis cassatis, annullatis, emana-
 „ tæ; per appensionem ejusdem novi seu secundi
 „ sigilli fuerunt tandem confirmatæ. “ *cet.* Inter
 diplomata adhuc, quorum in foris regni Hungariæ
 nulla est auctoritas, literæ pertinent Ludovici I.
 Regis, sigillo ejus secreto munitæ, nec non omnes
 omnino Elisabethæ & Mariæ reginarum, & Sigis-
 mundi Regis etiam, ante annum 1406. conse-
 ctæ, nisi novo Sigismundi Regis sigillo confir-
 matæ sint: „ pro tollendo, — ut Sigismundus
 „ in diplomatibus confirmationis adserit — omni
 „ dubio, removendo scandalo, & ad evitanda
 „ multa atque varia, quæ propter sigillorum ipsarum
 „ dominarum reginarum deperditionem, nostrorum-
 „ que tam minoris quam majoris, videlicet dupli-
 „ cis, e causis, & rationibus legitimis contractionem,
 „ in multorum juribus, — periculosa detrimenta
 „ hætenus evenire potuerunt “ — Ad calcem li-
 terarum, quas Ludov. I. ab anno 1364. novo suo
 sigillo firmabat, longior plerumque clausula legi-
 tur, cui historia cum suorum tum patris sigil-
 lorum inserta est; quod Sigismundo R. in exor-
 dio diplomatum, quæ transumebat, facere placuit.
 Vid. WERBOECZ. l. c. & SPIESS *Archivische Neben-*
arbeiten P. II. p. 5. — Exhibebat autem deperdi-
 tum Ludovici I. sigillum Regem, manu sinistra qua
 globum tenebat protensa, perigraphen simplici orbe
 contentam, thronumque scutulis adjacentibus de-
 stitutum: in novo contra Rêx, manu sinistra pe-
 ctori

flori admota, throno insidet adstantibus ex utroque latere, prout hoc idem in sigillo Mariæ Reginae (Tab. V. Fig. 10.) cernimus, regni insignibus; perigraphæ duobus circulis inclusa. — In Sigismundi Regis deperdito, in parte sigilli principe, in dextro throni latere scutum fasciatum, in sinistro crux duplicata erat. Eadem in parte sigilli altera in scuto cordiformi fuit conspicua, caput scuti aquila occupante, latus vero utrumque draconibus alatis, quinque stipantibus. Istis in sigillo reformato sex scutula, frondibus & floribus intercepta, substituta sunt, quæ parte etiam adversa Regem throno innixum ambiunt. Conf. PRAII *Commentatio historica de vetere Reginae Hungariæ coronandi more*. Pest. 1792. 8. pag. 48. & seqq. ubi discrimen etiam inter sigilla Andreæ II. & Ladislai Cuni antiqua & nova ostensum est. — Plura dabit celeberrimi ejusdem viri *Sphragistica Regni Hungariæ*, cui elucubrandæ auctor complura lustra impendit, & quam omnes avide expectant, quicunque talium rerum gnari & amantes sunt.

- d) Exemplum antiquissimum immutati sigilli capitularis, literæ Capituli Jaurinensis 1279. commemorant, in quibus literæ ejusdem Capituli anni 1271. sub priorē & antiquo sigillo editæ, ceu veræ, quod quidem e forma sigilli prioris, e modo distandi, (stylo) & testimoniis fide dignis patuisse dicitur, transumptæ sunt. KAPRINAI MSS. B. I. Nro. XIX. Plura hic loci similia exempla congerere, opus non est. Describam tantum adhuc exordium litterarum Capituli Colleg. Eccles. S. Martini de Scepus anni 1320. quod mihi quidem dignissimum hoc loco visum est. „ Nos Capitulum Eccl.
 „ b. Martini de Scepus, memoriæ commendantes
 „ significamus universis, quibus expedit, præsen-
 „ tium per tenorem; quod cum in spoliatione Ec-
 „ clesiæ nostræ, per Regem Ladislaum, & suos
 „ Neugaros, inter damna quam plurima, una cum
 „ aliis rebus, antiquum sigillum nostrum fuisset
 „ perditum & ablatum, nos iniquorum fallacias
 „ æquitatis tramite retundere cupientes, omnige-
 „ narum conditionum literas, sub antiquo sigillo
 „ nostro emanatas, quæ novi sigilli nostri testi-
 „ monio renovatæ non fuerint, publica protesta-
 „ tione præmissa, cassandas, & refutandas decre-

„ vimus,

„ vimus, ad cautelam. Hinc est &c. “ Vid. GODOFR. SCHWARZ *Recensio crit. originum & occasuum Transilvaniae*, auctore LAUR. TOPPELTINO. Rintelii 1766. p. 33,

§. 109.

Divisiones Sigillorum varia,

In doctrina de sigillis præcipue observanda sunt: 1.) Materia sigillorum. 2.) Figura. 3.) Inscriptiones sigillorum. 4.) Modus adnectendi sigilla. 5.) Personæ, quæ sigillis usæ sunt. Poterunt inde pleræque sigillorum species deduci commode.

§. 110.

Materia Sigillorum.

Vulgaris sigillorum ævi intermediarii materia duplex fuit: *cera communis*, & *metallum*. Et cera quidem uti antiquissimum; ita nunquam non usitatissimum etiam materiæ genus fuit, cui sigilla impressa sunt. Post Græcos & Romanos ergo, ætate quoque media, materie tenaci illa, & facile parabili, omnes utebantur, quibuscunque jus sigilli fuit proprium. Ad illius *colorem* inprimis, deinde ad *mollitiem* etiam, diplomatum censori diligenter attendendum est.

§. 111.

Cera alba, rubra.

Fuit videlicet cera, quæ ad sigilla effingenda adhibebatur diversicolor. Alba ut plurimum utebantur Reges nostri, ut adeo sigilla Regia impressa ceræ flavæ, sint anomalia. — Resistit autem edacitati temporis cera lutea præ alba (punica PLINIO) longius, quas a se invicem secernere, etiam scalpello leniter admotum, res sæpe est perdifficilis, cum utraque progressu temporis alterius colorem induat a). *Rubra*

bra seu *miniatæ* usum aliquamdiu Græci Imperatores sibi solis superbe arrogabant, donec Europæ Reges reliqui, nec non sacræ dignitatis viri, jus signandi cera rubra, commune sibi cum Græcis facerent. Quamquam vero in Germania, Fridericus I. Imperator cera rubra uti incēperit, & in Hungaria Carolus Robertus, nec non successores ejus, in cera miniatâ identidem sigilla sua minora expreslerint: illos tamen hac in re imitari nemini cuiquam integrum fuit, nisi peculiari ad id privilegio instructus esset. Id certum est, Barones regni & Episcopos, jam Ludovici I. Regis tempor, literas cera rubra passim signavisse, (DOGIEL Tom. I. pag. 38.) qui honos, Urbibus Hungariæ quidem sæculo XV. diplomate conferri cœpit, Comitatibus vero serius aliquanto collatus est *b*). Fit hodieque, stylo nimirum diplomatum veterē retento, ut dum Nobilium aliquis Magnatum, seu Liberos Baronum, Hungariæ numero adscribitur, inter ceteras prærogativas jus quoque utendi cera rubra locum inveniat.

a) J. BECKMANN'S *Beyträge zur Geschichte der Erfindungen. I. Band, S. 482. 83.*

b) Hujusmodi privilegium acceperunt Cibirium (*Hermannstadt*) Cassovia, & Bartpha 1453. Posonium „more civitatis nostræ Budensis“ 1459. Kesmarcum 1463. Sopronium 1465. Eperiesinum 1508. Szakolcza 1524. (KATONA *Hist. crit. RR. Hung. stirpis mixtæ. Tom. XII. ord. XIX. p. 454.*) Cibirium minus 1533. — Idem impetrarunt Slavonia 1496. Comitatus Scepus 1624. Abaujvar. 1639. cet.

§. 112.

Quibus rubra cera uti integrum nondum Cera flava, viderat, flava utebantur, vel viridi; illam Reges ridis, nigra. Gal-

Galliæ sæc. XIV. & XV. in deliciis habebant a), utramque autem promiscue fere b) adhibebant in Hungaria illi, quibus jus ceræ rubræ concessum necdum erat, usquedum ex speciali Regum venia, sæc. XV. XVI. XVII. ad illius usum admissi sunt. DOBNERO teste sigilla *ceræ nigra* Bohemiæ Ducum sæc. XI. XII. supersunt c). Etiam apud nos erat coloris nigri in ceris usus aliquis; etsi rarior d): Magnis vero Meliten- sum equitum Magistris, in literis non tantum commeatus, sed alterius etiam argumenti sæpe maximi muniendis e), adhucdum solemnissimus est. Deinde Privilegium adhuc duplex Germaniæ Imperatorum utendi cera *cærulea*, Scriptores Germaniæ commemorant, cujus attamen coloris ceræ, nemini cuiquam adhuc visæ sunt f).

a) *N. L. G. der Dipl.* Tom. V. §. 470.

b) Viridi attamen majus quid tribuisse videntur; inter formulas enim Cancellariæ Matthiæ Corvini, privilegium exstat Civitati T. collatum, signandi cera viridi. KOVACHICH *Formulae solennes* p. 519.

c) *Abhandlungen einer Privat-Gesellschaft in Böhmen* I. Bd. Prag. 1775.

d) Transumfit Capitulum Scepusiense anno 1367. „ li-
 „ teras prudentis Johannis Schurke dicti, Comitis
 „ provinciæ Scepus, & 24. juratorum de eadem
 „ Scepus, anno 1360. confectas, sigilloque prædi-
 „ ctæ terræ Scepus, in Kapsula pergameni depen-
 „ dente, in *nigra cera* communitas, in cujus me-
 „ dio magna turris apparebat “ cet. Exemplum
 hoc ceræ nigræ in Hungaria suggestit mihi ANDR.
 JONAS CZIRBESZ V. Cl. Iglovientium inter Scepusios
 orator sacer disertissimus.

e) Coram me habeo Transumtum authenticum, seu
 Vidimus, privilegiorum equestri ordini, qui nunc
 Melitenensis nuncupatur, a PP. Gregorio X. concess-
 forum, cujus clausula sequens est: „ in hujus rei
 „ testimonium *Bulla nostra magistralis in cera nigra*
 „ præsentibus est impressa. Datum Melitæ, in Con-
 „ ven-

„ventu nostro die 20. mensis Maii 1657. “ Sigillum moduli medii, ceræ nigræ charta prius cooperitæ impressum, protomen Magistri umbilicotenus exhibet, cum perigraphæ nomen titulumque Magistri recitante. HEVENESSI MSS. I. p. 415. 419.

f) JO. FRIDR. JOACHIM *Einleitung zur deutschen Diplomantik.* Halle 1754. p. 54. conf. BECKMANN I. c. p. 484.

§. 113.

Sigilla cerea, quæ uno seu simplici colore constant, sigilla appellantur *pura*, quibus opponuntur *mixta*, quæ in Hungaria ex parte una mox alba, mox rubra, viridia item sunt; ex altera vero communiter lutea, ita ut quæ honoratior sigilli pars est, inscriptionem in cera alba, viridi, rubeave referens, parti alteri, ceu conchæ profundius impressa sit. Exemplamixtorum in Hungaria e sæc. XIV. a) & XV. (immo quædam & ex XIII. b) adeo) sat multa supersunt; inter quæ præcipue Episcoporum ætatis illius sigilla pertinent.

Sigilla cerea
pura & mixta.

a) Literæ anni 1555. in quibus Proceres regni Hungariæ, jurejurando ad pacta inter Carolum Hungariæ & Casimirum Poloniæ Reges, de successione filiorum illius in regno Poloniæ, inita acceperunt, anno 1557. auctoritate publica Cracoviæ transfumta sunt. Transfumi introitus, sigilla Procerum Hungariæ mixta commemorans, sequens est: „Noverint universi præsens Transumptum, seu Transscriptum publicum inspecturi, quod nos Joannes, Decanus, & Cancellarius Cracoviensis, vidimus, & diligenter inspeximus, quandam patentem litteram, sanam & integram, omni prorsus vitio carentem, tenoris & continentis infra scriptæ. Cui quidem Literæ decem sigilla, duo oblongæ figuræ, octo vero sphericæ figuræ, de cera communi ad tergum, sed ad faciem de cera rubra, solum ultimum sigillum de cera communi, ex utraque parte, in pergameni pressulis appendebant, „ tenor

„tenor vero ejusdem per omnia sequitur in hæc
„verba “ — — DOGIEL l. c. I. 38.

- b) Vidi Andreæ II. Regis sigillum cereum simplex, cujus facies coloris erat albi, flavi contra moles reliqua.

§. 114.

Cera vetusta
arida.

Cum mollities & pinguedo, ceræ recentis adhuc sint indicia, & sigilla eo majorem præferant antiquitatem, quo aridior, magisque exsiccata est cera, ex qua conflata sunt: oppido apparet, spurium esse sigillum, quod antiquius esse perhibetur, quam illud ceræ indoles esse patitur.

§. 115.

Cera Hispanica; oblata.

Inventionem Ceræ, quam vulgo *Hispanicam* appellamus, PP. Benedictini perperam gentili cui-dam ipsorum (ROUSSEAU) quæstori sæculi XVII. deferunt a); utpote cujus usus publicus jam anno 1554. in Germania obtinuit b). Sigillum farinaceum vero, in oblata seu hostia ut vulgo appellant, miniata, chartæ supposita expressum, post iteratas curas nullum inveni 27. Julii 1602. antiquius c). Antiquiora hocce, nec non illo, quod literis commæatus liberi an. 1603. Bruxellis appressum est, & quod ceu antiquissimum specimen sigillorum hujus farinae, in prima libelli hujus editione descripseram, se in Archivis Westphalicis invenisse tradit, NIC. KINDLINGER V. Cl. nimirum ann. 1571. 1579. 1590. 1597. cet. d). Duo autem se mihi hic observanda offerunt, *primum* est: sigilla in hostiis rubris, difficulter sæpe discerni a sigillis ceræ miniatae impressis; *alterum*, in originibus id genus sigillorum exquirendis, necesse non esse, ut ad Belgas horumque cum exteris frequens literarum commercium recurramus. Sine dubio ho-

hostiarum indoles sigillis apta, sacerdotibus & monachis omnium primum observata est, a quarum prima destinatione, sigillis forte sanctitatis etiam aliquid accedere potuit.

- a) N. L. G. der Diplom. V. 464.
 b) JOS. PH. ROOS *Fortgesetzte Aufklärung von dem ältesten Gebrauch des spanischen Siegelwaxes*. Frankf. 1792. conf. N. Allg. d. Bibliothek, B. III. S. 324.
 c) Prostat istud inter MSS. Bibliothecæ Universitatis Pestanæ. Muniverat autem illo FERD. ALBER Rector Collegii Soc. Jes. Viennensis, exemplum ex autographo desumptum libelli, quo MELCHIOR CLESELIUS Episcopus olim Vienn. cum pluribus Theologis, anno 1600. de usu calicis in S. Cœna retinendo dimittendove interrogati, hunc porro neutiquam admittendum esse rati sunt. Sigillum integre servatum, characterem illum refert, qui in sigillis Ord. S. I. communiter expressus est. Perigraphen habet: *Rectoris Collegii Viennensis Societatis Jesu*. Omisissis solemnibus vulgavit idem instrumentum RHEVENHILLER in *Annalibus Ferdinandeis* Tom. V. p. 2229. seqq.
 d) Vid. NIK. KINDLINGER'S *Nähere Nachrichten vom ältesten Gebräuche der Siegelohlaten und des Siegel-laks in dem XVI. und XVII. Jahrhundert*. Dortmund und Essen: 1799. 8.

§. 116.

Diplomata sigillis e metallo factis munita, Bullæ. per metonymiam Bullæ nuncupantur, quod nomen sigillis in metallo expressis proprie convenit, rarissime translatus ad sigilla cerea. E metallis autem potissimum aurum & plumbum in sigillis usum habuerunt: argentum enim, æs, stannumque, quamvis non prorsus neglecta fuerint, raro tamen admodum sunt adhibita; quod nec eodem quo aurum splendore diviti, nec pari cum plumbo commoditate sese commendarent.

Bullæ aureæ Imperatores Byzantinos sigillis aureis digressæ II. Be-
 1æ III. — An- plumata sua munivisse est verisimile, a quibus
 dæ II. Re- auri in signando usus ad Francos Hungarosque
 gum Hung. propagatus est. Et apud hos quidem a Geysæ
 II. inde tempore, (cujus sigillum aureum, ap-
 pensum literis 1156. quibus Canonicis Strigo-
 nienſibus de cœna, qua illuc usque caruerant,
 liberaliter providit, primum est bullarum aurea-
 rum in Hungaria vestigium a), insignis bullarum
 aurearum occurrit copia, non contemnendum
 magnificentiae Regum & opulentiae civium Hun-
 gariae indicium. Quod Belæ III. superest sigillum
 aureum, in parte sui adversa Regem seilæ insiden-
 tem habet, in averſa præter verba SIGILLUM
 BELE nihil refert. Permulum jam ab hujus
 simplicitate discrepat splendida Emerici Regis
 bulla aurea an. 1202. quæ in Tabulario Au-
 gustæ Domus secretiori, ubi illam autumnò 1801.
 contemplatus sum, conservatur, cujusque exem-
 plum, quod Tabula ænea ostentat, GRUBERUS
 commune mecum aliquando esse voluit. In
 parte enim hujus illa, quam anticam dicunt,
 more consueto, Rex coronatus, thronoque
 magnifice constructo sedens conspicitur: in
 postica vero, præter morem supe iorum temporum,
 scutum cordiforme exstat, dissectum octonis
 taniis seu fasciis; quarum in bulla aurea An-
 dreæ II. an. 1221. ternæ binis atque binis leo-
 nibus jacentibus sibiſque invicem oppositis, in-
 fima vero, ob scuti figuram veterem, leone sim-
 plici, distinctæ sunt b). Id nescio, cur leones
 huc inducti sint; nec illud adsequor, quare
 capiti Andreano (quod etiam in Ladislai Cum.

Tab. IV.

Fig. 4.

ceris observatur). hinc solis imago, illinc stella, cornubus lunæ sursum erectis interpolita immineant. HEINECCIO interprete hæc talia ornatus solius causa adjecta sunt. Huic sigillo Andree II. Regis forte haud multum dissimilis erat, celeberrima illa ejusdem Regis bulla aurea, quam nobis vetustas invidisse videtur, & qua anno (1222.) dictum proxime subsecuto, amplissima Nobilium Hungariæ privilegia confirmaverat. — Belæ IV. Regis bullam, ex tenuibus laminis aureis compactam, intusque vacuum seu *cavam*, in Tabulario ærarii Regii meis versavi manibus, quæ perinde cum sigillis cereis ejusdem Belæ Regis, fasciarum loco, jam crucem duplicatam præsefert.

a) GE. PRAY *de vetere Reginas H. coronandi more*, pag. 41. Diploma typis quantum memini, nondum ex aße evulgatum, exstat inter MSS. P. KAPRINAI Tom. XXXVII. B. Nro. 27.

b) GRUBER *Kurzgefasstes Lehrsystem*, p. 173.

§. 118.

Post Belam IV. pauci fuerunt Reges Hungariæ, qui auro in sigillis usi non fuissent, imprimis tunc, cum auri Hungarici non minor esset copia quam celebritas. Matthias Corvinus anno 1464. vetustissimæ urbis Soproniensis jura & privilegia, bulla aurea, quoad compositionem solida, complexus est a). Æquat illa, quam ipsemet vidi tractavique, pondus decem aureorum Cremnicensium, refertque Matthiam sellæ vulgari innixum, qui coronam gestat, capillis, more Hungarorum prisco, in nodos collectis, atque de humeris eius defluentibus. Crux patriarchalis colliculo insistens, tanquam

Bullæ reli-
quor. Regum

Tab. IV.
Fig. 5.

in sinum Regis paludati stat reposita, qui manu sinistra pomum regium pectori admotum tenet, dextra sceptrum comprehendit longius, in crucem, ut videtur, duplicatam desinens. Inscriptio Davidis sententia absolvitur: *Adjutor meus Dominus Deus*. In parte opposita, fasciæ in scuto, quoad formam italico, ductæ sunt, quibus sertum est appositum. Circumferentia habet: *Matthie D. G. Regis Hungarie & C.* Affectum huic æqualem Ferdinandus I. in urbem suam Budensem, corroborando hujus libertates bulla aurea, an. 1528. testatus est *b*). Post hujus vero ætatem videtur rarefcere cœpisse auri in literis Hungariam attinentibus usus, nec tamen exolevit penitus. Enimvero ad omnem magnificentiam composita est Ferdinandi II. Regis bulla aurea major, quæ literis foundationis almæ Universitatis Tyrnaviensis 1635. appensa est, a qua non tam mole, quam elegantia distat illa, qua Leopoldus I. 1659. Cassoviensem Academiam ornare dignatus est. Utraque in Archivo Exc. Cameræ reposita, ex genere illarum est, quas cavas dicimus. Maria Theresia denique præter solemne diploma, quo insignem Ordinem Equitum S. Stephani constituit, etiam illud, quo Transilvania Magni Principatus titulum anno 1765. 2. Nov. contulit, sigillo communivit aureo.

- a) Etiam Posonium gaudet ejusdem Regis Matthiæ bulla aurea, itidem anni 1464.
- b) Verba diplomatis e simplici exemplo desumpta sunt:
 - „ libertates illorum approbamus & confirmamus,
 - „ quas bulla nostra aurea, (cujus altera in parte
 - „ effigies nostræ personæ in throno sedentis cum insignibus Regiis, corona, sceptro, ac pomo; altera in
 - „ parte quatuor fluminum, & crucis duplicatæ imago, ve-
 - „ tera

„ *tera Hungariæ stemmata conspiciuntur*, exstat utrin-
 „ que titulus, ac præcipuorum regnorum nostro-
 „ rum inscriptio,) & cordula item aurea munitas,
 „ & ornatas eidem civitati Budensi — — dari
 „ iussimus. “

- *) Servizæ reguli sæculi XIV. auro in sigillis suis usi sunt. Et Stephani quidem Czari bullam, cuius partem priorem S. Stephanus Czarus stans ornat, posteriorem autem Stephanus Czarus, literarum (quæ fundationem asceterii Hillendar continent) auctor, itidem pedibus insistens occupat, tridentem una manu, altera avem sustinens, jam antea commemorare debui: — Lazari vero, itidem Servizæ reguli, sigillum aureum eclypon, descripsit auctor commentationis: *Beschreibung einer goldenen Bulle und eines Siegelstämpels des Serwischen Fürsten Lazar*. Vid. *Ungr. Magazin* Tom. IV. Fasc. I. Utrumque sigillum intus est vacuum, utriusque inscriptio lingua & literis est facta illyricis. Cum plures adhuc bullæ literæque veterum Despotarum Servizæ in Archivio Carlovicensi gentis Servicæ, quæ patrio solo derelicto ad nos migravit, lateant; optandum est, ut aliquis e Gymnasii, quod nunc Carlovicii efflorescit, Doctoribus, rem diplomaticam Servizæ libello brevi illustrando, accessionibus quibusdam novis (*Diplomatische Beyträge*) Diplomaticam universalem locupletet.

§. 119.

Argenti, stanni, plumbique, nullum in Bullæ argen-
 Sphragistica Hungariæ adhuc inventum est ve- ter, æneæ in
 stigium: Utrum vero *aere* aliquando Reges Hungariæ.
 nostri, ad instar Regum Daniæ, suas muniverint
 literas, sub iudice lis est a). Plumbo in sigillis
 præter Pontifices Rom. a Gregorii inde M. tem-
 pore, complures alii etiam usi sunt, cum civilis,
 tum præcipue ecclesiastici Ordinis. Hodie ve-
 ro, quantum scio, plumbi in diplomatibus mu-
 niendis usus, solis Pontificibus Rom. relictus
 est, qui ceram ad literas duntaxat minus so-
 lemnes, quas *Brevia* appellamus, signandas
 adhibent. Firmantur ista saltem a sæc. XV.

figillo cereo rubro, in quo *annulus piscatoris* (qui jam sæc. XIII. in literis Pontificum privatis, quas e. c. consanguineis suis scribebant, commemoratur,) expressus est. Ante hoc tempus, tam Brevibus quam Bullis sigillum idem plumbeum appendere moris erat *b)*, unde bullarum aliæ *maiores*, aliæ *minores* olim dictæ sunt.

- a) Occasionem disceptationi de bullis æneis Regum Hungariæ præbuit eclypon typarii vel bullæ æneæ, (incertum enim est, quo debeat referri) quod MATTH. BELIUS vulgavit in *Prodromo Hungariæ antiquæ & novæ* p. 66. Throno ibidem Andreas Rex insidet, instructus omnibus reliquis Majestatis Regiæ insignibus, cum epigraphe: *Andreas Dei Gracia Ungariorum Rex*. Indigitari hac inscriptione Andream I. non vero Hierosolymitanum STEPH. SCHOENWISNER V. RR. contra BELIUM evicit, quem etsi jam operæ & studii pœniteat, quo aliam adhuc bullam æream Andreæ II. vindicare conatus est: doctè tamen pro exquisita, qua pollet, rerum antiquarum cognitione, utrumque argumentum pertractavit, in opere periodico: *Ungarisches Magazin* T. III. p. 257. & *seqq.*
- b) MABILLON l. c. p. 129.

§. 120.

Figura. Sigil-
lorum.

Figura sigillorum, juxta cum materia & colore, fuit multiplex. *Orbicularia* sigilla ut simpliciora sunt, ita etiam antiquissima censentur; neque alius figuræ sigilla Regum Hungariæ exstant majora atque solemniora. Sigismundi Regis annulare vidi octogonum, tale Matthiæ quoque regis erat. Episcoporum & Abbatum Hungariæ sigillis, in quibus illi stantes mitraque tecti occurrunt, quorumque ex sæc. XIII. XIV. & XV. multa supersunt, forma *parabolica oblonga* conveniebat maxime; derelicta est vero illa eadem, postquam mos, Episcoporum imagines

sigil-

Tab. IV.
Fig. 7.

figillis imprimendi derelictus est. E Capitulis solum M. Varadinense sigillum formæ *ovalis* adhucdum retinet.

- *) *Exempla sigillorum episcopaliū, capitulariū, cet. in PÉTERFI Conciliis R. H. in Com. BATTYANI LL. Eccles. R. H. & in Cerographia Hungariæ plura invenies; qui libri ob sigillorum ære incisorum multitudinem, Sphragisticæ Hungariæ studio- sis sæpe & diligenter consulendi sunt.*

§. 121.

Diversa fuit etiam sigillorum *Quantitas*. Quantitas Si
 Ut enim bullæ aliæ aliis majores atque gravio- sigillorum.
 res sunt a): ita cerea quoque sigilla, quoad magnitudinem ambitus & gravitatem, permultum a se invicem differunt. S. Stephani, Stephani III. Belæ IV. Ladislai Cumani, Caroli Roberti, cet. Regum, quæ inspexi sigilla, latitudinem trium quatuorve digitorum plus minus excedunt. Majora paulo sunt, in quibus Sigismundus, Ladislaus posthumus, Wladislaus II. omnibus Majestatis insignibus induti comparent. Maximi vero moduli, apud exteros etiam extraordinarii, & prorsus singularis, sigillum cereum Andreæ II. Regis illud est, quod SPIESS. l. c. P. I. p. I. descripsit, delinearique curavit; quippe quod figuram hemisphærii referens, duas libras minus tribus uncis grave est, habens diametrum $5\frac{3}{4}$ pollicum b).

- a) HEINECCIUS l. c. p. 57. exemplum commemorat bullæ aureæ, quam Henricus III. Imperator sibi ab Imperatore Byzantino missam, Ecclesiæ Goslariensi dono dedit, cujusque ea fuit gravitas, ut eadem calici conflando, pergamena vero, de qua pependerit, altari obtegendo suffecerint. — In Archivo Regum Daniæ sigillum aureum Christiani V. est repositum, quod 20. appendit uncias.

- b) Indulgente Tabularii Exc. Camerae Aul. Praefecto MART. IGN. a LENDVAY, Viro Magnifico, reique diplom. Hungaricae intelligentissimo, sigillum illud Budae nuper denuo vidi, & admiratus sum.

§. 122.

Inscriptiones
Sigillorum.

Inscriptiones sigillorum aliae *reales* sunt, aliae *literales*. Hæ per literas, illæ per imagines fiunt. Imagines in sigillis obviæ vel sunt personarum, a quibus sigillum profectum est, referentes illarum habitum, aut ex assere & integrum, aut ex parte tantum aliqua: vel vero dignitates & jura adumbrant, quibus personarum, quarum sigillum vides, condecoratae erant. Inscriptiones illas *proprias* seu *loquentes* appellabimus, has *symbolicas*. Ad proprias seu loquentes, *Imperatorum*, *Regum*, *Ducum*, *Comitum*, *Episcoporum*, *Abbatum* cet. imagines pertinere nemo non intelligit; prout imagines *Sanctorum*, *cruces*, *coronas*, *sellas regias*, *globos terrestres*, *vexilla*, *gladios*, *vestimenta*, *animalia*, *flores*, *castella*, & *insignia* seu arma gentilitia cet. inter imagines symbolicas censerentur, vel monuisse satis est.

§. 123.

Sigilla simpli-
via, duplicia.

Sigilla cum veteris tum recentis ævi, interdum ex una tantum parte inscripta observamus, interdum ex utraque. Illa *simplicia* seu *monosphragista* (interdum in ipsis diplomatibus *uniformia*) appellantur; hæc *duplicium* seu *amphisphragistorum* distinguuntur nomine. Quæ imaginem Sancti alicujus tutelaris, vel Principis cet. refert pars sigilli, quasi est honoratior, *adversa* dicta, cui opposita est *aversa*; quam, si inscriptionem, sive utriusque generis, sive alterutrum tantum referat, *contrafigillum* nuncupabimus.

bimus. Apud nos Andreas II. diplomata primus corroboravit *sigilli duplicis munimine*, cujusmodi sigilli typarium, e. c. in notissima illa formula Ludovici I. confirmatoria, *utrumque par sigilli* dictum est. Ante Andream II. enim, si a bullis Regum nostrorum discedas, quæ nunquam non sigillis duplicibus accensendæ sunt a), sigilla cerea Regum omnia fuerunt monosphragista seu simplicia. Duplicia porro Regum Hungariæ sigilla omnia, quæ vidi, sunt *numaria*, ad modum numerorum utrinque æqualem sculpturam habentia. Sigilli *secreti* vagum & pluribus sigillorum speciebus e. c. bullis aureis, commune nomen est; sæpissime tamen sigillum simplex insignia Regni repræsentans, cujusmodi etiam judiciale, quamvis formæ minoris, esse solebat, significat. Annularia Regum omnia sunt simplicia.

Tab. V.

Fig. 9.

- a) Pontifices electi, sed nondum solemnî ritu inaugurati, bullas literis appendunt monosphragistas, (bullas dimidias); inaugurati tantum nomen etiam suum, in parte altera sigilli exprimunt. HEINECCIUS p. 149.

§. 124.

A primordiis inde Regni, usu veniebat Regi-
bus & Reginis nostris, & quidem quorum si-
gilla ex ætate media nobis supersunt, omnibus,
ut suos vultus in sigillis majoribus & solemnibus,
integros, & ad summam Majestatem
compositos exhiberent. Comparent quando-
quidem in illis corona tecti, throno insidentes,
altera manu sceptrum, globum terrestrem altera
tenentes, vestiti habitu regio, ita, ut nisi
venerabundus, augustas illorum facies contra

Sigilla Majestatica.

intueri nequeas. Hujus generis sigilla sæc. XI. in Gallia Henricus I. in Anglia Eduardus Confessor, in Germania Henricus II. seu sanctus (anno 1002.) primi adhibuerunt *a*), quos subinde successores, & in Germania quidem ad Fridericum usque III. († 1493.) in suis ceris imitati sunt. Tale sigillum illud quoque est, quod diplomati an. 1001. Monasterio S. Martini per protoregem Hungarorum concessio annexum ostenditur, & hujusmodi omnia sunt omnium Regum Hungariæ sigilla, si annularia forte excipias, qui sæc. XI. XII. XIII. literas cujusvis generis elargiti sunt. A Caroli Roberti tandem tempore, aucto sigillorum regionum numero, *secretum* sigillum (inprimis sæc. XV.) alternare cœpit cum *impressione regalis imagnis b*); ut proinde sæc. XIV. & XV. aliquanto rarius, quam antea, id genus sigilla recurrant. Antiquari tamen, obstante lege *c*), minime adhucusque poterant; unde sæculi XVII. similia sigilla ipse vidi *d*), Cerographiæ vero auctor (p. 90.) Caroli adeo III. Regis († 1740.) ceras imagine ejus insignitas commemorat. A Majestate Regibus propria, sigilla hæc denominata esse *majestatica* crederem, nisi vasallorum etiam sigilla splendida ac majora eodem superbirent nomine *e*). Quare a magnitudine ambitus, & ornatu magnifico potius, & Majestatis elogio interdum in ipsa perigraphæ expresso *f*), illa denominationem *majestaticorum* accepisse est verisimile. Principes exteri sigillis majestaticis in rebus potissimum feudalibus usi sunt: etiam in Hungaria eadem ad donationes & privilegia confirmanda potissimum sunt adhibita.

- a) *N. Lehrgeb. der Diplomatie*. Tom. V. §. 536. GATERER Ottoni III. († 1002.) usum sigilli majestatici jam attribuit. Vid. ejusd. *Abriß der Diplom.* p. 175.
- b) Ita appellatur in literis Belæ II. 1127. In lite is Ladislai Cum. 1287. *effigies nostra, tempore coronationis sigillo nostro insculpta dicitur; vocatur etiam sigillum magnum; sæpissime vero, ex quo nempe in parte ejus aversa insignia Regia (contrafigillum) impressa simul occurrunt, sigillum duplex audit.* Leopoldus I. 1700. se concessisse literas ait „*duplicis* „*privilegialis sigilli nostri*, quo ut Rex Hung. uti „mur impendentis munimine roboratas.“
- c) Novissima eatenus lex exstat Decreto regni 1741. art. 10. Archiepiscopo ergo Strigonienfi, ceu summo Regis Cancellario, etiamnum illud est conceditum, munirique & expediri sub eodem, ex præscripto legum, (soluta taxa duplici Decr. 1609. art. 75.) possunt nonnullæ literarum regiarum species, quas tamen jam secreto Regio expeditas videre usitatissimum est.
- d) Kesmarcenses diplomate gaudent Rudolphi Regis anni 1607. de quo sigillum duplex pendet molis maximæ, confirmans vetustissima illorum privilegia.
- e) *N. L. G. der Dipl.* l. c. Comes Cellejensis, raro adeo Regum exemplo, sigillum imaginem ejus referens, in perigraphæ dictavit majestaticum. SPIESS von den Reuter Siegeln, Halle 1784. p. 11 — 13.
- f) Vidi apud Kesmarcenses sigillum Matthiæ Regis an. 1474. inscriptum: *Sigillum Majestatis Matthiæ Dei Gr. Hung. cet. Regis.* Sed idem etiam sigillum ad omnem magnificentiam, ut non fastum dicam, est compositum.

§. 125.

Ornatus Regius, (*Clenodia Regni* appellamus) quo Reges nostri in sigillis majestaticis exulti sunt, idem fere est cum eo, quo Imperatores & Reges Germanorum suis in sigillis sunt conspicui. *Corona* Regum capiti imposita, similis fere constanter est illius, quam in sigillis

Regum in Sigillis habitus.

Tab. IV.
Fig. 6.

lis majoribus Capituli Ecclesiæ Strigoniensis, Archiepiscopus capiti Regis defert. Hæc a sacri diadematis nostri forma & specie, prorsus diversa est. Dissimilitudinis causam, doct. KOLLÁRIUS (*de jure Patronatus* p. 42.) ignorabat, nec ego adsequor. At nec Germanorum Imperatores, quos coronis vel maxime a se invicem diversis in sigillis effictos videas, diadematillo, quod inter Clenodia refertur S. R. G. Imperii, in ceris unquam visi sunt. — *Sceptrum* itidem diversum est ab eo, quod inter Regni Cimelia Budæ custoditur. Hoc enim, quod una cum corona diutius contemplatus sum, clavæ (buzogány) formam habet: illud vulgo solet esse florigerum. Matthias Corvinus sceptrum gestat, in crucem geminam, prouti videtur, exiens; nec exterorum Regum sceptrum in sigillis sunt uniformia. — A Byzantinis & orientalibus Augustis transiit ad occidentis Imp. & Reges. *Globus cruciger*, qui olim ab Imperatoribus romano-germanicis, non alia mente fuit adhibitus, quam ut totius Orbis rotundi, cui Imperator opinione ævi medii præerat, repræsentaret dominium. Interceperunt huic Orbis dominio, Hungariæ, Poloniæ, Daniæ cet. Reges, qui eundem globum inter dignitatis suæ symbola adsciscentes, divisum se cum Imperatore Orbem tenere, aperte testati sunt a). Emerici Regis ceræ globum illum referunt insignitum cruce duplici, quod GRUBERUS b) primum crucis patriarchalis in scuto R. Hungariæ esse opinatur vestigium; ego vero, pro argumento miræ veterum, in fingendis sceptris globisque regalibus inconstantia habeo. Etiam in *Sellis regis* construendis, ingenium artificum sese

sefe exercuit. Speciosa, & affabre facta est, quam Emericus tenet; Ladislaus Cumanus throno insidet, cujus extrema cornua, capitibus caninis terminantur; Matthiam Corvinum sellam, quam orientis verbo sopham dicunt, occupare crederes. Corpus tandem totum, *paludamento*, seu chlamyde fimbriata ad talos usque demissa, tectum est: quod in humero Regis Emerici dextro, in Andreæ II. autem sinistro, fibula connectitur; ita ut ille brachium dextrum, hic vero sinistrum nudum exerant. Utraque Matthiæ Corvini brachia velata sunt. Cervicem porro nudam ostentant, nec desunt, qui ex oris lineamentis, de animi cujuslibet habitu, & virtutibus judicium eruant.

a) Vid. PÜTTERI *Specimen juris publici medii ævi* p. 172. & DUFRESNE *Dissert. de infer. ævi numismatibus*, p. 14.

b) GRUBERS *Kurzgefasstes Lehrsystem* p. 174.

*) De reliquo vestitus Regum nostrorum genere, parum habeo, quod commemorem. Plura dedit MART. SCHMEIZEL in *Schediasmate historico de Insignibus vulgo Clenodiis Regni Hung.* Jenæ 1715. & in SCHWANDTNERI *SS. RR. HH.* Tomo II. p. 486. *seqq.* Quas Corpus juris, Regum antiquorum adfert imagines, ingenii & phantasiæ figmenta sunt.

§. 126.

Ad genus majestaticorum, *equestria* sigilla eque-
Regum Hungariæ, nec non Regum junio-
strum, & agnatorum gentis Regiæ sigilla refe-
ro. Solemne scilicet aliquando fuit Europæ
Regibus, possidentibus Ducatum, vel Comita-
tum aliquem, ut tanquam Duces vel Comites
promulgaturi edictum, vel edituri privilegium
aliquod, sigillo uterentur, ævo intermedio Du-
cibus

cibus Comitibusque proprio *a*), in quo videlicet iidem equitantes fiebant conspicui. Tenuerunt hunc morem Reges Galliae *b*), qui Regibus etiam Hungariae priscis placere debuit. Etenim Spalatensis, principis Dalmatiae urbis, amplissima privilegia, Colomannus Rex, anno 1108. sigillo pensili, eoque equestri communicavit *c*); mihi quae saltem, ex iis, quae nunc de significato sigillorum equestrium attuli, fit admodum verisimile, quaterna illa scutula equestria, quibus Emerici Regis thronus in sigillis cereis stipatus est *d*), provincias, quas idem moderatus est, respicere; inprimis, cum numero scutulorum, provinciarum, quae in titulis recensentur, numerus respondeat. Prouti porro primogeniti Regum Franciae, patre in vita adhuc superstiti, in ceris equites exhibebantur, dextra vexillum vibrantes, sinistra scuto sese protegentes, destituti saepenumero sellis & calcaribus: ita eadem imaginis forma, primogenitis Regum nostrorum, & horum agnatis quoque arrisit, nisi quod Bela IV. & Stephanus V. divisum cum patribus tenentes Regnum, (ideo *Regum juniorum* axiome insigniti) in adversa ceræ parte throno, in averfa equo insideant *e*). Bela Dux totius Sclavoniae, Belæ IV. Regis filius, sigillo simplici eoque equestri usus est, quod de literis an. 1268. pensile, PRAII egregio, dum viveret, alios juvandi studio debui. Ceterum usus equestrium sigillorum saec. XIV. vel XV. in Hungaria desiisse videtur, nec posthæc revixit amplius.

Tab. v.

Fig. 8.

a) „ Figura equestris personæ laicæ, semper indigitat
 „ visum natalibus illustrissimum, videlicet Comi-
 „ tem;

„ tem; & si nomini circumscripto Comitum titulus „ non est adjectus, certo notat personam digni- „ tate parem “ GUDENUS in *Præf. ad Syllogen- varior. Diplom.* p. 23. Exempla in MARQU. HER- GOTTI *Monumentis Aug. Domus Austriacæ*, atque in OLIV. UREDII *Sigillis Comitum Flandriæ*, Brugis 1639. Fol. invenies. Conf. cum illis SPIESS l. c. *von den Reuter Siegeln.*

b) N. L. G. d. *Diplom.* Tom. V. §. 621.

c) Didici hoc ex utilissimo opere LUCII *Memorie istoriche di Tragurio ora detto Trau.* In Venet. 1673. 4. Sossorum astutia huic eidem operi præfixit etiam huncce titulum: *Historia di Dalmatia & in particolare della città di Trau, Spalatro & Sebenico.* in Venet. 1674.

d) GRUBER l. c. p. 174. Vidi ipsemet sigillum hujusmodi Emerici Regis in Archivo Regis nostri secreto, quod Viennæ est.

e) De Ducibus & Regibus junioribus Hungariæ, vid. EUS. VERINUM (JOS. BENCZUR) *de hæreditario jure Sereniss. Domus Austriacæ in Regnum Hungariæ*, Vien. 1771. 8. Inter MSS. ejusdem sigillum Stephani V. Regis junioris diligenter delineatum me vidisse, bene memor sum.

§. 127.

Ad inscriptiones sigillorum symbolicas, præcipue illa signa jurium & dignitatum pertinent, quæ secundum certas regulas scuto inscripta sunt, ab Hungaris *Tzimer*, Germanis *Wappen* seu *Waffen* appellata. Origines istorum & indolem universam explicare, ad artem, quam *Heraldicam* dicunt, pertinet. Hoc loco ob frequentissimum eorundem in sigillis usum, speciminis instar, pauca duntaxat quædam, de signis scuto Regni Hungariæ inscriptis, adferenda esse censui.

§. 128.

Insignia Regni
Hungariæ.

Insignia nobilissimi Regni Hungariæ, pro-
uti hodie exhibentur, scuto continentur com-
posito ex duobus aliis, quorum alterum qui-
dem seu dextrum, quaternis fasciis candidis,
totidemque rubris distinctum est; alterum vero
seu sinistrum, in campo rubeo crucem dupli-
cem argenteam complectitur, cujus stipitem,
insistentem tribus montium jugis, sertum aure-
um ambit. Non eadem fuit olim, quoad
omnia, insignium Regni Hungariæ, quam nunc
delineavi facies, neque primorum Regum æta-
tem attingit, scuti utriusque compositio.

- *) Quæ THEODOR. HOEPINGK in *Tractatu juridico-
historico - philologico de insignium sive armorum pri-
sco & novo jure*, Norimbergæ 1642. Fol. pag. 317.
de Attilæ & Regum Hungariæ insignibus commi-
niscitur, credulitate ævi, quo vixit scripsitque
nimia, in rebus Heraldicam attinentibus, excusari
possunt debentque. Quod ibidem de capitibus
brassicæ albæ, inscriptis scuto priscorum Regum,
e studiosis Hungaris Marpurgi se accepisse ait, de
liliis Regum stirpis Andegaviensis sine dubio intel-
ligendum est. In doctrina de insignibus non minus,
quam in genealogiis principum virorum contexen-
dis, veteres auctores mira fabulati sunt.

§. 129.

Scuti fasciati
antiquitas.

Equidem si verum est, insignia eo anti-
quiora esse, quo simpliciora sunt; fasciatum
Regni Hungariæ scutum pervetustum esse nemo
inficiabitur. Sunt, qui ad Hunnos originem
illius referunt, & qui Pannoniæ veteris insigne
fuisse autumant. Horum ego sententiam in-
gredi nequeo. Quamquam enim Hunnos, gen-
tem bellicosissimam, Pannoniquesque parma alba
inglo-

inglorios fuisse, jure dubitem: persuadere mihi tamen non possum, imagines, quas scutis suis inscribebant, constantes fuisse, secundum artis scutariæ regulas elaboratas, atque ad posteros & successores continuo propagatas. Ego pace illorum, qui in alia omnia abeunt, scutum fasciatum, Emerici Regis ævo, dubito esse antiquius. Hoc insignium natales, qui in idem fere tempus incidunt, suspicari jubent, & cum aurea bulla Emerici Regis anni 1202. nullum adhuc vetustius antiquitatis monumentum inventum sit, nec facile inveniri adhuc possit, in quo fasciarum illarum lineamenta ducta sint: hanc meam de ætate scuti fasciati Regni Hungariæ tenebo sententiam, dimissurus eam, protinus ac meliora edoctus fuero. Quid si quaterpis fasciis argenteis, si divinare omnino licet, eadem significatio ab origine inerat, quam totidem insignibus equestribus in sigillis Emerici Regis inesse, §. 126. opinatus sum? Hac opinione saltem propius ad veritatem vix accedit illa, quæ ab Wladislai II. Regis, & STEPH. WERBOECZII tempore, inter populares nostros viget, quaternis nempe tæniis adumbrari quaternos Hungariæ nobiliores fluvios. Utrique equidem opinioni obest, quod non idem semper fasciarum, in ceris & numis Regum subsequen-
tium, recurat numerus: at oblivione, & ignorantia artificum (SCHMEIZEL *Er. läuterung gold und silberner Münzen* pag. 9.) hæc numeri in fasciis describendis inconstantia, non difficulter excusabitur.

§. de 130.

Crux duplica-
ta in scutoRe-
gni Hungariæ.

Cum scuto fasciato Regni Hungariæ, quod nunc descripsi, sub Andrea II. seu Hierosolymitano, crux duplicata alternare cœpit *a*), sub Bela vero filio *b*), & Regibus hunc subsequen-
tibus per unum fere sæculum & longius, soli tantum cruci metropolitanæ in altera sigillorum duplicium parte locus concessus est. Sine dubio illam Andreas II. ab equitibus Hospitalariis, quibus crux patriarchalis argentea campo rubro inscripta, pro ordinis tessera erat *c*), mutuo acceptam, paulo vetustiori Regni Hungariæ emblemati suffici voluit, saltem identidem cum eodem alternare, ut & expeditionis suæ cruciata, & affectus vere singularis, quo in Ordinem Hospitalariorum ferebatur, æternam loqueretur memoriam *d*). Crux duplicata certe ante tempus Regis istius, nusquam in sigillis ceu publicum Regni Hungariæ insigne occurrit. Accedit, lilia antiquissimi Regni Galliæ, non multo effloruisse maturius, atque occasione simillima, cum nimirum Ludovicus junior, in no-
crucis suscepto, ad vindicandam Christianis Palæstinam, legiones suas trans mare duceret *e*). Sunt adeo, qui universe insignium origines, a cruciatis illis expeditionibus repetunt; quas saltem cruces, varias non minus quam copiosas, scutis intulisse certum est *f*). Et quæ deinde causa esse posset, ob quam sanctissimum pietatis christianæ signum, lævum potius, quam dextrum scuti latus occupat? Mihi equidem, si quid video, salvo meliori rem intelligentium iudicio, videtur admodum verisimile, patriarchalem crucem inter insignia
Regni

Regni Hungariæ serius fuisse receptam, quam octo fascias; neque ante Andream II. vel hujus filium Belam IV. pro symbolo Regni Hungariæ fuisse adoptatam; quamvis auctorem novi stemmatis regii, in hujus delectu, præter iter cruciatum, & arctius quo militibus Hierosolymitanis adstrictus fuisse videtur vinculum, fortassis aliam adhuc Regum Hungariæ consuetudinem sacram respexisse non negaverim. Nec obstat, crucem duplicem globo, quem Emericus in cereo sigillo an. 1202. gestat, stare impositam; illius enim ad insigne, de quo quæstio agitur, non alius cogitari potest habitus, quam qui inter globos Imperatorum occidentis, itidem cruce duplicata interdum insignitos, sceptraque similis formæ, atque aquilam Imperialem obtinet. Neque a numis Regum Hungariæ, qui Andream II. antecesserunt, & in quibus ad modum crucis duplicatæ, manu rudi aliquid signatum observas, ad aliud quid credendum induci me patiar. Numis etenim illis, in quibus scutum fasciatum omnino neglectum est, non amplius vis demonstrandi inest, quam globo Emerici Regis crucigero; vel quantum illis Ptolemæorum & Atheniensium numismatibus, ad demonstrandam cultus christiani antiquitatem, majorem quam velis, deferri potest, in quibus monogramma Christi (✠) expressum est.

- a) Sigilla cruce patriarchali insignita antiquiora sigillis Belæ IV. quamvis ipse non viderim, libenter tamen assentior PRAJO, (*de vetere Reginas Hungariæ coronandi more*, p. 55.) qui talia se vidisse narrat. Sed etiamsi nemini cuiquam visa essent, non mihi tamen illa, quæ non per conjecturam futilem aliquam ac temerariam, verum cum summa

verisimilitudine de cruce inscripta regni insignibus sub Andrea II. attuli, eripi paterer. Pauciora Regum Hungariæ sigilla, ad Belam usque IV. ex illa temporum periodo, quæ Tatarorum furorem prægressa est, supersunt, quam ut conjectura omnis, quantumvis sobria, in rebus obscuris dilucidandis damnari debeat. Charta libertatum H. septies descripta, totiesque aureo sigillo Andreæ II. corroborata, cui nostrum unquam in protographo visa est?

b) Vide e. c. Sigillum Belæ IV. æri incisum, in F. A. KOELLARII *Historia diplom. juris Patronatus Regum Hung.* ad pag. 42.

c) *N. L. G. der Diplom.* T. VI. §. 260. 61.

d) Exempla munificentiae vere regiae, & amoris vere fraterni, donationum illæ tabulæ aureis sigillis communitæ præbent, quas Hospitalarii ab Andrea II. in Hungariam e Palæstina reduce acceperunt. „ Nos, inquit ille ibidem, hujus sacra collegii non „ tantum caritatis affectu, *verum etiam numero par-* „ *ticipare* volentes, ut eorum communicaremur „ consortio, & mereremur orationum & beneficio- „ rum participes fieri, *confraternitati eorum ita nos* „ *adstrinximus devote*, ut tam nos, quam successo- „ res nostri pro redemptione animarum — — singu- „ lis annis — 500. marcas argenti — — confere- „ mus. “ — KATONA *Hist. crit. RR. H. stirp. Arpad.* Tom. V. p. 278. & *seqq.* — Hæc legenti mirum esse non potest, Andream a Scriptoribus passim ordini Hospitalariorum S. Joannis Hierosolymitani adscribi, quem ordinis insignia, crucem nimirum duplicatam paludamento adsutam, circumferre non puduit. HELYÖT *Geschichte aller geistl. u. weltl. Kloster und Ritter Orden*, Bd. III. S. 114. Rectius ergo fortassis inde potius Hierosolymitanum denominatum esse putabimus, quam ab urbe Hierosolymorum, quam minime attigit.

e) *N. L. G. der Diplom.* Tom. VI. §. 320.

f) Conf. PH. JAC. SPENERI *Insignium Theoria* p. 170.

§. 131.

Tricollis.

Sculptores in effingenda & adornanda cruce ista sedulos fuisse, unus quisque, me non monen-

monente, suspicabitur *a*). Potissimum tamen formam suam primævam retinuit, nisi quod jam sæc. XIII. interdum basi elevatori insistat, interdum vero triplici montium jugo stet imposita. Et tribus quidem collibus innixa, visa est GODOFREDO SCHWARZ in sigillo Stephani V. Belæ IV. filii, nec non in sigillo universorum juratorum ceterorumque Saxonum de Scepus anni 1319. *b*). In sigillo Regnicolarum Hungariæ 1385. nec non in illo, quo *Prælati*, *Magnates* & *Nobiles*, regnum gubernante Joanne Hunyadi, usi sunt, idem tricollis erectus est, quem GRUBERUS in nullo sigillo vidit, quod 1386. esset antiquius. Si conjecturis indulgere vellem, vel interpretationibus arbitrariis, quallium sæpe ridicularum olim ars Heraldica longe fuit feracissima, tria montium juga, totidem ordines, nimirum *Prælatorum*, *Baronum*, & *Nobilium*, significare jam contenderem, epigraphe sigilli OO. regni monitus, quæ talis est: *Sig. Prælatorum, Baronum, & Nobilium Hung.* — Fortassis etiam circulus, quem corollam rectius dixeris, religionis & ornatus causa tantum, in sigillis Regum exeunte sæc. XIII. e cruce suspensus est *c*). Sertum tandem adhuc, quod stipitem crucis ambit, medio montium vertici est impositum, cujus attamen perpetua vestigia ultra Reges Austriacos non apparent *d*).

a) Vid. ornatissimum Fennenz Reginz sigillum, in *Disquisitione de jure coronandarum reginarum Hungariæ*. Posonii 1792. 4. (auctor est RR. IGN. BAERNKOPF.)

b) In recensione critica *Schmeizeliani de numis Transilvanicis Commentarii*, Rintelii 1764. pag. 15. Est autem crux duplex e tricollis surgens, vetus Saxonum Scepusii insigne, quod illos a Regibus Hungariæ, ad instar insignium, quæ concessionis & pa-

tronatus nuncupantur, mutuum accepisse, postea vero fraternitate XXIV. regaliū civitatū dissoluta, urbi Leutschoviensi reliquisse certum est.

- c) BONFINIUS (*Rerum Hung. Decad. II. Lib. 9.*) circulum istum de insignibus gentis Maurocenæ, quæ mater Andreæ III. nata erat, desumptum fuisse, perhibet, cui passim assentiuntur auctores Veneti. Refragatur illis PRAJUS, (*de vetere Reginas Hungariæ coronandi more* p. 56.) idque merito; ipse enim vidi sigilla Stephani V. & Ladislai Cuni, in quibus corollam illam observavi pendulam.
- d) PALMA *Specimen Heraldicæ Regni Hungariæ* p. 41.

§. 132.

conjunctio
eorumque.

Utraque insignia, quæ hæcenus descripsi, & quorum prius Regni, posterius Regis coronati fuisse, nonnulli, etsi perperam, statuunt; (cum regni ordines interregni tempore, antequam Ladislaus posthumus sceptro capeffendo per ætatem par esset, cruce duplici pro insigni usos fuisse, inter nos nemo ignoret,) primus in uno eodemque scuto conjuncta adhibuit Ludovicus I. cujus sigillum secretum, quibus literas anni 1366. roboravit, in dextra scuti parte regni fascias, in sinistra vero crucem geminatam exhibet. Eadem est illorum in sigillo OO. Regni 1385. dispositio a), rarissime vero conjuncta in postica majestaticorum parte (§. 118. not. b.) fiunt conspicua. Quæ sub Matthia I. obtinuerit, utrumque insigne eodem scuto complectendi ratio, ex icone sigilli Matthiæ Regis, quam Tabula ostendit, intelliges. Sigismundus, quantum scio, primus fuit, qui sigillis suis etiam provinciarum ad Regnum Hung. pertinentium emblemata (e. c. Dalmatiæ) inferevit aliqua. In horum Historia multa adhuc restant, quæ luce majori indigent b). Interest porro

Tab. V.
Fig. 9.

porro hoc etiam tenere, Reges periodi mixtæ, exemplo Caroli Roberti, qui lilia numis sigillisque intulit, insignia etiam regnorum & provinciarum, in quas illis aliunde jus competebar aliquod, nec non insignia gentilitia, quale corvus Matthiæ Corvini fuit, associasse insignibus Regni Hungariæ. Conjungebantur autem conglutinatione vel insertione, si pauciora numero copulanda erant; si plura, sufficebat nuda reliquorum circa scutum princeps, idque majus, (c. c. in sigillo duplici novo Sigismundi Regis) in orbem facta collocatio.

a) Vid. Titulum libelli: *Reflexiones ad Disquis. de jure coronandarum Reginarum Hung.* (auctore LUD. CSA-
PODI) Pestini 1792. 8.

b) In PETRI de REWA *Commentariis*, in *Cerographia Hungariæ*, apud CAR. PALMA l. c. in OO. deinde periodicis: *Anzeigen aus den K. K. Erbländern*, nec non *Ungarisches Magazin*, nonnulla quædam ad Historiam istorum congesta sunt.

§. 133.

Ab inscriptionibus sigillorum Regum Hungariæ realibus, quarum, compendii causa, præcipuas idque breviter nunc attigisse satis esto, ad *inscriptiones illorum literales* recensendas accedimus. Orbiculares istæ nunquam non fuere, ambientes semel bisque sigillorum imagines, interdum, si locus defuit in parte una, protractæ, si sigilla essent duplicia, ad partem usque alteram. Distinguunt se istæ in sigillis antiquioribus brevitate non minus, quam inscriptiones reales in priorum seculorum ceris, simplicitate sua sese commendare, nemo nescius est. Tantum enim abest, ut ante sæc. XI. & XII. Imperatores Regesque longo titulorum symmate

delectati sint, ut vix dignitatum, aut provinciarum quibus præerant, meminerint. Nec diffiteri proinde possum, suspectam mihi videri lectionem inscriptionis, quam ŒEGEDI (in *Affertore libertatis Hungariæ* cet. pag. 117.) in sigillo S. Stephani, quo idem diploma græcum communiverat, se invenisse tradit, expressam verbis: *Stephanus D. G. Rex totius Ungariæ*. In Chronico Gottwicensi, & alibi, nequicquam simile inscriptionis exemplum, in sigillis Imperatorum & Regum illius ævi quæsivi; unde inscriptio sigilli Andreæ I. anni 1055. (quod tamen diplomati huic aliquando appressum, abinde jam decidisse testis sum) *Ungariorum* (*Pannoniorum* diplomatis textus habet) *Regem* Andream appellans, omnino confirmari posset commode.

§. 134.

Provincias R. Edacitas temporis invidit nobis sigilla ple-
 H. recensent. rorumque Regum, e sæculis XI. & XII. Mihi
 saltem si S. Stephani unum, deinde quod Lucius descripsit Colomanni Regis, quæ porro ipsemet vidi Belæ II. Stephani III. & Belæ III. Regum sigilla excipiam, ignota reliquorum sunt: vel quod diploma protographum ab iisdem e. c. a Petro, Salamone, cet. nullum superstes sit; vel quod incuria hominum, a diplomatibus quæ adhuc supersunt e. c. S. Ladislai pro monte Pannoniæ, Andreæ I. cet. sigillum fragile, inprimis quod appressum erat, jam avulsum est; vel quod diplomata ad quæ pertinent in lucem protrahenda in tenebris adhuc-

hucdum lateant. In Emerici Regis bulla aurea, perinde ut in sigillo Belæ III. an. 1195. præter Hungariæ Regis titulum, regnorum *Dalmatiæ* adhuc, *Croatiæ*, & *Ramæ* occurrunt nomina. Auxit horum catalogum Andreas II. (in bulla aurea; GRUBER l. c.) *Serviæ*, *Gallicię*, & *Lodomeriæ* titulis. Accessit paulo post sub Bela IV. (vide KOLLÁR l. c.) *Cumania*, & sub ejus filio *Bulgaria*, donèc tandem Reges e provinciis exteris ad thronum Regni Hungariæ arcessiti, e more sæculi, inscriptionibus sigillorum, nomina etiam exterarum suarum provinciarum intexentes, easdem multo adhuc longius extenderent.

Tab. IV.

Fig. 4.

Tab. V.

Fig. 10.

§. 135.

Inscriptionum in sigillis regiis initium, Reliquæ in-
ut plurimum a crucis fiebat signaculo, quocum scripturæ
subinde alternabant stellæ, aliæque figuræ arbi- lit. formulæ.
trariæ. Sequebatur illud continuo vox *Sigillum*,
interdum, præcipue in antiquioribus majestati-
cis, omissum, sæpissime in aliorum etiam si-
gillis sola initiali S. expressum. Inter nomen
Regis & titulos vetus subsistit formula *Dei Gra-
tia*, post quam Regis titulus, regnorumque &
provinciarum exponuntur nomina a). Inter-
dum etiam cognationis nexus b), magno po-
steritatis commodo in sigillis descriptus est. In
Hungaria Bela III. patris (Geyse II.) quo
genitus erat nomen, primus e diplomatum
introitu, ubi id prius jam observatum erat c),
ad sigilla transtulit, cujus exemplum ad initium
sæc. XIV. (e. c. *Sigillum primi Ottonis Regis*
M 4 Unga-

Ungariæ, nepotis quarti Belæ Regis) omnes fere successores secuti sunt *d*). Idem Rex apud nos auctor etiam videri posset consuetudinis, jam antea ab Imperatoribus & Pontificibus Rom. (Leone IX.) non item a Galliæ Regibus ante Franciscum I. *e*) receptæ, numero se in sigillis distinguendi ab aliis Regibus homonymis, si lectio perigraphes sigilli in diplomate foundationis Abbatia Cisterciensium de Bocconio an. 1182. quam MANCINI habet *f*), omnino vera esset; de quo tamen ego vel eo magis dubito, quo certius est Belam III. Geyſæ II. non vero Almi fuisse filium. Notandum adhuc est, vehementer falli, qui omnes Regum titulos, in diplomatum introitu obvios, in sigillorum etiam inscriptionibus exigunt. In autographo Ladislai Cumani, quod coram me habeo, Bulgaria titulorum seriem absoluit; in sigillo vero Bulgariæ nomen deest; sine dubio, quod sculptor ob spatii defectum, in Cumania titulo exsculpendo subsistere debuit. Ex literarum denique, quibus perigraphæ sigilli absolvitur forma & caractere, qui singulis fere sæculis variabat, de veritate & authentia sigillorum, cum verisimilitudine aliqua iudicium ferri potest; sed magna eatenus cautione opus est, cum sculptorum ejusdem ævi stylus, pro majori minorive artis quam exercebant cognitione & dexteritate, differre multum queat, idemque typarium e. c. urbibus & oppidis, sæpe per longissimi temporis decursum sufficiat.

- a) Extraordinaria & prorsus singularis inscriptio sigilli Belæ Regis junioris (an. 1229.) hæc est: *B. Dei Gratia, & voluntate sui patris, Rex Hungariæ; cujusmodi perigraphen sigilla Imperatorum Russiæ,*
ex

ex lege Petri Magni habitura fuissent, nisi auctor, legem a se ipso neglectam, morte antiquasset.

b) HEINECCIUS l. c. pag. 195.

c) E. c. (an. 1082.) „Ladislaus D. G. Hungarorum Rex, *Belæ Regis filius* “ — (an. 1075.) „Ego Magnus qui & Geysa supremus Hungarorum Dux, postea vero Dei Gratia Rex consecratus, *Belæ Regis filius* “ *FRAN Hierarchia Regn. Hung. P. I. p. 265. 355.*

d) PRAY in *Notitiis præviis ad Hist. Regum Hung. p. X. XI.*

e) *N. Lehrgeb. der Dipl. T. V. §. 527.*

f) In *compendiaria politioris Literaturæ notitia. P. II. p. 195.* In *literarum exordiis id aliquanto factum est maturius.*

§. 136.

De cereis prius sigillis, quam de bullis Modus adne-
loquar. Illorum alia fuerunt diplomatibus ap. Attendi sigilla
pressa; alia de iisdem *pendula*, seu *pensilia*. Ap- impressa.
pressa iterum vel in parte diplomatum inven-
niuntur antica, vel in postica. Prior sigillo-
rum apprimendorum locus, ut antiquior est,
ita semper etiam fuit usitator. Antiquissima
certe Germanorum diplomata, quorum non
pauca videre, etiam mihi aliquando licuit esse
tam felici, ita fere signabantur, ut membrana
in latere marginis inferioris dextro, plerum-
que in stellæ vel crucis formam incideretur,
replicatis in unam alteramque partem laciniis,
quæ post sectionem existerant triangularibus;
apertura subinde ex utraque parte, operieba-
tur cera, sigillum apprimebatur intrinsecus.
(*Chron. Gottw. L. II. p. 164.*) An in Hunga-
ria hic modus signandi olim viguerit, in tanto
diplomatum priorum duorum sæculorum defe-
ctu, definire est difficile; contra vero alium,
quo

quo vel in facie, vel in tergo diplomatis, filis membranaceis per medium diploma, in partem alteram transmissis, inprimebantur sigilla, non infrequentem inter Hungaros fuisse, exemplis certum est. Et in adversa quidem impressa, ad calcem literarum rejecta medium occupant. Quæ tergo adglutinata sunt nostratia, cum majora tum minora etiam, regionem equidem palarem seu mediam tenent, ita tamen, ut hæc plerumque supra centrum assurgant, illa contra infra illud sint deposita. In Archivo urbis Soproniensis literas Regum Hung. sæc. XIV. bene multas vidi, (& hujusmodi Mariæ I. quoque est, quod e Museo Bibliothecæ R. U. desumptum Tab. II. Fig. 10. repræsentat,) quarum tergo sigilla majora majestatica, diametro altitudinem ipsarum literarum sæpe adæquantia, impressa sunt. Similium exemplorum e re diplomatica aliarum gentium memor non sum *a*): etsi non ignorem inter Germanos sigilla minora, neque tamen Imperatorum & Regum majestatica, (de quorum contrasigillis hic sermo non est) in dorso literarum expressa, itidem a sæc. XIV. interdum occurrere *b*). Sunt autem illa quocunque demum loco appressa, caducitati & fragilitati præ pendulis obnoxia, quorum superficiem, si minora essent, inprimis miniata, sine dubio eapropter prius quam typarium admoveretur, ab exitu inde sæculi XIV. (exemplum quod mihi innotuit primum literæ habent Sigismundi Regis anni 1399. sigillo annulari communitæ) particula chartæ identidem obtegere visum est. Decidua de literis, loco quem occupant, vestigia nunquam non relinquunt, e quorum ambitu
&

& colore, ætas fidesque literarum utcunque æstimabitur. Juvabit hoc fine etiam formulam scriptam, quæ sub cera jam avulsa latuit respicere. Membranæ enim priusquam cera oblineretur, sub Carolo I. Rege, solemnes inscribi cœperunt Cancellariarum formulae: *Commissio D. Regis; Splis 9º Domine regine; relatio Henrici, Piponis*, cet. Observavi ego illas in illis fere Regum literis, quibus formularum istarum aliqua in summo margine præmissa stabat, latentes sub majoribus minoribusque sigillis, etiam annularibus, ad Albertum usque Regem, in cujus literis an. 1438. sigillo judiciali in cera rubra firmatis, ultimum consuetudinis istius notavi vestigium. Exempla recentiora ignoro; nec hoc definire audeo, sublestæne fidei continuo dicendæ sint literæ, quarum sigillo appresso a Carolo I. ad Albertum usque, formula nulla subest: quamvis in judiciis, ut relatum accepi, sigilla ceu fraudis suspecta, rejecta aliquando sint, quod confracta similem non edidissent sententiam.

a) HEINECCIUS diplomata hujusmodi sigillis in tergo munita falsi insinuat l. c. p. 177.

b) *Allg. deutsche Bibliothek*. T. LII. append. I. p. 561.

§. 137.

Præeunte perill. quondam GUDENO a), Sigilla pen-
communis plerorumque non ita pridem adhuc dula.
fuit opinio, ad annum usque 1190. desiderari
sigilla cerea de literis & diplomatibus pendula.
Adversantur huic sententiæ ea, quæ LUCIUS de
pensili cera Cresimeri Regis Dalm. & Croat. anni
1071. b) nec non de pendulo sigillo Colomanni
Regis Hung. 1108. c) commemorat; adversan-
tur

tur illa quoque sigilla Belæ II. Stephani III. & Belæ III. Regum, quæ instrumentis protographis appensa, adhucdum supersunt *d*). Ab auctoritate diplomatis Boleslai II. Ducis Bohemiæ concessi an. 993. Monasterio Ordinis Divi Benedicti Brzevnoviensi, & sigilli quod ab eodem dependet, me sponte abstineo; quod de utriusque authentia & sinceritate ego quoque post PUBITSCHKAM non temere dubitem *e*). Neque ea GUDENO opponi possunt; diplomatum Ottonis III. Imp. exempla, quæ MURATORIUS in *Antiqu. Ital.* Tom. I. p. 233. 235. edidit; sigilla enim ibi filis avulsa, dubium relinquunt, bullisne an ceris potius adscribi debeant. Quamquam ergo sigilli regii pendentis de diplomate exemplum nullum adhuc anno 1071. antiquius, quod LUCIUS commemorat, inventum sit: Episcopus tamen jam sæc. X. passim chartas sigillis munivisse pendulis, vel MABILLONII (l. c. p. 150.) constat testimonio. Id mirum videri potest, auctores Gallos Germanosque iterum nihil commemorare de consuetudine, quam salvo diplomate S. Stephani an. 1001. mature aliquando in Hungaria obtinuisse certum est, majora videlicet sigilla, seu majestatica, adfuendi tergo diplomatum ope corrigiæ, per incisuras ex antica in partem posticam trajectæ, ita ut sigillum appareat non in illa diplomatis pagina, quæ inscripta est, sed in altera vacua, idemque, quamvis vere pendulum mobileque, nihilominus negligentius contuenti appressum esse videatur. — Pendent porro sigilla non tantum de membranis, verum ut nuper admodum edocti sumus *f*), etiam de literis e charta communi linea, quamvis hoc, ob materiæ infirmitatem

tatem, rarius. Universe autem consuetudo appendendi sigilla, ita in alteram, qua ceræ apprimebantur chartis, haudquaquam sæviit, ut protinus ac illa admittebatur, hæc subito ac penitus dimissa sit.

- a) In præfat. ad *Syllozen I. Diplomatariorum* p. 18.
- b) V. JO. LUCH *de regno Dalmatiæ & Croatiæ Libb. VI.* Amst. 1663. Fol. „ *Privilegia* (inquit ille pag. 96. „ scil. Ducum & Regum Croat. & Dalm. præcorum) „ *diversimode firmabantur, signis tantum, ut Tirpi-* „ *miri; signis & sigillo annuli ducis, ut Mucimiri;* „ *subscriptione, & approbatione aulicorum, & Episco-* „ *porum, ut Regum Cresimiri Petri, & Zuonimiri.* „ *Et quamvis plura originalia Regum privilegia su-* „ *per sint, unicum tantum pendenti sigillo cæreo ro-* „ *tundo Cresimiri reperitur, anni 1071. in sanctua-* „ *rio Arden. Ecclesiæ existens, in quo imago Regis* „ *in throno sedentis apparet, circa quam sequentes* „ *characteres: SIGILLUM REGIS CRESIMIRI DAL-* „ *MATIAE.*“
- c) *Memorie istoriche di Tragurio* p. 19.
- d) Primum in Archivo Exc. Cameræ Aul. vidi, alterum in Archivo urbis Soproniensis; tertium, priusquam Plassenburgo Budam cum pluribus aliis instrumentis referretur, vulgavit SPIESS l. c. P. I. p. 240. conf. P. II. p. 1.
- e) Vetustissimum hoc, ut vulgo creditur, rei diplomaticæ Bohemicæ monumentum, una cum sigillo, quod ab eodem dependet, servato charactere præfco quoad fieri potuit, vide quam diligentissime æri incisum in W. HAGER *Annalibus Bohemorum* cura G. DORNER P. IV. ad p. 374. Idem vindicare illud ab objectionibus adversarii tentavit in commentationibus: *Abhandlungen einer Privat-Gesellschaft in Böhmen, I. Band, Prag, 1775.*
- f) Vid. *Leipziger allgem. Liter. Anzeiger, December 1798. p. 2094. conf. Intelligenzblatt der allgem. Literatur Zeitung, 1799. Nro. 43.*

§. 138.

Ligamina si-
gillorum.

Diversi coloris, diversæque materiæ fuerunt sigillorum pensilium vincula, cum alibi, tum in Hungaria. Et materia quidem e *serico, corio, membrana, & filo communi*. Sericea olim fuere vincula sigillorum non solum Regum Hungariæ, sed plerumque etiam Episcoporum, Capitulorum & personarum illustrium. Corio, eoque crassiore sigillum diplomati S. Stephani 1001. alligatum est, cujus Regis literas 1019. ill. GEBHARDI haud ita pridem falsi insimulare non dubitavit, quod corrigiæ in formula sphragistica illarum mentio facta est a). Nec membranacea nobis desunt sigillorum ligamina, sigillis præcipue Abbatum & Conventuum suspendendis olim adhibita, & ubivis obvia. Si instrumentum aliquod plurium Procerum Nobiliumque sigillis instructum est, dependentibus de loris membranaceis, non tantum ordinis, quem personarum dignitas definiebat, diligentem rationem habitam fuisseprehendimus; verum nomina etiam illorum, ad quos sigilla pertinuerant, membranulis per Notarium inscripta invenimus b). Filo communi, recentiori demum ævo, personæ ut plurimum inferioris conditionis usæ sunt, quamvis Capitulorum etiam, e. c. Scepusiensis, sigilla viderim filis vulgaribus pendentia. — Coloris porro non minor fuit varietas & inconstantia in appendiculis sericeis. Quidam enim etiam Hung. Regum serico partim rubro, partim albo flavove: alii penitus rubeo aut viridi usi sunt. Hodie Imperatores Rom. Germ. & quidem a Caroli IV. tempore, quem tamen non omnes successores in eo continuo imitati sunt c), accommodate

ad tincturas insignium Imperii, ligamina adhibent contexta e serico nigro fulvoque: in Hungaria colores e Regni insignibus desumpti, argenteus puta ruberque, quibus interdum ob tria montium juga viridis admiscetur, publici juris sunt.

a) *Geschichte des Königreichs Hungarn* I. 450. Literæ dotem Monasterio Benedictinorum S. Adriani de Szala constituunt.

b) Diploma Prælatorum, Baronum & Nobilium Hung. an. 1402. quo se, mortuo sine hærede masculo Sigismundo, Albertum Austriæ Ducem, Regem agnituros & coronaturos esse promiserunt, sigillis annularibus CXII. communitum est; quibus appendendis, cum locus in inferiori margine membranæ non sufficeret, duo, urbium Posonienfis & Sopronienfis, sigilla, e dextro diplomatis, quod ipsemet evolui, latere appensa, nomina vero ligulis membranaceis CXII. de quibus pendent, Notarii attamen manu, inscripta sunt. Exemplum aliud, sed minus illustre, habet KAPRINAI in Hungaria diplom. P. II. p. 252.

c) WILL'S *Beyträge zu der Diplomantik* p. 81.

§. 139.

Pendent de chartis omnes, quotquot exstant, bullæ, quas ceris quoque appendendis occasionem fecisse nullus dubito. Fuerunt illarum quoque vincula materiæ & coloris diversi. Alternavisse porro inter se sericeas & cannabinas bullarum pontificiarum appendiculas, tironibus in arte diplomatica notum est. Sed audiendi non sunt, qui e ligaminum materia, argumentum literarum pontificiarum, semper adsequi cupiunt. Enimvero bullæ Pontificum cum *executoria* seu *justitiæ*, tum *gratiæ*, promiscue ad finem sæc. XII. mox filo sericeo (quod subinde a medio sæc. XIII. ad XVI. per-

Vincula bullarum.

perpetuo mixtum e rubro flavoque erat,) mox cannabiño crassiore alligatæ sunt: quamquam post illud tempus in *forma gratiosa* expeditas serico, in *rigorosa* vero exaratas, cannabi vinctas esse debere a), non sim nescius. Recentioribus bullis aureis Regum Hungariæ, accedit a vinctulis aureis etiam; splendoris aliquid; antiquiores, e. c. aurea Bulla Belæ IV. an. 1252. juxta cum ceris, e zonis dependebant sericeis. — Modum denique, quo sigilla alligabantur chartis, lectores in ipsis diplomatibus, quam descriptione qualicunque imperfecta contemplari malo. Interdum si sigilla majoris molis adnectenda erant, fila, de quibus sigillum pendet, per medium literarum contextum ducta sunt; neque tamen hic sigilla applicandi modus, Hungaris duntaxat, ut SPIESSIO aliquando videbatur b), erat proprius. — Capsulis, vel metallicis vel etiam ligneis, sigilla pendula includendi mos, vix sæculo XVI. est antiquior; neque ut theca hujusmodi sigillo ipsi ubique ætate par sit, necesse est.

a) *N. L. G. der Dipl. IX.* §. 1174. 75.

b) *Archivische Nebenarbeiten II.* p. 2. In *monumentis Boicis* Tomo XI. p. 479. ad diploma Alberti Archiducis Austriæ an. 1459. ejusque sigillum equestre notatum reperit: „Sigillum in medio chartæ filis, sericeis tricoloribus appensum est.“

§. 140.

Sigilla civilia;
ecclesiastica.

Personæ, quæ in Hungaria sigillis usæ sunt; fuerunt ordinis vel *ecclesiastici*, vel *civilis*. Ad sigilla personarum civilium pertinent:

1.) Sigilla Regum, & Reginarum, nec non Principum filiorum. 2.) Magnatum & Nobilium.

bilium. 3.) Comitatum. 4.) Urbium & Op-
pidorum. 5.) Civium & plebejorum.

Inter sigilla personarum ecclesiasticarum,
cominemoranda sunt: 1.) Sigilla Romanorum
Pontificum, (ob magnam illorum inter nos
copiam.) 2.) Episcoporum & Capitulorum. 3.)
Abbatum & Conventuum sacrorum.

§. 141.

Hungariæ Reges pro diversitate literarum, Sigillorum re-
quas sigillis roborabant, diversa etiam adhibue- giorum plura-
runt sigillorum typaria. Illustris hac de re lo- litas & disceri-
cus exstat Matthiæ Corv. Decr. III. art. 8. (an- men.
ni 1471.) „ Nos utimur, inquit ille ibidem,
„ quatuor aut quinque sigillis, videlicet bulla
„ aurea & duplici, secreto, juridico, & an-
„ nulari “ Ectypon unius alteriusque in Tab.
IV. & V. videris. „ Duplex, (ita SZEGEDI in
Tripartito juris Hungarici Tyrocinio, P. II.
p. 100. commentatur,) uti & bulla aurea
„ apud Archiepiscopum Strigoniensem asser-
„ vatur, (addere debuisset: ex quo hic per-
„ petuo est summus Regis Cancellarius)
„ & postquam series statutionis reportatur,
„ atque in formam privilegii redigitur, dona-
„ tio per illud munitur. Hodie (de suo tem-
„ pore loquitur † 1760.) etiam literæ armales
„ ab Rege & Archiepiscopo Strigoniensi, velut
„ summo Cancellario & Secretario subscriptæ,
„ illo expediuntur. Secretum sigillum Regis
„ est, quo in præcipuis negotiis & confirma-
„ tionibus privilegiorum utitur, item in novo
„ judicio extradando. Judiciale Locumtenens
„ personalis præsentia regis apud se habet,
„ & sub eo expedit. Annulare demum, quod
N „ Rex

„ Rex pro suo privato usu conservat. “ Secretum, (majus minusque) & judiciale Regum Hung. sigilla, simplicia sunt, atque insignia regni exhibent; & posterius quidem regia impressa sibi habet symbola, quod Regum auspiciis judicia nunquam non habita fuerint. Neutrum sæculo XIV. est vetustius.

§. 142.

De Sigillo duplici speciatim.

Primus ac præcipuus sigilli duplicis regii usus olim erat in conferendis & confirmandis Nobilium beneficiis, quæ vulgo *Donationes* (in Polonia aliquando, *panis bene meritorum*) appellamus, etiam postquam secretum, in pluribus literarum generibus, in locum duplicis substitui cœptum est. Donatione scilicet aliqua, civi de Rege & patria bene merito decreta, inscribebatur hæc regię liberalitatis declaratio literis patentibus, firmatis nonnisi vel sigillo Regis annulari, vel secreto minori, subiecta vetere formula: „ harum nostrarum vi-
„ gore & testimonio literarum mediante, quas
„ in *formam privilegii* redigi faciemus, dum
„ nobis in specie fuerint reportatæ “ a). Dabatur adhæc loco credibili, beneficio promisso proxime adjacenti, in mandatis, ut dimitteret unum e sui medio pro testimonio fide dignum, associandum viro seculari a Rege ad negotium hoc deputato, quorum, vicinis limitaneis convocatis, intererat, beneficiarium in possessionem prædii introducere, hujusce metas & fines obire, & diligenter definire, intercedentes actui investituræ, si qui aderant, ad rationem contradictionis edendam, in Regis præsentiam evocare, historiamque rei
totius

totius peractæ (*seriem statutionis*), literis loci credibilis comprehensam, Regi perscribere. Hac percepta, si vel nemo erat, qui statutioni intercessisset (*statutio pura*,) vel contradictione in judicio elisa, solemnes dabantur literæ, quas *Donationales* dicimus, statutionis etiam seriem in se continentes, eademque sigillo nunc demum muniebantur duplici seu *privilegiali*, ipsique donationis instrumento *privilegii* exinde cognomen est inditum *b*). Progressu temporis a sæculo inde XIV. ad finem XV. ubique gentium fere rarefcere magis magisque cœpit duplicium sigillorum usus; (enimvero exeunte sæc. XV. nec Imperatores *c*), neque Episcopi se amplius sedentes in ceris suis exhibent) rarefcunt etiam sigilla equestria, adhibitis in eorum locum secretis potius, quæ suis imaginibus, vel provinciarum quibus quis dominabatur proloquerentur copiam, vel stemma, quo quis ortus esset, testarentur vetustum atque nobile. Mos idem etiam ad Hungaros propagatus est; sed, quod hi, juxta cum Hispanis Belgisque *d*) rituum antiquorum admodum tenaces essent, paulo lentius. Alternare hic primum ergo tantum cœpit sigillum secretum cum duplici; subinde vero Ferdinandus I. secreto jam in *donationibus atque aliis gravioribus rebus Regni sui Hungariæ usus est e*). Imitabantur hunc ejus successores e Domo Austriaca, neque tamen duplex aboleri potuit penitus. Rudolphus II. anno 1603. Articulos quos *Tavernicales* appellamus, *sigilli duplicis* munimine *ratos, gratos, & acceptos habuit*; majestaticum ejusdem itidem utraque parte insignitum jam supra (§. 124. not. d.) celebravi; commemorari idem in pri-

vilegiis Leopoldi I. bene memor sum; fuerunt quibus Caroli VI. visum est *f*), ursitque tandem adhuc illius usum Lex regni an. 1751. art. 3. — Sine dubio Archiepiscopi Strigonienfes, ex quo hi perpetui Summi & Secretarii sunt Regis Cancellarii, ac proinde, sigilli etiam duplicis custodes, hoc idem penitus antiquari passi non sunt *g*), etiam postquam titulo Summi & Secretarii Cancellarii eisdem duntaxat relicto, alius in aula Regis a Rege constitutus esset Cancellarius, qui re vera hoc munere functus est, & adhuc usque fungitur. Quamvis vero nihil impedire dicant, quominus hodieque codicilli nobiles a Rege & Archiepiscopo subscripti, illis, quos Rex ad commendationem Archiepiscopi in cœtum nobilium cooptavit, e Cancellaria hujus sigillo duplici (cujus e lege regni 1609. 73. duplex taxa est) munitæ expendantur *h*): nulla tamen, quantum scio, ævo nostro similis expeditionis exempla exstant amplius, mortuoque nuper Archiepiscopo Josepho e Comitibus de Batthyán, ex hujus Cancellaria utrumque par sigilli ad Aulam Regis relatum est, quin ille, titulo Summi & Secr. Cancellarii contentus, illius usum unquam fecisset aliquem. — Hoc tandem adhuc hic commonere expedit, ad evitandam fraudis suspicionem, si olim Cancellario, aut Vice-Cancellario Regis, cui sigilla Regia erant concredita, per Regem beneficii tribueretur aliquid, mox Palatini, mox unius alteriusque Episcopi sigilla de eodem instrumento fuisse ad latus regii appensa. Ludovicus I. literis 1355. hac eadem de causa, („ad evitandum suspicium“) Elisabethæ matris sigillum duplex authenticum suo addi-

addidit. Sed cautela hæc, a quo Reges literis manu propria subscribunt, ceu minus necessaria, jam pridem neglecta est.

a) Ante sæc. XIII. nec formula ista, nec hujusmodi literarum donationis, quas Aylo illius ævi *interimales* facile quis appellare posset, apud nos occurrunt. Suffecisse primis R. H. temporibus videtur rescriptum Principis ad locum aliquem, vel personam aliquam credibilem e. c. Slavoniæ Banum, quo jubebantur videre, prædium vel villa, quæ a Rege petebatur, jurisne esset regii, ut promissam roganti dare posset? Qui ejus esset ambitus? Quæ cultura? &c. donatario, si nihil obstabat, continuo in prædii possessionem introducto, privilegio autem subinde edito. Sed neque ejusmodi collationis exempla desunt, ubi nimirum Rex per locum credibilem prius utcumque edoctus, privilegium donationis edidit, statutio vero serius subsequuta est. Hæc vero cum aliorum intercessionibus inexpectatis impediretur sæpius, factum est, ut ante investituram, literas equidem donationis regiarum testes acciperet beneficiarius, hæ autem nonnisi statutione ab omnibus contradictionibus rite vindicata, in formam privilegii solemnem redactæ sint. „ Ad petitionem ejusdem (verba sunt Elisabethæ Reginae conjugis Ladislai Cumani, instrumento donationis, seu privilegio, quod Luchatio nuntio victoriæ de Cumanis reportatæ impertita est) „ quamdam terram seu villam præconum nostrorum N. — „ in Comitatu Simigienti — duximus conferendam. „ Verum quia de qualitate, quantitate, & circumstantiis ejus nobis veritas non constabat ad plenum, nec vellemus nostræ donationis insignia sub incerto donationis titulo vacillare, ad plenioram notitiam ejusdem villæ — religiosi viris — nostris literis dedimus in mandatis, qui nobis totius terræ qualitatem & circumstantias in suis literis rescripserunt in hæc verba — “ In responsoriis Conventus Simigientis statutionem jam etiam peractam esse relatam est.

b) E literis donationis Emerici Regis anni 1199. quas tabularium Soproniense habet, hic est epilogus:

- „præsentem concessimus paginam, privilegiantis
 „sigilli nostri munimine in perpetuum roboratam.“
- c) GUDENUS l. c. in *Præfat.* p. 21. 25.
- d) Vid. OLIV. UREDII *Sigilla Comitum Flandriæ*, ubi sigilla Regum Hispaniæ majestatica sæc. XVI. XVII. æri eleganter incisa sunt. Ultimum ibidem Philippi IV. Regis sigillum novum est anni 1634.
- e) Hanc formulam in multis Ferdinandi I. legi privilegiis. conf. *Quadripartitum opus juris consuetudinarii Regni Hungariæ*, Zagrabiæ 1798. 4. pag. 51. 52.
- f) (JOS. KOLLER e S. I. † 1766.) in *Cerographia Hungariæ*, seu *Notitia de Insignibus & Sigillis Regni Mariano-Apostolici*. Tyrnaviæ 1734. pag. 90.
- g) Repræsentationes ita dictas Archiepiscoporum Strig. pro usu sigilli duplicis retinendo, plures legi. (HEVENESSI MSS. Tom. LI. NNN) conf. P. PAZMANI *Append. III. ad Synodum Diæces.* an. 1629. in *PETERFI Conciliis R. H. P. II.* p. 287.
- h) Non memini me Regum Hung. codicillos nobilitares (armales) sigillo majestatico duplici firmatas uspiam vidisse. Exempla sine dubio rara sunt.

§. 143.

Sigilla Regi-
 narum Hun-
 gariæ.

Reginæ Hungariæ sigillis cum majoribus seu majestaticis a), tum minoribus etiam seu secretis, & annularibus usæ sunt. Utriusque generis exempla a sæc. XIII. inde sat multa supersunt; æri incisa vero exstant nonnisi Fennæ Andreæ III. b), Barbaræ Sigismundi c), & Annæ Ferdinandi I. d) conjugum. Illorum primum est duplex majestaticum, intermedium annulare, postremum secretis accensetur. Operæ igitur pretium me facturum esse putabam, si tribus istis, hætenus in lucem editis, quartum, nimirum Mariæ I. sigillum majus, seu majestaticum monosphragistum adjicerem, quod in parte postica diplomatis anni 1383. impressum seu agglutinatum est. Hoc ideo deligere placuit, quod decretis & privilegiis Mariæ I.

per

per Sigismundum Regem approbatis, hodieque in foro summa sit auctoritas, nec inter Reginas, sed Reges Hungariæ, juxta cum Maria Theresia, juris hungarici præceptores illam censeant. Locus adhæc, quo sigillum expressum est, & adnectendi modus, qui e vestigiis fragminum deciduorum luculenter apparet, nec non inscriptionis utriusque fragmenta, sigilli exemplum præbent, satis, ut opinor, memorabile.

- a) Elisabetha regina conjux Ladislai Cumanii literas *reverendæ Socrus suæ Elisabethæ majoris an. 1283. duplici sub sigillo, Timotheo Zagrab. Episcopo, de decimis in Comitatu de Werevce colligendis, editas, itidem duplici sub sigillo confirmavit 1284. „ in quantum ad nos pertinere dignoscitur, cum idem „ Comitatus de V. sit de prædiis & curtiibus regina- „ libus. “ De hujusmodi scilicet tantum juribus reginæ privilegia largiri poterant; quarum proinde consensum Reges ipsi, daturi alicui de illis aliquid, negligere nunquam solebant. — Aliud sigillum Majestatis 1367. iterum Elisabethæ Ludovici I. conjugis, Auctores *Chronici Gottwicensis* I. 407. commemorarunt: equidem uberius, quin tamen ob operis continuationem impeditam illud delineaverint.*
- b) In (IGN. BAERNKOPF) *Disquisitione de jure coronandarum Reginarum Hung.* Posonii 1792. ante prologum.
- c) In JO. HEUMANNI *Commentariis de re diplomatica Imperatricum ac Reginar. Germaniæ*, Norimb. 1749. pag. 4. & 350. fig. 5. unde exemplum, quod I. G. BOEHMIUS in fronte dissertationis *de Barbara Celejensi*, Lips. 1759. exhibet, acceptum est.
- d) Apud PÉTERFIUM in *Conciliis R. H. P. I.* dedicationi præpositum.
- *) In ERAŚMI GATTOLA *Accessionibus ad Historiam Abbatiae Cassinensis*, Venet. 1734. Fol. pag. 512. diploma recitatur Johanniæ II. Hungariæ, Jerusalem, & Siciliæ Reginam sese appellantis, munitum sigillo majori majestatico duplici, figuræ insolentis, cui dictorum regnorum insignia in parte averfa inscripta sunt. — At feminæ huic quamvis principi inter Reginas nostras locus non est.

§. 144.

Sigilla Nobili-
um.

Sigilla Nobilium Hungariæ ante sæc. XV. admodum rara sunt. Quamvis autem maturius jam primæ nobilitatis viros, nimirum regni Barones, Comites parochianos, & sic porro, sigillis usos fuisse dubitari non possit: certum tamen est, insignia gentilitia, eaque perpetua, ab avis ad nepotes propaganda, ante Sigismundum Regem sigillis insculptâ non occurrere, ut adeo exempla sigillorum, a regni Proceribus ad istud usque tempus profecta, vel emblemata exhibeant inconstantia & temporanea, vel si eadem publica & authentica erant, sigillis regiis, prout e. c. nunc judiciale regium, adnumeranda sint. Nobilissimis ergo & vetustissimis Hungariæ familiis tesseras gentilitias, seu arma, Sigismundus Rex omnium primus contulit *a*); qui cum simul Imperator esset, opinione ævi medii, hoc jus inprimis ad se, ceu luminare illud minus, e quo omnium sæcularium dignitatum radii profluerent, pertinere ratus est *b*). Sed neque reditum, (taxarum) qui ex insignium concessione, Sigismundo Regi, pecuniarum semper indigo, proveniebant, oblivisci decet; qui præcipue in Concilio Constantiensi permultos Hungariæ Nobilium insignibus condecoravit, qui talia tunc vel eo magis desiderasse censendi sunt, quo magis eisdem in magno illo & frequenti Nobilium totius Europæ christianæ conventu, discernacula hujusmodi, & publici nobilitatis suæ indices fuerunt necessarii. Crevit abhinc (Hungariæ Regibus subsequētib; insignia suo eoque maximo jure conferentibus) sigillorum priva-

privatorum usus in Hungaria continuo, quo Nobiles Hungariæ eo facilius carere ad hoc usque tempus poterant, quo magis abundabant Capitulis & Conventibus, sigilli publici & authentici jure gaudentibus, coram quibus, quemadmodum coram summis & ordinariis Regni Judicibus, privati Nobiles contrahere, (fassiones celebrare) & olim solebant, & adhuc usque solent.

a) Primum & antiquissimum quod mihi quidem innotuit literarum hujus generis exemplum, armales illæ sunt, quas Sigismundus anno 1401. in Festo B. Georgii Martyris, Joanni filio Demetrii de SEMSE, ob mortem fratris illius Ladislai, pincernarum regalium magistri, qui infelici illo cum Turcis ad Nicopolim conflictu occubuerat, impertitus est. Diploma vulgavit KATONA in Hist. crit. RR. Hungariæ Tom. XI. p. 519 — 21.

b) Eximio specimine, verbisque Sigismundi (quæ, cum brevitati studeam, describere huc non possum) systema hoc deducum vide, in JO. STEPH. PÜTTERI *Specimine juris publici & gentium mediæ ævi*, Gœttingæ, 1784. 8. p. 184. — Vidi armales literas sub Ludovico I. Rege 1566. a Palatino Rhæni, potestate sibi utique ab Imperatore delegata, Hungaro collatas. Legi vero easdem non foris, sed domi, non in exemplo aliquo vago, sed in protographo.

§. 145.

Inter Comitatus Hungariæ, Sümeghienfis Sigilla Comitatus primus erat, cui Wladislaus II. an. 1490. singulari privilegio, (quod P. SZEGEDI inseruit *Decretis & vitis Regum Hungariæ, qui Transilvaniam possederunt* p. 253. seqq.) insignia, atque adeo sigillum largitus est. Simile privilegium reliqui Comitatus omnes & singuli, lege Regni an. 1550. art. 62. a Regia Majestate

state impetrare jussi sunt *a*). Comitibus ergo anni dicti adhuc perdurantibus, Honthensi Comitatu, 12. mens. Februarii, an. 1550. convenienter legi, sigillum proprium, & insignia, diplomate concedebantur, quod in M. BELII *Notitia Hungariæ novæ*, Tomo IV. pag. 553. 54. expressum, multa suggerit rem Hungariæ veterem diplomaticam non parum illustrantia. Antehac enim regni Comitatus sigillis propriis & perpetuis destituti, in literis publico Comitatus nomine edendis, quarum nullas initio sæc. XIV. antiquiores vidi, annulis Vice-Comitum & Judicum Nobilium utebantur *b*), plerumque ita, ut Vice-Comitis sigillum paulo exstantius, medium occuparet locum inter sigilla cetera, in formam quadrati, si quatuor numero adessent, disposita. Habuerit hæc literas corroborandi ratio non nihil incommodi; magistratibus enim provinciis suis decedentibus, sigillum Comitatus etiam continuo mutari debuit. Neque alia de causa igitur, quam ut mutationis minus esset, Scepusiensis Comitatus, priusquam sua, quibus nunc gaudet, insignia an. 1593. a Rudolpho II. impetrasset, solo Comitatus nomine in quatuor

syllabas diviso, **(SE) (PU) (SI) (UM)** quæ totidem typaria minora dabant, Judicibus Nobilium custodienda, (quæ etiam interdum uni circulo majori inclusa chartis apprimebantur) in muniendis suis literis usus est *c*). Sigillum hujusmodi quadripartitum, cui verba: *Comitatus Maramarus*; vel: *Comitatus Ugoczia* insculpta leguntur, Comitatus dicti adhucdum retinent, nisi quod quaterna illa sigilla minora non jam

in potestate sint totidem Judicum Nobilium, sed more aliorum Comitatum V. Comitis aut Notarii fidei permiffa sint. Josepho II. ita jubente, duobus & quod excedit annis, a 1. inde Sept. 1787. Comitatus omnes & singuli, in sigillis suis insignia Regni gesserunt, inscriptionibus Comitatus cujusvis nomen exprimentibus: mense tandem Februario 1790. priora sigillorum typaria Comitatus Regni, urgentibus rem Regnicolis, iterum restituta sunt. Eclypa plerorumque in *Cerographia Hungariæ* invenies.

a) „ Præterea statutum est, (sunt verba legis) ut pro
 „ evitandis diversis inconvenientiis, quæ hæcenus
 „ sæpe numero in Comitatus contigerunt, propter
 „ incerta ignotaque sigilla: in posterum in singulis
 „ Comitatus sub uno sigillo, literæ nomine Comita-
 „ tus expediendæ, ex benigna concessione Regiæ
 „ Majestatis expediantur, quemadmodum fit in Co-
 „ mitatu Simigienfi. Quæ quidem sigilla postquam
 „ fuerint impetrata & confecta cet. “

b) Hinc communis literarum Comitatus nomine edictarum introitus: *Nos N. Vice-Comes* (antique *Comes Curialis*) & *quatuor Judices Nobilium de N.* intelligendus est, qui postmodum, sigillo nimirum perpetuo Comitatus Regni attributo, formulæ initiali cessit: *Nos Universitas Nobilium Comitatus de N. &c.* Exemplum esto: „ Nos Universitas Nobilium de Sarosdamus pro memoria, quod cum
 „ — — — exhibuit nobis literas quasdam adjudicatorias antecessorum *Vice-Comitis & Judicum* — an.
 „ 1545. — modo antiquo, sub quinque sigillis emantatas & confectas, quarum vigore &c. Datum —
 „ anno ejusdem Domini 1575. “ Imagines sigillorum ejusmodi quinque delineatæ exstant in *WAGNERI Diplomatario Sarosienfi* p. 281.

c) M. BEL in *Prodromo Hungariæ antiquæ & novæ* p. 83. 84.

§. 146.

Sigilla urbi-
um & oppi-
dorum.

Antiquissimum exemplum diplomate regio accepti juris sigillum publicum adhibendi, privilegium Saxonum in Transilvania ab Andrea II. Rege 1224. acceptum suppeditat *a*). Ab hoc ætate parum discrepat sigillum universitatis Saxonum Scepusiensium *b*); inter urbes autem Hungariæ singulas, Cassovia, quantum e documentis liquet, prima fuit, cui insignium & sigilli usus, & quidem a Ludovico I. Rege, *diplomate* (nam & antea jam sigillum ad arbitrium delectum, & Cassoviæ & aliis civitatibus fuisse usitatum caret dubio) an. 1369. concessus est *c*). Etiam Buda, Alba-Regia, Pestinum, Sopronium, Posonium, Carpona, ceu antiquissimæ Hungariæ urbes, eodem jure mature satis a Regibus Hung. donatæ fuerint: at defunt mihi literæ, quibus id definire & pro certo affirmare possem; quæ etsi adessent, vix tamen Cassensium illud privilegium ætate antecederent. Legi autem complurium urbium Hungariæ antiqua privilegia, quæ adeo inter se consonant omnia, ut compendii causa in multis ad libertates tantum urbium illarum vetustarum, nimirum Civium de Buda vel de Cassa & sic porro, fiat provocatio; utpote quarum jura & prærogativæ jam longissimo usu erant cognitæ probatæque, & ad quarum unam oppidum privilegiis urbanis exornandum proxime situm erat. In eo vero etiam Hungariæ urbes antiquitus consensisse videntur, quod, exemplo urbium Germaniæ *d*), sigillis suis aut divos tutelares, aut turres & castella insculperint, aut in iisdem insignia Regum

Regum Hungariæ, secutæ fuerint. Vetus urbis Bartphæ sigillum (ita in MSS. P. KAPRINAI notatum inveni) S. Ægidium refert; Cassoviæ S. Elisabetham; Eperiesini ceræ veteres S. Nicolaum habent; Sebenicum S. Michaellem. Turres porro & castella urbium munitarum cum olim, tum nostro etiam ævo, saltem plerarumque, commune efficiunt symbolum. *Buda, Pesthum, Strigonium, Posonium, Sopronium, Comaromium* cet. mœnia cum porta patente, catractisque pendulis, in ceris suis exhibent. Lilia Regum e domo Andegavensi, a quibus scilicet privilegia sua impetrasse præsumuntur, *Cassovia, Crennecium, & Libet Bánya* adhuc dum retinent. Urbes *Leutschovia & Szakolcza*, cruce regni patriarchali gaudent; *Buda* vero, *Neosolum & Crennecium* octonas adhuc ostentant in sigillis fascias. *Quinqueecclesiæ, Eperiesinum, Bela-Bánya*, cet. in sigillorum suorum imaginibus, ad nomen suum alludunt; neque in aliis regnis, in civitatum clypeis, quidquam est frequentius, quam figuræ paranomasticæ. Plerisque omnibus istis, Dalmatiæ urbes vetustiores aliquanto sunt; quid mirum igitur, si res diplomatica illarum universa & sigilla quoque aliquanto antiquiora sint? e).

a) J. C. EDER *Comment. de initiis juribusque Saxonum Transilv.* p. 145. 190.

b) *Terra* certe *Scepusiensis*, — cujus a Comitatu ejusdem nominis discrimen, GODOFR. SCWARZ in *Floribus sparsis ad Tabulas pignori reliçarum XIII. Civitatum Terræ Scepi. Rintelii* 1765. 4. p. 19. & seqq. docuit: — jam anno 1280. proprio sigillo, quod sine dubio multo prius acceperat, gavisus est. In literis enim hoc anno per Eliam Comitem, & Consules, ceterosque Saxones & Latinos de provincia Scepusiensi editis, hic legitur epilogus: *præsentes decre-*

decrevimus literas, in perpetuam confirmationem, sigilli terræ communis munimine, roborare. — Conf. §. 131. & WAGNERI *Analekta* P. I. p. 265.

- c) Armalium literarum hoc in Hung. primum exemplar est, quod §. 144. jam commemorari a me debuisset, si familiæ alicui nobili, non item civitati in complexu datum esset. Lustravi ego ante hos annos aliquot Archivum urbis in Hungaria superiore principis, diplomatum bene dives, (neque enim inter omnes Hungariæ Urbes ullius memini, quæ tot tantisque Regum laudibus & privilegiis exculpta esset, quam est Cassovia) nec incommodè digestum. Ladislai Cumani Regis literæ, omnium quas ibidem vidi fuerunt antiquissimæ.
- d) HEINECCIUS l. c. p. 138. 41.
- e) Vid. fœdus pacis, quod anno 1221. Spalatini cum Sebenicensibus iniverunt, ni JO. LUCII *Memorie istoriche* p. 51.

§. 147.

Sigilla civi-
um & plebe-
jorum.

Jure Hungarico (*Tripart.* P. I. Tit. 6.) solus sigilli & armorum seu insignium usus, neminem quemquam nobilitat. Sine dubio legi huicce occasionem facere debuit, frequens sigillorum usus, qui ætate Wladislai II. atque adeo sæc. XV. inter cives & plebejos in Hungaria invaluit. Neque in aliis regnis, jus sigilli inter nobilitares prærogativas censetur; ex quo sæculis XIV. & XV. ignobiles, & infirmæ etiam fortis homines, sigilla sibi sumserunt a). Figuræ, quæ istis incidebantur, fuerunt arbitrariæ, ut plurimum artis b), vel opificii c), quod aliquis tractabat symbola.

a) *N. Lehrg. der Diplomatie*, Tom. VI. §. 145 — 48.

b) In sigillo PETRI BONA Archiatri Henrici VII. Imperatoris, effigies medici exhibetur umbilicotenus, qui dextra manu comprehensam matellam respicit, capiti vero aquilam imperialem expansis alis gestat impositam. *N. L. G. der Dipl.* Tom. VI. §. 148.

c) Lite-

e) Literas emtionis & venditionis duplices aliquando coram me habui (benevole mihi illas suppeditante Adm. Rev. P. JOSEPHO JAKOSSICH, scrutatore antiquitatum omnis ævi perito non minus quam indefesso) lingua germanica adornatas, quarum aliæ anni 1403. editionis locum nullum habuerunt, aliæ vero anno 1433. Posonio datæ erant. De utrisque sigilla pendebant civitum Posoniensium, impressa ceris, quarum superficies erat coloris viridis, reliquum lutei. Ex illis, quæ 1433. confectæ sunt, sequentem accepi formulam, „und der sache sint ge-
 „tzeugen, durch meiner fleissigen pet willen, die
 „erbern und weisen Manner, Caspar Ventur ge-
 „sworner purger, und Peter Praitendorffer mitpur-
 „ger der Stat zu Prespur, mit ihren anhangenden
 „Insigelln, in und iren erben an schaden, der geben
 „ist zu Prespur am Samptztag noch Ostern.“ &c. Sigillum, quod Tabula exhibet, ad vitæ genus al-
 ludit, cui is, ad quem pertinebat, deditus fuerat,
 & quod ex falce duplici putatoria juxta se posita,
 sine opera quisque colliget. Epigraphe adjecta
 habet: S. Peter Praitendorffer.

Tab. V.
Fig. 11.

Tantum de Sig. *civilibus*; sequuntur *ecclesiastica*.

§. 148.

Literas Pontificum Romanorum, materiam-
 que sigillorum quibus munitæ sunt, jam supra
 attigi; hic mihi eorundem sigillorum variatio-
 nes & epochæ, summatim attamen nonnisi in-
 dicandæ sunt. Celebrantur autem duo illorum
 genera, quæ aliquatenus nosse, studiosi rei
 diplomaticæ Hungariæ interest.

I. *Bullæ Pontificum*, cum magis solemnes
 (*Bullæ consistoriales*), tum minus solemnes
 etiam seu minores (*Brevia*), quibus demum
 sæculo XV. annulus piscatoris in cera expressus
 substitutus est. Utriusque generis bullæ quoad
 inscriptiones reales literalesque, quæ in illis
 leguntur, quatuor distinguuntur epochis.

I.) An-

1.) Antiquissimis bullis Pontificum ad Leonem fere IX. sæculi XI. Pontificem, (in re diplomatica Pontificum Rom. ob multa, quæ in eadem innovaverat, inprimis memorabilem) in parte antica Pontificis illius nomen, de cujus literis pendent; in postica vero solum *Papæ* vocabulum inscripta observantur. Paulus equidem I. († 767.) primus etiam fuit; qui protomas Apostolorum Petri & Pauli bullis intulit, attamen ad Leonem IX. successorum nullus, eundem hac in re imitatus est.

2.) A Leone IX. usque ad Urbanum II. i. e. ab anno 1049 — 1087. bullarum inscriptiones utriusque generis variant. Superest diploma Leonis IX. an. MXLIX. editum, cui appensa est bulla plumbea, in altera parte sistens BB. AA. Petri & Pauli capita limbis circumdata, & crucis longioris signo separata, cum literis superimpositis S. PA. S. PE. in altera vero inscriptionem habens: LEO PP. Ejusdem Pontificis iterum bulla alia, anni MLII. more prisco, in adversa parte exprimit nomen LEONIS cum nota numerali VIII. averſa autem refert PAPAE titulum; in utraque tandem parte, omnes & singulæ literæ, liliorum floribus distinctæ sunt. Neutra harum bullas inscribendi ratio; perpetuo successoribus placuit. Qui enim Leonem secutus est Victor II. in plumbi parte altera impressit, aut suam, aut, ut MABILLONIO videtur, S. Petri imaginem umbilicatenus, ita ut sinistram extendat prehensurus clavem a manu e nubibus porrectam; cum epigraphæ: *Tu pro me navem liquisti suscipe clavem*: in altera vero exſtare voluit portam, & mœnia urbis Romæ, in cujus apice, AUREA
(i. e.

(i. e. princeps, præcipua) in limine vero, ROMA, scriptum est, cum epigraphe: VICTORIS PP. II. Ab hac, quam nunc descripsi, Bullæ Nicolai II. & Alexandri II. verbis duntaxat partis adversæ differunt. In illius namque bullis scripturæ sacræ dictum legitur: *Tibi Petre dabo claves regni coelorum*; in hujus vero versus: *Quod nectis nectam, quod solvis Petre resolvam*, expressus est.

3.) Ab Urbano II. usque ad Clementem VI. (an. 1087 — 1342.) bullæ in adversa parte exhibent protomas Apostolorum Petri & Pauli, cruce longiori separatas; cum superscripto lemmate S. PA. S. PE. in averfa autem solum Pontificis nomen, ac titulum Papæ (PP.) cum nota numerali habent.

Tab. V.

Fig. 12.

4.) A Clemente demum VI. seu ab anno 1342. Bullæ eodem quidem modo, quo prius inscriptæ sunt, at insignibus nonnunquam Pontificum gentilitiis conspicuæ. Sed neque hoc prætermittendum esse ratus sum, siglas nominibus Apostolorum significandis, quæ prius linea recta jacebant, a Sixto inde

IV. pendere sibi impositas $\begin{pmatrix} SS \\ PP \\ AE \end{pmatrix}$ vocalibus A.

& E. sub Clemente XI. subinde penitus omissis.

II. *Annulus Piscatoris* Brevibus, supposita cera rubra, quam membranula cordiformi cooperiunt, & quam filum crassius superne ambit, in medio circiter extremi marginis, quem Heraldici sinistrum dicunt, tergo apprimitur. Adest in eo sola PETRI effigies piscantis habitu, cum nomine & titulo regnantis PAPAE in perigraphæ. Clemens IV. (inauguratus 25. Febr. 1265.)

illo in suis secretis, quas e. c. ad consanguineos dabat, quasque subinde emblemate suo gentilitio Pontifices obsignarunt adhucque obsignant, usus est, qui sæculo XV. in locum *bullarum minorum* successit, brevibusque addicæpt pontificiis. (*N. Lehrgebäude der Dipl.* T. VI. §. 180.) In Archivis caduci hujus sigilli rara exempla sunt, parumque si quæ adsint perspicua. Cum etiam æri incisus annulus piscatorius admodum raro sit obviu8, eundem accuratissime adumbratum, in fronte hujus libri lectorum oculis subjicere volui. Est autem exemplum hoc desumptum e prototypo, quod brevi adhæret Pontificis PII VI. ad Primatem Regni Hung. JOSEPHUM Com. BATHYANI († 1799.) „ datum Romæ apud S. Petrum sub annulo „ Piscatoris die 17. Januarii MDCCXCV. Pontificatus nostri anno vigesimo. “ Solet iste annulus Pontifici recens inaugurato offerri, a Senatu populoque romano, non modico æstimatus pretio. Mortuo vero Pontifice, eum in minutissima frustra confringunt, ac penitus abolent. Idem cum bullæ parte altera fieri, cui nomen Pontificis vita defuncti inscriptum fuerat, jam observatum est.

*) Cur in bullis Pontificum Pauli imago ad dextram, & Petri ad sinistram collocata sit, auctores, pro diversitate confessionis cui addicti sunt, varie interpretantur. Cf. MABILLON. l. c. p. 130. & HEINECCIUS l. c. p. 145.

**) Fallitur, qui Brevia a brevitate ita dicta esse putat. Longitudine enim sua sæpe bullas superant, longissimis saltem nihilo breviora sunt. Præter sigilla, temporis notatio, & aliæ quædam adhuc solennes sunt formulæ, quibus utræque literarum species a se invicem differunt.

***) *Bullæ motus proprii*, a sæc. XVI. inde non infrequentes, sigillis prorsus carent, quibus signatura, Pontificis manu, interdum in fronte, sæpissime in calce literarum facta, formulaque voluntatis declaratoria constans, e. c. *placet, motu proprio, & ita mandamus; fiat ut petitur; fiat motu proprio; placet & ita mandamus*, cet. sufficit. Vidi hujusmodi bullam Clementis VII. omni temporis nota destitutam, quam bullæ hujusmodi mox cum bullis proprie talibus communem habent, mox vero prorsus omittunt.

§. 149.

Episcopos & Archiepiscopos Hungariæ sæc. Sigilla Archi-
 XI. & XII. suis fuisse gavisos sigillis, caret du-
 bio. (§. 102. not. c.) Fuerint illa initio annularia & Episcoporum
 tantum, donec Episcopi, ad imitationem Regum, rum Hunga-
 illorum areis suas quoque intulerunt imagines, tæ.
 dignitatis suæ sacræ symbolis, mitra, pedo, inter-
 dum etiam Evangelii libro decoratas. Sigilla hu-
 jusmodi, *pontificalia* in diplomatibus passim appel-
 lantur a), quod annularia etiam seu minora,
 præter majora ista, Episcopis nunquam non
 in usu fuerint. Vulgaris illorum forma para-
 bolica est, utrinque cuspidata; quæ, cum Epi-
 scopi in illis stantes ut plurimum, (rarius se-
 dentes) manu dextra ad benedicendum subla-
 ta exhibeantur, orbiculari specie omnino aptior
 videri debuit. Exeunte tandem sæc. XIV. magis
 autem sæc. XV. decurrente, disparuerunt e sigillis
 Episcoporum imagines, occupantibus harum lo-
 cum, modo sanctis Ecclesiæ cathedralis patronis,
 subjectis Episcopi insignibus gentilitiis; modo
 solis tesseris nobilitaribus, ita tamen, ut, quemad-
 modum alibi, ita etiam in Hungaria, causa disci-
 minis, dignitatis sacræ insignia (*discernacula*
 O 2
 Heral.

Heraldi vocant) scuto adjuncta sint *b*). Contrafigilla Episcoporum Hung. nulla vidi.

a) In literis Joannis Archiepiscopi Strig. 1418. hanc observavi formulam sphragisticam: „præsentes „concessimus, *annularis* sigilli nostri, quo de præsente propter *pontificalis* carentiam utimur.“ Item in literis foundationis Præposituræ B. M. V. in Ecclesia Agriensi, Petri de Rozgón Episcopi Agriensis anni 1430. „in cuius rei memoriam — — li „teras nostras privilegialiter confectas, propter „*carentiam sigilli nostri pontificalis*, nostro *annulari*, „& fratrum nostrorum de Capitulo sigillis, fecimus impendenti communiri.“

b) Exempla sigillorum episcopalium Hung. in II. cc. §. 120. Not. * incisa æri intueberis.

§. 150.

Sigilla Capitulorum Hungaricæ.

Vetustius sigillum capitulare Hungaricum nullum mihi adhuc occurrit illo, quod PÉTER-FI in fronte l. c. exhibuit, literis anni 1121. idem adtribuens. Sæculo ergo saltem XII. Capitula Hung. sigilla sibi jam habuerunt propria, eaque, quod diplomatum testimonio certum est *a*), publica fide digna, atque authentica. Voluit autem in plerorumque Capitulorum sigillis, sanctos illorum tutelares exprimi pia antiquitas, inprimis B. V. Mariam. Sigillum majus Archicapituli Strigonienfis, (nam minora etiam Capitulorum sigilla occurrunt,) Regem stantem sistit, cujus capiti Archiepiscopus S. diadema defert. Cæræ Capituli Zagrabienfis, fundatoris augustam referunt effigiem. Ecclesia collegiata Posonienfis, olim a S. Salvatore dicta, (nunc S. Martino sacra) insigne gerit, in quo Salvatoris mundi imago, super apices templi, geminas inter tures posita, atque benedictionem spargens est conspicua. In

ceris

Tab. V.
Fig. I.

ceris Capituli Ecclesiæ Scepusiensis S. Martino dicata, equo fertur sanctus Turonensium Præsul, Pannonia ortus, partemque chlamydis stipem roganti ense refecat. Ante faciem stella. Inscriptio circumposita habet: *S. Capituli Ecclesiæ B. Martini de Scepus*. Longum esset hic omnium sigillorum capitularium historiam, e codice Legum & Regum privilegiis contexere; icones plerorumque omnium libri §. 120. recensiti exhibent.

- a) In literis Capituli Quinqueecclesiensis autographis anni 1191. (SPIESS *Archiv. Nebenarbeiten* P. I. p. 142.) divisio patrimonii exponitur inter Comitem Butk & Julam filios Simonis de Guklos (Suklos); cui Petrum Canonicum rogatum interfuisse narrant, cujusque de re transacta, post suum ad Capitulum reditum, facta relatio, literis inscribebatur, roboratis *sigilli capitularis munimine*.

§. 151.

Præter Ecclesias cathedrales & collegiatas, ^{Sigilla Abbatum & Conventuum.} Conventibus adhuc non paucis (nec tamen omnibus) pars aliqua Archivi regni Nobilium, non ita pridem adhuc, apud nos erat concedita. Gaudebat ergo etiam Conventus sacer hujusmodi sigillo authentico, sibi a Regibus concessa, quod ab illo, quo Præpositi & Abbates (addi possunt etiam Abbatissæ) utebantur, diversum fuerat. In Conventuum sigillis plerumque divitulares, vel ædificia ecclesiarum expressa sunt. Sigillum Conventus S. Adriani de Szala igitur S. Adrianum, Conventus S. Crucis Lelesziensis, patriarchalem crucem præferebat. In Abbatum ceris, ad instar episcopalium parabolicis, plerumque istorum effigies expressæ sunt, ad sacra faciendâ, vel ad benedictionem spargendam,

compositæ. Exemplum, cujus prototypum in cera viridi luteæ superfusa expressum, a charta quam muniverat jam avulsum, coram me habeo, & quod hic sequitur, e CAR. PÉTERFI. (qui illi annum 1264. assignavit) *Conciliis Regni Hung.* P. I. pag. 192. huc tralatum est.



*) In eſtypo hoc, quod PÉTERFI fieri olim curavit, imago diligenter, negligentius literarum characteres expreſſi ſunt. In cera ipſa DIZLAI. ABBIS. RTINI. SAC. MONT. PAN IE diſerte legitur.

**) Ordinibus ſacris PP. Benediſtinorum, Præmonſtratenſium & Ciſterciarum per Joſephum II. ſublatis, dum hæc autem deſcriberentur, pietate & clementia FRANCISCI Regis (Decreto d. 30. Martii 1802. Nro. 7716.) in integrum reſtitutis, ſine dubio juſ ſigilli authenticici etiam, quo antea plerique illorum Convēntus ſacri gaviſi erant, reſtituetur iterum.

CAPUT V.

DE INSTITUTO ET SIGNIS NOTARIORUM
ÆVI INFERIORIS.

§. 152.

De signis calamo factis Notariorum seu ^{Signa Nota-}
Cancellariorum ævi antiquioris, quibus in cal- ^{riorum vere-}
ce instrumentorum subscriptionem nominum ^{tum.}
suorum terminabant, explicatu, ob notas tiro-
nicas quibus perplexa sunt, sæpe longe difficil-
limis, quorum usus in Gallia & Germania an-
tiquissimus, sæc. X. inconstans esse cœpit *a*);
in Hungaria vero Regum Notariis, quo nomi-
ne Cancellarii & Vice-Cancellarii aliquando
intelligebantur, nunquam placuit, non arbitra-
bar hic loci longius differendum esse. *Recen-*
tiorum potius *Notariorum* ratio & institutum
paucis declaranda sunt, quod isti etiam in
Hungaria aliquando non fuerint incogniti.

- a*) De Notariorum ævi veteris signis, quæ *recognitionis*
appellant, consule CHR. GATTERERI *Elementa A.*
D. p. 149. & *seqq.*

§. 153.

Sunt vero instituta Notariorum ævi infe- ^{De Notariis}
rioris, e sæc. XII. & XIII. repetenda: quo ^{ævi inferio-}
quidem tempore, opinione sæculi, Pontifex ^{ris.}
Romanus cum Romanorum Imperatore divisum
habebant orbis imperium; neque alia inter Im-
peratorem & Reges reliquos statuebatur ratio,
quam illa fuit, quæ inter Pontificem Romanum,
& reliquos orbis christiani Prælatos intercesse-
rat. Pro potestate hac adeo late patente, Pon-
tifices & Imperatores Rom. *Notarios* etiam *publi-*

cos creabant, quibus in illis, quæ sensibus suis se percepisse testabantur, publica fides tribuebatur, inter omnes fere christianos populos, donec invalescente Regum christianorum auctoritate, usus Notariorum hujusmodi, ab aliis penitus abolitus, ab aliis saltem circumscriptus est. In Anglia Eduardus II. an. 1320. Notariorum cæsareorum usum prohibuit, dominioque mundi intercessit cæsareo *a*): in Gallia eadem consuetudo, singulari Caroli VIII. Regis edicto an. 1490. abrogata est. In Hungariam tandem, quamvis hoc genus hominum jam sæc. XIII. immigraverit, *Notarii que auctoritate apostolica, vel sacra & imperiali* simul creati, præcipue sub Regibus ex Italia in Hungariam traductis, sub Sigismundo vero Imperatore & Rege, ejusque successoribus, sola *imperiali* ut plurimum *auctoritate* constituti, in instrumentis domesticis compareant *b*): non tamen vel numero suo graves, vel agendi ratione sibi solemnī Hungaris multum molesti esse debuerunt; cum tabellionum istorum in *WERBOECZII Jure tripartito* nulla exstet memoria, nec Regum Decreta illos commemorent, nisi verba Decr. Sigism. 2. art. 3. (an. 1405.) illis applicemus „ de-
 „ crevimus insuper, quod nullus publicus No-
 „ tarius, in causis, quæ inter duos laicos ver-
 „ tuntur, sive coram judice ecclesiastico, sive
 „ seculari procurare audeat, vel ullatenus ad-
 „ vocare; sed tantum in foro spirituali, seu
 „ vicariorum curiis locum habeat. “ Sine du-
 bio auctoritas *locorum credibilium* in Hungaria,
 nec non *Notariorum personalis præsentia regiae c*),
 quos hodie *juratos Tabulæ regiae judicariæ No-*
tarios appellamus, incremento illius instituti
 per-

permultum obstitit: quod a Maximiliano I. anno 1512. in ordinem redactum *d*), quamvis adhuc usque, in Germania præcipue, tandem in Italia supersit, arctis attamen limitibus auctoritas ejus ubique circumsepta est *e*). Immo quod multi in ordinem istum, potissimum per Comites Palatinos, tum Curia Romanæ tum S. R. Imperii, adlecti fuerint, quos procul abinde esse oportuisset *f*), non potuit non fieri, quin Notariorum istorum nomen & institutum vilescerent passim, atque tantum non in contemptum abirent.

a) ST. PÜTTER *Specimen juris publici medi ævi*. Göttingæ 1784. p. 88.

b) Elenchum illorum e libris impressis congerere nuper incepit Cl. MICH. SZVORÉNYI in *Historia eccles. Regni Hung. amœnitatibus*. Fasc. I. Jaurini 1795. 8. p. 49. *seqq.*

c) Ita passim appellantur in literis ævi veteris, *e. g.* Matthiæ Corvini 1479. ad Capitulum Nitriense datis.

d) KAISER MAXIMIL. I. *Ordnung zu Unterrichtung der offenen Notarien — zu Cölln aufgericht anno 1512.* Constitutio ista Cæsarea sæpe typis vulgata, iterum repetita exstat in opere: *Anweisung zur Abfassung rechtlicher Aufsätze I. Theil*. Leipzig 1786. 8. p. 72. & *seqq.*

e) Edicto Josephi II. d. 1. Jan. 1782. auctoritas Notariorum apostolicorum & Protonotariorum in provinciis Monarchiæ Austr. sublata est.

f) WOLFG. LAZIUS († 1565.) in *Comment. reip. rom.* Lib. XII. Sect. I. cap. 5. suo tempore lapidas ac pannorum tonfores, homines illiteratos, Notarios fuisse creatos acerbe questus est. Potest enim Notariatus apostolicus dari quibuscunque, etiam non nobilibus, non graduatis, neque constitutis in aliqua dignitate; contra *Protonotariatus apostolicus* non confertur cuiquam, nisi sit nobilis, aut graduatus in aliqua scientia, aut constitutus in dignitate aliqua ecclesiastica. Taxa hujus in Curia Rom. sunt 24. scuta, illius 14. & 50. Bajoci. Conf. LA CROIX *Theol. mor.* Lib. VI. P. III. Nro. 931.

§. 154.

Signa Notari-
orum recenti-
orum.

Firmabant recentiores isti Notarii, rejecto plerumque omni alio sigillo, solo *signeto*, ut vocant, *Notariatus*, instrumenta quævis publica. Signetum exprimebant vel typario atramento tincto, vel calamo seu penna. Præter nomen suum, quod in areola inscribebant, quæ signeto (cujus figura arbitraria fuit) ad id vacua plerumque subjecta est, sententiæ etiam interdum inscriptæ observantur, e. c. *Super omnia virtus; pace quid est melius; semper fertilis*, & harum similes, quæ sæpe numero ad emblemata alludunt, cui subscriptæ sunt. Vid. GOEBEL de *Notariis*, in BARINGII *Clave dipl.* p. 197. Antiquissimum Notariatus signetum, quod quidem vulgatum adhuc usque est, illud anni 1236. esse perhibent, quod apud MURATORIUM in *Antiquit. Ital.* Tom. VI. p. 9. & 12. delineatum est. Hoc ego aliquanto vidi vetustius, in JO. LUCII *Memorie istoriche* &c. Lib. III. p. 66. quo loco auctor epilogum instrumenti anno 1206. confecti, una cum signeto, exhibet. Tenor subscriptionis est: „ & ego Magister Tre- „ guanus adhuc Tragurii Notarius, prædictæ „ venditioni testimonium perhibui, & rogante „ memorata D. Cath. præsens instrumentum „ scripsi, & *consueti signi* munimine roboravi.“ Signetum rude, clavæ figuram referens, in tabula intueberis. Aliud, quod itidem in Tabula subjicio Notariatus signetum, prius æri vel ligno incisum, deinde expressum in chartæ frustulo singulari, instrumento anni 1671. agglutinatum est. Sententiam includit: *per spinas ad rosas*, ejusdemque Notarii (Joannis Caroli de

Tab. V.
Fig. 13.

Tab. V.
Fig. 14.

de Giorgio, utriusque juris Doct. Notarii publici Cæsarei) sigillum cereum adjunctum sibi adhuc habet.

CAPUT VI.

SYMBOLICA DIPLOMATICA.

§. 155.

Prisca ætas rituum & signorum solemnium inprimis amans erat, quorum copia nunquam non occurrit inter homines rudes simplicesque, qui agere, resque effectui dare, quam loqui scribereque malunt *a*). Etiam antiquitas romana rituum & signorum hujusmodi, a majoribus acceptorum, bene dives fuit; inter quæ, ut de nobis loquar, annulum pronubum, claves urbium captarum victori oblatas, doctorum pileos, & alia retuleris. Similia, sed numero multo majore, mirifice placuerunt ævo quoque intermedio, quod quidem, ut unum ceremoniarum genus, quod debeo, commemorem, in rerum qualiumcunque possessionem admittebat neminem, nisi id factum esset cum ritibus solemnibus, adhibitis symbolis, seu imaginibus, quæ cum re vendita, donata cet. cognationis aliquid haberent. Hoc *investire* dicebant; signa vero dominium adeunti reddita, *Investituræ* vocabant *Symbola*. Investiebant autem, ut aliqua exempla adferam, per *alapam*, per *annulum*, per *annulum* & *baculum*, per *cespitem*, per *coronam*, per *osculum*, per *librum*, per *calicem* & *patinam*, per *stipulas*, per *pilos barbæ*, per *chirothecam*, cet. *b*) Symbolorum deinde alia diplomatibus assuebantur: ut *stipulæ* & *chirothecæ*,

Origo & notio symbolorum investituræ.

thecæ, nec non pili barbæ, qui ceris interdum immixti sunt, annulique, quos literis, quibus Ecclesiæ dos constituebatur, appendere passim moris erat c); alia in templis custodienda deponebantur; pleraque temporum edacitas, & hominum incuria perdidit.

- a) Ratio subscribendi superius declarata, iurijurandi, & quod inde consequens erat perjuriorum frequentia, certamina singularia seu duella, testium deinde multitudo, & ipsa rerum traditarum symbola, confectaria erant ignorantie literarum, morisque prisci, contrahendi sine literarum testimoniis, (notitiis) qui apud Gallos in donationibus privatorum ad sæc. usque XII. vixit. *N. Lehrgeb. der Diplomantik*, Tom. III. §. 113-14. Tom. VI. §. 726. MABILLON l. c. p. 232.
- b) DUFRESNE *Glossarium med. latinitatis voc. investiturae* conf. *N. Lehrgeb. der Diplom.* VI. §. 739-52.
- c) *N. Lehrgeb. der Dipl.* Tom. VIII. §. 139.

§. 156.

Investituræ
Symbola in
Hungaria.

In Hungaria, Regni Corona constanter, pro Symbolo traditæ acceptæque dignitatis regiæ fuit habita. Vexilla, quæ Regi inaugurando inter solemnia coronationis præferuntur, provincias ad Regnum Hungariæ pertinentes adumbrare, notum est. Investiebant porro olim Reges nostri, exemplo Regum antiquorum Germaniæ, Episcopos annulo & pedo; Episcopi vero Præpositos, mox per immisionem annuli, mox, quod Parochis fere proprium erat, per impositionem bireti. Sed hæc, quamvis ad intelligentiam diplomatum omnino pertineant, Diplomaticam tamen vix propius attinent, quam iudicium ferri candentis, monomachiae, & quæ universe verbo barbaro *ordalia* dicta sunt. Neque ergo de solemnibus Symbolis, quibus hodie-

diedum Comes Saxonum Transilvanorum in provinciam introducit. a), quidquam commemorare lubet, caputque hocce, quod leviter duntaxat attingendum erat, absolvo ingenua confessione, quod Symbola chartis sive adfuta, sive quomodocunque adjecta, nulla unquam repererim.

a) SCHLOEZER'S *Krit. Sammlungen zur Geschichte der Deutschen in Siebenbürgen III. Stück. S. 574. 75.*

Etiam Matthias Rex in dipl. an. 1465. Emericum Zápolya in perpetuum terræ Scepusiensis Comitem se creavisse dicit: „observatis illis omnibus ceremoniis, quæ in talibus observandæ sunt.“

DIPLOMATICÆ

PARS III.

FORMULARIA

RHETORICA DIPLOMATICA.

§. 157.

Ad ultimam transeo Diplomaticæ partem, Uti Formula-
Formulariam seu Rhetoricam diplomaticam, quæ ria diploma-
 in diplomatum ævi medii argumentum inquit, tica.
 solemnes illorum formulas recenset & illustrat,
 dispositionemque & structuram eorundem re-
 solvit & explicat. Hæc demum illa pars est
 artis diplomaticæ, quæ ad mores & instituta
 vete-

veterum cognoscenda; ad jûris cum gentium positivi; quod mediô ævo vigebat, tum publici cujusque civitatis, nec non ecclesiastici, & municipalis præcepta eruderanda & illustranda; ad locupletandos annales, & delenda chronicorum commenta; ad detegenda principum familiarum præsepia, & describendum locorum (quorum nec vestigium nec vola sæpe superest) situm; ad delineandam provinciarum ævi veteris faciem; ad temporum denique rationes ineundas, examinandas, & rite inter se comparandas cet. quam plurimum conducit: atque adeo, reliquas Diplomaticæ partes utilitate sua longe superat. Pleraque, immo omnia diplomata controversa, e formulariæ legibus falsi & accusata & convicta sunt; sufficiente interdum una & singulari diplomatis sententia verbove, ad demonstrandos natales hujus spurios. Famossimum Lindaviensis cœnobii diploma, quod Ludovicum pium Imperatorem, auctorem sui mentitur, HERM. CONRINGIUS vir incomparabilis, atque Germaniæ doctæ aliquando decus, († 1681.) destitutus adhuc MABILLONII, BESSELII, Auctorumque novi operis diplomatici lucubrationibus, argumentis ex hac potissimum Diplomaticæ parte depromptis, & aggressus est, & suppositionis convict a). Exempla tabularum, (copiæ) quarum primam scripturam, vel quod interiit, vel quod sexcentis cancellis occlusa custoditur, frustra desideramus, formulariam Diplomaticæ partem solam, nunc vindicem expectant, nunc ultricem metuunt. — Ceterum nemo non videt, præcognita historica, inprimis juris & consuetudinum, quæ ævo illo obtinuerunt, necessaria artis diplomaticæ, non

scho-

scholis tantum sed & vitæ usuique accom-
modandæ, esse præsidia; quibus destituti
turpiter ignorent necesse est, ecquid tan-
dem e venerandis illis antiquitatis reliquiis,
sive Historia omnis, sive jus universum lucis
ac incrementi scenerari possint. Sed nec discrimen veri falsique in vetustis membranis videre
illi poterunt, quibus Historia lux veritatis deest,
jurisque veteris nulla prorsus inest cognitio.

a) Vel fama, notissima cuilibet esse debet, ingenio
& doctrina referatissima HERM. CONRINGII *Censura
diplomatis, quod Ludovico Imp. fert acceptum cæ-
nobium Lindaviense.* Helmstadii 1672. 4. recusa in
OO. ejus omnibus, Tomo II. Brunsvigæ 1750. fol.

§. 158.

Horum omnium perpetuo meminisse oportebit illum, qui vel difficultates aliquando
sentiet, quibus universe artis dipl. studium
laborat, vel qui in verbis præcipue & oratione rudis ævi, omnia illa cum tadio desiderabit, quæ aliquando in veteris Latii Auctoribus
cum voluptate legit, & exemplo omnium sæculorum admiratus est. Lingua ætatis mediæ, ut supra demonstravi, diplomatica, latina fuit, sed barbarismis, & solœcismis, quos Grammatici vocant, supra fidem inquinata. Exempla certe vocabulorum peregrinorum, & syntaxeos anomalæ, & flexionis sinistra, e chartis domesticis excerpta, quæ inferius collegi a), talia sunt, quæ ævum Ciceronum ignoravit, quorum autem in diplomatibus ea est frequentia, ut eis Glossaria integra, VOSSIUS, SPEELMANNUS, DUFRESNE, CARPENTIER, & alii cumulaverint b). Scilicet partim inopia lingue
latine

Oratio in di-
plom. inculta
& horrida.

latinæ ad res incognitas veteribus Romanis exprimendas; partim vero crassa illius ignorantia fieri debuit, ut populi, jure victoriæ in hodiernis Europæ regnis confidentes, gentis suæ vocabula latino canone & norma inflecterent copularentque c). Hinc ortæ sunt voces illæ, quas in exemplis descripsi, & quæ maxima parte sunt puræ putæ Hungaricæ, Germanicæ, Slavicæ. Repudiandum igitur esset diploma, ornatu haud opportuno, suoque sæculo haud conveniente indutum; (quamvis verum sit etiam rudi illo ævō monachum doctum præ indocto loqui scribereque potuisse minus barbare) etenim dubio caret, barbarismos & solæcismos pro veritate diplomatis ævi barbari seu intermedii, militare adeo, ut quo plures numero occurrunt, eo major fides instrumento (ceteris paribus) adhibenda sit. Scatent solæcismis bullæ adeo summorum Pontificum (MURATORI *Ant. Ital.* III. 130.) In foris Hungariæ autem, & passim etiam in vita communi, siquidem eadem lingua latina, quam scilicet Leges & diplomata ævi intermedii loquuntur (*Hussaren Latein* inepte & petulanter nonnullis dicta) ad præsens usque tempus in usu est; non certe oleum & operam ille perdidit, qui Grammaticam & Dictionarium dialecti istius, nobis adhucdum & diplomaticæ & vulgaris, adhibita industria, e fontibus domesticis & accommodatè ad rem diplomaticam Hungaricam, elucubrari non gravabitur d).

a) *Striga*, *argentum finum*, *birsagium*, *banderium*, *Jobagiones*, *cybriones* (Zuher), *Thana* sive *Thanya*, *Zuani Salis*, *Pisetum* ($\frac{1}{4}$ marcæ), *Spanatus* seu *Knezatus*, *Scultetia*, *Udvarnici*, *Timinus* seu *Tuminus*

nus salis, *Scaramantia* (*Scharmützel*) *bravium*, *marturina* & *submarturina*, *expressanter* (in specie), *bladum*, *quitta*, *pagare*, *trewga*, *Tavernicus*, *dicare*, *puscarius*, *regraciare* (beneficium rependere), *mercantiā*, *maniloquium* (conventus magistratus) *garleta tritici*, *Czottha de galea dependentes*, *Vajvoda*, *pausare*, *Rutheni pro custodibus*, *Drabantii* (pedites stipendiarii), *sinceriter*, *angaria*, *Kuruczones*, *Neoquistica*, *Patvaria*, *robota*, *valentia* (pro valore) *ferto*, *fatiga*, *avisare*, *incaminare*, *solemnifare*, *coramifare*, *invadiare*, *pigrigare*, *inimicari*, *boltha* (fornix), &c. &c. Bartphenfes 1491. *insurgere jussi sunt*, „cum bombardis duabus, ac *Hwffhni* „ *cza* 6. & *Tharacz* tribus, ac cum pulveribus ac „ lapidibus ad *præmissa ingenia* (tormenta) sufficien- „ tibus, item peditibus 200. bene expeditis “ — *Exempla solæcismorum sunt* : certa *pecuniarum summa valde sumus necessarii*; *adduxit nobis*, pro narrando retulit; *respondeat*, ut sciamus nos ad quid tenere; *familia optime stat* (bene valet); *a modo in* „ *antea*; si hæc (latifundia) adire non possent, „ *ex tunc nos*, *ex nunc prout ex tunc*, & *ex tunc* „ *prout ex nunc*, quasdam — possessiones decrevi- „ mus pignori obligandas; „ *pridem Comes Teme-* „ *siensis i. e. emeritus*; *rogamus Fidelitates vestras*, *eisdem nichilominus committimus*, *quatenus*. — *Litteræ illustreis quondam* (hoc ei axioma datum invenio) *Giskræ*, quæ copiosæ in archivis superioris, Hungariæ conservantur, pleræque omnes, ob monstra in verbis & dictionibus obscuræ, ad modum Epistolarum obscurorum virorum scriptæ sunt.

- b) Qui monumenta ævi intermediarii tractat, illisque intelligendis & explicandis studet, carere omnino non potest: *Glossario ad Scriptores mediæ & infimæ Latinitatis*, auctore CAR. DUFRESNE, domino DUCANGE, cujus ego editione illa usus sum, quæ locupletior, opera & studio Monachorum Ordinis S. Benedicti e Congr. S. Mauri, Basileæ 1762. III. Tomis, fol. prodiit. Ejusdem operis longe utilissimi, *Thesaurique encomio longe dignissimi Epitome*, (*Glossarium manuale mediæ & infimæ Latinitatis, ex magnis operibus CANGII, CARPENTARIi, aliorumque* —) Halæ 1772 — 84. VI. Voll. 8. expressa est.

c) Qui in vicissitudines linguarum, imprimis latinæ, inquit, cum voluptate & fructu leget relegendque prolixam CAROLI DUFRESNE præfationem ad Glossarium: *De causis corruptæ Latinitatis*.

d) Inter complura desideria diplomatica, quæ JO. HEUMANNUS (*de re dipl. Imperatorum*, in præfat. ad Tom. II.) exposuit, Idioticon hujusmodi gentilitium jure retuleris. DUFRESNE gentis ad quam ipse pertinuerat, primam & præcipuam rationem habuit.

§. 159.

Dispositio Di-
plomatatum.

Quotquot concipi possunt orationum genera, tot etiam diplomatatum possunt esse formæ, nisi quod *epistolaris* sit omnibus, quæ occurrunt, frequentior. Argumentum princeps seu thema, chartis omnibus (exceptis pariclis) singulare – & diversum inest: quæ ad hoc exornandum, & confirmandum congeruntur, pluribus, imprimis ævi æqualis, sunt communia. Cave enim existimes, Notarios seu Cancellarios novas omni quaque occasione operose excogitavisse atque elaboravisse formulas, quas potius cum in promptu, & præscriptas sibi haberent, argumento diplomatis dato accommodare, fuit facile a). Collectiones hujusmodi exemplorum seu formularum veterum, qualis e. c. est MARCULPHI, monachi sæculi VII. vulgarunt BIGNONIUS, SIRMONDUS, GARNERIUS, BALUZIUS, BOUQUETUS, alii. Conf. *N. Lehrgeb. der Diplomatik*. Tom. VI. §. 635. & seqq.

a) Indoles soli Arvensis cuilibet aliunde nota est. Hujus castrum cum universis oppidis & possessionibus, Rudolphus II. Georgio Thurzo pro fidelibus servitiis & 25216. Flor. & 25. Denar. summa, anno 1595. denuo inscripsit, seu contulit, „ cum cun- „ dis utilitatibus & pertinentiis, nimirum terris „ arabilibus, cultis & incultis, agris, pratis, „ pascuis,

„ pascuis, campis, fœnetis, silvis, nemoribus, vallibus, vineis vinearumque promontoriis, & eorum locis, nec non teloniis “ *et.* Hoc, ad demonstrandam scribarum in describendis formulis perpetuis solertiam, credo sufficit. Ceterum ritum teneat qui potest, chartam Præpositi & Conventus Osterhovensis, stylo ligato, inter *Monumenta Boica* Tom. XII. p. 572. inspiciens:

In libro scriptum monstratur Machabeorum,
Quod pro defunctis sit res exorare salubris.
Quod bene Reinoldus vir prudens premeditatus, &c.
Ergo quod intacta maneant quæ sunt recitata,
Presentem cartam precepimus inde notatam
Ecclesiæ nostræ bulla, nostraque serata.

§. 160.

Qui *Syntagmata dictandi* ad nos transmissit auctor anonymus sæculi XI. vel XII. diplomatum imperialium & regionum sui temporis, ita depinxit habitum. a):

Forma Diplom. ex Syntagm. dictandi.

Præcepta, inquit, *vel mundi: burdia magnatum & sæcularium potestatum sunt solum.* Proprie autem Regum vel Principum præcepta, signum certum non habent in exordiis, sed quod facere scriptoribus collibuerit, vel crucem, vel chrismon, vel literam quamlibet circumdatam serpentibus in hunc modum — vel quodlibet aliud, quod voluerint. Solet autem prima linea præceptorum longis & æqualibus literis figurari, initium autem præceptorum huiusmodi est: In nomine sanctæ & individue Trinitatis. Henricus gratia Dei imperator Augustus. Post illum prologum inducitur quasi persona Imperatoris loquentis; reddentisque causam, qua inductus illud voluerit præceptum statuere, dicens: Regiæ dignitati competere, ut talium virorum, a quibus ipse rogatus est, non debeat contemnere preces, vel quam voluerit facere illius edenda

di præcepti, vel mundiburdii, justam causam insinuans. Post hæc, quod ipse, loco illi, vel homini, sua auctoritate concedat, vel roboret, erit illud subinferendum. In fine vero præcepti illud erit locandum, ut quicumque contra illius præcepti decretionem fecerit, mille auri optimi libras, vel quodlibet aliud pretium, quod instituerit Imperator se persoluturum cognoscat, medietatem Regiæ Cameræ, & medietatem loco, vel homini illi, cui illud præceptum conscribitur. Post hæc, quod Imperator propria manu subscripserit, & proprio sigillo sigillari jusserit, erit adjiciendum. Post completum præceptum, monogramma est ponendum, in quo nomen Imperatoris Augusti Dei Gratia habetur connexum, vel alia quælibet, quæ Imperatorem condeceant. Ex utraque autem monogrammati parte, longioribus & æqualibus literis scriptum erit: signum domini illius Imperatoris Serenissimi, vel Augusti, vel aliud quodlibet hujusmodi. Post monogramma prolixioribus & paribus literis scribitur: Heynricus, vel A. Cancellarius vice G. Vercellensis Episcopi recognovi istud factum. In ultima cartæ linea, quoto anno a Domini incarnatione, & quoto indictione, & quo Regni vel Imperii illius Imperatoris anno, & quo loco, literis erit communibus conscribendum.

- a) Vulgavit ex eodem fragmentum hoc cum aliis quibusdam MABILLONIUS l. c. p. 618. 19.

§. 161.

Formulariæ
Capita.

Ad diplomata Regni cujusque, ea, quæ ex anonymo auctore de structura illorum attuli, applicare haud erit difficile, dummodo generis tabularum, quod ille describit, & ætatis, qua illum vixisse est verisimile, memor fueris. Ut hæc-

hactenus vero, ita posthæc quoque diplomatum domesticorum præcipuam rationem habiturus, differam primum de *formulis exordii*, subinde de *formulis textus*, tandem de *formulis conclusionis*, seu *epilogi*.

*) *Formulæ solennes Styli, in Cancellaria Curiaque Regum, foris minoribus, et locis credibilibus authenticisque olim usitati, quas edidit MART. GE. KOVACHICH, Pestini 1799. 4. cum fructu hac Sectione artis diplomaticæ consuli poterunt. Congestæ illæ sunt ævo Ludovici I. & Matthiæ I. Hungariæ Regum, in lucem vero a V. Cl. protractæ, ad imitationem illorum, quorum nomina §. 159. celebravi.*

CAPUT I.

DE FORMULIS EXORDII.

§. 162.

Poetas & Oratores antiquitatis cum græ-^{Invocatio Dei,} cæ tum romanæ, carmina & orationes suas, seu ^{auspicii} invocationibus Deorum Dearumque, sæpe or-^{formulæ.} natissimis atque splendidissimis, fuisse exorsos, illi tantum ignorare possunt, quibus vel Homeri ingenium, & Lucretii doctrinam aliquando experiri, vel delicias degustare, quibus Georgica Virgilii diffuunt, non licuit esse tam felicibus. *Quod Deus bonum, felix, faustumque esse jubeat*, commune fere omnium orationum, quibus Livius suos historiarum libros distinxit & exornavit, est exordium, quos *cum bonis ominibus, votisque & precationibus Deorum Dearumque* auspicatus erat, *ut incoepto tanti operis successus prosperos darent.* Nec Hebræi quidquam sine solemnī precationis formula, in *Nomine Dei*, in *Nomine Dei creatoris*, & similibus ag-
gressi

gressi sunt, a quibus formula *in nomine* — hebraice sonans, ad Christianos derivata est. Omitto piæ hujus consuetudinis prioribus continuo post Chr. N. sæculis historiam, nec aliarum gentium tabulas commemoro, qui domesticis potissimum intentus sum. — In Hungaria a S. Stephano inde, ad sæculum XIII, seu Belam IV. diplomata regia plerumque, nec constanter tamen, auspicii formulas præmittunt: *In nomine Dei summi, vel supremi; in nomine Patris, & Filii, & Spiritus sancti; in nomine sanctæ & individuae Trinitatis; in nomine sanctæ, vel sanctissimæ, Trinitatis & individuae Unitatis cet. a*). Post sæculum XIII. in diplomatibus Regum nostrorum, invocatio Numinis divini, e more sæculi illius, omissa est, quæ in Tabulis SS. & OO. regni, (DOGIEL I. 38. 41. 54.) nec non Notariorum publicorum instrumentis, in testamentis item, & literis piarum præsertim foundationum, retenta fuit longius, passimque adhucusque retinetur. Communiter pacis & fœderum tabulis, quas reges & populi christiani inter se conficiunt, invocatio SS. Trinitatis ceu postliminii jure hodie præponitur *b*), quæ nuper admodum omitti cœpit iterum, in literis Romanorum Pontificum autem ævi mediî rarissime est adhibita *c*).

a) Conf. KOLLER, (*Hist. Episc. Q. E. P. I. p. 62. P. II. p. 119. 130.*) PRAY, & KATONA. Privilegium S. Ladislai (textus *Ladislauus* habet) præ ceteris BB. in S. Monte P. notarius hoc rythmo literis longioribus descripto, procurrente ad extremum usque marginem primæ lineæ auspiciatus est: *Divinum firmet Nomen quod scripsimus amen.*

b) WENCK *Corpus juris gentium recentissimi* Tom. I. Lipsi, 1782, Tom. III. 1795. — De MARTENS *Recueil*

- Recueil des principaux Traités — conclus par les Puissances de l' Europe, depuis 1761. Tome I. à Gottingue 1791. Tom. IV. & V. 1795. 8.
- c) *N. Lehrgeb. der Diplomatik*, T. VII. §. 518.

§. 163.

Altera prologi formula *Nomen & titulum* Nomen cum titulo. *Regis*, vel alius, cuius auctoritate instrumentum confectum erat, continet. Et ex frequenti quidem usu nominum *Stephani*, *Ladislai* & *Belæ*, (quod Hungari pro Adalberto habent), nec non *Elisabethæ*, haud quidem præpostere colligitur, quæ fuerit primorum, qui istis nominibus insigniti erant, apud successores & posteros, sitque ad præsens usque tempus, æstimatio, horumque erga illos pietas a). Observatur autem primis duobus Hungariæ sæculis, pronomen *Ego* nominibus Regum sæpius præmissum, ita ut Reges in reliquo etiam diplomatum contextu, singulari numero de se locuti sint b): quamquam exempla instrumentorum illius ævi non desint, in quorum exordio, ut postea sæpiissime factum esse constat, Reges pronomine utriusque numeri prorsus abstinere, atque in reliqua orationis serie, non singulari, sed multitudinis potius numero, de se ipsis verba faciunt c). Pronomen *Nos*, quod majestaticum nuncupamus, ante nomen titulumque Regis in literis Belæ IV. primum, sed rarius occurrit; cuius exemplum successores subinde imitati sunt, nec tamen omnes & perpetuo. In literis Episcoporum, Conventuum (c. c. *Nos Præpositus & Conventus*, vel si nullus esset Præpositus, *Nos Conventus*) & Communitatum maturius, quam in Regum præceptis reperiisse mihi illud videor, quorum ita loqui intererat, quod pla-

cita sua, cum consensu & consilio aliorum ederent. Quid si univérse hæc eadem origo est pluralis majestatici, etiam in Regum & principum privilegiis & literis?

- a) Bela II. & Geysa II. si apographis, quæ passim apud scriptores domesticos recentiores recensentur, fides habenda est, se primi, numero, ab antecessoribus suis regiis *eiusdem nominis* distinxerunt. In literis Belæ II. apud NIC. SCHMITTH (*Episcopi Agrienses* P. I. p. 63.) hic legitur introitus: „ In nomine S. Trinitatis, & individuae Unitatis, regnante Domino nostro Jesu Christo, anno autem gloriosissimæ incarnationis ejus millesimo, centesimo trigesimo octavo. — regnante vero serenissimo, & victoriosissimo Rege *Bela secundo, bonæ memoriæ Almi Ducis filio*, — idem Bela Rex piissimus cet. Ibidem p. 68. 69. „ In nomine — manifestum sit — quod ego *Geysa secundus, secundi Belæ Regis filius*, divina dispositione sceptrum paterni regni jure hereditario obtinens cet. & alibi: — quod ego *Geysa secundus*, Hungarorum Rex, *piissimi Belæ Regis filius* — quod (privilegium) nos *Bela tertius, secundi Geysæ Regis filius* diligentius intuentes cet. Si numerus nomini non esset adjectus, discriminis causa saltem patrem quo nati erant appellabant e. c. Steph. III. in literis anni 1166. apud KOLLER I. p. 213. post invocationem SS. Trinitatis — quod „ Ego Stephanus Dei gratia Hung. Dalm. Croat. Rameque Rex, *filius victoriosissimi Regis Geche (Geysæ)* — concessi, cet. In sigillis Regum nostrorum a Bela III. ad sæc. XIV. usque, (§. 125.) eorundem genesis multo diligentius, quam literarum introitu expressa est.
- b) Colomannus privilegium anno 1108. Traguriensibus concessum ita auspicatur: *Ego Colomannus Rex Ungarie, Croatie, atque Dalmatie juro super sanctam crucem*, — confirmans illud Stephanus II. ait: Et ego Stephanus Colomanni Regis filius, Rex Hungariæ — eandem libertatem, & pacem confirmo, & corroboro. — In literis anni 1143. *Ego Geysa Rex Hungarie* — juro — mihi quoque & meis successoribus — *Ego Stephanus* (IV.)

- (IV.) inspirante divina gratia — Vid. KERCH-
LICH in *Historia Ecclesiæ Zagrabienfis* p. 76.
- c) Privilegium Colomanni Regis Ecclesiæ Arbenſi an-
no MCXI. concessum, quod FARLATUS in *Illyrico*
sacro Tom. III. p. 1666. ex autographo descripsit,
Regis nomini præmissum pronomen *Ego* refert,
quamvis in contextu reliquo Colomannus in plurali
numero loqui maluerit. Utriusque pronominis
præpositione S. Stephanus, Andreas I. Bela III.
Emericus, Andreas II. & plerumque Bela etiam
IV. abstinent; in medio vero literarum ut pluri-
mum plurali numero sui mentionem faciunt.
- *) Plura reperiuntur Palatinorum, Judicum Curiz &c.
sæc. XIII. & XIV. literæ *anonymæ*, quæ nullo
nomine præmissa incipiunt: *Damus pro memoria*
cet. Sigillum scilicet, nominis & subscriptionis lo-
co erat.

§. 164.

Inter nomen regis & titulum, formula *Formula Dei*
interjacet *Dei gratia*. Ex oriente hæc in occi-
dentem transit, ubi inter Reges & principes,
Pipino, ut videtur, primum percommoda visa
est, ad speciem imperii honesti, quod iniqui-
tate partum erat, induendam. Hunc & sui
successores, & alii Reges atque Imperatores
secuti sunt; in chartis adhæc Episcoporum,
Præpositorum, Abbatum, & Abbatissarum, nec
non Comitum & Baronum, frequens formulæ,
a prima origine pietatis erga Deum indicis,
fit mentio. At enimvero, quod cultui divino
tributum erat ab initio, mature vanitati & ar-
rogantiæ hominum cessit; donec tandem sæcu-
lo XV. Majestatis, & dependentiæ a solo Deo,
existeret elogium. Quare quod alicubi in di-
plomate anni 1254. (pie vel arroganter? ne-
scio) scriptum legas: Johannes *Dei gratia* ad-
vocatus in Alſtede (ECKHARD I. c. p. 119.)
Carolus VII. & Ludovicus XI. Galliæ Reges,
digni-

dignitatis & majestatis suæ memores, diplomatibus & edictis Ducum Burgundiæ & Britannijæ inscribi passi non sunt. *N. Lehrgeb. der Dipl.* Tom. VI. §. 630.

§. 165.

Ufus ejus in
chartis Hung.

Hungariæ Reges diplomatibus suis, exemplo suo illis præeunte S. Stephano, *Dei gratiam* continuo præmiserunt, nisi quod vulgarem formulam, inprimis priorum sæculorum Reges, plerumque cum alia aliqua valente idem commutaverint, e. c. *Stephanus divina clementia*; *Andreas Dei annuente clementia*; *Geysa secundus divina gratia*, cet. — Episcopi Hungariæ ad nostra usque tempora, in suis tabulis *Dei gratiam* (miserationem divinam) colunt, quam formulam Prælati reliqui a sæc. XV. inde negligunt: Superfunt autem tales etiam Episcoporum Hung. præcipue e sæc. XIV. literæ sat magno numero, in quibus post Dei, Rom. Pontificis quoque gratiam collaudarunt, (*Dei & Apostolicæ Sedis gratia Episcopus*) inducti ad id, cum reliquis orbis catholici Prælatibus c. 2. de *Præbend. in 6.* ut proinde exemplo prorsus singulari, Stephanus circa an. 1227. Zagrab. Episcopus, *soliis Dei gratia* se talem in sigillo suo prædicaverit. (PÉTERFI in *Conc. R. Hung.* P. I. p. 168.) A regni Baronibus & Magnatibus multo rarius est adhibita formula *Dei gratiam* commemorans a), quod argumento fortassis esse posset, maturius quam vulgo putatur, prisco formulæ significato derelicto, eam cum formula, ad speciem pietatis plena, conjunctam fuisse potestatem, quam fere nobis cum eadem connectere, hodie solemne est.

- a) Exempla e paucis quæ suppetunt sunt: *Walferus Dei & prædicti Regis (Geysæ II.) gratia Comes in loco inhabitato Quyzin 1157.* — *Dionysius D. gratia Palatinus. 1228.* — *Andreas Dei gratia Comes Posoniensis; Paulus Dei gratia S. R. I. Princeps de Eszterházy.*

§. 166.

Formulam *Dei gratia* sequitur *Titulus*, qui Titulus in Regum Hungariæ literis continuo augebatur, crescente provinciarum ad S. Coronam pertinentium, vel aliunde acquisitarum numero. (§. 134.) Commemorantur autem stylo vetere *Reges Francorum & Ungarorum*, cum in diplomatibus tum annalibus illius temporis; quo Hungaria regni formam induit; Galliæque Reges exeunte non nisi jam sæc. XII. derelicto hominum, quibus regendis præerant, nomine, *Franciæ* quam *Francorum Reges* appellari voluerunt potius. Ad eundem modum S. Stephanus in diplomatibus, quæ e. c. Monasteriis S. Martini, Péchuaradiensi, S. Adriani de Szala, & S. Mauritii de Bakony Bél largitus est, se *Ungarorum Regem* appellat; in aliis vero e. c. Quinqueecclesiensi Episcopatu concessa, derelicta nomenclatione antiqua, haud scio an satis accommodata ad illud ævum, nisi id scribarum errore factum esse putemus, *Hungariæ Regem* sese nuncupat. Andreas I. *Pannoniorum Regis invicti* titulum sibi tribuit. Alternant *Rex (H) Ungarorum* cum *Rege (H) Ungariæ Croatiae Dalmatiæ* (Ramæque? a) in Colomanni regis privilegiis; nec post hujus ætatem *Regis (H) Ungarorum* titulus, testantibus id literis Regum sæc. XII. (e. c. Geysæ II. 1158. b) & XIII. (e. c. Stephani V. 1263. c) quamvis Hungariæ

gariæ nomen continuo frequentius jam occur-
rat, prorsus neglectus est.

- a) Rama inter titulos Colomanni semel duntaxat ex-
stat, in privilegio Ecclesiæ Spalatensi concessio 1103.
Scribarum oscitantia illam huc non irreplisse evi-
cit KATONA *Hist. crit.* Tom. III. p. 174. contra
LUCIUM & alios. Id mirum est, subinde exulasse
illam ad Belam usque II. e Regum Hung. titulis.
- b) KATONA l. c. Tom. III. p. 683.
- c) „ Stephanus D. gr. Rex Ungarorum junior, Dux
„ Transilvanus, Dominus Chomanorum “ KA-
TONA l. c. T. VI. 27. 374.

§. 167.

Titulorum

Regum Hung.

incrementum.

Bela cæcus (dipl. 1135. KATONA III. 493.)
Hungariæ, Croatiæ, Dalmatiæ, Ramiæque (i. e.
incrementum. Bosniæ a) regem se professus est. *Galaciæ*
(i. e. Galliciæ) regnum jam Belæ III. identi-
dem ab alijs in titulorum recensione attributum
est b); *Bulgariæ* (quam postea Stephanus V.
& Ladislaus IV. constantius Bela IVto retinue-
runt) & *Serviæ* (an. 1203.) in titulis Emerici
Regis prima leguntur vestigia; *Lodomeria* sub
Andrea II. (1206.) post *Serviam* (sive *Rasciam*)
& *Galliciam* in titulorum ordine collocata est.
Cumaniam Bela IV. addidit, etiam *Stiriæ* Du-
catus sub Bela IV. & Stephano V. provincia-
rum ad Hungariam pertinentium seriem ingres-
sus est. *Transilvania* Hungarorum & Hungariæ
Regis titulo in literis ævi medii contenta est.
A Matthia Corvino *Silesia* etiam cum *Lusatia*
inter provincias ad Coronam Regni Hungariæ
pertinentes, ac proinde etiam inter titulos re-
gios, relatæ sunt. *Sclavoniæ* vero Regni titulus
vix ante Ferd. I. reliquis intercalatus est c). —
Quæ tandem unione, ut loquuntur, *personali*
tan-

tantum Hungariæ regno vel olim junctæ erant, vel nunc conjunctæ sunt provinciæ, initio sæc. XIV. Arpadi hærede masculo nullo amplius superstitite, Principibusque exteris Hungariæ sceptrâ obtinentibus, titulis regiis inscribi cœptæ sunt. Carolus Robertus certe, in sexcentis quæ supersunt diplomatibus, enarratis omnibus priorum Hung. Regum titulis, hunc aliunde sibi proprium subjunxit: *Princeps Salernitanus & Honoris d) Mortis S. Angeli Dominus*. Eadem axiomata omnia etiam Ludovicus I. & Maria Regina retinuerunt, nisi quod ille in titulorum censu, aliquamdiu (1348 — 51.) continuo post Hungariam etiam regna *Hierusalem & Siciliae e)*, *Poloniae* vero regnum ab aditu illius 17. Nov. 1370. perpetuo commemoraverit. Longa titulorum Sigismundi Regis fuit series; varietatis ratio, ex historia Germaniæ & Bohemiæ repetenda est. *Austriæ* in Alberti Regis titulis fit prima mentio. Sub Ferdinando I. tandem, & hujus successoribus e domo Austriaca, numerus titulorum Regis Hungariæ, in eam excrevit magnitudinem, ut illos omnes, in chartis non nisi maxime solennibus repeti videas. Id ceterum quisque animadvertet, sublime Regni nomen & titulos, ætate intermedia sæpe attributos fuisse provinciis etiam minoribus, obnoxiiis jure clientelari majoribus regnis, & vere talibus; ut adeo nomine & stylo ævi medii duntaxat e. c. Normannia & Britannia minor regna fuerint. In Annalibus ejusdem ævi, Hispaniæ, Angliæ & Galliæ Reges, interdum *Imperatores* salutantur, quod scilicet pluribus regnis i. e. provinciis (Ducatibus, Comitatus) dominati sint, quarum comple-

plexus Hispaniam, Angliam, Galliam constituerat f). Fuiſſet ergo Ludovicus I. Rex Hungariæ, reſpectu iſto, *Imperatoris Hungariæ* titulo longe digniſſimus; ſed neque in *Regni Tranſilvaniæ* aut *Croatiæ* titulis amplius adhærebimus.

- a) „ Boznenſe regnum, quod & Ramam vocamus “
THUROCZ. *Chronica Hungaror.* P. IV. cap. LXV.
- b) FARLATI *Illyr. ſacr.* Tom. IV. p. 12. — LUCIUS
L. III. c. XII. conf. KATONA l. c. IV. 344. 370.
- c) In vulgaribus Corporis juris Hung. editionibus, rex
Wladislaus II. Decreto regni 1492. Sclavoniæ re-
gis titulum ſibi attribuit; unde Wlad. II. Sclavo-
niæ regnum titulis regiis intuliſſe fuit creditum.
Abeſt autem illa, loco diſto, in editione Decre-
torum R. H. principe anni 1584. Etiam in aliis,
quos eapropter in Bibliotheca Reg. Universitatis
Hung. conſului, codicibus MSS. nec non Decretis &
Diplomatibus Wladislai II. reliquis deſideratur illa
eadem; ut proinde Decreto illo, ad vindicandum
Wladislao II. Sclavoniæ Regis titulum, nemo jam
poſthæc uti poſſit amplius.
- d) Queritur illuſtr. SCHLOEZERUS (*Krit. Samml. zur
Geſch. der Deutſchen in Siebenbürgen* Tom. III. p.
523.) verbi *Honoris* vim ac poteſtatem in epigram-
mate hoc, a nemine adhuc eſſe definitam. Ego
provinciam, vel Comitatum, aut Dominium intel-
ligi debere cenſeo, & hoc quidem, cum auctori-
tate diplomatum domeſticorum, in quorum epilogia
Honores pro Comitatibus innumeris vicibus uſur-
pantur, tum Gloſſarii Cangiani, art. *Honor.* Sed
nec particula *ac* inter *Honorem* & *montem* ſæpe
interjacens inanis eſt; Comitatum, qui *mons S.
Angeli* vocatur, diſcernens a loco, qui Comitatu
nomen indidit. Hodie mons, cui oppidum inclum-
bit, *Gargani* nomine notus eſt.
- e) „ Rex autem Ludovicus civitatem Neapolitanam
„ intravit, ex tunc titulo regnorum Hungariæ, Hie-
„ ruſalem & Siciliæ utebatur. “ Ita JOANNES
Archidiaconus de KIKULLEW apud THUROCZ. P. III.
c. XI. Tempus & occaſionem, qua Ludovicus
novos iſtos titulos dimiſit, titulis duntaxat pater-
nis,

nis, Principis videlicet Salernitani cet. contentus, KATONA exponit l. c. T. X. p. 19.

f) N. *Lehrgebäude der Diplomatie* Tom. VI. §. 545-46.

*) De titulis RR. Hung. periodi primæ & secundæ, vid. PRAY *Taurunum* (Belgradum) *auspiciis Josephi II. recuperatum*, carmen heroicum, notis historicis illustratum; PALMA *Dissert. de peculiaribus Titulis & Insignibus M. Theresiæ*, Vien. 1774. inprimis ST. KATONA *Historia crit. Regum Hung. Stirpis Arpad. & mixtæ*, quam ad an. usque 1526. Tomulis XIX. complexus est.

§. 168.

Fuit aliquando tempus, quo nihil habebatur denominatione a religione & pietate accepta, pulchrius & illustrius. Hinc factum est, ut Regum ævi medii epitheta: *illustris, illustrissimus, excellentissimus*, cesserint encomio *christianissimi, orthodoxi, catholici*, cet. Id solum observari debet, ante sæc. XV. nullum horum agnominum cuiquam Europæ Regum soli & perpetuo fuisse proprium. Certe laus *christianissimi* ad sæc. XV. plerisque Europæ, etiam Hungariæ a) Regibus communis erat, nec prius quam ante hos annos circiter tercentos solis Galliarum Regibus relicta est b). Arragoniæ rex Ferdinandus ob studium religionis ferventius, ab Alexandro VI. pontifice, *catholicus* dictus est; & simile illius fuit Henrici VIII. regis Angliæ meritum, quod eidem bullam Leonis X. auream, & magnificum *defensoris fidei* agnomen attulit. -Etiam *orthodoxi*, quo Poloniæ reges aliquando gaudebant, titulus, ætate media late patuit; *apostolici* vero elogium, eodem illo tempore (de primis enim Ecclesiæ christianæ seculis hic quæstio nulla est) ad solos fere tantum Romanos Pontifices pertinuit;

ut adeo apostolici titulo, siquidem hunc Sylvester Papa II. protoregi nostro inscripsit, nihil amplius perpetuitatis inesse censendum sit, quam elogio *Signiferi ecclesiae* inerat, quod Pontifex in Concilio Cardinalium Ludovico I. Regi, ob rem Ecclesiae rom. cath. strenue ab eodem defensam attribuerat c). Sed neque inter diplomata Regum Hung. superioris aevi ad Mariam Theresiam, quodpiam adhuc usque inventum est, quod *Apostolici* encomium, ceu agnomen aliquod Regum Hung. perpetuum, eorum cuiquam adscriberet. Clementi XIII. proinde *Apostolici* Regis titulus in acceptis referendus est d), qui S. Stephani studium indefessum imbuendi Hungaros mysteriis fidei christianae, & ingentia illa jura, quae Regi Hungariae circa sacra competunt, respicit; haudquaquam vero clientelarem illum nexum indigitat, quo Johannes olim rex Angliae, sine terra dictus, Romano praesuli obstrictus, *Rex apostolicus* dictus fuerat e).

a) Johannis de Hunyad, in ejus literis an. 1444. hic erat titulus: „ Jo. de H. Vajv. Trans. Sic. „ Comes, nec non Comitatum Zoln. & Temes „ Comes, supremusque Capitaneus armorum, & „ Dux militum *Christianissimi* Regis Hungariae“ Exempla plura e seculis anterioribus coacervare, non esset difficile.

b) *N. Lehrs. der Diplom. VII.* §. 800. IX. §. 233.

c) KATONA l. c. Tom. X. p. 166.

d) Breve Clem. XIII. datum Romae — 19. Augusti 1758. Mariae Theresiae titulum illum deferens, vid. in KOLLARII *Hist. dipl. Juris Patronatus* — p. 65. 66.

e) „ Volens autem rex Joannes — hanc (chartam „ magnam) inviolabiliter observari, misit ad Do- „ minum Papam Innocentium, rogans constanter, „ ut huic piae concessioni & confirmationi suae fa- „ vorem dignaretur exhibere, & eandem bullae „ muni-

„ munimine confirmare. Quæ , quia jam factus
 „ fuit *obsequens Papæ vasallus* , & *Rex apostolicus* ;
 „ meruit quæ petiit citius impetrare sub hac for-
 „ ma: Innocentius “ cet. Vid. MATTHÆI PARIS
Historia major. Londini, 1684. Fol. p. 220. ad
 an. 1215.

§. 169.

Interdum titulorum recensioem claudit Rex in perpe-
 formula *in perpetuum* , vel si alia construendi & ^{tuum.}
 interpungendi ratio placet, *rex in perpetuum*.
 Exempla domestica e sæc. XIII. bene multa
 sunt: Andreas D. G. Hung. Dalm. Cro. Ram.
 Serv. Gallic. Lodomeriæque Rex *in perpetuum* ;
 Bela D. G. Hungariæ — — Cumanicæque Rex
in perpetuum. E bullis rom. Pontificum solem-
 nioribus (panchartis, consistorialibus) atque
 in longum tempus valituris (ad perpetuam rei
 memoriam) in quibus sæc. XI. XII. XIII. hæc
 clausula, tribus ut plurimum literis coarctatis
 expressa, inscriptionem absolvebat (*salute & apo-*
stolica benedictione rescriptis brevioribus & mino-
 ris momenti tantum, & quæ in præsens statim ex-
 sequenda erant, præmissa,) eandem in diploma-
 ta Regum nostrorum traductam esse non est
 dubium. An hic, eadem formulæ potestas sit,
 quæ in Pontificum bullis (MABILLON. l. c. p.
 436. 622.) obtinet, quæri potest. Putabam
 ego aliquando illam alteri, Imperatoribus Rom.
 solemnibus, *semper Augustus* , substitutam esse,
 ac proinde formulas, ut loquuntur, esse iden-
 ticas, exprimentes perpetuitatem honoris &
 dignitatis regiæ, nulli restaurationi, ceu alii
 honores ambulatorii ad tempus duntaxat ali-
 quod, & conferentis arbitrium collati, obno-
 xia. Nec hoc temere. Ut enim nihil dicam
 de studio Regum Europæ imitandi Germaniæ
 Q Augu-

Augustos, vique ac energia dictioni illi propria, atque de pretio, quo sæc. XIII. honores perpetui apud Hungaros erant (Decr. Andreæ II. 1222. art. 16.): sufficiat inscriptionem duorum diplomatum (utrumque ad an. 1200. pertinet) Andreæ Ducis inter se contendere. Unius hæc est: Andreas D. gr. Dalmatiæ, Croatiæ, Chulmiæque *Dux in perpetuum*; alterius: Andreas Dalm. Croat. Chulmæque *Dux perpetuus* (KATONA l. c. IV. 592.) Quicunque demum formulæ sensus fuerit, omiſſa illa est e Regum Hung. sæc. XIV. & sequ. literis & privilegiis.

§. 170.

Intimatio.

Titulos intimatio subsequitur. *Nosse desidero omnes homines & præſentes & posteros, Ego Stephanus Dei gratia Rex Hung. sublimis triumphatoris Geysæ Regis filius, — Noverint omnes fideles nostri, præſentes ſcilicet ac futuri, qualiter — Ad univerſorum tam præſentium quam futurorum notitiam harum ſerie volumus pervenire, quod — Memoria commendamus tenore præſentium — cet.* Eadem aliquando verbis ſubſtantivis effertur: *Noverit omnium tam præſentium quam futurorum ſolertia, industria, ſagacitas.* Sæpe fit, enumeratis perſonarum, ad quas literæ dabantur, qualitatibus & conditionibus, e. c. *Fidelibus nostris magnificis, Nicolao de Gara Regni nostri Hungariæ Palatino, & Petro de Perenz Judici Curie nostræ, salutem & gratiam. — Sigismundus: Fideli nostro sincere dilecto nobili & egregio Stephano, filio quondam Magnifici Simonis de Rozgon Judicis Curie nostræ, speciali, familiari nostræ Majestatis & continuo commensali salutem & gratiam. — Fidelibus nostris providis, Judi-*

Judicibus, Juratis, ceterisque civibus cet. Cum intimatione, saltem prioribus Hungariæ sæculis, conjungebatur *Salutatio*, cujus formulæ non minus quam intimationis variant: *Omnibus tam præsentibus — salutem in omnium Salvatore — salutem in eo, qui est vera salus — salutem in filio Virginis gloriosæ — salutem in eo, qui Regibus dat salutem. — Buzad, quondam Banus, nunc frater Ord. Prædicatorum minimus, (1234.) salutem in Sion & gloriam in Jerusalem.* Pontifices præ indignatione salutis formulam interdum omnem omiserunt, interdum sub conditione, *si obedieris*, eandem dictam esse voluerunt. (N. Lehrs. der Dipl. T. VII §. 653.) Nicolaus III. Ladislao (Cumano) regi Ung. illustri, salutis loco, *Spiritum consilii sanioris*, apprecatus est.

§. 171.

Interdum ante, aliquando post intimationem, oratio elaboratior esse incipit, lectorque oratione sæpe copiosa non minus quam variegata, ad lectionem thematis præparatur, & deducitur. Hujusmodi causæ ut plurimum moventis & impulsivæ indefinita declaratio, *prooemium* (Grammatici *locum commune* dicunt,) appellatur; quod brevitatis causa e diplomatibus interdum etiam omissum est. a). Ut plurimum vero verbis sesquipedalibus, & studiose quæsitis phaleratum, & per omnes argumentorum locos circumductum est. Fit, ut sæpe sensum præ nimia sublimitate vix adsequare, & ad figurarum splendorem, quibus oratio illinita est, cœcutias: ut iterum interdum ad hiatus verbosos & inanes, risum vix contineas.

Notariorum hoc erat artificium, qui hoc loco, pro ratione argumenti principis, mox de liberalitate Regibus digna, mox de Regni quæ e civium numero profluit felicitate, mox de virtutum, fidei præcipue erga principes & fortitudinis bellicæ, præmiis, & vitiorum monstis, mox de eleemosynarum fructibus, & opum hujus sæculi caducitate, commentati sunt. Sæpissime imbecillitatem memoriæ hominis, post lapsum primorum parentum deplorant, usumque literarum & scripturæ docent ac deprædicant *b*).

- a) e. c., Nos Agnes (1290) Dei gratia Regina Hungariæ significamus — universis — quod nos decimas frugum — — Episcopo Veszprimiensi — debitas, ad suggestionem quorundam laicorum malefudentium, qui quasi caupones aquam vino commiscent, & virus Draconis in aureo calice propinant — — pro nobis recipi — fecissemus: postmodum &c. — Nos Ludovicus (1361.) Dei gratia Rex Hung. memoriæ — universis: quod nos fideles cives & hospites nostros Cassenses pietatis oculis conspicientes, pensatis — — servitiorum præclarissimis meritis — quæ iidem — — primum Domino Karolo regi — tempore — opportuno, quo scilicet funicula tentorii potentie dicti patris nostri, nondum longe erant distentis — — & tandem nostræ Majestati exhibuerunt — — hujusmodi libertatis — prærogativa — — decrevimus decorandos, quod —
- b) Juvabit dicta exemplis quibusdam illustrare. Stephanus V. celebratissimum privilegium Saxonibus Scepusiensibus anno 1271. concessum, ita exorditur: *regiæ sublimitatis immensitas, cujus est in subditorum opulentia, & populi multitudine gloriari, solet suorum formam libertatis subditorum; & solutionum, ac servitiorum meritum, sive modum, misericorditer moderari, ut populis certa lege fruëntibus, eorum numerus augeatur. Proinde cet.* Andreas II. diploma, quo donationes priorum Regum Ecclesiæ Quinqueecclesiensi confirmavit, ita ingressus est:

*In nomine — Andreas — quoniam plasmatis mundialis caduca condicio primitiva, ex ipsa protoplasti jactura, labem contraxit realiter in posteritatis universæ dispendium prorogatam, ut radicalis inficio corruptele, quatenus elumpmat, & consumpmit nature virtutem humane — sub motu perpetuo decursantem, eatenus tabescant hominum opera manuum, (et) cum tempore delitescant, quadam nisi innovationis redivive solercia restaurata, successivi temporis ad memoriam perhempnentur scripture scemate seu figura, hinc est. — Vid. KOLLER l. c. II. p. 87. Aliud exemplum ex ejusdem regis literis anni 1212. exscribo: Andreas — — Sancta, & salubris est devotio, Deo servantibus manum charitatis elargiri, de quibus pie confiditur, quod eorum orationibus assiduus, ira supremi judicis misericorditer sedatur, & coelestis aula janua clementer aperitur. Hinc est, quod nos pro remedio animæ nostræ. — Perinde Notarius Belz IV. in dipl. 1248. (WAGNER *Analecta Scep. I.* 505.) differit: Eo salubrius de supernæ remunerationis præmiis cogitatur, quo tremendæ poenæ, & afflictionis periculum, quæ in finali futura est examine, vehementius formidatur. — Sophista autem fuerit oportet Kesmarkensium Notarius, qui anni 1548. instrumentum ita auspicatus est: Cum omnia entia tendi habent ad esse primum; & cum homo sit rationalis creatura, & mediante ratione assimiletur entibus nobilissimis; porro quæ spectare videntur ad culmen & fulcimenta primi entis quod est nobilissimam; homo, qui est creatura infima, merito eadem quoque fulcimenta supplere tenetur, tamquam loco æ minori. Nos ergo — — Brevitatis, quam sectari debeo, causa, exemplis pluribus supersedeo. Illud vero procæmium, quod notissimæ bullæ aureæ Caroli IV. Imp. an. 1356. præmissum est, pro extraordinario haberi debet, & prorsus singulari.*

CAPUT II.

FORMULÆ TEXTUS.

§. 172.

Diplomatis Prologum, *argumenti principis* Thema, & excepit expositio, ad quam transitus fit, rei ejus formulæ.

quam procemium tractabat, ad thema diplomat-
tis primarium applicatione. Proinde — Nos
(Bela IV. an. 1248.) *æternorum intuitu, tempo-
ralia spiritualibus, transitoria perpetuis felici com-
mercio commutare volentes, pro obtinendo quoque
nobis ac animæ felicitatis recordationis Colomanni quon-
dam Regis, charissimi fratris nostri salutis æternæ re-
medio, quandam terram cet.*— Nos (Lad. IV. 1288.)
*igitur volentes sudores ipsius bellicos linteo remunera-
tionis abstergere cet.*— Sunt autem in hac diploma-
tis parte, seu sede argumenti, ob quod diploma
factum est, *primariæ formulæ* & magis solemnes
probe secernendæ a *secundariis* & minus so-
lemnibus. Illæ *thema* quod dicunt ipsum,
seu propositionem principem, enunciant, &
quidem verbis, tum, cum diploma ederetur,
lege consuetudineve receptis, nec proinde arbi-
trio Notariorum temere immutandis; his con-
tra accensetur, quidquid præterea ornatus vel
eruditionis ostentandæ causa tantum, ad ar-
gumentum diplomatis referendum haud necessa-
rio pertinens, profectum sæpenumero a garru-
litate & gustu male sano Notariorum, in con-
textu diplomatis est obvium.

§. 173.

Commune
diplomat-
arum
argumen-
tum.

Et si diplomatum ævi intermediarii argumen-
tum varium sit & multiplex, pleraque tamen,
quæ ad nos usque pervenerunt Regum diplo-
mata, donationes seu beneficia enarrant, quæ
iisdem locis sacris, nobilibus, & urbibus oppi-
disque conferebant, & quæ liberali manu pro-
fundebant sæpius. Certe, si e donationum quæ
factæ sunt tabulis, superioris ævi principum libe-
ralitatem metiri velis, fuit illa nobis propemo-
dum

dum incredibilis. (§. 6. not. g.) In militibus prædiorum rusticorum spe alebant virtutem bellicam, quorum egregia facinora bello pæque nunquam non regia liberalitate remunerati sunt *a*); ab urbibus & oppidis immunitatum spe mercabantur fidem: omnes vero, ac universi, principes privatique, a sacerdotibus preces, & futuræ vitæ felicitatem, pro opibus huius sæculi caducis & instabilibus, sibi stipulati sunt *b*). Hæc est ratio, ob quam, ut in omnibus Europæ regnis, ita in Hungaria etiam, diplomatum ecclesiasticorum tantus censetur numerus; qui apud nos, saltem protographorum, multo major adhuc superesset, nisi, qui in annalibus & diplomatibus Hungariæ vocantur Tartari, Neugari, Hussitæ, Turcæ, & superiorum temporum discordiæ intestinæ, sacrilegas certatim manus tabulariis capitulorum, & ecclesiarum intulissent. Universe attamen ecclesiarum privilegia, præ reliquorum civium diplomatibus, experta sunt fortunam propitiam, unde & antiquissima, & comparatione rite habita, numero plurima, quæ nobis e medio ævo suppetunt, personas & res sacras attinent *c*).

- a*) En aliquot exempla præmiorum fidei & virtutis Hungaricæ, & liberalitatis vere regię! Korus filius Bod ob Regis Stephani II. *eliberationem ex unguibus ursi*, in cuius feros amplexus inter venandum infelix devenerat, terram Illwts (1130.) accepit. Ob simile beneficium Emerico regi venanti in *Maramoriso* præstitum, Laurentio cuidam comiti (1199.) ager ad quinque aratra sufficiens ad lacum Ferten obtigit. — Bela IV. a Tartaris fugatus, filios Rugach nomine, terra Fay (1243.), magistrum Erne quatuor villis in Sclavonia (1251.), Andream vero filium Iwanka (Forgatsum) terra Ghymes (1256.) remuneratus est, quod fugienti equos suos subdiderint. — Agne-

ti nobili feminæ, quod Regis in Francia *nuncia exstitit & relatrix*, a Stephano V. rege jun. 1269. villa T. data est. — Petro dicto Poharus 1351. castrum Szaplöncha cessit, quod — — & Ludovicum Regem *tempore adolescentiæ ejus in suis humeris bajulaverit*. — Sigismundus Cæcilæ conjugii St. de Rozgon, ob *merita bellica* (digna vate Hungaræ) 1435. complures possessiones contulit. — Wladislaus II. famulum BONFINII, quod *opus hujus historicum pro Regis Bibliotheca nitide descripsisset*, cum patre fratribusque in numerum nobilium cooptavit; Ferdinandus I. autem Josepho Luka Quinqueecclesiensi, qui Joannem Fridericum Electorem Saxonie ad Mühlbergam *virtute & agilitate sua ceperat*, exspectativam, ut loquuntur, 100. colonorum an. 1547. contulit. — Hæc, cum prolixior esse nolim, sufficiant.

b) *Et sane* — inquit MURATORIUS, ipse sacerdos — *injuste non agam cum majoribus nostris, si dixerò, tum persuasionibus, tum terroribus, atque consiliis egisse ejus temporis monachos, ut a piis hominibus, quæcunque possent, emungerent; adserendo hoc solum omnium operum Deo gratissimum esse, sæculo renunciare, & monasticam induere vestem. Quod si id minime adsequebantur, saltem persuadebant, nullum esse melius inter eleemosynarum virtutes, quam si de propriis substantiis in monasterium concederetur. Vid. MURATORII Antiqu. Ital. Tom. V. p. 630. Acerbius hæc tamen forsan quam deberent, de monachis prædicata sunt. Annalium saltem O. S. Pauli P. E. testimonio (vid. Fragmen Panis cet. Auctore F. ANDREA EGGERER, Viennæ 1663. Fol. p. 132.) constat, F. Nicolaum, Vicarium dicti ordinis Generalem, dum videret Ludovicum I. cænobium suum Nostrense (Mariæ nostræ) ultra præscriptas religionis leges opibus cumulare, intercessisse huic Regis liberalitati nimis, eundemque ne ultra beneficeret, per salutem suorum & professæ paupertatis amorem obtestatum esse.*

c) Inter S. Stephani diplomata, quæ omnia Com. BATTHYANI in *LL. eccl.* evulgavit, & S. Ladislai quæ leguntur, nullum est laico, ut dicunt, concessum. conf. adhuc WERBEOCZ. *Tripart.* P. II. Tit. 14. §. 9.

§. 174.

Ad contextum diplomatum, qui summam Ad quid in argumenti tractat & complectitur, rite, se-textu inpri- cundum varias temporum periodos intelligen-mis attenden- dum & dijudicandum, necesse est, ut attenda-dum. mus: 1.) ad personas, quæ illum ingressæ sunt, horumque nomina, dignitatumque & honorum titulos; ad usum proinde loquendi, quem eadem observaverunt, cum de se ipsis verba faciendo tum alios commemorando. 2.) Ut ani-

num, advertamus ad rem, quæ *literarum aucto-
ritate & testimonio mediante* alicui promissa, data, tradita, præcepta, judiciumve sententia definita, vel de qua inter duo pluresque conventum, vel quomodocunque juris & obligationis aliquid contractum est. Exempla multiplicitum istarum specierum, stylique, quo quovis sæculo ætatis mediæ concipiebantur, atque in formam diplomatis justî redigebantur, profiant, tum in collectionibus diplomatum quas jam superius (§. 15.) laudavi, tum apud illos, qui styli Cancellariæ illius ævi vulgarunt (§. 159—160.) specimina a).

- a) Historiam juris prisce hæc omnia mirifice illustant, ut vel exinde fiat evidens, Diplomaticam, cujus dotem & usum varium jam supra demonstravi, ad jureconsultos pertinere quam proxime. Qui majora & pleniora artis diplomaticæ systemata vulgant, ut in illas diplomatum species, ob varietatem objecti, quod tractant, varias, earundemque epochas, uberius & curatius commententur, necesse est. Pro instituti ratione, in hac brevi isagoge in rem diplomaticam, summam duntaxat omnia attingi poterant; neque enim omnem Hungariæ antiquitatem, jurisque publici ac privati historiam vulgare constitui. Præcipuas ergo tantum instrumentorum aliquot formulas & species, quarum necessitatem ad intelligen-

da Diplomaticæ elementa jam olim perspexi, etiam in hac editione libri altera, & quidem majori numero, delectuque meliore in appendice subjiciendas esse putavi, Hungariam reique ejus diplomaticæ studiosos perpetuo respiciens. Qui pleniorē chrestomathiam diplomaticam, Germaniæ præcipue accommodatam, consulere gestit, consulat SCHOENEMANNI collectanea: *Codex für die praktische Diplomantik, I. Theil, Göttingen, 1800. 8.* cujus libri, nec non illius quem §. 22. celebravi partem alteram, extremum eheu! morientis (2. Maii 1802.) munus esse, dum philyra hæc typographo jamjam traderetur, tristes accepimus.

§. 175.

Quibus ver- Stylo vetere, libera republica Romana,
bis Reges in *majestas* apud populum erat, amplitudinem &
eodem sui dignitatem civitatis romanæ significans. Trans-
meminerunt. ferebatur illa subinde in principes, felicitate
imperii publica id exigente, ut regnandi potestas penes unum esset. Recurrit autem majestatis titulus in chartis Regum, qui post occasum Imperii Romani divisum occidentem tenebant, rarius, nec ante dimidium sæculi XII. in chartis domesticis quæquam ejusdem observavi vestigia a). Sæculo adeo XIII. & initio subsequents usus elogii illius oppido rarus erat, neque illa cum vi & potestate adhibitum fuisse videtur, quam subinde inter Europæ Reges accepit iterum, & adhucusque tenet. Commemorarunt quippe Reges illius ævi in diplomatibus quæ dabant, *celitudinem regiam, regiam serenitatem, sublimitatem regiam, regalem excellentiam, præminentiam regalem, regiam pietatem, culminis regii conspectum* — multo frequentius, quam Majestatis titulum, cujus valor hodiernus nec sub Ludovico I. adhuc definitus erat b), quamvis & hic, & hu-
jus

jus gener Sigismundus eundem sibi jam sæpius attribuerint. — Abhorrent autem a sæculi nostri moribus, permagnæ illæ laudes quibus se Principes ævi intermedii in suis literis interdum ipsi celebrarunt, vel potius a suis Notariis efferri passi sunt. (*N. L. G.* VI. 539.) Etiam defunctorum, quotiescunque memoriam istorum, literarum argumentum postulabat, perpetuo cum laude mentio facta est; cui quidem piæ consuetudini, formulæ serviebant: *illustris quondam Rex Hungariæ; felicis recordationis; piæ memoriæ*; & harum similes c). Quantum autem titulorum usus consuetudini serviat, *illustris* titulo cognoscas, quo Reges mediæ ævi, cum ipsi se in chartis compellabant, tum vero ab aliis, etiam subditis suis, celebrati sunt. Ætate qua vivimus, *perillustis* adeo encomium significantius, saltem in Hungaria parvi penditur.

a) Exstant illa in privilegiis Geysæ II. & Stephani III. sed rariuscule.

b) „ Nos Stephanus Dei gratia Dux terræ Scepi. & „ de Saros — universis, quod ad *nostræ* acceden- „ tes *Majestatis* præsentiam, exhibuerunt nobis „ quasdam literas *Excellentissimi principis Domini „ Ludovici* eadem gratia Regis Hungariæ, fratris „ nostri carissimi “ KAPRINAI MSS. B. Tom. X. Nro. 7.

c) Formula *beatæ, piæ, sanctæ*, (malæ) cet. *memoriæ*, non tantum de mortuis olim dicta, sed etiam superstitibus ac viventibus attributa est. *N. Lehrgeb. der Dipl.* Tom. VI. §. 540. conf. KATONA I. c. T. VIII. p. 326.

§. 176.

Eisdem fere encomiis, quæ nunc recitavi, Quibus encomiis ab aliis commemo- rantur. etiam ab aliis exornati occurrunt Reges nostri. Enimvero literæ quas vel ab aliis Regibus a), vel

a suis Episcopis, Capitulis, Baronibus & Comitatus accipiebant, ad sæc. usque XV. perpetuo inscriptæ sunt: *Excellentissimo & illustri Regi — Illustrissimo atque Excellentissimo — Excellentissimo & Magnifico — Serenissimo cet.* Legi Capituli cujusdam literas, in quibus Regi *excellentissimi b)*, Duci vero a Rege constituto *serenissimi* titulus attributus est. Ut plurimum vero in hujusmodi literarum contextu, *regalis Excellentia & regalis Serenitas*, Regum compellationes alternant, donec utraq; cedere debuerunt *Regiæ Majestatis* titulo. In bullis Pontificum, quas Regibus nostris inscribebant, communiter elogium hoc præmissum est: *Charissimo Filio N. illustri Regi Hungariæ.*

a) Epigraphe literarum Henrici Regis Angliæ ad Belam III. an. 1188. sequens erat: „ Venerabili & „ Karissimo fratri Belæ, Dei gratia Hung. — „ Regi, H. eadem gratia &c. — “ Eduardi itidem Angliæ Regis ad Ludovicum I. an. 1346. „ Magnifico Principi, Domino Ludovico, D. gr. Regi „ Hung. illustri, consanguineo suo charissimo, Eduar- „ dus ead. gratia “ &c. Ibidem in medio literarum *regiæ Nobilitatis & Excellentia*: hic *Serenitatis, Sublimitatis, Excellentia regis* occurrunt elogia. KATONA l. c. IV. 334. IX. 481. — Illud velut in transitu observo, *fratris* nomen, prout etiam *patris, sororis, nepotis*, cet. ætate media (more hodieque apud Hungaros, dum vernacula loquuntur, retento) latius patuisse, neque tamen a Regibus ante sæc. XV. cuiquam nisi sanguinis nexu sibi junctis, attributum fuisse. A sæculo vero XV. inde, familiaris illa compellatio, a Regibus & principibus non tantum invicem data & accepta est, verum majoribus etiam honoribus & dignitatibus conspicuis adscribitur, e. c. Equitibus Ordinis aurei velleris:

b) Maria Theresia anno 1758. *Excellentissimi* titulum olim Regibus & principibus, nunc apud nos intimis, ut vocantur, Status Consiliariis proprium, simpli-

simplicitate superiorum temporum medicis delatum,
iisdem porro attribuere edicto publico vetuit.

§. 177.

Romanos veteres ad personarum confusio- Nomina &
nem evitandam, ingenuos quosque, gentis cognomina
nomine, & cognomine familiæ, ad quam quis- privatorum
que pertinebat, distinxisse, nemo ignorat. Lau- in diploma-
dabilis hæc consuetudo, succubuit juxta cum tibus.
aliis, barbarorum, qui sæc. V. & sequentibus
Imperium Rom. diripuerunt, moribus; quippe
qui rudes simplicesque, simplici etiam & uno
nomine contenti fuerant. Eadem Hungaris
quoque, dum Pannoniam armis occupabant,
commilitones a se invicem distinguendi ratio
placuit. Aspera vero & horrida illorum fue-
runt, quæ sibi indita gerebant nomina, & quæ,
more Christianis adhucusque solemni, sensim
nonnisi, & sero cum illis commutarunt, quæ
aliquando a sanctis Martyribus, aliisque Chri-
sticulis virtute illustribus usurpata sunt. Sed
vel eapropter, *Ritum explorandæ veritatis, seu ju-
dicium ferri candentis, quo in dirimendis contro-
versis gens Hungara olim utebatur*, libellum, jussu
& sumtibus fratris Georgii, Episcopi Varadien-
sis, e sacrarii ecclesiæ suæ monumentis com-
pilatum, & Claudiopoli 1550. typis expressum,
(recusum in MATTHIÆ BELII *Apparatu a) ad Hi-
storiam Hungariæ*) inter præstantissimos anti-
quitatum Hungaricarum thesauros post BELIUM
refero, quod segetem veterrimorum nominum
Hungaricorum recenseat, ex qua argumentum
capias, cum de gentis nostræ, tum de linguæ,
qua sæculo XII. utebantur, indole b). Neque
enim reformido fortia ac bellicosa Ungrorum
sæcu-

sæculi illius nomina: *Gugus, Hegud, Medue, Ombud, Cholnuk, Zamacziomut, Numicolohod* & sexcenta alia horrifona, quæ investiganti penitus antiquitatem gentis sago nunquam non celeberrimæ, voluptatem potius adferunt vel maximam. Id solum doleas, cum in hoc antiquitatis monumento, tum in chartis ævo ejus paribus, rara adhuc cognominum, quibus familiæ se ab invicem distinxissent, exstare vestigiâ. Habuerunt scilicet Hungari, nobilissimæque eorum familiæ, cum aliis cultissimis Europæ populis, horumque Ducibus, Marchionibus, Comitibus, cet. id commune, ut sæculis, quæ XIII. antecedunt, vel simplicibus nominibus se ab invicem fecernerent, vel ex titulo alicujus ministerii & officii, aut ex nomine patris (avique) addito (e. c. *Andreas filius Emerici; Joannes filius Joannis filii Henrici,*) se agnoscerent. Cognomina paucissimarum familiarum hoc temporis intervallo, sive in donationum contextu, sive testium recensione exponuntur; etsi sæc. XI. cognominum tenue aliquod initium jam existisse, eademque quovis subinde sæculo latius usurpata fuisse, ultro largiar. Sed nec sæc. XIV. adeo hæc majorum oscitantia prorsus desit e). Hæret ergo aqua viris in hoc artis genere vel exercitatissimis, dum principum, & clarissimarum, quæ hodie per Europam florent, familiarum præsepia, in sæculis XI. anterioribus exquirunt; cum vix tres quatuorve regias censeamus, in quarum tabulis natalibus construendis, ad ætatem Caroli M. Imperatoris secure regredi, esset possibile.

a) Post doctiss. aliquando JO. TOMKA SZASZKI, qui l. c. primus rudus hoc antiquum suis notis explicare cona-

conatus est, permultum lucis ad juris Hung. antiquitates illustrandas exinde mutuatus est AD. FR. KOLLAR in *Historiæ jurisque publici Regni Ungariæ amoenitatibus*. Vol. I. II. Vindob. 1785. 8.

- b) Eadem persona (quod utinam factum non fuisset!) interdum in chartis ævi medii sub pluribus nominibus recurrit. *N. Lehrs. der Dipl.* T. VI. §. 591. Conferri potest KATONA l. c. II. 189. 357. — Optandum autem est magnopere, ut philologus aliquis nostras, in nomina illa simplicia (baptismalia) priscorum Hungarorum curatius inquireat, eadem cum latinis compareret, hacque ratione illorum valorem declararet. Verum est, non pauca sæc. XII. adhuc ex ethnicismo fuisse residua; sed etiam a Sanctis & martyribus christianis accepta multa, ita sunt decurtata, e. c. István pro Stephano; contorta, e. c. Deseu pro Desiderio; obsoletaque, e. c. Geysa, Bela cet. ut operæ sane pretium jure suo expectare posset, qui onomasticon hujusmodi vetus Hungaricum plenius, & illustratum nobis procuraret.
- c) Sæc. XIV. cognominum usum, necdum apud omnes Hung. proceres fuisse receptum, vel ex hac, quam describere lubet, diplomatis Ludovici Regis clausula (WAGNER *Anal. Scep.* I. 154.) luculenter apparet. Datum illud est per manus venerabilis in Christo Patris D. Nicolai Archiepisc. Colocens. — Anno Domini MCCCLVII. tertio Idus Febr. — Venerabilibus in Christo PP. & DD. Nicolao Strigoniensi, & — Vgolino Spalat. Archiepiscopis; Nicolao Agriensi, Demetrio Varad. — Transilvan. sede vacante, Nicolao Quinqueeccles. Joanne Vespri. Colomanno Jaurin. Thoma Chanad. Stephano, electo Zagrab. Michaële Vaciens. Petro Bosnensi, Fratribus Stephano Nitriensi, Thoma Syrm. Episcopis — Magnificis viris Nicolao Konth Palatino, Cikou M. Tavern. Andrea Vaivoda Transilv. Nicolao de Zéch Judice Curia, Nicolao Bano de Machou, Leustachio totius regni Sclavoniæ Banatum tenente, Leukus Dapifer. & Pincern. Dionysio Agason. Thoma Janitor. nostrorum Magistris, & Simone Filio Mauriti Comite Poson. aliisque, cet. — Si tot nobilitatis primæ viri, hoc ævo cognomine adhuc destituti erant, quid mirum, si inferioris sortis homines eodem caruerunt multo adhuc longius? Episcopos Hungariæ & postea passim
- adhuc

adhuc quam longissime, sine familiæ quæ orti essent cognomine recenferi videas.

§. 178.

Absentia cog-
nominum ge-
nealogiam
impeditam
reddit; ple-
rumque im-
possibilem.

Quæ cum ita sint, credulitatem ævi præteriti admirari, vel turpe adulandi studium illorum detestari debes, qui nonnullas principes nobilesque Europæ familias, vel a clarissimis gentis romanæ heroibus longissimo ordine derivant; vel illorum auctores utero equi Trojani inclusos turpiter educunt; vel in tabulis Familiarum contexendis, ab Nimrodo exordium insaniendi faciunt *a*). Enimvero fuit aliquando tempus, quo Galli Priamum Hectoremque, parentes Regum suorum pie collaudabant, Angli vero Æneam Juliumque pari pietate profecuti sunt. Aniciam Romanorum gentem, patriam alii tradebant antiquissimæ domus Habsburgicæ; prouti Borussorum Fride-ricos, inter Colonnarum posteros recensuerunt alii. Fuerunt, qui antiquos Lithuanicæ Duces, a spuria Augusti sobole arroganter repetebant, & qui Marchiones Badenses sub auspiciis Vespasiani, Hierosolymorum urbem oppugnasse fabulati sunt. Quæ de Czecho & Lecho Poloniæ Bohemiæque Ducum majoribus, in sexcentis libris revolvuntur, apocrypha sunt; etiam Wittekindi clarissimi Saxonum ducis posteritas incerta, quotidie magis imminuitur. Scilicet imposuerunt sibi aliisque talia hallucinantes, immemores illius, absentia cognominum genealogiam impediri *b*), & nisi chartarum & annalium testimonio fidedigno liqueat, quibus majoribus Cajus satus sit, laterculum hujus genealogicum haud esse possibilem. Non sine

causa igitur exhibilamus aniles illas fabulas, quibus ut gentium omnis ævi, ita familiarum quæ pridem jam effloruerunt incunabula, sæpe superstitiose involuta sunt; ridetque illustrissima Eszterhaziorum gens auctorem nugivendulum *Trophæi nobilissimæ ac antiquissimæ Domus Eszterhazianæ*, Viennæ 1700. Fol. splendide impres- si, a quo inter majores illius Attila, Hono- rius Rom. & Opos Scytharum Imperatores, ante omnes vero Nimrodus allegantur; despi- citque argumenta fictilia, & diplomata spuria, quibus infelix adulator stemmatographiam *Magnorum de genere Eszterház* obscurare potius, quam illustrare conatus est. Quasi vero gens a plu- ribus inde sæculis, pace belloque per omnem Europam clarissima, Chœrilo opus habuisset, qui Mæcenatem quæsiturus, eidem thura, & odores stulte incendere non erubuit. Neque Comites de Wodicha, Romano Ursinorum san- guine sati sunt; saltem ad hunc sanguinis ne- xum demonstrandum, frustra urgetur diploma Andreæ II. Regis anni 1218. quo illis throno insidens, stipatusque suis proceribus, dignita- tem Liberorum Comitum contulit, propaginis- que enarravit seriem. Diploma ex LUXIGIO (*deutsches Reichsarchiv*) desumptum, denuo vul- gavit RR. KOLLER l. c. Tom. I. p. 350—4.

- a) Legas ea velim, quæ de furore præteriti ævi ori- gines principum familiarum reduciendi ad heroas ætatis romanæ & græcæ & fabulosæ usque, im- mo ad Deos adeo commemorant, CHR. LUD. SCHEI- DIUS in præf. ad *Origines Guelficas*, Tom. I. Han- nov. 1750. fol. nec non KOCHIUS in præfat. præ- missa operi elaboratissimo: *Tables genealogiques des maisons souverains de l' Europe*, Strasburg 1780.

Conf. MART. SCHVARTNER *Diff. de gente Croviaca*, Pest. 1791. 8.

- b) „ Ein einziges diplomatisches Axiom — inquit GATERER *Abriss der Genealogie*, Göttingen 1788. p. 36. — schlägt alle bisherige Fabeln, allen genealogischen Wahn und Unsinn, die von Ahnenstolz, Unwissenheit, und Schmeichelei erzeugt worden sind, auf einmal zu Boden: *Ueber tausend Jahre lang seit Christi Geburt gab's noch keine Familien-Nahmen.*“

§. 179.

Unde cognomina in a imposita.

Perinde cum Germanis igitur Hungariæ quoque nobiles, sæc. XII. & XIII. cognomina adsciverunt, sibi a castellis & locis, quorum possessores erant, indita. Hæc interdum accessione novi castri, sæpissime vero divisione patrimonii inter fratres facta, diversimode immutata sunt a). Sunt multæ etiam in Hungaria familiæ, quibus cognomen a loco aliquo adhæsit, non quod ibi dominarentur, sed quod illorum majores pro cognomine patriam assumerint b). Nobiles Armalistæ quos vocamus, Cives & plebeiî sæc. XIV. & XV. & interdum serius cognomen adepti sunt, quod illis accessit a loco habitationis vel originis, (ex. c. *Pelbartus de Temesvár, Gabriel de Petrovaradino, Debreczeni, Miskolczi, Szikszai &c.*) ab arte quam tractabant (*Deák, Szabó, Szűts, Varga, Fazékas,*) animique & corporis vel virtute & vitio (*Jámbor, Ördög, Sánta, Fejér, Fekete, Nagy, Kis, Kopasz &c.*) aut ab hominum arbitrio & petulantia. Sæpe familiæ alicui, suo jure a castro quod tenebat denominandæ, adhæsit cognomen hujusmodi, atque ad posteros transivit, quod uni e majoribus undecunque erat inditum; sæpe possessionem castelli acivit aliquis,

aliquis, retento priore suo cognomine, unde diversitatis ratio inter hoc & prædicatum, quod in Hungaria appellamus, facile perspicitur. Patronymica, quorum terminatio originem gentilitiam continuo prodit (ut *Pálfi*, *Péterfi*, *Istvánfi*, *Mártonfi*; *Paulovits*, *Davidovits*, *Petrovits*, *Markovits*;) in omnibus civium classibus admodum sunt frequentia. Nec hoc omittendum est, grassatum aliquando esse, etiam per Hungariam doctam, morbum illum superiorum temporum, quo contacti, nomina gentium suarum in græcum latinumque travestiverunt, magno sæpe posteritatis incommodo c); quod videlicet omnia nausearent, nisi græce latineque saperent. Nomen denique quod in lavacro sacro, sive nobiles sive plebei accipiebant, ad sæc. usque XVI. simplex duntaxat fuerat & unicum, neque geminato Joannis Sigismundi in quodpiam aliud incidi antiquius.

a) Exemplo illustris ac vetustissimæ gentis de *Nagymihály* id commode illustrari potest, quæ ab inclyto *Jakov de Nagymihály* originem trahens, in varias postea familias seu ramos divisa, a diversis, quæ in patrimonii divisione illis obtingebant, possessionibus, variis etiam & multiplicibus cognominibus in annalibus Hungariæ nota est. A. *Tyba* enim, *Vinna*, *Sztara* cet. totidem nomina familiarum ducta sunt, quibus tamen omnibus gentilitium de *Nagymihály*, nunquam non solemne fuerat. E tot ramis unicus hodie *Sztaraiorum* superat. KAPRI. NAI Hung. diplom. II. 486. — Ad eundem modum gens nobilis & perantiqua de *Neek* (*Nyék* in Inf. Csallóköz) nuncupata, in plures familias, nimirum *Végh*, *Nagy*, *Méhes*, *Kosa* cet. propagata est. — Etiam familiæ *Szentiványi*, *Bán* & *Szmrecsányi*, ejusdem arboris annosæ frondentes rami sunt.

b) In Hungaria hæc consuetudo forte magis adhuc quam alibi obtinet. Ad imitationem vero ævi intermedii, quo latine scribentes locum patrium;

quin ibi dominati fuissent, particula *de* interjecta indicarunt, e. c. *N. de Buda, N. de Strigonio* cet. Transilvanorum multi adhucdum cognomini originis locum suffigunt. Ita auctor libelli: *Lis Transylvanica, seu practica Transylvanorum litigandi methodus*, Claudiopoli, 1799. 8. se nuncupat THEOPHILUM LÁNY de Késmark; non quasi urbis hujus libera regiaeque dynastiam se atque dominum profiteri voluisset, verum quod inde suam trahat originem. Incautos hæc talis consuetudo decipere facile poterit.

- c) Ita Tsukás cognominari maluit *Lucius*, Holzmann *Xylander*, Biro (Richter) *Prætorius*, Hwezdar *Astronomus*, Bornemiszfza *Abstemius*, Borbély *Tonsoris*, Szántó *Arator*, Kováts (Schmied) *Fabricius*, Quendel *Serpilius*. — Hodie Hungariæ cives metamorphosi nominum e germanico & slavico in hungaricum gaudent. Ita nuper admodum Reutermeyer mutatus est in *Rostaházi*, Voiteschko in *Edeskúti*, Kohlmayer in *Tatrai*, Mayer in *Mayerfi*, cet. quod posterorum causa hic adnotatum esse volui.

§. 180.

Tituli Prælatorum & Nobilium.

Archiepiscopi in literis Regum Hung. antiquis *Venerabilium*, (& quidem ad Belam IV. usque Strigoniensis tantum; CORNIDES in *Vindiciis A. B. R. N.* p. 159.) Episcopi vero *Reverendorum* gerunt axioma. Sæculo subinde XV. a Regibus *Reverendissimi* illi dicti sunt, *Venerabilium* elogio his relicto, qui stylus Cancellariæ regiae adhucque est. Ab aliis iidem promiscue salutantur *Illustrissimi* & *Reverendissimi*, qui tituli prius Cardinalibus proprii, dimissi sunt ab his, cum Archiepiscopis & Episcopis promiscue dari inciperent a), accepto 1630. ab Urbano VIII. PP. *Eminentiae* & *Eminentissimorum* titulo. Abbates, Præpositos, Canonicos, hodie *Reverendissimos* vulgo salutamus: superioribus sæculis Præpositi quidem & Abbates, mox *honorabiles*, mox *reverendi*, mox *venerabiles*, Canonici vero

plerumque *honorabiles* & *discreti* nuncupati sunt. Plebani stylo antiquo *discreti* dicebantur interdum *honorabiles* & *discreti*, rarius *reverendi*. *Religiosorum fratrum* encomium monachis peculiariter erat, quod nec in Abbatum titulis prætermisum est.

Ad regni *Principes*, *Primates*, *Summates*, *Magnates* pertinebant præter Episcopos, Barones regni, & qui Comitatus Regis administrabant nomine. Opponebantur illis *Servientes* scil. Regis *b)*, (unde iudex Nobilium hungarice *Szolga-bíró* audit) quos nobili genere natos, vel a Regibus in cætum nobilium cooptatos, sub Regis vexillo militandi manebat obligatio. Hi *egregii*, uxores vero eorum filiaque *generosæ* vocabantur; *Primates* contra, si sæculares essent, *Speciabiles* erant & *magnifici*. — *Prudentes ac circumspecti*, vel *sagaces* & *circumspecti*, item *sapientes* interdum & *honorati*, a sæc. XIV. & XV. cives & horum magistratus salutantur *c)*. Matronæ cives ab *honestate* laudantur. Coloni *agiles* audiunt atque *providi*; encomium *fidelium* in regiis literis — in illis enim tituli isti recurrunt, retinenturque in præsentī quoque — omnibus commune est. — Etiam compellationes: *Dilectio vestra*, *Egregietas vestra*, *Dominatio vestra*, *Sagacitates vestrae* cet. sic satis frequentes sunt.

a) Conf. N. Lehrgeb. der Diplom. VI. §. 542. 686. — 690. Sanctitatis axioma saltem a sæc. XIV. solis Rom. Pontificibus est proprium, Beatissimi vero laus eisdem iterum solis a Sylvestro II. inde attribuitur l. c. §. 686.

b) Diversi ab illis erant Servientes aliorum. In literis Ladislai IV. regis anni 1288. „Ladislauß — ad univerforum — quod Magister Thomas,

mas, Tolpos dictus, *Serviens Magistri Laurentii filii Laurentii* — — exhibuit nobis literas nostras patentes super collatione quarundam terrarum Vezveres & Várhegy — — “

- c) Dalmatiæ civibus a regibus Hungariæ titulus aliquanto tribuebatur titulis reliquorum civium illustrior. — Legi complures literas privatorum, immo Magnatum etiam Hung. sæc. XVI. ad civium Hungariæ magistratus, in quibus istos, benevolentiae captandæ studio, interdum *magnificos* adeo compellere non dubitarunt. Sed stylus hic Regum & diplomatum nunquam erat.

§. 181.

De titulo Baro-
nis.

Ille, qui hodie per Hungariam celebratur, *Liberorum Baronum* ordo, sine beneficio confertur, sæculo XVI. a quo Austriaci Principes continuo habenas Regni tenent, vix antiquior a). Quamvis enim Hungaria antiqua, *Barones Regni* non ignoret: hos tamen ex officio, quod in aula domus Augustæ, & in Regno gerebant, & olim tales fuisse, & adhuc usque esse, cuique notum est. Aut ego vero fallor, aut *Baronatus Regni*, ad Archiofficia Imperii Germanici accedunt quam proxime; quæ quidem sæculo X. in Germania constituta, sæculo XI. ad Hungaros etiam traducta sunt. Qui illos obtinebant, ut paulo ante dictum est, *Spestabiles* salutabantur ac *magnifici*; neque *Comitis Palatii* seu *Palatini* (Nándor Ispán b), titulus excellentior fuit, quamvis & honore, & dignitate omnes reliquos anteiret, post Regem in administrando regno proximus. *Deliberatione* cum his, nec non cum Prælatiis, interdum cum *charissima* etiam *conjugē* inita, (*unserer geliebten Hausfrau*, ut versio vetus Privilegiorum Scepusi. habet) Reges Hungariæ, sæpius

pius virtutes militares remunerati sunt, templisque ac ædibus sacris providerunt liberaliter. Inferebantur adhæc illorum nomina Comitiorum articulis & privilegiis c), neque tamen omnibus, & perpetuo. Habuerunt etiam Regina, curiæ suæ administros, veluti Tavernicorum, Pincernarum cet. magistros, quibus ævo prisco idem fere cum aliis Baronibus Regni honos obtigit. Utrique tandem aulam regiam, illo tempore mobilem & ambulatoriam, quo ibat, sequebantur; *Magistri* appellati, quod certæ ministrorum aulicorum classis, e. c. pincernis, agasonibus cet. præfecti fuerint. Vid. CAR. ANDR. BELII *Commentatio de Archiofficiis Regni Hungariæ*, Lipsiæ 1749. 4. & BECKII *Specimen juris publici Regni Hung.* Viennæ 1790. p. 128. & seqq.

- a) An. 1534. Ferd. I. Nic. *Kozkam* in ordinem Baronum R. Hungariæ adoptavit, alienigenamque numero indigenarum inferuit. Idem Ferd. I. 1555. *Franciscum Nyári* de Bedeg Baronem creavit, augendo ejus insignia gentilitia, indulgendoque eidem ceræ rubræ usum, cum omnibus reliquis prærogativis ordini Baronum propriis. Hæc duo exempla collati Baronatus sunt sine dubio antiquissima. Recentius aliquantum diploma Liberi Baronatus est, quo Leopoldus I. 1691. *Alexandrum Vécsei* Capitaneum arcis hæreditariæ ejus Ainaçskö, ejusque hæredes exornavit „ *e cætu numeroque præfati regni nostri*
 „ Hung. *Nobilium eximentes*, in numerum — regni
 „ nostri Hung. *Liberorum Baronum seu Magnatum*,
 „ *rubra cera* in obfigillationibus literarum suarum
 „ utentium, evehendum — — duximus. Volentes — ut Tu — & hæredes utriusque sexus uni-
 „ versi — omnibus illis gratiis, privilegiis & hono-
 „ ribus — — quibus ceteri — — Baro-
 „ nes seu Magnates — — fruuntur — tam intra
 „ quam extra judicia & Comitia — — frui — —
 „ *litteras vestras quascunque cera rubra, instar alio-*

„ *rum Baronum* — — *munire* — *valeatis*, Quo
 „ vero perpetuum hujus — — *sublimationis* exstet
 „ *documentum* — — *antiqua* — *insignia* non solum
 „ *clementer* — — *confirmavimus* — — *verum etiam*
 „ *in hunc* — *modum amplianda* benigne concedimus
 „ — *Scutum nimirum* cet.

b) Vocabulum originis Slavicae, vi vocis Praefectum Palatii notat. Hungaricum esse illud, juxta veterem orthographiam Nadur - Ispán (i. e. Nagy Ur Ispán) rescribendum, ingeniose, nec indocte evincere aliquando nitebatur JO. SZARKA, in *Conjectura de origine* — *Nominis Nádor - Ispán*, Sopronii. 8. s. a.

c) Ad examen de diplomatum fide rite instituendum, multum interest in promptu habere, cum Episcoporum, tum Baronum Regni Hungariae catalogos. Et Episcopos quidem GE. PRAY, quotquot poterat collegit, in *Specimine Hierarchiae Hungaricae*. Poson. & Cass. Pars I. 1776. Pars II. 1779. 4. Et praeter PRAIUM illi, qui singulorum Episcopatum delinearunt historiam: Barones Regni autem majori ex parte dispersi adhuc, in Decretis Regni, & privilegiis privatorum latent. Palatinorum seriem vulgarem, non ita pridem diplomatum fide CAR. WAGNER supplere & emendare ruduit. (*Ungr. Magazin IV. p. 4. & seqq.*) Collegit Judices Curiae anonymus in *Curia Judicum Regni Hungariae*, Tyrn. 1726. Utrique praeverat CASP. JONGELLINUS in *Catalogo Palatinorum & Judicum Curiae Regni Hungariae*, qui Tomo II. *Scriptor. rer. Hung.* insertus est. Laudabiles aliquando P. SZENTIVANI conatus digerendi reliquorum etiam regni Baronum seriem, e *Dissert. paralipomenonica rerum memorab. Hungariae*, in ejus *Miscellaneis*, Dec. III. P. I. Tyrn. 1702. 4. intelligas.

§. 182.

Comitum memoria in chartis Hungariae est multo frequentior; significatus varius & multiplex. Rem paulo altius exordiri operae pretium est. Primi Hungariae Reges, exemplo veterum Romanorum, instituta & leges exteriorum, quantum Regno conveniebant, ultro adoptarunt. E Regum Francorum Capitularibus

bus ergo, non pauca in Codicem juris patrii illata sunt; accepta etiam est ab Germanis Regni in *Comitatus* distributio. Quos enim antiquitas Germana pagos (Gau) nuncupaverat, sæculum IX. Comitatus dixit, eosque, qui Comitibus præfecti erant, *Comites a*). Ita cum re nomen etiam ad Hungaros sæc. XI. transiit. A castro Comitatus itaque quod illi præfecti tenebant, *Castrenses*; (Vármegye Ispányok, *Burggraf n*); a parochia vero, seu districtu quem administrabant, *Parochiales*; & quod vicarios in munere unum duove haberent (*Vice - Comites b*), recentiori demum ævo (circ. an. 1600.) *Supremi Comites* appellati sunt. Appellabantur autem ita primitus ab officio, quod durante Regis beneplacito gerebant, ut apud Germanos & Italos fere, neque quod officii erat nomen ad posteros transmitti potuit; quod quidem nec hodie, nisi paucis illis familiis illustribus concessum est, quibus honor ille jure hæreditario & perpetuo, a sæc. inde XV. in primis vero sub Regibus Austriacis, horumque indulgentia obtigit. Principibus Regum filiis (e. c. Stephano Ludovici I. fratre,) gubernantibus Comitatum regni aliquem, commutabatur fere Comitatus nomen cum *Ducatus* titulo, hincque factum est, ut *Duces de Scepus & Sáros*, nec non *de Liptovia* in Regum nostrorum ævi veteris identidem commemorentur tabulis. Sub Andrea III. Agnes, sub Ludov. II. & Ferd. I. Maria, utræque conjuges Regum, illa quidem Posoniensis, hæc vero Mosoniensis Comitatum defungebantur honoribus.

a) De Comitatum origine, Castrisque Hungariæ antiquè doctè differuit A. F. KOLLAR in *Historiæ jurisque*

risque publici Regni Hungariæ amœnitatibus. Vol. II. Vindob. 1783. 8.

- b) Vice-Comites olim in suis titulis Comitum plerumque illius meminisse solebant, cujus vicarii in officio erant, qui hodie per compendium omittitur. Exempla sunt: „ Nos Magister Johannes Vice-Comes Magistri Konya, & quatuor Judices Nobilium de Sarus. — Stephanus Soos de Sovár & Nicolaus de Roskovan Vice-Comites Spectabilis, ac Magnifici Domini Emerici de Zapolya, Comitum perpetui terræ Scepusiensis, ac quatuor Judicum Comitatus de S. &c. “

§. 183.

Comites Urbium & terrarum.

A Comitibus Comitatus regendis præfectis, differunt *Comites perpetui liberi & majores*, seu *naturales* a), ut prisca monumenta habent, qui castrum aliquod tenebant cum territorio seu provincia ad hoc spectante, a jurisdictione Comitum parochiani exemptum, atque ad hæredes transmittendum b), præter privilegium signandi cera rubra, quo saltem prius gavisi sunt alii. Huic Comitum classi videntur illi etiam adscribendi, qui *Comites perpetui* alicujus loci in antiquis diplomatibus appellantur c), nec non *Comes terræ Scepusiensis* (*Landgraf*), qui anno demum 1465. *perpetuus* factus est. A Comitibus istis liberis & perpetuis, seu naturalibus, de quibus verba Decreti Matthiæ anni 1459. in *PRAHI Annalibus R. H.* III. 125. „ sunt „ plures nobiles, qui quodammodo statum „ Baroniarum — ultra ceteros nobiles habent “ intelligenda sunt, originem suam trahunt Liberrimi Barones hodierni (§. 181.) nec non Comites, quos Hungari, non vetusto & vernaculo nomine *Ispányok*, sed vocabulo germanico, originis perspicuo indice, *Großok* dicunt. Initia

novi hujus axiomatis referri debent ad illos Reges Hung. qui simul Imperatores erant, neque enim ante Sæc. XV. quæquam ejus cernuntur vestigia. Titulum autem Comites isti iterum non ab officio, nec territorii alicujus possessione & dominio, sed codicillis solummodo principis ad id concessis repetunt, eademque fere horum ad illos est ratio, quæ inter Nobiles quos *Donatarios* nuncupamus intercedit, & illos quos *Armalistas* dicimus d).

- a) Anno 1487. Dominica post Fest. B. Lucie V. in S. Hippolyto, interventione Alberti Ducis Saxonie, Treugæ (induciæ) inter Frid. III. Imp. & Regem Hung. procuratæ sunt, arbitro Romanor. Pontifice inter belligerantes hac lege constituto, ut si idem contra Matthiam Regem sententiam pronunciaret, hujus subditi Prælati, Barones cet. omne auxilium ad bellum continuandum eidem subtraherent, quemadmodum idem denegare Friderico Imp. obligarentur Electores & Principes S. R. I. si Papa justam belli a Matthia Rege gesti causam agnosceret. — „ Isti „ autem (sunt verba Diplomatis induciarum) nominatim se inscribere & obligare debeant, imprimis Reverendissimus D. Archiepiscopus Strig. D. „ Arch. Ragusinus, D. Episcopus Agr. &c. — „ Item *Barones ex officio in Hungaria*: D. Palatinus Hung. D. Comes Curie Regie Majestatis, „ D. Magister Thavernicorum R. Maj. D. Thesaurarius R. Maj. D. Marschalcus. — Item *Principes in Hungaria*: Dominus Banus Dalmatie Croatie „ Slavonie, D. Despotus Servie, D. Banus Boznæ, D. Vajvoda Valachie, D. Vajvoda Austrie, „ D. Banus Machovienensis, D. Banus Nándor Albenensis, D. Banus Zevrinienensis, D. Comes Themesienensis, D. Comes Posonienensis. — Item *Barones naturales in Hungaria*: Dominus Dux Laur. „ de Ujlak, Domini Comites de Frangepanibus, „ D. Comes Scepusienensis, Domini Comites de S. „ Georgio & de Bozin, Domini Comites de Corbavia, Domini Comites de Zrinio, Domini de „ Losonc, Domini de Perin, Domini de Rozgon, „ Domi-

„ Domini de Báthor, Dni de Gara, Dni de Hendervara, Dni de Megyefallya, D. Ország de Guth, Dni de Ellerbach, Dni de Pamkirchen, D. Joan. Ernuth, Dni de Lindva, Dni de Bakos. — Item Civitates in Hung. Buda, &c. “
 Diploma prolixum non minus quam memorabile nullibi impressum inveni. Fragmentum quod hic interui, excerpti e MSS. STEPH. KAPRINAI Tom. XIII. B. Nro. LX.

- b) Ladislaus posth. an. 1453. fortissimum Joannem de Hunyad remuneraturus, creavit illum, & filios, hæredesque eorum universos, super civitate Bistricensi & districtu, ac ejus pertinentiis in partibus Transilvanicis habitis, in perpetuos (i. e. hæreditarios), liberos (exemptos a Vajvodæ & quorumlibet jurisdictione i. e. immediatos) Comitum majores, dictum vero districtum, in Comitatum perpetuum. “ Utrum hoc Ladislai Regis munere, familia Hunyadiana dominium etiam (terrestre) urbis & districtus Bistricensis acceperit? de eo, in alia omnia abiens, docte in utramque partem disputavit cel. JOS. CAR. EDER in *Appendice ad Schesæi ruinas Pannonicas* (Cibinii 1797. 4.) pag. 223. & seqq. conf. PALMA *Notitia rer. Hung.* edit. 3. p. 63. & seqq. KATONA l. c. XIII. p. 871.
- c) Hoc titulo, nec eo inani, primus insignitus occurrit Archiepiscopus Strigoniensis sub Stephano V. Rege. Colocensis paulo serius illum adeptus est. Cavendum vero est sedulo, ne *Comites locorum perpetuos* confundamus cum *Comitibus Comitatum* ejusdem nominis. Ita in diplomate 1480. Albertus Episcopus Vesprimiensis *loci ejusdem* Comes perpetuus, non item *Comitatus Vesprimiensis* dicitur.
- d) In discrimen, quod inter Comites & Barones titulo tales intercedit, inquirent Doctores juris publici. Illos stylus curiæ *Speciabiles & Magnificos* (Nagyságos) salutatur, ab aliis vero quibuslibet (ut diploma comitis an. 1696. Baroni *Stephano Apor* datum jubet) *Illustriissimorum* (Méltóságos) titulus iisdem attribuitur. In dipl. 1666. quo *Sigism. Petzhö* de Gherse Comitis dignitate ornatus est, idem „ ex ordine & numero — regni Hung. Magnatum „ (Liberorum Baronum; Magnificentiarum) benigne „ eximitur “ — Josephus I. 1707. „ *Stephanum Szirmai* ejusque hæredes — — Regni Hung. & partium

„ tium eidem annexarum Comites, germanice *Graf-*
 „ *sen* nuncupatos declaravit, — tituloque & ho-
 „ nore, nec non dignitate Comitum, cum prædi-
 „ cato *Illustriſſimorum Spectabilium ac Magnificorum,*
 „ germanice *Hochgebornen*“ insignivit.

*) Tantum de præcipuis vocabuli significatibus, in Re-
 gum nostrorum chartis obviis, dixisse sufficiat. Non
 vacat longius ad antiquitatem Hungaricam digredi.
 Quæ DUFRESNE de ejus usu collegit & adnota-
 vit, rerum similium studiosus nemo negliget. Id
 solum adhuc dignum hic loci observatione censeo,
 Comitum titulum, quod officii esset, mature tralatum
 fuisse etiam ad officia minora denotanda, quemad-
 modum in castellis nobilium etiam nunc hungari-
 cum *Ispán*, nomen servientis & officialis domus
 esse, bene notum est. Ævi superioris loquendi
 usum e literis Belæ III. anni 1181. & Caroli Ro-
 berti Regis anni 1323. didiceris. In illis quædam
 Domina, nomine *Froa*, uxor Marcelli Præpositi,
 prædium Zeles F. Palatino coram Rege vendidisse
 narratur, cujus rei testis inter alios adducitur *Ele-*
 „ *lis Curialis Comes Froæ*, qui terminum terræ in
 „ *circuitu demonstravit*; harum vero exordium sequens
 „ est: — „ ad universorum — quod *Comite Petro*
 „ *Judice Curie* magnifici viri *Demetrii*, Magistri
 „ *Tavernicorum* nostrorum ab una parte; item
 „ *Comite Michael* filio *Mark de Faw* nobili de
 „ *Comitatu Bekes* ex altera, coram nostræ Excel-
 „ *lentiæ* præsentia constitutis cer. — “

§. 184.

Cognitis ita jam una pluribusve personis, Res, quæ for-
 quas summa diplomatis dati respicit, ad rem mulis prima-
 attendendum erit, quæ sub formula textus prin- riis continen-
 cipe continetur, atque ad conditiones, cum tur.
 quibus illa alicui promissa, data, tradita, adem-
 ta, cet. Primarium diplomatum argumentum
 perpetuo fere jura & obligationes attinet, ju-
 risque ævi intermediæ historia non aliunde pu-
 rius, quam ex hoc fonte defluit. Quamvis
 autem sat largus proventus hic videri possit
 debeat-

debeatque : ubertate tamen sua , spicilegium quod ordini Historicorum relinquitur , messem quam Jureconsulti sibi vindicant , sæpe quam longissime superat. — Præcipuam & maxime copiosam diplomatum domesticorum speciem, *donationes* sic dictæ nostrorum Regum, & harum confirmationes constituunt. Mutatis nominibus personarum & prædiorum, donationis diploma unum sæpe parum habet, quo ab alio differat, si formulas quæ serius accesserunt & quæ ad dijudicandum diploma omnino pertinent, (e. c. *salvo jure alieno a*) ; *de nostra auctoritate Regia, certa scientia & gratia speciali, certis causis ad hoc nos moventibus b*) ; *totum jus nostrum Regium, si quod — nihil juris, nihilque proprietatis — reservando c*) ; *et*) & pertinentiarum recensitionem *d*) , quæ eo simplicior observatur , quo antiquior est ipsa donatio *e*) , excipias. Grande incrementum quod e privilegio aliquo ita singulariter inspecto Jus patriæ universum hujusque historia capere possit , equidem haud perspicio ; inductione enim & multorum diplomatum inter se comparatione opus est , ut axioma aliquod juris antiqui inde elicias. Potior itaque prædæ pars , quam quodlibet diploma hujusmodi suggeret , ad alias disciplinas pertinebit , quas illustrare non desinet , diploma jam obsoletum etiam , & valore omni in foro destitutum. Ita si quis vel ob vulnus aliquod in oppugnatione castelli alicujus vel in prælio acceptum , vel ob mortem , quam propinquorum aliquis , propter Regis Regnique salutem obierat , vel ob sumtus & pericula legationum ad vicinos principes , agros prædiaque accepisset ; diligentissime horum in literis donatio-

nationis delineabantur metæ terminique, secundum fluvios, vias, arboresque, quibus septa erant. Observabatur adhæc sæpe loci, de quo quæstio erat, ab alio vicino atque celebriore distantia, addebatur castri seu Comitatus nomen, commemorantur deinde sæpius silvarum quæ adjacebant densitas, hominum, qui mancipi dabantur, vel multitudo vel inopia, & sexcenta alia, quæ penitus investiganti imaginem & conditionem Hungariæ illius ævi, magnopere profunt, & sine quorum usu & cognitione, hodie Historiam alicujus Regni descripturus, placebit nemini. Literas certe, quas in Hungaria *statutionis* appellamus, in primis Geographiæ medii ævi numerabis fontibus, quas sæpissime ex asse insertas invenies Regum privilegiis, & quarum in omni antiquitate Hungariæ cognoscenda, dos est omnino varia & multiplex. Exemplum in appendice exquiras.

- a) In diplomatibus ecclesiasticis hæc formula jam sæc. XII. celebratur alibi, *N. Lehrgeb. der Dipl. VIII. §. 262. IX. §. 1011.* in Hungaria sæc. XIII. vix antiquior.
- b) Formula ante sæc. XIV. vix uspiam adhibita. *N. Lehrs. der Dipl. IX. §. 191.*
- c) Conf. (BÆRNKOPF) *De Dominio Nobilium*, Posonii 1790. p. 59. & seqq.
- d) In nova donatione prædii Nagypalugya incl. familiæ Plattianæ per Albertum Regem an. 1438. facta (Nagpoluga enim seu Magna Paludia, in districtu de Lypthov, familiæ eidem per Carolum Robertum adhuc 1517. collata fuerat), contextus series ita porro habet: *Item totum & omne jus nostrum Regium, si quod in iisdem possessionibus haberemus, & nostram quibuscunque modis, causis, & rationibus concerneret Majestatem, simul cum cunctis ejusdem (Nagy Palugyæ) utilitatibus & pertinentiis, terris*
scili-

scilicet arabilibus, cultis & incultis, agris, pratis, pascuis, silvis, nemoribus, montibus, vallibus, aquis, fluviiis, piscinis, piscaturis & decursibus aquarum, molendinisque & locis molendinorum, ac generaliter quarumlibet utilitatum & pertinentiarum integritatibus, quovis nominis vocabulo vocitatis, ad prædictas possessiones, prædiumque prænotatum de jure spectantibus, & pertinere debentibus, sub suis veris & antiquis limitibus, præmissis sic uti superius nostræ exposita sunt Majestati stantibus & se habentibus, annotato Nicolao, Gregorio & Georgio filiis Petri — eorumque hæredibus & posteritatibus universis — novæ nostræ donationis titulo dedimus, donavimus, & contulimus, immo damus, donamus, & conferimus, jure perpetuo, & irrevocabiliter tenendum, possidendum pariter & habendum, salvo jure alieno. Harum —

- e) *Ut S. Stephani donationes prætermittam, in quibus prædiorum adjuncta passim copiose recensentur, sufficiat ea attulisse, quæ in literis Andreæ I. Regis anni 1055. Abbatæ S. Aniani de Tylhon adscribuntur sequenti serie: Ne autem in processu temporum, super his, quæ in honorem Christi, & ibi degentium sibi que famulantium sustentationem, ad præfatam Ecclesiam contulimus, aliquam patiantur calumniam, singulatim cuncta in præsentî cartula Notarii manu adsignata habentur. Sunt igitur aratra XII. cum XX. mansionibus, vineæ XX. equites XX. piscatores X. agæones V. bubulci tres, pastores ovium tres, subulci duo, apiarii duo, coquinarii duo, sutores duo, fabri duo, aurifaber unus, dolatores duo, molendinarii cum molendinis duo, tornator unus, vestimentorum ablutor unus, cerdo unus, ancillæ decem. Præter hæc sunt emissarii triginta quatuor, cum subditis equabus, vaccæ centum, oves septingentæ, porci centum, apium vasa quinquaginta. Præter hæc ad necessaria fratrum per singulos annos constituimus de armento regali quinquaginta pedros — —*

§. 185.

Formula Textus
secundaria.

Ad formulas textus secundarias seu accedentes pertinebit, quidquid, salvo ac integro diplomatis argumento, adesse & abesse poterit; quid-

quidquid amplificationis vel ornatus causa, vel ex ingenio notariorum, interdum otiose ac inepte etiam adjectum est. Judicio ceterum opus est, ne quod præcipue argumentum diplomatis attinet, ad accidentia thematis & parerga referas. Exile & sterile thema instrumenti, (quod unus quisque, qui diplomata aliquando tractavit, rebusque applicare studuit, expertus sit necesse est) si artes spectes, quæ a diplomatis suppetias expectant; cedere quam sæpissime debet formulis, quas vel casus diplomatis intulit, vel ingenium scribarum sæpe male sanum intrusit *a*). Enimvero multa, eaque præclara sæpenumero sub formulis istis secundariis latent, quæ vel ab aliis nondum animadversa sunt, vel quæ, inventa jam, majorem in lucem collocant.

a) Innumeris id doceri potest exemplis. En duo, tria: Wladislaus I. an. 1441. ad debitum 1500. flor. (auri) tempore definito dispungendum solemnibus se literis obligavit, adjecta barbara, majestatique Regis prorsus indigna, clausula: „Casu autem quo non solveremus, extunc eidem Jo. Hluzky damus plenum posse per præsentis, nos monendi, increpandi, diffamandi verbis & literis, ac aliis omnibus modis, tamdiu cet. “ vel hoc uno exemplo mores discamus non illorum temporum. — Quæ juris publici, disputandique de jure in regno succedendi ratio eorum fuerit, Elisabethæ Alberti Regis viduæ literæ produnt, in quibus an. 1440. Nobiles Transilvanarum partium, ad fidem Ladislao (posth.) filio exhibendam contra Uladislaum I. hortata est, hoc interjecto, inermi ratiocinio: „Sed pensate quæsumus fideles dilecti, & animadvertite. Si hæres iste & Dominus naturalis, regni ejus debita successione exheredari debeat & privari, quid de filiis & hæredibus vestris evenire possit? Cum per hoc quasi pro lege introduci valeat, ut filii & hæres paternis

„ eorum rebus, possessionibus & bonis frustrentur
 „ & priventur. “ Addam adhuc fragmentum lite-
 rarum Wladislai II. ad Comitatum de Borsod, in
 quibus de intempestivo nunciorum hujus e regni
 Comitibus recessu questus, hæc talia subdidit: „ Nec
 „ pristinas solum & disjectas atque imminutas li-
 „ bertates vestras restituimus, verum — plures —
 „ adjecimus, quæ nec quisquam Regum Hunga-
 „ riæ unquam contulit ante nos, neque deinceps —
 „ collaturus “ Exemplis pluribus superfedeo, quæ,
 diplomata legenti, nisi hoc iracunda Minerva fa-
 ciat, succurrent facile, & sine numero.

CAPUT III.

FORMULÆ EPILOGI.

§. 186.

Momentum
 formularum
 Epilogi.

Epilogus, quoad ordinis seriem, orationis
 in diplomate postrema pars est, quoad solemn-
 um vero, quæ diplomatis *functionem* constitu-
 unt, numerum, rerumque ibidem sæpe occur-
 rentium varietatem usumque, interdum omni
 reliquo diplomatis textui longissime præferri
 debet. Enimvero ut formulæ epilogi ad robo-
 randum atque confirmandum thema diplomatis
 primarium sunt dispositæ: ita vicissim ad fidem
 universi diplomatis, ex formulariæ legibus vel
 stabiliendam vel infringendam, valent pluri-
 mum. Qui illustrium adhæc familiarum inda-
 gant origines, cognationisque seriem conti-
 nuam, nullisque hiatibus laborantem construe-
 re satagunt a), hac inprimis diplomatis parte gau-
 dent; qui temporum rationes subducunt, hic
 loci campum sese exercendi habent latissimum.
 Utrisque, cum difficultatibus, quas hic offen-
 dunt, sæpe dimicandum est; vincit illas labor,
 & rerum inventarum pulchritudo & utilitas.

Sin-

Singulas epilogi formulas, eodem quo in diplomatibus decurrunt ordine, jam perlustrabimus.

- a) Prouti CAR. WAGNER in libro bonæ frugis: *Collectanea genealogico-historica illustr. Hung. Familiarum quæ jam intercederunt. Decas I-IV. Pos. & Pest. 1802.8.*

§. 187.

A multis & imprecationibus, communiter in chartis vetustis, epilogi ducitur initium. Cum enim nullo tempore homines deessent malevoli, qui incurii voluntatum sanctiorum, cupidius alienis opibus & bonis inhiabant: remediis opus erat, quibus, ab impetendis pactis, donationibusque violandis, rapaces illorum manus cohiberi possent. Pœnarum, imprimis multæ pecuniariæ, & dolorum inferni, id fiebat minis, quibus chartæ præcipue vetustiores ævi intermedii armatæ sunt. Equidem multas, cum ævo antiquo romano, tum subsequente intermedio, ubivis gentium ferè usurpatas fuisse, (*N. Lehrs. der Dipl. T. VI. §. 709 — II.*) in utriusque ævi monumentis relatum legimus: id solum non ita pridem adhuc nostratium unus admiratus est a), aurum primorum Regum nostrorum diplomata exigere, tempore, quo legum aliarum transgressores, crimina certo juvenum numero expiare iussi sunt. At levius hoc argumentum est, quam ut cujusquam diplomatis fidem reddat dubiam. Vicinorum enim more, & stylo suo tempore vulgari, S. Stephanus diplomati foundationis asceterii in monte Pannoniæ, sanctionis illam formulam addidit, quæ jura monasterio concessa infringentem jubet „ componere *centum* „ *libras auri optimi*, medium Camerae, medium

Multæ pecuniariæ.

„ præfato Monasterio suisque rectoribus “ *b*). Huic similes, quantitate attamen non ubique pari *c*), multæ, in reliquis Protoregis foundationum piarum instrumentis, ab horum contemtoribus exiguntur, & idem diplomata corroborandi mos apud Reges successores quoque aliquamdiu vixit *d*); quin tamen vel æqualis ubique æqualibus delictis poena statuta fuerit, vel multæ ob privilegii negligentiam expensæ ullum vestigium, vel apud Scriptores domesticos, vel in chartis ævi illius & sequioris, supersit. Est ergo formula illa, (ita MABILLONIUS l. c. p. 106. depositionis comminationem exponit) comminatoria, non vero sententia decretoria; aberatque S. Stephanus a persuasionem illam quam longissime, id vel suo, vel successorum suorum ævo fieri posse, ut „ præcepti paginam frangere tentans, *octo millia librarum auri costi* (!) componat, medietatem Camerae, medietatem S. Michaelis Vespriemensi Ecclesiae “ *e*). Impune igitur privilegia & testamenta infringere licuit? Minime omnium; id solummodo statuo, nefarios testamentorum & privilegiorum infractores, eas potius pertulisse poenas, quæ legibus regni in similes prævaricatores constitutæ fuerant, quam illas; quæ facultates hominum imprimis illius ævi excedere debuerunt, & quæ chartis etiam privatorum interdum adjectæ, (*N. Lehrgeb. der Dipl.* l. c.) profecto minarum duntaxat & formulæ vulgaris loco, neque majoris pensæ habendæ sunt illis, quibus per notarios immites & crudeles, invadentibus foundationes sacras, spes omnis perveniendi olim ad sedem beatorum præscissa est.

- a) Anonymus (vid. §. 23.) fidem diplomatis S. Steph. an. 1001. impugnans.
- b) „ Multæ pecuniaræ frequentissime sub pœna centum librarum auri statuuntur. “ *Chron. Gottwic.* Tom. I. p. 354.
- c) In privilegio Monasterii S. Adriani de Szala 50. libræ auri optimi, in privilegio autem Monast. S. Maur. de Bakonbél 20. marcæ auri purissimi dicuntur. *BATTHYANI LL. eccles.* p. 366. & seqq.
- d) Andreas I. in literis fundat. Abb. de Tyhon, a decreti hujus sui transgressoribus XII. libras auri poposcit; S. Ladislaus vero in diplom. 1082. quo dotem Vespr. ecclesiæ recenset & confirmat, illos, qui paginæ isti contradixerint, ad centum aureos solidos persolvendos condemnavit.
- e) Librarum iste numerus 1280000. numos aureos efficit. (Viennensis enim libra 16. uncias, uncia vero 10. Ducatos hung. capit.) Immanis hæc summa etiam P. INNOCENTIO SIMONCHICZ V. Cl. differenti de *Numismatica Hungariæ Diplomatica accommodata.* Vien 1794. 8. p. 53. visa est; (multa omnium maxima statuitur in privilegio Lotharii II. Imp. 1137. monachis Cassinensibus dato, videlicet 15000. librarum auri purissimi, *Chron. Gottw.* I. p. 354.) unde suspicio illi oborta, per singulas auri libras, singulos duntaxat aureos intelligi, quam hypothesim subinde etiam Cl. auctorem *Notitiæ Hungariæ rei numariæ* p. 154. amplexum esse video. — Ego, ni mihi illa, quam in textu adoptavi, ratio pendendi multas istas pecuniarias ad veritatem videretur propior, facile induci me pateret ad credendum, immensas illas aureorum quantitates, seu numerum aliquem definitum pro indefinito, seu omnibus delinquentis, quibus ut Majestatis reus exui debebat, facultatibus esse positas. Stephanus certe III. in literis donationis 1166. FF. Hierosolymitanis factæ, omissa multa pecuniaria omni, „ si quis inquit igitur prædicæ „ institutioni in posterum contradicere voluerit, „ anathematis sententia feriatur, & regia Majestatis reus judicetur “ *SCHMITZ in Episc. Agr.* P. I. p. 91.

Exorcismus
diplomaticus.

Cum mulētis pecuniariis quandoque majoris gravitatis causa conjungebantur imprecationes, ad modum illius, qua Apocalypsis S. Joannis terminata est. Est autem antiquissimus illarum usus, communis omnis ævi populis. Ut enim nihil de Græcis dicam, inscriptionibusque ævi antiqui sepulchralibus; horret animus humanus, revolvens legem horrendi carminis, seu veterem Romanorum fœdus sancienti formulam: „ Si populus Romanus prior defecit — — *tum illo die Jupiter populum Romanum sic ferito, ut ego hunc porcum hic hodie feriam: tantoque magis ferito, quanto magis potes pollesque* “ (LIV. I. 24.) Istis tamen execrationibus, nec atrocitate neque varietate cedunt illæ, quæ ex libris sacris desumptæ, in diplomatibus & formulis jurisjurandi ætatis intermedix recurrunt sæpius, & majori cum studio collectæ & ad numerum elaboratæ, quam vel putes optesque. Ab Italis & Germanis credo exorcismi istius diplomatici exempla, mature accipiebant Hungari, qui in donationum & privilegiorum infractoribus ad ignis infernalis cruciatus detrudendis, nihilo mitiores erant aliis Europæ nationibus. Genio proinde & moribus sæculi anathemata apte conveniunt, quæ S. Stephani clementissimi Regis foundationum literis adjecta sunt *a*); quorum similes sunt imprecationes illæ, quibus Andreæ I. S. Ladislai, & successorum Regum tabulas veteres munitas cernimus. Sæculo tandem XIII. immo sine XII. penitus fere abstinere cœperunt ab hujusmodi formulis imprecatoriis; vel quod
suffi-

sufficere viderent, regiæ indignationis metum ad privilegiorum auctoritatem conservandam, vel quod eventu alio, quam precati erant, essent admoniti. Universe in donationibus hominibus laicis factis, terriculamenta illa rarius observantur, quam in literis, quibus Ecclesiarum integritati, & sacerdotum sustentationi prospectum est. Insolens ergo videri potest jusjurandum illud execratorium, quod mossocius tanquam sæc. XIV. in Hungaria solemne (decretale) Decreto Ludovici I. nullo adjecto teste idoneo, subdidit; etiam illa, quæ literis Joannis ab Hunyad an. 1448. (quibus egregium Woyik de Chionok *fratrem* suum *condivisionalem* adversus Castellanos castrorum Hunyad & Hatzeg protegebat) adjecta est sanctio, sæculo, quo idem Hungariam gubernabat, non satis, convenit. Ut vero constet vicinos in syrmate dirarum & execrationum perorando, quod suis diplomatibus appendebant, pari cum Hungaris fuisse eloquentia, ni superiores dicere velis, adscribam (e MEIBOMII *SS. rer. germ.* T. III. p. 199.) atrocissimam execrandi formulam, ad cujus lectionem ni animus exhorrescat, cautibus horrentis Caucaſi genitus sis, necesse est b).

- a) S. Stephanus fundationem Episcopatus Vesprimienſis an. 1008. sic absoluit: „ Si quis igitur hujus „ nostri præcepti paginam frangere tentaverit, octo „ millia librarum auri sciat se compositurum — „ trecentorum decem & octo Patrum anathemate feriendum. (videlicet Nicænorum Patrum, qui 518. numero, primam æcum. Synodum anno 525. celebrarunt; formula imprecationis Græcis familiaris. „ MONTFAUCON *Palaogr. græca*, p. 585.), atque „ perpetuali supplicio tradendum, jugiterque karathri „ pœna perpetuo fore concremandum.“ Non minus

graves diræ sunt, quas in reliquarum donationum clausulis in transgressores vibrat. In tabula foundationis Abbatiz ad radicem montis ferrei ait : „ Quod si fecerit, componat — & ut plus divinæ „ iræ occursum paveat, sciat se a Patre, & Filio, „ & Spiritu S. & a Genitrice Dei, Sanctisque Apo- „ stolis Petro & Paulo, & a S. Benedicto in cujus „ honorem prædictum constructum est monasterium, „ perpetuo anathemate damnandum, & ante tribunal „ Christi rationem redditurum. “ BATHYANI LL. eccles. pag. 373. 80. 81.

- b) Munitum est illa, diploma Henrici IV. Imp. an. 1075. quo Hirsaugiensis Cœnobii instaurationem, auspiciis Adalberti Comitis Calbensis institutam, confirmat : „ Si forte quispiam Regum, vel poste- „ rorum ejus, seu quarumcunque homo persona- „ rum (quod absit) testamentum hoc ullo inge- „ nio infirmare, vel infringere præsumperit : si „ id autem (quod absit) a quolibet eorum insti- „ gante diabolo fiet, obsecrat idem Comes, & „ omnino testificatur Apostolicum Pontificem, per „ Christum, & per sanctum Petrum Apostolum, „ & S. Aurelium Episcopum, & per omnes San- „ ctos Dei, & per tremendum judicii diem, ut „ illum Dei & sanctorum ejus contemtorem, & „ testamentariæ hujus conscriptionis destructorem, „ nisi resipuerit, tradat omnino Satanae, & anathe- „ matizet eum, ac profanet a consortibus & filiis „ ecclesiæ sanctæ Dei, & hæredibus vitæ æternæ ; „ ut & auferat Deus memoriam illius de terra vi- „ ventium, & deleat nomen ejus de libro vitæ æter- „ næ, & cum Dathan & Abiron, quos terra aperto „ ore deglutivit, & vivos infernus absorbit, peren- „ nem incurrat damnationem, & ut Herodis & Pilati, „ & Judæ socius factus in æternum discrucietur : & cum „ Sodomitis & Gomorris, ignis & sulphuris imbres hic „ experiatur, & Heliodori plagas & verbera hic „ perpetiatur, & Antiochi tormentis, vermibus scili- „ cet scaturiens, & cum fatore computrescens, miser- „ rime conteratur, & nisi resipiscat, Petrum Regni „ cælorum Archiclavigerum, cum S. Aurelio & tota „ cælesti militia, portæ Paradisi obstitorem habeat in „ æternum. “ Conf. adhuc MABILLON de re.diplom. „ pag. 96. & seqq.

§. 189.

De formula monogrammatica utraque, cum Formula de *priore* seu *commemorationis*, tum de *posteriori*, sphragistica. seu *indicationis* jam supra §. 94. dictum est. Interjacet inter utramque formula *sphragistica* seu *subsignationis*, quæ majoris roboris ac firmitatis causa, instrumentum sigillo communitum esse pronunciat. Hæc in Hungariæ diplomatibus vulgo sola recurrit; monogrammatum enim usus in diplomatibus Regum nostrorum rarus, atque solo sæculo XI. circumscriptus est. Variant autem verba quibus conceptam legimus, primum quidem notariorum arbitrio, deinde quod plura & diversa sigilla fuerint, quibus Reges præcipue a sæc. XIII. usi sunt. S. Stephanus in privilegio an. 1001. præmissis quæ diplomatis argumentum constituunt, & formula imprecatoria „ quod ut verius credatur, ait, hanc paginam „ manu propria roborantes, *sigillari jussimus* “ in Veszprimiensi: *annuli nostri impressione subter insigniri curavimus.* — Andreas I. „ *sigilli nostri impressione signavimus.* “ Stephanus III. in dipl. an. 1166. „ hoc privilegium scribi & *sigillo regali muniri feci*; “ item in alio anni 1165. cujus originale MATTH. BELIUS aliquando vidit & exscripsit: *sigillo regali affirmare præcepi.* Idem Hemerici Regis diploma refert, cui inconcussum robur in hunc modum additur: „ Ut igitur nostra donatio, inconcussæ firmitatis robur obtineat, scripto commendare, & *imagine nostræ sigillo fecimus insigniri.* “ Vid. BELII *Notit. Hung. Novæ* I. p. 114. 115. A Regis Andreæ II. tempore, qui primus Regum Hun-

Hungariæ duplici sigillo usus est, *duplicis sigilli* frequentissima mentio in diplomatibus recurrit, quæ perpetuo fere hac clausula continetur : „ Ut igitur — — præsentibus concessimus literas „ *duplicis sigilli nostri munimine roboratas* “ — Si secretum, vel judiciale sigillum esset appensum, hoc plerumque expresse commemorarunt in formula sphragistica, e. c. in literis Matthiæ anni 1474. „ harum literarum nostrarum, quibus *secretum sigillum est appensum*, vigore, & „ testimonio mediante; & alibi „ harum quibus *sigillum, quo in judiciis utimur, appensum est*, auctoritate “ — Sigismundus cum plurimum esset regnorum hæres & dominus, sigillisque uteretur, pro varietate provinciarum variis, formulæ auctioris a successoribus quoque suis frequentatæ auctor est: „ præsentibus concessimus literas — pendentis duplicis sigilli, „ *quo ut Rex Hungariæ utimur*, munimine roboratas; — in quorum fidem — præsentibus literas fieri, nostroque secreto sigillo, *quo ut Rex Hungariæ utimur*, communiri iussimus. “ Si aurea bulla diploma fuit confirmatum, talem clausula quoque commemorat, prouti in literis Belæ III. anni 1190. „ In memoriam omnium „ posterorum *nostræ regalis aule bulla aurea* fecimus perhempnari; “ — in diplomate Belæ IV. anni 1244. Pestanis civibus concesso: „ præsentem eis paginam duximus concedendam, „ *charactere bullæ nostræ aureæ* perhempniter roboratam. “ In privilegio tandem per Matthiam anno 1464. Soproniensibus collato: „ præsentibus concessimus literas nostras privilegiales, „ *aureæ bullæ nostræ munimine* roboratas. “ — Reliquæ variationes hujus formulæ leves sunt, cui-

cuique tenenti ea, quæ antea de sigillis dicta sunt, intellectu faciles. Id quilibet perspicit, formulam istam quamvis active, ut Grammatici loquuntur, interdum conceptam (*signavimus, roboravimus*) passive tamen explicandam esse. Meminimus e præmissis quorum intererat Sigillum Regis custodire; horum autem opera in exprimendis etiam sigillis Reges usi sunt. Vidi diplomata Regum sæc. XV. signata, & sigillis etiam destituta, in quorum extremo margine, verba descripta observavi, forfice inter sigillandum resecanda: *Dignetur Reverendissima vestra Dominatio præsentis sigillare*. Instar omnium allegasse satis sit finem literarum Belæ II. an. 1138. „ *Cancellarius, qui hoc privilegium regio* „ *consignavit sigillo*, filius Voth fuit, *scriptor* „ *autem privilegii hujus* Egydius Capellanus La- „ *dislai Ducis fuit* “ KOLLER l. c. Tom. I. p. 195.

§. 190.

Monogrammatibus, quæ loco subscriptionis aliquando erant, mature admodum in Hungaria neglectis, sigillo potissimum, quo munitum omnino esse debuit diploma quodvis, instrumentorum fides roburque nitebatur; subscriptione nominum, hodie non minus vulgari quam solemni sigillorumque auctoritati prævalente, nec in Regum nostrorum, nec aliorum literis ad sæculum usque XIV. obvia. Hoc tandem sæculo, meliori vitæ morumque & consuetudinum habitu e Græciæ majoris olim sedibus ad nos traducto, Cancellarii & Secretarii primum formula brevi illa & solemni: *Commisso Domini Regis*, testari (recognoscere) cœperunt, constructionem diplomatis, hujusque sigil-

Subscriptio
Regia.

lo regio adjecto (unde formula illa sub ipso sigillo sæpenumero invenitur abscondita) expeditionem, à Rege sibi esse demandatam, idque jam nullo alio interveniente (immediate) sive oretenus sive scripto; quo formulæ: *Commissio propria Domini Regis; ad literatorium mandatum Domini Regis* respiciunt: jam intervenientibus Referendariis; (mediate) qui videlicet Regi erant a consiliis, quorumque erat supplicum preces Regi exponere, hujusque responsa & mandata Cancellariis & Secretariis insinuare, quo formulæ plerumque in supremo literarum margine dextro, rarius in calce prostantes pertinent, e. c. *relatio Stephani filii Lazk ex parte Domini Regis; relatio Leustachii Bani* per suas literas; *Commissio propria Domini Regis Domina Regina referente*, i. e. voluntatem Regis Regina declarante, cet. a). Subscriptio ipsorum Regum, per literarum nimirum consequentiam manuque propria facta, paulo serius accessit b). Quamvis enim Galliæ Reges jam sæc. XIV. interdum placita sua hoc modo communiverint c): non tamen quodpiam exemplum subscriptionis hujusmodi regiæ apud nos adhuc inventum est, quod sæculo XV. esset antiquius. „ *Vidimus*, inquit KAPRINAI in *Hist. dipl.* P. I. p. 65: complures Matthiæ in literis ac diplomatibus *subscriptiones*, quas Rex Matthias primum „ *coepit usurpare*, prosecutus est interdum rem „ ab eo cœptam Wladislaus II. crebrius usurpavit Ludovicus II. donec a Joanne Zapolio „ & Ferdinando I. ceterisque Regibus Austriacissim „ in morem ac legem verteretur. “ Sæculo XV. ergo laudabilis hæc Regum Hungariæ consuetudo, etsi haud est vetustior; vetustior est

est tamen aliquanto Matthiæ I. Regis temporibus. Si divinare licet, ad Sigismundum Regem originem illius refero; quamvis nemo nostrum in tanta diplomatum Imperatoris & Regis illius copia, chirographum ejus unquam se vidisse meminerit: si literarum testimonia flagitas (quin literas Alberti Regis huc trahere velis, in quarum margine supremo formulam: *Manus propria Domini Regis*, caractere attamen ut mihi videbatur a reliqua diplomatis scriptura parum diverso, me alicubi vidisse bene memor sum) Ladislaum posthumum solemnis istius moris auctorem statuo; illius ego literas anni 1455. e protographo desumptas d) præ manibus habeo, quibus subscriptus est *Ladislaus Rex manu propria*. Subscriptionem, verba, quæ contextu continentur, respiciunt: „Fidelitati „vestræ præsentibus literis nostris, *quas etiam „scripto propriæ manus nostræ consignavimus* (i. „e. subscripsimus) firmiter committimus, „quatenus cet.“ Hoc autem facile quisque, spero, animadvertet, hunc subscribendi ritum initio rarius, sæpius progressu temporis fuisse adhibitum. Neque ergo falsi statim postulabis diploma, quod post annum 1455. subscriptione Regis adhuc destituitur. Communem hanc sequitur regulam Germaniæ Hungariæque res diplomatica. HERGOTT & GUDENUS Fridericum III. primum inter Imperatores fuisse perhibuerunt, qui anno 1486. subscribendi fecit initium: protractis e tabulariorum tenebris chartis pluribus, jam Carolum IV. idem interdum egisse apparuit e), quin istum successores in Imperio statim & perpetuo in hac re imitati sint f).

Eodem

Eodem denique fere tempore, quæ a Principibus diplomata, more hodie recepto, subscribi cœpta sunt, in epistolis etiam privatorum scribentis nomen; quod exemplo CICERONIS hætenus primas tenuerat, ad infimas epistolæ partes passim rejectum est. *N. Lehrs. der Dipl. III. §. 122.*

a) Harum formularum in Regum Hungariæ literis sæc. XIV. & XV. usus est longe frequentissimus; momentum in dijudicandis illis, cum instar subscriptionis regiæ haberi debeant, maximum; ut notam negligentiae supinæ effugere vix possint illi, qui secundis curis diploma regium aliquod divulgant, quin recognitionis Cancellariæ formulas recenseant. — Ab illo vetere diversus aliquantum hodiernus literas Principum *contrafignandi* modus est.

b) Omiserunt illam Reges Hungariæ ceterique sæculis quæ XIV. antecedunt, vel quod analphabeti essent, vel quod repetitionem nominis sui, in principio diplomatum jam expositi, supervacaneam esse ducerent; vel quod a more, tunc ubivis gentium in re diplomatica recepto, sibi non recedendum esse putarent. Si Ladislaum Neapolitanum Regis Caroli parvi filium (qui apud Dalmatas, *serto*, ut Sigismundus ait, *fiditio* in Regem Hungariæ a faciosis coronatus erat, Regisque Hungariæ titulis usus est etiam) Regibus nostris adnumerare fas esset, fuisset hic inter istos primus qui nomen suum chartis & privilegiis subscripsit. Hujus enim autographon, anni 1403. 19. mens Oct. quod adhuc superesse certo scio, propria ejusdem manu subscriptum est. Vidit & vulgavit idem etiam LUCIUS *De Regno Dalm. & Croat.* Amstel. 1668. pag. 261.

c) *N. Lehrgebäude der Diplomatie*, III. §. 121. VII. §. 103. Tab. 76.

d) Jubebatur illis Card. & Archiepiscopus Strig. Dionysius prædium Bana Joanni de Rozgon Vajvodæ Trans. & Rynoldo de eadem Comiti Siculorum reddere. Pro mense & die, feriam 4. post Festum OO. SS. habet.

e) *N. Lehrgeb. der Diplom. T. III. §. 122.*

f) Hæc quidem omnia post ritum subscriptionum in aliis Regnis ubi ante plura sæcula jam viguerat, sæc. XIV. & XV. restauratum, in aliis nunc demum primo introductum. Quæ ante istum, cum apud nos tum alibi gentium etiam, recepta fuerit subscribendi ratio, superius jam in doctrina de crucibus & monogrammatibus, ex parte declaratum est. Exstant etiam Stampillæ non modo in monogrammatibus apprimendis, verum in vulgari etiam nominum subscriptione vestigia. Unicum sed illustre illius exemplum domesticum, quamvis recentius, Decretum Caroli VI. 1715. art. 29. suppeditat, quo Comiti Steph. Koháry Judici Curiz Regiæ, ob dextram bello Turcico mutilatam, usus argenteæ laminæ in nomine suo exprimendo concessus est.

§. 191.

Formulam quæ in diplomatibus regiis Actum & Datum exspectare jubet, continuo excipit sequentium alterutra: 1.) *Datum per manus NN.*

Aulæ nostræ (vel *aulæ regię* seu *regalis*) *Cancellarii*, (vel *Vice-Cancellarii*) *dilecti & fidelis nostri.* — 2.) Sine mentione Cancellarii: *Datum*

e. c. Budæ in Festo — — *anno &c.* — Et *Datum* quidem tempus confecti & traditi instrumenti seu expeditionis proprie significat, cui in instrumentis domesticis rarissime *actum*, quod tempus rei transactæ denotat, adjectum est. Discrimen hoc inter utrumque post MABILLONII l. c. p. 193. diligenter demonstravit SPIESSIUS l. c. P. I. p. 108. Si eodem plane tempore, quo de re aliqua constitutum erat, diploma etiam, constitutionem continens, descriptum & expeditum esset, eadem fuit cum Acti, tum Dati notatio. Diploma, quo Oratores Regni

Regni Hungariæ testati sunt, Wladislaum I. in Regem Hung. electum esse, habet: „*Datum & actum Cracoviæ*, die 9. Martii Anno Domini „1440. “Hodie in Cancellaria Regis nostri, Datum non expeditionis tempus, sed constitutionis (resolutionis) regię exprimit.

§. 192.

Cancellarii
Sacerdotes.

Simplicitas in moribus & actionibus hominum ævi intermedi, habet, relate ad ævum quod vivimus, nescio, quid jucundi & grati, quod, postquam in operose eruderandis priscurum temporum monumentis fessus es, animum duplici aliquo levamine reficit. Ita (ut aliquot exempla attingam) conventus procerum seu comitia in pratis cogebantur late patentibus; obibant Reges ipsi suas provincias, (*Decr. Colom. Reg. L. I. c. 37. conf. Sigism. Decr. II. an. 1405. art. 13.*) atque sub tentorio seu papilione (THUROCZIUS in vita Belæ II.) vel tegmine quercus fagique confidentes, subditorum causas ad se deferri passi sunt; cubili, quod Rex in castro cum Regina inhabitabant, contigua fuit Camera, in qua thesauri servabantur, Rexque cum carissima sua conjuge, Regnique Baronibus & ministris, qui illi adstabant, gravissima agitabat consilia; vicina cameræ Capella fuit, in qua Rex cum familia Deo & religioni litabant, & in qua, tamquam loco maxime securo, tabulæ, imprimis publicæ, erant reconditæ. Custodiendis istis, qui magis esse potuit idoneus Capellano? Qui alioquin Regi familiaris erat & ab epistolis, voluntatis regię, imprimis si scripto declaranda esset, perpetuus interpres, atque arcanorum, quæ custodiebat,

unus

unus omnium optime conscius. Neque obscure has muneris ejus partes diversa nomina demonstrant, quibus illum insignitum invenimus in Principum vetustis literis & diplomatibus. Eundem enim, qui ibidem ad exitum fere sæculi XII. *Notarius*, vel, quod subinde invaluit, *Cancellarius* appellatur, diplomata domestica antiquiora interdum *Capellanum*, & quod omnem Clerum palatinum regeret, (qui sacris celebrandis & literis describendis adhibebatur,) serius *Magistrum Capellæ Regiæ*, *Archicapellanum*, deinde *Comitem* etiam *Capellæ Regiæ* nuncupant. Equidem nescio, Cancellarium ævi medii a *cancellisne*, quibus circumseptus ad arcendum vulgus officio vacabat, vel *cancellando* (delendo præpostere scripta) derivare debeam; id certum est, ut in aliis Europæ regnis, ita in Hungaria etiam, Cancellarios fere continuo, ordinis sacri fuisse viros, literarum peritia & dignitate etiam conspicuos. Quamvis autem non ignorem fuisse ætate media, quibus Capellani palatini (saltem minores) invisi erant, tanquam qui in Principum palatiis ab omni disciplinæ ecclesiasticæ rigore exempti, præcipue honorum & beneficiorum impetrandorum causa (e capella enim crebro electi a Regibus nostris aliisque ad dignitates ecclesiasticas) servivissent a): non ego tamen ambitus eapropter sacerdotium ævi superioris accusavero, memor conditionis, quæ omnium quos sæculares appellamus, ad sæc. fere XVI. in omni Europa una eademque fuerat. Agricultura scilicet plebi relicta, armis nonnisi belloque intenti nobiles, neglectis pacis artibus, literarum arcana, ultro ac lubenter, ceu Marti inimica virtutique bel-

licæ adversa, (unde Germani virum inermem minusque fortem, per ludibrium hodieque equitem latinum i. e. literatum — *ein lateinischer Ritter* — dicunt,) non modo ignorarunt, sed ignorantiam hanc suam, in literis, quas aliorum manu subscribebant, lati etiam confessi sunt. Erant in hoc numero analphabetorum, Imperatores Justinus senior, Carolus M. Otto M. (qui viduus „ cum antea nescivisset literas, in tantum didicit, ut pleniter libros „ legere & intelligere noverit “ WITICH. II.) alique Reges & viri principes illis synchroni *b*). Nec Hungarorum scribendi peritia *c*) temporibus præteritis major erat; inter quos circiter annum MDL. adeo adhuc belli studia viguerunt, ut vel inter juratos Comitatum Nobiles inventi fuerint, quibus ne tantillum cum Musis commercium intercesserat, ut literas pingere potuissent. (§. 145. cf. BELII *Notitia* IV. 554.) Etiam arti saluberrimæ proinde non alii quam clerici addicere se commode poterant; nec mirum igitur inter medicos Hung. quorum memoriam clar. aliquando VESZPRÉMI ab oblivione vindicavit, Præpositos & Sacerdotes passim occurrere. Quid? Quod inter clericos adeo non pauci scribendi rudes fuerint. Nicolao. saltem Præposito Transsilvano, circ. an. 1276-77. cum Episcopo Vesprim. de Archiepiscopatu Strig. coram sacra Sede romana contendenti, præter enormia delicta, objiciebatur intolerabilis etiam, *quem in literatura* (arte legendi & scribendi) patiebatur, defectus *d*); Tabulas vero anni 1323. (WAGNER *Analekta Scepi*. I. p. 313.) ex undecim Canonicis, quatuor duntaxat manu propria subscripsere, reliqui idem se alie-

na opera perfecisse, hac formula confessi sunt:
*Ego NN. interfui — & per scholasticum nostrum
 subscribi feci, & sigillum meum apposui.* Sed, ut
 jam monui, nihilo melior fuit literarum condi-
 tio alibi gentium; quapropter S. Benedictus
 (Reg. c. 58.) in novitiis ordinis sui tironibus
 scribendi peritiam non exegit, exemplaue plu-
 ra Episcoporum, qui latioribus adeo Ecclesiæ
 Christianæ temporibus, prima literarum elemen-
 ta scribere non valebant, a MABILLONIO p. 164.
 & Auctoribus novi operis dipl. T. III. §. III.
 112. indicata sunt.

- a) DU FRESNE voc. *Capellanus*. — Laudare hic in-
 primis illa adhuc debeo, quæ de Notariis & Capel-
 lanis Regum Hung. priscis, operose congeffit do-
 ctæque differuit immortalis DAN. CORNIDESIUS in
Vindiciis Anonymi B. R. Notarii p. 40. & 82-86.
 149 — 52.
- b) MABILLON. l. c. p. 163. *N. Lehrgeb. der Dipl.*
 III. §. 108 — 110. ROBERTSON *Geschichte Kaiser*
Karls V. Tom. I. p. 317. Conf. illa, quæ supe-
 rius §. 86. not. a) jam a me dicta sunt.
- c) Fortissimum Joannem ab Hunyad Gubernatorem
 Regni Hungariæ, literarum & scripturæ fuisse
 expertem, ex imperitia ejus sermonis latini colli-
 go. Vid. GALEOTI MARTII *Commentarius de Matthias*
Regis egregie, sapienter, & jocosè dictis, & factis, cap.
 XIII. & XXVIII. in SCHWANDTNERI *SS. rerum Hung.*
 Tom. I. — In fœdere signando, quod Wladisl. II.
 & Proceres Regni Hung. cum Frid. III. Imp. &
 Max. I. Rom. Rege anno 1491. percusserunt, ar-
 gumenti longe gravissimi, Steph. de Bathor Judex
 Curiz Regiæ & Vaivoda Transilvaniæ; Ladislaus
 Ország de Guth Agazonum; & Ladislaus de Roz-
 gon Cubiculariorum Regionum Magistri, ignoran-
 tiam scribendi expresse facti, in subscribendo fœ-
 dere, manu aliena usi sunt. KOLLÁR in *Aucta-*
rio diplom. ad Historiam CASP. VRSINI VELII de
bello Pannónico p. 259-60. — Obscure, nec scio an satis
 vere, KERCHELICHUS in præfat. ad *Notitias præli-*

minares de Regnis Dalm. cet. de PAULO RITTER qui in Croatia sub Leopoldo I. vixit scripsitque hæcce: „ Sed quia sæcularem scribere (libros) „ impietas censebatur tum, eratque æternæ veri- „ tatis regula: *trahet sua templa sacerdos, religio-* „ *sus literas, frameas sæcularis*, hinc — — gra- „ vissimæ in RITTERUM injuriæ profluere crede- „ bantur. “

d) KAPRINAI in MSS. C. Tom. V. n. 134. — Bertholdum Præpositum Babenbergensem, affinem Regis Andree II. ordinante Pontifice Rom. priusquam ad Archiepiscopatum Colocensem promoveretur examinatum, repertum fuisse legimus (in epistola Innocentii III. ad Andream II. an. 1207.) „ *textum expedite le-* „ *gentem, & interpretantem ejusdem verba suo idio-* „ *mate competenter, & apte præterea de constructione* „ *Grammatica respondentem* “ vid. CORNIDES l. c. p. 143. ubi exempla eruditionis ævi medii similia plura in unum collecta sunt.

*) Inter Hungaros priscos legendi scribendique peritus, agnomine *literati* (*Dedk*, e græco Diaconus) distinguebatur, quod interdum in nomen gentilitium abiit. Apud Gallos *chevalier clerc* olim audiebat, Angli vero *clericum* (Clerc) etiam nunc appellant, quem Secretarium vulgo dicimus. Inde vero, quod literarum studiosi olim Clerici duntaxat fuerint, magna illa, quæ passim adhuc supersunt, studiosorum privilegia & immunitates derivandæ sunt; nisi istas Principum studio, alliciendi profanos etiam majori numero ad literarum studia, tribuere velis potius. Hodie incitamenti hujusmodi nec apud nos amplius opus est.

§. 193.

Vice - Cancellarii, Summi-que & Secretarii Cancellarii.

Cancellariorum intererat, de rebus, quæ ad Regum cognitionem pertinebant, referre, istorum Decreta & privilegia in formam diplomatibus redigere, & regio sigillo, quod illorum custodiæ demandatum erat, munire. Antiquitus interdum ipsi etiam videntur omnem e. c. donationis alicujus descripsisse seriem, (DU FRESNE voc. *Cancellarius*) communiter tamen hanc

hanc operam commiserunt amanuensibus & scribis, qui Cancellario ab obsequiis, itidem ad Capellam Regum priscorum pertinuerant. Crevisse autem continuo curarum & negotiorum, quibus Cancellarii distrahebantur, numerum necesse est; unde Cancellario vel ab aula Regis absente, vel gravioribus reipublicæ curis occupato, vel etiam officio ejus vacante, mature, cum alibi tum etiam in Hungaria, constituebantur alii, qui *vice*, vel *ad vicem* Cancellarii ordinarii diplomata se edidisse testati sunt. Subinde hinc *Vicecancellariorum* axioma ortum est, quod in diplomatibus Italiæ, Galliæ & Germaniæ ante finem sæc. XI. haud obvium *a*), in literis S. Stephani 1001. & 1037. (quæ fundationem monast. S. Mauriti de Bakonbél complectuntur) & S. Ladislai an. 1082. ac proinde rarius, prostat equidem, ante sæc. XIII. tamen frequentatum non est. — Sub Carolo Roberto, initio sæc. XIV. sigillum, (cereum) quod *secretum* appellamus, Regum Hungariæ literis applicari cœpit, quod temporis progressu (in Hungaria non magis quam alibi) in Regium sigillum, quod duplex nuncupatur, ita sæviit, ut hoc continuo rarius adhibitum, tantum non penitus antiquatum fuerit. Cum novo autem sigilli genere, novus etiam honor palatinus exstitit, videlicet *Secretarii Cancellarii*, cui sigilli secreti custodia data erat, qui adhæc, more aliis etiam regnis communi, perpetuo jam Regis lateri adstabat, admissionisque erat intimæ *b*). Idem sub Carolo Roberto & Ludovico I. Capellæ regiæ erat præpositus, capellanosque regebat, qui sibi in sacris solemnibus ministrabant, quorumque opera in diplo-

matibus & chartis describendis usus est c). Tenenda hæc sunt ad discrimen intelligendum, quod inter Cancellariam Regiam *maiores* & *secretam* olim diligenter observatum est d); qui illi præsidebat, sigillum Regis conservabat, quod *duplex* appellamus, atque a Sigismundo Rege *Summus* seu *Supremus Cancellarius* dictus est e): qui huic præerat, sigillum Regis secretum sibi habebat concreditum, & *Secretarii Cancellarii* titulo distinctus est f). Posterior in Legibus regni (Matth. Decr. VI. art. 68. Wlad. II. Decr. 1492. art. 42.) post Comitem Palatinum & Judicem Curie Regie, censetur inter Judices Regni, quos stylo Decretorum ordinarios dicimus; utriusque autem honor ambulatorius erat, nulli certæ dignitati adstrictus g), conjunctus identidem in una eademque persona, unde *Summi & Secretarii Cancellarii titulus* compositus & enatus est h), qui inde a sæc. XVI. & XVII. Archiepiscopis Strigoniensibus, quod sigillum Regis duplex, (non item secretum) quavis ab aula ejus absentes, adhucque retineant, proprius & perpetuus factus est.

a) N. L. G. der Diplom. VII. §. 336. 670.

b) Non possum non, & ad hæc accuratius intelligenda, & ad genium sæculi XIV. universe propius cognoscendum, maximopere laudare Jacobi II. Regis Maioricarum *Leges palatinas* (*Hofstaats-Ordnung*) an. 1357. editas, quas ingenti literarum commodo divulgavit DAN. PAFEBROCHIUS in *Actis SS.* mens. Jun. Tom. III. tractatu præliminari. Constitutiones illas inter præcipuos & prorsus inestimabiles ævi intermediarii thesauros refero.

c) Hinc in literis Caroli I. frequentius autem multo in Ludovici I. Regis N. Comes Capellæ & Secretarius Cancellarius recurrit, sigillumque, cujus custos erat, secretum, interdum sigillum Regium dicebatur, quo prætextu Honoris scilicet Comitatus Capellæ

Capellæ usus est. WAGNER *Dipl. Saros.* p. 467.
cf. KATONA X. 249.

- d) Sigismundus causam Petri Grof de Zenthgyurg 1409: dijudicavit „Præsentibus Prælatiſ & Baronibus, „videlicet Reverendiſſimis cet. nec non venerabi- „libus viris, Dominis Clemente Præpoſito de Po- „ſega majoris, Nicolaoque Gubernatore Præpoſi- turæ de Leleſz *ſecretæ Cancellariarum* noſtrarum Vice-Cancellariis; item Magnificis viris cet. KAPRINAI MSS. B. IV. nro. 54.
- e) Primus hoc titulo gaviſus eſt Joannes de Kanifa Ar- chiepiscopus Strig. cui ſubinde ſummi Cancellarii munus ademptum, atque in Eberhardum Episcopum Zagrabientem translatum eſt. Notiffima ſub Sigis- mundo occurrit formula: „Datum per manus R. in-Chriſto P. D. Eberhardi Episcopi — aulæ noſtræ Regiæ *ſupremi Cancellarii*. “
- f) Matthiæ Corvini Decr. II. an. 1464. quod *dupli- cis ſigilli munimine fuerit roboratum*, datum eſt per manus NN. *Aulæ noſtræ ſummi Cancellarii*; ejus- dem contra Regis Decr. VI. an. 1486. quod *ſecreti ſigilli* appenſione communitum fuerit, datum eſt per manus NN. *aulæ noſtræ Secretarii Cancellarii*. Etiam poſt tempora Decreti 1536. art. 15. in lite- ris Ferdinandi I. an. 1549. diſcrimen illud inter Summum & Secretarium Cancellarium rite obſer- vatur verbis: Fidelibus noſtris RR. in Chriſto PP. Dominis Paulo de Warda Archiep. Strig. Primati Hung. Legato nato, *Summo Cancellario* ac Locum- tenenti; Nicolao Olaho Episcopo Agrienſi, Con- ſiliario, ac in regno noſtro Hung. *Secretario Can- cellario* noſtro, cet. KAPRINAI MSS. B. II. Nro. 11.
- g) Diplomata, ad hoc demonſtrandum, ſunt ubivis obvia. cf. PALMA *Specimen Heraldicæ* R. H. p. 62.
- h) Wladisl. II. Decr. II. an. 1495. datum eſt per manus R. in Chriſto Patris Domini Thomæ poſtula- ti Agrienſis, aulæ — *Summi & Secretarii Cancellarii*. Exemplis pluribus opus non eſt.

Complexus
observation-
um aliquot
de Cancellariis.

Quæ adhuc de Cancellariis Hungariæ commemoranda sunt, sequentibus complectar observationibus :

1.) Cancellariam Regiam ad initium usque sæc. XVIII. immo ad annum usque 1731. quo Adamus Acsády Episcopus Veszprimiensis (non multo post Comitata Regni 1729.) provincia Secretarii Cancellarii decessit, viri obierunt ecclesiastici, Regibus *fideles & dilecti*. Præter morem ergo superiorum temporum Emericus de Perén tabulis an. 1412. quibus Sigismundus XIII. oppida Scepusiensia Wladislao Jagelloni Regi Poloniae pignore reliquerat, inter plures Regni Hungariæ Barones civilis ordinis, cum axioma *Secretarii Cancellarii* Reg. Majest. subscriptus est. Idem munus sub Ferdinando I. iterum laico quem vocant, Petro Perénio (ISTVÁNFI *Hist. Lib. XIII.* ad an. 1539.) obtigit; quibus addi fortasse posset Steph. de Werbewz, quem Joannes de Zapolya *Summi & Secretarii Cancellarii* honore exornaverat. Hodie ex ordine civili, Secretarii Cancellarii & Vice-Cancellarii per Regem deliguntur, viri meritis juxta ac natalibus clarissimi. Solum summi Cancellarii munus nomenque, nunquam non fuit apud viros Ecclesiasticos primi ordinis, quod, cum Archiepiscopis Strigoniensibus (adjecto etiam Secretarii Cancellarii axioma) perpetuo jam adscriptum sit, perpetuo etiam posthæc in illorum titulis recensebitur.

2.) Ab illo fere tempore, a quo Reges Hung. manu propria literis nomen subscribunt, Cancellariis quoque solemne est, modo qui ho-

hodie observatur, nomina sua illis subijcere a). Utrumque initio fiebat rarius. Sub Matthia Corvino, & proximis duobus ejus successoribus rara proinde ritus istius exempla sunt, qui sub Austriacis demum Regibus perpetuus & constans factus est. Si autem formulam: *Datum per manus, vel per manum N. aulae nostrae Cancellarii*, quæ in Regum nostrorum diplomatis continue post contextum exponitur, cum MABILLONIO pro Cancellarii subscriptione habeas, vulgaris fuit iste Cancellariorum Hungariæ subscribendi ritus, quamvis alterius i. e. scriptoris manu, a sæculo inde XII. immo, mutatis verbis, a Regni exordio. Id mirum est, quandoque non in brevibus tantum Regum rescriptis, sed regni adeo Decretis (conf. Decreta Ferd. I.) post *Datum* nullius Cancellarii vel Vice-Cancellarii nomen comparere. Utrum verba ad alterum monogrammatidis S. Stephani latus in lit. 1001. longioribus literis descripta: *Dominicus Vicecancerarius fecit*; diploma universum, vel monogrammatidis duntaxat picturam respiciant, quæri potest; subscriptionis ea vim habere non est dubium.

3.) Habebant etiam Reginae tam viduæ (*seniores, majores*) quam Regum conjuges (*juniores*) periodis, quæ Austriacam præcesserunt, suos Cancellarios, quos subscriptos invenimus præceptis, immo & privilegiis Reginarum, quæ illis edebant districtibus, oppidis, villis & hominibus, qui proxime jurisdictioni & dominio Reginarum suberant, & de quibus ipsi etiam Reges nihil statuere, nisi cum *consensu* & beneplacito suarum conjugum. Perpetuus harum Cancellarius, cum stipendio 500. marcarum (de

reginalibus redditibus solvendo) testimonio Belæ IV. Regis 1269. *b*) & Ladislai Cuni an. 1276. Episcopus Vesprimiensis erat; etsi quandoque alios etiam honorem hunc tulisse certum est. Magister Akus Albenfis Custos, quem Bela IV. in lit. 1249. (WAGNER *Analect. Scep.* I. 244.) *Cancellarium carissimæ consortis* suæ nuncupat, primus est, qui mihi hoc insignitus titulo innotuit.

4.) A Cancellariis istis & Vicecancellariis, quos hætenus enarravi, differunt *Notarii & Secretarii speciales*, qui Regibus erant ab epistolis, quas horum sigillo annulari muniebant *c*), quorumque rem privatam quodammodo procurabant. Contigit autem sæpiuscule ut mora locum non habente, sigilloque publico & authentico, ob quamcunque demum causam absente, literæ, quæ isto communiri debuissent, tantisper annulari, quale illud quoque fuerit, quo Carolus I. & Ludov. I. inter venandum utebantur *d*), firmatæ sint.

5.) Ad rite explorandam veterum instrumentorum veritatem, utinam suppeteret nobis Cancellariorum Regni Hungariæ plenior & accuratior historia & catalogus illo, quem P. MART. SZENTIVÁNYI suo tempore contexere potuit *e*). Ad leges severioris Criticæ idem concinnatus, prodire deberet, & multo plenior illo, & longe emendatior. Nec Vice-Cancellariorum syllabus negligendus esset, e quorum numero Albenfis Ecclesiæ tot erant Præpositi, ut fuerint, qui Cancellariam Regis ad Albensem Ecclesiam pertinuisse rati sunt *f*).

g) Vidi attamen literas anno 1417. ad *commissionem propriam* Barbaræ Reginæ scriptas, quibus Johannes Vice-

Vicecancellarius subscriptus est, quin Barbaræ Reginæ nomen subscriptum sit. — In medio tergo aureæ bullæ Matthiæ I. Regis Soproniensibus datæ, Secretarii editoris nomen monogrammate incriptum est, quemadmodum id in tergo bullarum pontificiarum xvi medii sæpius observasse memini. Consideratur autem Matthiæ Regis manus propria.

- b) (BAERNKOPF) *de Jure coronand. Reginar.* p. 4.
- c) Elisabetha conjux Ladislai Cumanii in literis 1284. quibus Thomæ Episcopo Vacienti, & ejus fratribus duas villas Comitatus Simegiensis, *ubi reginales Tavarnici morabantur*, contulit, ejusdem merita recensens inquit: „ tempore — Belæ Regis — in „ aula regia *aprocrysiarii & specialis notarii* meruit „ officium exercere, *sub sigillo & ministerio annulari* „ *Regis & Regni negotiis* — insudando. — Post- „ quam vero — incl. Rex Ladislaus *consors ho-* „ *ster charissi*, regalis fastigii thronum conscendit „ & arcem, idem — *Vicecancellariæ officio ante* „ *alios regalis Excellentie Clericos* — meruit insigni- „ ri — consequenter meruit conscendere ad *api-* „ *cem pastorem*. Licet autem divino esset adscri- „ ptus obsequio in officio pastoralis; Moysi tamen „ exemplo — demum vero — per conniventiam „ & instantiam Regiæ Maj. in *nostræ Cancellariæ* „ officium sublimatus, sic se cet.“ Privileg. exstat „ in MSS. HEVENESSI Tom. VV. p. 221.
- d) PRAY *de vet. Regin. Hung. coronandi more* p. 37. WAGNER *Analect.* I. p. 152. 35.
- e) In *Dissert. paralipomenonica rerum memorab. Hungariæ*, quæ prostat in ejus *Miscellaneis curiosis & select.* Dec. III. P. I. pag. 228. 29.
- f) Epistola querula Capituli Alb. ad PP. Gregor. IX. in MSS. ST. KAPRINAI C. Tom. V. Nro. CX. conf. KATONA VIII. p. 566.
- *) Sub Matthia Corvino in literis an. 1464. & 1466. duo eodem tempore celebrantur *Summi & Secretarii Cancellarii*. (KATONA XIV. 720. XV. 158.) Hoc quamvis factum præter omne exemplum non sit, (MABILLON. p. 121. *N. Lehrgeb.* Tom. VII. §. 350.) attamen conjectura nonnisi rationem utriusque ad se invicem definire esset possibile, nisi BONFINIUS (Dec. IV. L. I. p. 429. edit. Poson. 1744.) referret, quid gemini isti Cancellarii potuerint. „ *Re-*
„ *gale*

„ gale sigillum , ait ille , ex compacto senis mensibus
 „ vicissim ab utroque gestatum : scribendi munus sine
 „ controversia hoc modo — ambo gessere “ cet.

§. 195.

De loco, quo
 diplomata da-
 ta sunt.

De loco, quo diplomata data esse scribuntur, & de testibus, qui in diplomatibus Regiis recensentur, prius dicendum aliquid esse putavi, quam ad temporum rationes explicandas progrediar. — Sedes Regum Hungariæ primæ stirpis, more sæculi & exemplo aliorum Regum a), nulli certo fixoque loco erat adstricta, aulaque illorum mobilis fuit atque ambulatoria. Hujusmodi vitam fere desultoriam cum Reges quoque Francorum agerent, plures uibus suis addixerunt *Villas & Palatia*, (castra) quo ex itinere commode divertebant, & ubi, dum opus erat, mox reipublicæ, mox animi recreandi causa, interdum longius etiam morati sunt. Sicubi deerant hujusmodi villæ & palatia, earum vicem supplebant *procuraciones*, quas pendere tenebantur hospiti Regio personæ sacri profanique ordinis. Nec Germaniæ Reges ad sæc. XIV. sedem habebant stabilem, qui itidem provincias imperio suo obnoxias peragrando, palatiis & castris regiis pro hospitio usi sunt, solemniore anni dies in urbibus majoribus celebrantes, in magno procerum & nobilium ad se confluxu, quibus, sacris rite peractis, jus dicebant, quorumque consilio, & consensu in rebus definiendis, quæ ad publica civitatis commoda pertinebant, usi sunt. Diplomatum cujusvis generis, tali tempore & loco, magnum confectum fuisse numerum, me non monente quisque suspicabitur. Hoc ergo etiam
 respe-

respectu præclare de rei diplomaticæ studio meriti sunt, & MABILLONIUS (vel cui caput hoc elucubrandum dederat P. MICH. GERMANUS) & auctor Chronici Gottwicensis, qui loca, quibus diplomata aliquando a Regibus & Imperatoribus data sunt, notarunt, atque de villis, palatiis, curtibusque regiis cum cura commentati sunt. — Eadem vero prorsus Regnum obeundi, sedesque & castra (quæ sæpe locis amœnioribus erant posita, & ob contiguas prægrandes silvas venationi commoda) commutandi ratio, eademque dies festos majores recolendi consuetudo, Hungariæ quoque Regibus familiaris fuerat, domicilio illorum non uni & singulari loco ad Carolum usque I. adstricto. Nonnihil perspicuitatis hinc articulus I. Decreti 1222. accipit, ubi „statuimus, inquit Rex Andreas II. *ut annuatim in Festo S. Regis, nisi arduo negotio ingruente, vel infirmitate fuerimus prohibiti, Albæ teneamur solemnizare b).* Et si nos interesse non poterimus, Palatinus procul dubio ibi erit pro nobis, & vice nostra causas audiet, & omnes Servientes, qui voluerint, libere illic conveniant.“ Nec descensus Regum in prædiis & villis Servientium (nobilium), quem art. 3. ejusd. Decr. prohibet c), & cujus memoria in sexcentis privilegiis recurrit, porro obscuri quid habere potest d). Initio tandem sæc. XIV. Vissegradum, quod Carolus Rob. delegit, perpetuum esse cœpit Augustorum Hungariæ Palatium. Hinc Ludovicus I. imperii sedem subinde Budam transtulit, quæ ad stabilem usque interitum Ludovici II. perpetuo fere Regum & Reginarum Hungariæ hospitio claruit. Budæ Vindobona successit; unde Vien-

na Austriæ pleraque diplomata a Ferdinando I. ad hoc usque tempus data videas. Sigismundi Regis prostant literæ & privilegia, Parisiis, Ferrariæ, Constantiæ, cet. Hungaris concessa, cujus filia Elisabetha vidua, Comaromio pleraque dabat literas. Rationem horum in Historia quæsieris, quam vicissim permultum illustrare deberent itineraria Regum antiquorum, diplomatum præcipue ductu digesta & delineata. — Prostant chartæ omni notatione loci destitutæ, quæ mox negligentiam Notariorum prodere videntur, mox loci nimiam obscuritatem, quo scriptæ sunt.

a) Non possum mihi temperare quin insignem LUCII (*de Regno Dalmatiæ* cet. Lib. II. cap. XV.) de vetere ista Regum consuetudine locum huc transcribam „ Curiam Ducum & Regum (veterum „ Dalmatinorum & Croatorum) mobilem non fixam, fuisse ex Archidiacono & Datis privilegiorum constat, quamvis — — Nonam residentiam Ducum & Regum fuisse dici deberet — — tamen cum pauca privilegia Nonæ data reperiantur, multa autem in Sibenico, Civitate nova, Teneno, Belgrado ceterisque locis Croatiæ, vel penes ecclesias, prope flumina fontesque in locis campestribus; pro Aula commoditate Curias celebratas comprobatur, solemnioribus autem Curiis Regum, Episcopi Dalmatiæ & Croatiæ interveniebant. “

b) Non adsentior illis, qui hoc loco Comitia Regni (Diætam) quotannis habenda decerni existimant, Solemnisare enim hoc loco, cum formula juris ævi intermediî *solemnem Curiam celebrare*, idem est. Erant autem e. c. apud Gallos plures hujusmodi Curia solemnnes, videlicet *curia solemnis Epiphaniæ, c. s. Paschæ, c. s. Pentecostes*, quæ solemnem conventum in festis istis solemnioribus significant, in quo Rex cum Majestate regia & hujus insignibus (unde etiam *curia coronatæ diætæ*) coram Proceribus apparebat (MABILLON. p. 203.), qualis illa quo-

quoque est, quam aurea bulla Caroli IV. Imp. celebrandam præcipit. Quid in solemnioribus hujusmodi Conventibus, sacris cum pompa peractis, regnique Baronibus officiis suis erga personam Regiam defunctis, agendum adhuc restiterit, id diploma Belæ IV. an. 1267. plane declarat, videlicet „ ut — de omnibus damnis & injuriis per quos- „ cunque datis & illatis omnibus querulantibus satisfiat. “

c) „ Nec in domos nec villas (Servientium) descendemus, nisi vocati. “

d) Stephanus V. in privilegio an. 1271. Scepusiensibus concessio: „ cum nos Provinciam intrare acciderit — „ ipsi hospites (ita cives vocabantur, Slavi, Hungari, ut plurimum autem Germani) nostri nobis in itinere dare tenebuntur discessum (descensum?) „ opulentum, & similiter in egressu descensum, „ (discessum?) delicatum, nostræ Celsitudini committentem. “ Levavit illos hoc onere Carolus I. 1328. ita tamen, ut illos ad 1400. marcas argenti ratione terragii dependendas adstringeret, quos Privilegi Stephani V. non nisi 300. solvere jusserrat. Sed nec ineunte jam sæc. XV. civitates liberæ molestæ non minus quam honorificæ obligatione ista solutæ erant; quibus Sigismundus adhuc Decr. II. 1405. art. 13. præscripsit, quam laute ipse, reginalisque Claritas, & reliqui itineris regii comites, a civibus — ni privilegio essent exempti — haberi vellent.

e) Privilegium Andreæ II. Regis in monte Thabor confectum, quod WERBOECZIUS in *Tripart. Part. II. Tit. 14. §. 13.* commemorat, & quod suo adhuc tempore in Comitatu Honthensi conservatum fuisse narrat, ut quondam e doctissimo viro P. CAROLO KOPPI († 1801.) qui illud se inspexisse dicebat, didici, adhucdum in Tabulario vetustissimæ gentis Palasthianæ superest. Quod, siquidem uni e majoribus hujus in præmium rei bene gestæ datum, eundem Jobagyonibus Castri Hunthensis adscriptum fuisse necesse est; etenim legi aliquando diploma Regis Ladislai Cumani an. 1281. quo Almus & Fabianus filios Guze de Palást ab onere Jobbagyonatus Castri sui Hunthensis exempti; nec non Caroli Roberti an. 1327. quo Georgius filius Liphthow de Palást cum fratribus suis itidem e Jobbagyionatu

tu Castrum Hunthenfis exempti, atque nobilibus (servientibus) Regni aggregati sunt.

§. 196.

Testes in Diplomatum
Regiis.

In Diplomatum Regum Hungariæ post Regum nomina & titulos, qui in prologo fulgent, sine dubio vel maxime solemnibus (sæc. XI. XII. interdum eidem prologo inserta) pars illa epilogi est, quæ Episcoporum, Regni Barorum, seu testium voluntatis Regiæ, nomina & honores, nullo crucis aliæve signo præmissis, recitat. Non recensentur autem illi promiscue in omnibus Regum literis, verum, prouti Romanorum Pontificum bullæ, quas *consistoriales* vocamus tantum, a Cardinalibus subscriptæ sunt: ita Episcopi & Barones Regni Hungariæ non nisi in Decretis & privilegiis, ad omnem solemnitatem compositis, sunt obviæ. Huc porro nunquam ipsi manu propria sua intulerunt nomina, quæ sive *præsentes* essent, sive *absentes*, Notarius potius idem inseruit, cujus manu contextus instrumenti reliquus descriptus est. Equidem primis regni temporibus præsentibus illos consilio Regis, (e. c. in curiis solennibus) cum argumentum hujusmodi diplomatum discutiebatur & definiebatur, interfuisse non est dubium *a*); postmodum vero *absentes* etiam *b*), si Comitiorum Decreta eximas, honoris, memoriæ veteris, temporis notandi, majorisque omnino solemnitatis causa privilegiis subscripti occurrunt, subscribunturque adhucque, ita quidem, ut seriem continuam, qua se excipiunt, aperiant Archiepiscopi & Episcopi, (etiam vacantibus sedibus interjectis) sequantur demum Regni Palatinus cum reliquis
Regni

Regni Baronibus, (ordine in vetustis membranis sæpe variante, neglecto si quodpiam vocabat Baronatus officio) recensionem demum testium claudant unus alterque (Supremorum) Comitum, ut plurimum Posoniensis, subjecta formula: *& aliis quam plurimis, (vel aliisque compluribus) Comitatus Regni nostri tenentibus & honores.* Exemplum in appendice inspicias. Hoc unusquisque videt, e simili testium elenco, nova quotidie erui debere, quæ ad Historiam Hierarchiæ Hungariæ, familiarumque antiquissimarum decus demonstrandum pertinent; estque, vel hoc respectu, magnopere omnino dolendum, quod Episcopi, (etiam Abbates & Præpositi) Hungariæ sæc. XI. & XII. more tunc etiam alibi recepto (*N. Lehrs. der Diplom. T. IX. §. 1026.*) sedes suas rarius exprefferint, Baronēs vero sæculares multo adhuc longius cognomina sua reticuerint.

Omnes, quæ in Capitulis & Conventibus sunt expeditiones, a *Capitularibus & Conventualibus (fratribus)* subscribi debent. Id exigit lex novella 1723. art. 10. Fiebat id olim, ut vel e Decreto Regni 1492. art. 44. apparet, negligentius; in literis statutoriis attamen, præcipue si traditionem castrorum & dynastiarum referebant, nec non literis majori pendenti sigillo munitis (privilegialibus) diligentius, quam in aliis literarum generibus. Opus hoc iterum Notariorum erat, qui in Capitulis *Leitores* dicti sunt. Honoris causa addebant isti Capitularium & Conventualium syllabo, interdum memoriam etiam regnantis Principis, Archiepiscoporum, sui que Prælati (*Ecclesiæ curarum aurigante N. reverendissimo Abbate; vid.*

N. Lehrgeb. der Dipl. T. VIII. §. 265. not. D.) vel Episcopi, sed hoc rarius. Sæculo XV. vulgaris hæc fere erat Capitulorum formula: *Datum per manus venerab. viri Domini T. Lectoris & Canonici — Præsentibus N. Cantore &c. vel: præsentibus honorabilibus Dominis, N. Cantore, N. Custode, nec non Magistris N. N. N. ceterisque Canonici fratribus nostris, in Dei Ecclesia jugiter Regi famulantibus semperiterno „ vel: Deo in Ecclesia prædicta jugiter famulantibus.* In antiquioribus chartis simplicior fuit illa aliquantum, atque brevior: e. c. *Datum per manus Magistri Petri Lectoris Quinqueecclesiensis, anno gratiæ 1191. mense Martio, Jurcone Cantore, Teodoro Custode, Wenczlao Decano, ceterisque quam pluribus ibidem existentibus.* SPIESZ l. c. P. I. p. 142.

a) Ut subscriptiones proprie tales in privilegiis antiquissimis præfermittam, testantur hoc formulæ: *Datum præsentibus — in præsentia Episcoporum & Comitum quorum nomina hæc sunt — vel, ut Steph. III. literæ quas autographas inspexi habent: coram quibusdam Primatibus, videlicet. —* Sed quod præsentibus tantum subscripserint, perpaucos in antiquis privilegiis interdum expressos videas.

b) Magna ubique in Europæ archivis superest instrumentorum etiam privatorum copia, in quibus testes ut præsentibus nonnisi adducuntur, quin manu propria sua nomina subscripserint. Origo moris e lege romana repetenda est, quæ nullam esse differentiam statuit, utrum subscripserint testes, an præsentibus eis instrumentum compositum esset. Vid. *N. Lehrgeb. der Diplom. VII. §. 183.* „ Adscribebantur vero in notitiis privatis testium nomina — inquit MABILL. p. 252. — ut emergente controversia consuli potuissent in annos triginta, quo temporis spatii legitimæ possessionis titulus præscriptione inducebatur. Commemorantur adhuc ibidem interdum testes per aurem tradi, per aurem conducti (testes auriti), immo & pueri, quos memoriæ causa plagis cadere moris erat. „ Qui „ (puer)

„ (puer) cum requireret, cur sibi permaximum
 „ colaphum dedisset? Respondit: quia tu junior me
 „ es, & forte multo vives tempore, erisque te-
 „ stis hujus rationis, cum res poposcerit“ MABIL-
 LON *Ann. Bened.* T. IV. ad an. 1154. p. 393.

§. 197.

Ad notas chronologicas, seu data quæ Chronologia vocant diplomatum (sunt qui *datum loci* a diplomatica *dato temporis* distinguunt) explicanda jam progredior, materiam scitu omnino necessariam illis, qui monumenta scripta superiorum temporum qualiacunque intelligere, atque explicare cupiunt. De loco & tempore, quo quid actum est, prima esse debet inquirentis in rei veritatem quæstio. Accedit, in temporum notis adscribendis, sæpius quam alibi, se prodidisse falsariorum imprudentiam & nefariam aliis imponendi libidinem; quod ceu mendaces, ubi ad tempus diplomatis confingendum jam perventum erat, mendacii parum memores, ab eo, quod prius statuerant, turpiter deflexerint. Quo difficilius autem caput hoc videri pluribus potest, eo plura nobis subsidia ad illius intelligentiam suppetunt; præter illos enim, qui vel in Mathesi, quam applicatam dicimus, de temporum astrorumque ratione disputarunt, vel singularibus etiam operibus in temporum decursus commentati sunt, e. c. PÉTRAVIUS alii; — fuerunt etiam, qui magno labore & diligentia fastos inprimis ævi medii, accommodare ad artem diplomaticam interpretati sunt. Hos ergo consulat, qui plura, quam hic daturus sum, desideraverit.

*) Auctores, qui omnem Diplomaticam complectuntur, non possunt non rem chronologicam ævi medii attin-

gere etiam. Illorum autem, qui libros singulares de Calendariis potissimum medii ævi emiserunt, præcipui sequentes sunt:

CHR. GOTTL. HALTAUSII *Calendarium medii ævi, præcipue Germanicum, in quo obscuriora mensium, dierum festorum ac temporum nomina, ex antiquis monumentis illustrantur — in usum Historiæ, ac rei diplomaticæ.* Lips. 1729. & 1772. 8.

J. JAC. RABE (+ 1798.) *Calendarium festorum, dierumque mobilium perpetuum, in usum Chronologiæ historicæ.* Onoldi 1735. 4.

L' *Art de vérifier les Dates des Faits historiques, des Chartes, des Chroniques, & autres anciens monumens; nouvelle édition, revue, corrigée, & augmentée par un religieux Benedictin de la Congregation de S. Maur.* a Paris 1770. 2. Voll. in Fol. Editio tertia eximii hujus operis, Parisiis 1783. volumine tertio auctior prodiit. Pro compendio hujus haberi quodammodo potest:

ANT. PILGRAM *Calendarium chronologicum, medii potissimum ævi monumentis accommodatum.* Vien. 1781. 4.

JOS. HELWIG'S *Zeitrechnung zu Erörterung der Daten in Urkunden für Deutschland.* Wien 1787. Fol.

Quibus addi possunt insignes duo libelli rem chronologicam etiam medii ævi illustrantes:

JOS. CHRISTOPH. GATTERER'S *Abriss der Chronologie.* Götting. 1777. 8. &

Anleitung zur Zeitkunde; herausgegeben von GEORG Freyh. v. VEGA. Wien 1801. 8.

§. 198.

Calendarium

Julianum &
Gregorianum.

Calendarium emendatum, quo hodie utimur, *Gregorianum* appellamus, *Julianum* (a Julio Cæsare, ad quem cum simul Pontifex esset maximus, fastorum cura pertinuerat) vocatur illud, quo veteres per decursum ævi inter medii ad annum usque 1582. usi sunt. Utriusque a se invicem discrimen nosse nostra interest. Absolvebatur autem annus Julianus diebus 365 + 6. horis, fuitque anno vere solari (cuius Astronomia celeberr. LA LANDII edit. 1792.

dies

dies 365 + 5. horis + 48' + 48" tribuit) 11' + 12" longior. Hæc differentia quamvis ad speciem levis esse videatur, major attamen post plurium sæculorum decursum, atque molesta existere debuit. Enimvero summa illius excrementi ab anno post C. N. 325. quo Patres Concilii Nicæni id, quod hæctenus redundabat, resecaste creduntur, ad annum usque 1582. summæ 10. dierum par, æquinoctium vernale verum, quod dicti Patres semper 21ma Martii fore rati sunt, ab hoc suo limite ad 11man usque Martii jam retraxerat; ut metuendum adeo fuerit, ne excremento illo continuo adulescente, Pascha, quod e decreto Concilii Nicæni celebrari debet die dominico, sequente plenilunium ab æquinoctio verno proximum, progressu temporis in Januarium Februariumque, & longius adhuc recidat. Hinc tolli prius insignis illa differentia debuit, caveri deinde, ne unquam amplius eadem temporum rediret confusio. Utrumque præstare conati sunt Astro-nomi, (inprimis ALOYSIUS e gente LILIA) quorum opus Pontifex Gregorius XIII. bulla (*Inter gravissimas*) an. 1581. sexta Kal. Martii hanc in rem edita, (vid. *Bullarium roman.* edit. COCQUELINES Tom. IV. P. IV.) abrogato veteri seu Juliano Calendario, in omnibus christianis civitatibus substitui voluit. Fuerunt, qui mandato huic obtemperantes, modo in bulla præscripto, ejēctis mense Octobri anni 1582. (qui annus correctionis dictus est,) decem diebus („ inclusive a tertia Nonarum usque ad pridie Idus“) Octobris 4to, continuo 15tum succedere passi sunt; fuerunt, qui id facere distulerunt longius a). Hungaria ad annum 1588. usque cunctata est,

nec nisi Comitiorum auctoritate ad dimittendum Calendarium priscum moveri potuit. Hoc modo æquinoctium vernum ad sedem suam pristinam (21. Martii) reductum est: unde, ne unquam ab excessu anni Juliani supra solarem dimoveri possit iterum, (excessus ille intra annos 400 est = 3 d. 2 h. 40') decretum est, ut inter annos sæculares quartus tantum quisque bissextilis esse debeat *b*). Hinc vero factum est, ut e. c. a Russis, quibus Calendarium vetus adhuc placet, hoc sæculo jam diebus 12. dissideamus *c*); cum anni 1700. 1800. illis intercalares, nobis communes fuerint: anno 1900. unitate crescet ista eadem differentia iterum, non item anno 2000. quippe qui utrisque bissextilis erit.

a) Evangelici in Germania, Britannia, Suecia, cet. Calendarium Gregorianum ad sæc. usque XVIII. non admiserunt. Græci vero cum uniti, quos dicimus, tum disuniti in Hungaria, ad hoc usque tempus Calendarium vetus e privilegio retinent.

b) Superabit ergo annus Gregorianus solarem post 400. annos h 2. 40' post annos 3600. vero die 1. Ad hoc discrimen tollendum, conservandamque utriusque anni concordiam, annus 5200. e lege Greg. Calendarli bissextilis, communibus accensendus erit. Conf. *Anleitung zur Zeitkunde* §. 26.

c) Est autem operæ pretium hanc *styli veteris* a novo notare differentiam, quam in fœderum tabulis & annalibus, hac formula vulgo expressam videris:

Elisabetha Russ, Imp. mortua est :	1761. 25. Dec.
	1762. 5. Jan.

§. 199.

Anni exordium.

Non omnibus ætatis intermediæ populis christianis idem erat anni principium; statuebantur potius plures, ab aliis alii, anni communis

munis termini, qui in temporum rationes inquirentibus persæpe crucem figunt. Sed neque mirum est Christianos a diversis diebus festis anni cepisse auspicia, cum aliis dies incarnationis Dominicæ, seu Festum annunciationis B. V. aliis dies Domini natalis, aliis resurrectionis illius, (e. c. Gallis sæc. XIV.) aliis iterum circumcisionis, seu vetus annum exordiendi ratio, per Jul. Cæs. a Calendis Januariis ducta, videri poterat solemnior atque commodior. Senatus Venetus ad novissima usque tempora Calendas Martii pro anni incuntis termino habuit. DIONYSIUS equidem EXIGUUS, Abbas Romanus, qui sæc. VI. primus æram christianam vulgarem eruderavit, per BEDAM VENERABLEM subinde in libros annales introductam, postea in Regum & Imperatorum diplomata etiam admissam, initium anni ab incarnatione Domini, seu 25ta Martii repetiit: ejus attamen auctoritas nihil obstitit, quominus alii alios anni terminos constituerent. MABILLON *de Re dipl.* Libr. II. cap. XXIII — XXVIII.

- *) Bullæ Pontificum, quæ materias graviores spectant, annos computant ab incarnatione; ita tamen, ut in bullis vetustis non item recentioribus, sæpius annus incarnationis a nativitate Domini desumatur. Poterat ergo Concilium Tridentinum absolvi 4. Dec. 1563. confirmari autem die 26. Januarii ejusdem anni 1563. nec anni posterioris emendatione vel potius corruptione opus erat, cū se reos fecerunt, stylum romanum ignorantes editores Concilii, diæci Colonienfes anno 1587. — FONTANINI *Vindiciæ antiquor. Diplomatum* p. 248.

§. 200.

Apud Hungaros prioribus post S. Stephanum sæculis, Natalis Domini, vel huic proximo

Anni exordium apud Hungaros.

mus primus Januarii dies annum aperuit. Equidem antiquissima Regum Hungariæ diplomata ad Belam IV. usque constanter in tempore notando annum incarnationis J. C. commemorant, ut ultra formulam vulgarem illam: *Datum anno ab incarnatione Domini* nihil inquirens, principium anni apud veteres Hungaros cum HELWIGIO a die 25. Martii facile repetat, idemque non nisi indice formula, a fine sæc. XIII. iterum vulgari, *anno Domini* cet. in die 25. Dec. vel ima Januarii defigat a). At mihi rem longius scrutanti, in instrumentis domesticis vetus formula incarnationem Domini referens, cum abbreviata illa annum Domini exhibente, ejusdem potestatis esse videtur, utraque vero nativitatem Salvatoris seu 25. Decembr. cui progressu temporis in anno auspicando Calendæ Januariæ substitutæ sunt, respicere. Obtinuisse vero hanc normam loquendi, annosque computandi in Hungaria, ROGERIUS testis est, qui in *miserabili Carmine* cap. XIV. inquit. „Anno igitur Domini (paulo antea eundem annum „1242. ab incarnatione Domini nuncupaverat) „*evoluto*, — *circa nativitatem Domini*, fama „fuit cet. “ — THUROCZIUS fatalem Carolo parvo diem indicturus ait: „Erant tunc rigidi mensis Februarii dies — *dominicæque incarnationis* mille trecentos octoginta post annos „nos quintus *novo volumine* currebat “ cet. Utrum hoc loco 25. Dec. vel potius I. Jan. anni initium statuatur, dubitari potest, quod tempore coronationis Alberti Regis 1438. a Calendis Januariis Hungaros duxisse, ex eodem THUROCZIO certum est: „Albertus, inquit ille, „*prima novi tunc subsequenti die anni*, *domi-*
„ *nica*

„ *nicæ scilicet circumcisionis celebri in festo* — —
 „ *existit coronatus.* “ Neque vero hic usus loquendi Hungaris tantum erat proprius; prostant enim ævi illius instrumenta cum e curia Romana, tum in Germania edita *b)*, quæ quamvis annis incarnationis insignita sint, a Natali Dominico tamen annum passim incipiunt. Diplomata sæc. XI. & XII. plura apographa, hac chronotaxi servata, feliciter, ubi opus erat, emendarunt RR. VV. PRAY, inprimis KATONA *c)*. Huc adhuc pertinet illud, in antiquissimis Festorum Hungariæ recensitionibus, non a 25. Martii, sed 25. Decembris vel ima Januarii fieri exordium *d)*. Non ob stare potest igitur diversitas formularum anno ab *incarnatione Domini*, & *anno Domini*, quæ posterior compendiose priorem exprimit, quarum utraque antiquissimi annales domestici apud THUROCZIUM promiscue utuntur, & quæ in chartis etiam & diplomatibus sæculi XIII. (a Belæ IV. tempore) & XIV. nullo discrimine habito sunt adhibitæ *e)*.

a) HELWIGIUS l. c. p. 67. 68. inter utramque annos consignandi rationem, annum 1259. terminum normalem intermedium constituit; ad assertum autem comprobandum, nihil præter diversitatem verborum in utraque formula attulit.

b) MABILLON l. c. p. 173. 186. DUFRESNE voc. *annus*. MURATORIUS in *Antiqq. Ital.* Tom. III. p. 779.

c) Id mirum est, RR. KATONA, e. cujus Historia critica me multa didicisse ultro lubensque fateor, in tempore definiendo, collatis Scriptorum inter se testimoniis, diversam apud diversas nationes annum auspiciandi consuetudinem, interdum minus, quam lector expectasset, urxisse: e. c. Tom. XI. p. 455.

d) In Synodo Szabolchensi sub S. Ladislao Rege anno 1092. habita, Canone 38. dies festi per Hungariam celebrandi enumerantur, quorum primus est *Nati-*

vitas

vitae Domini. Vid. Decr. S. Ladisl. in *Corp. Jur. Hung.* & apud PETERF in *Conciliis R. H.* P. I, p. 34. Gertrudianum porro Calendarium, quo S. Elisabetham Andree II. filiam usam esse dicunt, (exstat in Com. FRID. ALTHAN libro *de Calendaris*, Venet. 1753. 8.) a circumcisione Domini anni & festorum desumit exordium. PILGRAMUS l. c. pro dioecesi aliqua Germaniae illud concinnatum esse censet; Germaniae certe provinciae pleraque, juxta cum Hungaris annum 25. Dec. orsa sunt. ECKHARD *Introd. in rem diplom.* p. 178.

- e) Vide diplomata Caroli Rob. anni 1310. apud NIC. SCHMITTH in *Episc. Agr. I.* p. 220. & anni 1312. in CAR. WAGNER *Analectis Scepustii I.* 120. Ab eodem WAGNERO p. 313. diploma recitatur Scepustiensis Capituli, editum anno incarnationis Domini 1323. Vidi ipsemet aliquando literas, quarum introitus erat: *Nos Thomas Waivoda Transilvanus significamus — quod cum anno incarnationis Domini MCCCXL secundo, in quindenis festi B. Georgii cet.* Quid? Quod Ludovici I. Regis literae annos incarnationis interdum commemorant, e. c. Datum anno verbi incarnati 1346. in die coenae Domini. KAPRINAI MSS. C. Tom. V. Nro. 13.

§. 201.

Indictio.

Ante annos incarnationis, Latinis Romano imperio subjectis, in usu erant *Consulatus* imprimis & *Indictio*. Et a ratione quidem secundum Consules, annos suos computandi, difficulter desueverunt Romani; indictio vero jam æra christiana recepta, diutissime adhuc cum inter reliquos Europæ populos, tum Hungaros etiam, saltem prioribus sæculis viguit a). Est autem *Indictio* cyclus seu spatium quindecim annorum Julianorum perpetuo in se rediens, cujus initium reductum ad aram christianam, hanc tribus annis antevertit. Ad annum ergo Christi in diplomate expressum tribus additis, summaque per quindecim divisa, residuus

duus numerus indicabit, quotus annus Christi respondeat indictioni, quam diploma habet. Idem memorialium versuum sensus est:

*Si per quindenos Domini diviseris annos,
His tribus adjunctis, indictio certa patebit.*

Si nihil excedit, quindena indictio currit.

Triplicem autem vulgo distinguunt, *constantinopolitanam* seu *græcam*, Imperatoribus Orientis & Scriptoribus Historiæ Byzantinæ propriam, quæ a Calendis Septembris confurgit; *constantinianam* (a Constantino M. procul dubio ita dictam, cujus imperio indictionum omnium usus vix est antiquior) seu *cæsaream*, Germaniæ Augustis aliquando familiarem, quæ ab VIII. Calend. Octobris (24. Sept.) & *pontificiam* seu *romanam*, quæ a calendis Januarii proficiscitur, a Pontificibus rom. saltem pleisque frequentata. Variant autem in actis & diplomatibus ævi medii indictionum genera varie, tam in Gallia & Romæ, b) quam in Hungaria. In diplomate S. Stephani 1001. indictio vel græca, vel quam cæsaream dicunt, intelligenda est; in aliis instrumentis domesticis communiter pontificia obtinet. Inscripta est adhæc multis literis ævi illius, (e. c. quibusdam quas LUCIUS vulgavit,) præcipue apographis, falsa indictio c). Singulare vero indictionis vitium est illud, quod non paucas irrepsit literas, quæ anno X. Pontificatus Innocentii III. scriptæ sunt. Cum hoc enim anno certum est indictionem decimam convenire, & tamen in pluribus anni dicti, nimirum Pontificatus decimi, epistolis, pro decima indictione, errore scribæ nona ponitur. MABILLON l. c. p. 623.

a) S. Stephani & Regum subsequentium sæc. XI. & XII. diplomata complura indictionem habent pro nota temporis: e. c. Datum anno Domin. incarn. MI. *indictione* XV. — Datum (dipl. fund. Episc. Quinqueecl.) X. Kalendas Sept. *Indictione* VII. anno Domini MIX. In publicorum Notariorum instrumentis hæc tempus notandi ratio longissime obtinuit, e. c. „ Omnibus — pateat evidenter, quod „ anno a nativ. Domini 1587. *Indictione decima*, die „ vero 7. mensis Nov. hora tertiarum, Pontifica- „ tus “ &c.

b) MABILLON, l. c. p. 179. conf. DUFRESNE voc. *Indictio*.

c) Vid. passim Tomulos *Hist. Crit.* ST. KATONA, Conf. PILGRAM l. c. p. VII.

§. 202.

Alli caracte-
res chronolo-
gici.

Præter indictionem exstant in chartis ævi intermediarii, præcipue illis, quæ res ecclesiæ respiciunt, varii adhuc characteres chronologici, videlicet *Epactæ*, *Concurrentes*, *Terminus paschalis*, alii. Inductionem istorum characterum MABILLONIUS putat duabus ex causis accidisse. Primâ, ne facili negotio notæ chronologicæ falsis diplomatibus ab imperitis supponerentur; secundâ, ut Notarii peritiam suam ostentarent in arte computi, quæ ars magnopere tum venditabatur, & a Clericis ordinandis exigebatur a). Quamvis igitur diploma quod temporis nota caret, repudiandum statim esse non existimem, præ aliis tamen severiori censuræ obnoxium sit, necesse est. KOLLERUS (*In Hist. Ep. Q. T. II. p. 93.*) domestica instrumenta sine die & consule edita plura commemorat, quorum aliqua nec mihi ignota sunt. — Ceterum primorum non nisi Hungariæ Regum temporibus consuetudo notas illas coacervandi viguit, quæ subinde sæculo XII. ad finem ver-

gente & initio XIII. e diplomatibus regiis majori ex parte extrusæ, aliis locum fecerunt notis temporum, quas jam summam attingere hujus loci est. Cum vero vetustissima diplomata, juxta cum nationibus aliis, pleraque secundis tantum curis descripta habeamus, cavendum erit omnino, ne ob leve Indictionis, Epactarum, aut Concurrentium vitium diplomati falsitatis notam affingas. Nullibi quam in numeris describendis facilius labimur.

a) Placitum S. Ladislai Regis an. 1093. (KATONA l. c. II. p. 628.) his notis chronicis a Capellano Regio destinatum est: *Anno Dominicæ incarn. millesimo nonagesimo tertio, Epacta XX. Concurrentibus V. Indictione I. Dominicæ resurrectionis, quindecima Kalendas Maii.* Aliud Colomanni Regis diploma (LUCIUS l. c. p. 114.) datum est: *anno Dom. incarn. MCXI. Indict. IV. Epacta IX. Concurrentibus (6.)* Originale diploma Belz cæci, (Tab. II. Nro. 2.) ita terminatur „*Acta sunt hæc anno dominicæ incarnationis MCXXXVII. epacta XXVI. concurr. IIII. celebrato pascha III. idus April.*

§. 203.

Dierum subscribendorum in chartis & De mensibus, libris ævi mediæ non una ratio observata & diebus. fuit; in illis enim adnotandis, cancellarii & auctores, primum quidem calendarium Romanum, subinde ecclesiasticum, tandem nostrum dies exprimendi morem secuti sunt. Sed nec illa menses partiendi, diesque computandi consuetudo omittenda est, quæ non Italis modo & Gallis, verum provinciis etiam Hungaris Italianam respicientibus aliquando placuit; qua nimirum menses in duas distinxerunt sectiones, sumto primæ mensium partis initio, a primo mensis die, alterius vero a decimo sexto. Prior

men-

mensis ita divisi pars dicebatur *mensis intrans*, posterior *mensis exiens*, *stans*, vel *cessans*. Diversus autem fuit utriusque partis numerandæ & computandæ modus. Nam prima mensis pars ordine consueto dinumerabatur, sumto a primo ejusdem die principio usque decimum quintum: altera autem, sumto ab ultimo mensis die initio, ordine retrogrado, non a calendis & a primo succedentis mensis, ut apud Latinos; ita ut decimus sextus fuerit ultimus secundæ partis. Vid. DUFRESNE *Glossarium* voc. *mensis exiens*. Ex LUCII l. c. hæc duo exempla adfero: *In Christi nomine amen. Anno incarn. ejusdem 1284. Indict. 13. die 11. intrante mense Decembris.* — *Anno Dominicæ incarnationis 1243. Indict. 2. mense Novembr. die 3. exeunte.* — Nec exempla desunt, in quibus solius mensis, neglecto dierum numero, fit mentio: e. c., Ego „ Stephanus (II.) — anno Dominicæ Incarn. „ 1124. indict. 2. mense Julio, nono anno regni „ mei “ vel diei tantum, e. c., Ladislaus (Cum.) „ cet. datum in Zolum, quinto die S. Regis Ste- „ phani. “ — Sed hæc rarius.

§. 204.

Calendarium
Romanum.

E scholis Calendarium Romanum mature in diplomata, & annales medii ævi traductum est. Et in illis quidem, a Caroli M. tempore, fere dominatum est ita, ut usus ejus in aliis regnis maturius, in aliis serius intermissus fuerit. In Hungaria sæc. XIII. usus Calendarii Sanctorum inolevit quidem, attamen sæc. XIV. & XV. etiam, non pauca exstant diplomata, in quibus more Romanorum prisco menses diesque adhuc connotatos cernimus. In libris gram-

mati-

maticis, nec non lexicis quibusvis expositum illud videas, cujus constructioni hic longius immorando, vix operæ pretium facerem. Nemo non meminit, duodecim illud complecti menses, quorum si mensuram vel e versibus hisce tibi cognitam habeas:

*Junius, Aprilis, September, itemque November
Ter. denos numerant, uno plus quilibet alter
Mensis; videnos tantum Februarius octo.*

*At si bissexius fuerit, superadditur unus,
Et nunc bissexto Marti conscribe Calendas.*

ex sequentibus reliquum structuræ Calendarii Romani patebit artificium:

Prima dies mensis cujusque est dicta Calenda;

Majus sex Nonas, October, Julius, Et Mars;

Quatuor at reliqui. Dabit Idus quilibet octo.

Inde dies reliquos omnes dic esse Calendas,

Quas retro numerans, dices a mense sequente.

Experientia vero docti, quam impeditus sit usus Calendarii latini, ignoscamus Notariis & librariis mediæ ævi, qui in illius usu sæpe lapsi sunt a). TROMBELLI (*La Diplomatica*, p. 80.) putat, in chartis genuinis loco formulæ *pridie Calendas* sive *Calendarum*, intra annos 1000 — 1400. constanter *secunda Calendas, secunda Nonas* cet. scriptum esse. Mihi vero ad manus est originale diploma Caroli Rob. ab omni fraudis suspitione liberum, datum anno Domini M. CCC. decimo quinto, *pridie Nonas Januarii* b).

a) Legi Ludovici I. literas scriptas *edava Nonas Novembris* 1369.

b) Idem Carolus patrimonium Feliciani regicidæ, donavit Joanni filio Alexandri filii Cselén vices gerenti Magistri Dapifer. Domina Regina, *pridie Calendarum Martii* 1356. Vidi & tertium adhuc instrumentum datum *pridie Idus Maii* 1524.

Calendarium
ecclesiasticum.

§. 205. Jam sæculo XII. quamquam, ut communiter fere fit, initio rariuscule, in diplomatibus cum publicis tum privatis, tempora nominibus Sanctorum & dierum dominicorum distinguere coepta sunt; subinde vero sæc. XIV. XV. XVI. vulgaris fuit ista, dies a festis Sanctorum & Dominicis computandi ratio. Erat nempe hæc sacerdotibus, e quorum classe Cancellarii desumbantur, familiaris; eademque Regibus etiam, qui inter anniversaria festorum solemnia, plurima elargiebantur privilegia, se non quæsitæ offerre debuit. Id mirum videri potest, Pontifices Romanos in suis bullis abstinuisse hoc dies computandi more, quippe qui in illis constanter fastis Romanis usi sunt. Est vero Calendarium ecclesiasticum alterum *festorum mobilium*; alterum *immobilium* seu *fixorum*. Festa *immobilia* seu *fixa* sunt, quæ quotannis in eisdem mensium dies cadunt. Huc pertinent omnia illa, quæ Sanctis & Martyribus sacra sunt, dies item nativitatis Christi, circumcisionis, alii. *Mobilia* contra appellantur, quæ non eodem mensis die semper recurrunt, verum una cum die paschatos porro retroque moventur. Ejusmodi sunt omnes dies dominici, Bachanaliam item, dies Cinerum, Viridum, Parasceves, Ascensionis, Corporis Christi, cet. Intelligi hæc cum ratione nequeunt, nisi cycli solaris & lunaris veterum brevis præmittatur notitia.

§. 206.

Cyclus literarum
Dominicalium.

A longissimo inde tempore, potissimum in Occidente, singuli hebdomadis dies primis alphabeti-

phabeti characteribus A. B. C. D. E. F. G. designabantur, litera A. diei cujuslibet anni primo propria. Quæ ita diei dominico anni primo obtingebat, *Litera* vocabatur *dominicalis*, distinguens omnes etiam reliquas anni dominicas. Fuit autem, hac semel constituta, facilis ceterarum literarum dispositio, quæ serie continua per dies hebdomadis decurrebant reliquos, dominicalibus literis retrogrado ordine a), se excipientibus. Utræque e mente Dionysii, qui illas in Calendarium Julianum introduxit, post annos 28. in eosdem dies reciderunt iterum, idemque literarum ordo pro certo rediit. Hinc *Cyclus Solis* natus est, vel *Cyclus* potius *literarum dominicalium* hodieque usitatus, definitus 28. annorum numero, cujus retroacti initium, in nonum ante æram christianam annum, eumque bissextilem incidit. Literæ scilicet eadem in eosdem hebdomadis dies quotannis restituerentur, si annus solaris 364. diebus absolueretur, seu rotunde 52. septimanas caperet. At quia annus communis 365. dies censet, ideo anno quolibet exacto, litera quævis in sequentem diem promoveri debet; hocque modo literæ dominicales post annos septem ad primas suas sedes redirent iterum. Cum autem quilibet annus bissextilis sit 366. dierum, qui 52. hebdomadas & duos dies complectitur; hinc fit, ut anno quovis quarto literarum dominicalium ordo denuo perturbetur; qui non nisi post $7. 4 = 28$ annos restituitur. In anno communi, una eademque litera dominicalis per totum annum valet; sed in anno bissextili duæ literæ dom. requiruntur, quarum altera dies dominicos ante 24. Febr. signat, al-

tera vero sequentes indigitat. Tabella hæc omnia demonstrat clarius.

1.	GF.	8.	E.	15.	C.	22.	A.
2.	E.	9.	DC.	16.	B.	23.	G.
3.	D.	10.	B.	17.	AG.	24.	F.
4.	C.	11.	A.	18.	F.	25.	ED.
5.	BA.	12.	G.	19.	E.	26.	C.
6.	G.	13.	FE.	20.	D.	27.	B.
7.	F.	14.	D.	21.	CB.	28.	A.

Vix opus est, ut modum, quo invenitur, quotum in cyclo solis locum annus Christi datus teneat, ostendam; qui, ut ex paulo ante dictis intelligitur, 9. additis & 28. divisus, residuum relinquit, quod anni dati cyclum solarem, huicque in tabella appositam dominicalem literam indigitat. Si nihil sit post divisionem reliqui, 28. cyclus solis est. — Cyclus hic solis in annis Julianis perpetuus, anno 1582. diebus decem ejectis, reformatus est, substituta litera dominicali C. in locum dominicalis G. quæ tunc in 7. Octobris inciderat; ut proinde 4. Oct. dies Jovis fuerit cum lit. D; 15. Oct. dies Veneris cum A; quam Saturni cum B, Dominica vero cum C. sequutæ fuerant. Cum porro tres anni sæculares, qui bissextiles esse deberent, communes sint, una eademque litera dominicali contenti; mutatione cycli iterum opus est, quotiescunque annus communis loco bissextilis decurrit. — Brevius ita: an. 1582. exemptis ex Octobri 10. die-

diebus, litera dominicalis Juliana G, sedes literarum 10, vel potius 3. non nisi, (abjectis 7. seu hebdomade intercalari) præterit, saliendo a suo loco ad C. — Distantia ergo lit. Dom. Julianæ a Gregoriana erat = 3. mansitque eadem ad annum usque 1700. quo facta est = 4. ab anno 1800 = 5. Ut adeo cum anno 1802. lit. dom. Jul. sit E. hæc in quintam sedem promota (exemptis intermediis F. G. A. B.) Gregorianam C. edat necesse est.

- a) Cum enim annus communis ex 52. septimanis + 1. die componitur, idem, si e. c. incepit die Veneris, die Veneris etiam terminabitur; & cum 1. Januarii sit semper A, eodem anno communi etiam 31. Decembris sit A, necesse est. Fuit porro eodem anno Juliano litera dominicalis C, cui sequente (retrogrado proinde ordine) successit B; si vero bissextilis erat A. Et sic reliquæ.

§. 207.

Post undeviginti annorum orbem (cyclum) Numerus aureus. novilunia & plenilunia in eisdem anni dies denuo cadere, vulgaris fuit veterum opinio a). Hoc spatium annorum XIX. *Cyclum lunæ* appellabant, qui æram christianam vulgarem anno simplici prægressus est; numerum vero cuique cycli istius anno respondentem, *numerum* vocabant *aureum*, qui si annus Christi datus unitate auctus per XIX. dividatur, e residuo manifestus fit. Aureum autem dixere veteres, vel quod in Calendariis auro depictus fuerit, vel ob usum, quem illis in Paschate anni cujuslibet Juliani inveniundo præstiterat maximum. Indicabat enim idem dies, in quos totius anni cadebant novilunia, quibus cognitis, plenilunia, ipsumque plenilunium ab æquinoctio vernali

proximum jam patebant, atque adeo Pascha etiam determinatum erat (§. 198.). Si annus, quo DIONYSIUS PARVUS forte *cyclum* hunc *metonicum* usibus christianorum accommodavit, (532.) in eodem isto cyclo primus repertus est, ac proinde 1, (aureus quippe numerus) 23. Januarii in Calendario adscribebatur, quo primum anni in cyclo primi novilunium exstitit; a 24. Jan. dies 29. collecti (in anno lunari enim 354. dierum, menses alternatim nunc 30. nunc 29. dies accipiunt) indicarunt novilunium alterum, 21. Febr. nempe, iterum numero aureo 1. distinctam; a 22. Februarii 30. diebus computatis novilunium tertium 23. Martii (iterum 1. notanda; numerus aureus enim omnibus anni mensibus communis est) prodiit. Huic, cum 14ta lunæ redeuntis die semper plenilunium exspectarent, addebantur dies 13. apparuitque 5. Aprilis, quæ tunc dies lunæ erat, plenilunium fore, quod cum esset primum post æquinoctium vernale, diem, in quam inciderat, *Terminum paschalem* vocavere, dieque dominica proxima seu 11. Aprilis Pascha actum est, cujus celebratio ad evitandum cum Judæis concursum, differri in alteram Dominicam Decreto Concilii Nicæni debuit, quotiescunque fere plenilunium paschale incidisset in diem Domini ita, ut paschalis dies simul cum Judæis transigendus esset.

- a) METON Astrologus Atheniensis (circ. an. 432. ante C. N.) cycli istius 19. annorum, quo solis lunæque motus conciliare conabatur, auctor est, quem DIONYSIUS PARVUS postea adaptavit in ordinandis temporum rationibus, pro christianorum usibus. A Calendarii Juliani reformationibus hic cyclus in paschate exquirendo derelictus est,

est, quod idem elapsis annis 508. (aliis: 512.) non amplius restituit novilunia & plenilunia ad eosdem anni Juliani dies, verum die 1. anticipat; a tempore ergo Concilii Nicæni ad annum usque 1582. diebus 4. lunam reduxerit.

§. 208.

Abbreviavit laborem, pascha anni Juliani ^{Laterculus Pa-} ratione præscripta exquirendi, quicumque ^{schalis.} *Laterculus paschalis*, quem hic subjiciam, auctor fuerit, in quo cuique cycli lunaris anno, *terminus paschalis* adscriptus est, adjecta *litera characteristica*, quæ diem hebdomadis, in quem plenilunium istud cadit, indicat, & quæ, inventa jam litera dominicali, negotio facili eruitur. — Illius schema sequens est:

Num.	Termin.	Litera	Num.	Termin.	Litera
<i>aureus Paschal. charact.</i>			<i>aureus Paschal. charact.</i>		
1.	5. Apr.	D.	11.	15. Apr.	G.
2.	25. Mart.	G.	12.	4. Apr.	C.
3.	13. Apr.	E.	13.	24. Mart.	F.
4.	2. Apr.	A.	14.	12. Apr.	D.
5.	22. Mart.	D.	15.	1. Apr.	G.
6.	10. Apr.	B.	16.	21. Mart.	C.
7.	30. Mart.	E.	17.	9. Apr.	A.
8.	18. Apr.	C.	18.	29. Mart.	D.
9.	7. Apr.	F.	19.	17. Apr.	B.
10.	27. Mart.	B.			

*) Cum 21. Martii, & 18. Aprilis (quæ mense lunari, seu 29. diebus a se invicem distant) sint extremi paschales termini; apparet ratio, ob quam pascha diem 22. Martii nunquam prægredi, 25tam Aprilis nunquam sequi possit.

§. 209.

Pascha:

Problema : Festum Paschatis anni Juliani invenire.

Resolutio : 1.) Quæraturs anni dati litera dominicalis, & numerus aureus.

2.) Quæraturs in tabella descripta terminus paschalis, numero aureo invento respondens.

3.) Conferatur litera dominicalis quæsitæ, cum litera characteristica; ab hac ad literam dominicalem progrediendo in diem Paschatis incidet.

4.) Si vero ipsa litera characteristica anni dati sit litera dominicalis etiam, Pascha octiduo post celebratum est. — Anno 1411. numerus aureus fuit = 6. Terminus paschalis = 10. Aprilis; litera characteristica = B, litera dominicalis = D. Cum igitur plenilunium paschale in 10. Apr. qui dies Veneris erat, incidit; Pascha 12. Aprilis celebratum fuit, Dominica nimirum proxime excipiente plenilunium.

*) Erronea est hæc Paschatis inveniendi ratio; erroneum enim est tempus æquinoctii (§. 198.); erroneus etiam est cyclus numeri aurei (§. 207. a).

§. 210.

Epactæ.

Cum in chartis nostris domesticis, quamvis antiquissimis tantum, Epactarum existet mentio, commemorentur eadem præterea in Breviariis quæ dicimus, & Calendariis etiam vulgaribus, paucis illarum indolem declarare operæ pretium fore putavi, idque vel eo majus, quo major Epactarum, verum ab ALOYSIO LILIO emendatarum (Gregorianarum), rejecto cyclo lunæ,

lunæ, in paschatis tempore definiendo usus est atque necessitas. Decurrebant autem illæ cum numero aureo intra eandem XIX. annorum seriem, ad indicandam differentiam quæ est inter annum solare communem 365. dierum, & lunarem dierum 354. vel potius ad declarandam ætatem lunæ die ingredientis anni solaris primo adhibitæ. Fuit ergo Epacta anni I. in cyclo lunæ dierum XI; anni 2 = XXII. anni 3 = XXXIII. vel potius resecto mense intercalari seu 30. diebus = III; anni 4 = XIV. & sic porro, adjectis quotannis diebus XI. — Epacta anni 19. hoc modo erit = XXIX, hunc subsequens anni in cyclo lunæ 1. (ob addendos hac vice causa compensationis quantacunque, quod *saltum lunæ* dicunt, dies 12) = XI. priorque Epactarum ordo recurret iterum. Facile jam erit Epactam Julianam pro quocunque anno dato detegere:

1.) quærendo anni numerum aureum;

2.) inventum multiplicando per XI. (differentiâ anni solaris a lunari) ubi si productum minus fuerit 30, erit illud Epacta diplomatica; si majus, dividatur per triginta, numerus qui supererit, *Epactas Julianas* dabit. — En cyclum illarum 19. annis Jul. circumscriptum:

1.	XI.	8.	XXVIII.	15.	XV.
2.	XXII.	9.	IX.	16.	XXVI.
3.	III.	10.	XX.	17.	VII.
4.	XIV.	11.	I.	18.	XVIII.
5.	XXV.	12.	XII.	19.	XXIX.
6.	VI.	13.	XXIII.	I.	XI.
7.	XVII.	14.	IV.		

Si *Epactam Gregorianam* e. c. anni 1790. quærat aliquis, is Julianam XXV. imminuat 10. (ob ejectos anno 1582. dies 10.) + 1. (ob annum 1700. communem) = 11; habebit *Epactam Gregorianam* quæsitam XIV. Si subtrahi tantum non possit, *Epactæ Julianæ* 30. dies (mensis intercalaris) addi prius debent. — Aliquanto magis impeditum est sæculi novitiï seu XIX. *Epactas Gregorianas* cum ratione indagare. Neque enim ab anni nunc currentis 1802. *epacta Juliana* VII. utut annus 1800. communis tantum fuerit, ad eruendam *Gregorianam* 12. verum 11. tantum, & non amplius subtrahere integrum est; dies enim, quæ, juxta *Systema Calendarii Gregoriani*, *Epactæ anni* 1800. communis, ob *æquationem* quam *solarem* dicunt, imminui debuissent iterum, relicta illis est, *epactisque annorum subsequenti*um ad an. 1900. usque, quod anno dicto *æquatio lunaris* locum habuerit, quæ quoties ingruit, *Epactas*, quod eadem novilunia & plenilunia intra 308. annos integra die antevertant, unitate auget, ut adeo *Epacta Greg.* anni 1802. sit 37 — 12 = 25 + 1 = XXVI. — Longius in hanc materiam excurrere, usumque harum *Epactarum* præcipue in *Paschate Gregoriano* exquirendo operosius demonstrare, inprimis cum idem *Epactarum* cyclus sæculis omnibus haud conveniat, huc non pertinet. Conf. præter libros initio capitis recensitos CHR. WOLFII *Chronologiam in Elementis Matheseos universæ* Tomo IV.

*) Veteres utebantur *epactis* pro *Paschate* determinando, demonstrabatur enim illis ætas lunæ 22. Martii. *Epactas* porro *Notarii* medii ævi inceperunt mox a *Calendis Septembris*, mox secundum *Roma-*

Romanos a Calendis Januarii. Diploma, quod Bela II. Præposituræ Demefiensis largitus est, has notas refert: Anno incarn. 1138. IndiQ. I. *epacta XVIII.* tertia Septembris. Conf. RATONA l. c. III. p. 517. 19. — Vulgo annus dictus *Epactam VII.* adsciscit.

§. 211.

Reliquis temporum notis recensendis, in quibus cumulandis scholasticorum subtile ingenium sibi mirum quantum placuit, supersedeo; *Concurrentes* solummodo, qui interdum in chartis nostris antiquioribus recurrunt, attingere visum est. Consignabantur hi per numeros priores septem; itidem ad dies hebdomadis (ferias) inter se cognoscendas, in Oriente præprimis olim adhibiti. Dierum adhæc quasi custodes erant, qui quolibet anno 52. hebdomadas excedebant, donec septimum numerum adsecuti, septimanam efficerent. *Concurrebant* iidem cum cyclo solis a), & quoties hic finiebatur, novum pariter cum illo cyclum inceperunt, unde concurrentium illis adhæsit appellatio. Inter hos, & literas dominicales sequens observata fuit ratio: $A = 6$; $B = 5$; $C = 4$; $D = 3$; $E = 2$; $F = 1$; $G = 7$. Cum itaque anni 1143. litera dominicalis C fuerit, concurrentem fuisse $= 4$ necesse est. Etenim $1143 + 9 : 28 = 41 + 4 = C = 4$ concurrenti.

De Concurrentibus.

a) Unde interdum *Epactæ solares*, etiam majores dictæ sunt; *Epactarum minorum* etiam *lunarium* nomine illis relicto, de quibus §. 209. actum est.

§. 212.

Nunc tandem, præmissa primum dilucidatione qualicunque cycli veterum solaris luna-

Feria secundum festam immobilis.

risque, notæ chronicæ ævi mediæ, defunctæ a Festis anni mobilibus & immobilibus, intelligi, & explicari poterunt. — Colligitur autem negotio facile Martyrologiis, Actis Sanctorum, immo Calendariis vulgaribus, in quem mensis diem *immobile* aliquod *festum* inciderit & adhuc incidat: quamquam, ne quid dissimulem, Festorum nonnullorum non eadem apud omnes populos sedes fuerit, neque eadem omnium festorum, quæ apud alios, solemnitas a). At multo difficilius est, datum ad nostras revocare calculos, si in diplomate hebdomadis dies designetur, qui fixum aliquod festum vel antecessit, vel secutus est, e. c. *Datum feria quinta proxima post festum B. Catharinæ Virg. & Mart. anno MCCCCLXXXVIII.* item: *Datum feria quarta proxima ante festum B. Joannis Baptistæ anno MCCLXXVI.* *Datum Dominico proximo ante festum Philippi & Jacobi Apostolorum, anno Dom. MDIX.* Ad hæc enim, & similia exempla intelligenda, & cum nostro computandi more comparanda, necesse est, ut sciamus in quem hebdomadis diem festum illud immobile dato anno inciderit. Hoc neminem observare pigeat, Hebræorum loquendi usum factum esse, ut hebdomadis dies, *feriarum* distinguerentur nomine, quibus, ut vel ex novi fœderis tabulis constat, dies Domini feria fuit prima; dies Lunæ feria secunda; & sic porro reliqui.

a) Jucundum & utile simul est etiam in nomina festorum & dominicorum inquirere, quibus iidem in vernacula distinguuntur a se invicem. Et a Germanis quidem hac in re multa præclare præstita, neque dubito brevi futuros esse eruditos Hungaros Croatasque, qui nobis Etymologicum *dominicale festivaleque* Hungaricum Croaticumque procurent.

Utriusque adornandi nuper initium quaecunque fecit
FR. CARL. ALTER, in libro: *Beitrag zur slavischen
Diplomatik für Slaven, Wien 1801. 8.*

§. 213.

Invenies vero hebdomadis diem (feriam), Quomodo in
in quem Sancti alicujus anniversarium incidit, veniuntur,
hac operandi methodo:

1.) Quærat^r litera dominicalis, qua in-
venta, hebdomadis quoque dies, in quem pri-
mus anni dies perpetuo litera A. notatus inci-
dit, inventus est.

2.) Computa dies a prima anni Domini-
ca ad festum Sancti datum (hoc etiam addi-
to) attendendo, num annus datus communis,
vel bissextilis sit.

3.) Divides tandem summam, unius heb-
domadis dierum numero (7.) residuum dabit
feriam quæsitam.

*) E. gr. Feria quarta post festum S. Elisabethæ anni
1444. respondet 25. Novembris. Istius enim anni
litera Dom. fuit ED. initiumque anni in diem
Mercurii incidit = A. Summa dierum a prima an-
ni dominica ad festum S. Elisabethæ, quod 19. No-
vembris recolitur = $319 + 1$ (quia annus bissex-
tilis) = $320 : 7 = 45 + 5 =$ diei Jovis, seu feriæ
quintæ; si igitur diploma, feria quarta, seu die
Mercurii post festum S. Elisab. datum sit, illa 25.
Novembris fuerit necesse est. Eadem methodus osten-
dit, memoriam decollationis S. Joannis Baptistæ,
quæ 29. Augusti recurrit, Hungaris 1526. ad Mo-
hachium fatali, eodem hoc anno incidisse in feriam
4. i. e. diem Mercurii. — Legi literas, ibique:
„Datum sub anno Domini 1372. in die divisionis
„Apostolorum (15. Jul.) proxime præterito.“

**) Vulgaris nostra & commoda dies mensium expri-
mendi ratio, a Scriptoribus & Notariis ævi inter-
medii, sine dubio quod facilem nimium animad-
verterint, rarissime est adhibita, Antiquissimum illius
vesti-

vestigium apud Hungaros observavi in dipl. Belæ II. an. 1138. cui tertia Septembris subscripta est: extraneum nullum antiquius novi illo, quod in *Monumentis Boic.* Tom. V. p. 362. notavi, ubi 15. Aprilis diserte Actis 1199. adjecta est.

§. 214.

Data festorum
mobiliū.

Aliquanto operosius exquiritur *festum mobile*, feriaque quæ illud vel præcessit, vel secuta est. Recurrit autem necessitas illius exquirendi sæpius, nam festis mobilibus Dominicæ etiam accensentur, quas cum vulgari nostro putandi more comparare interdum difficilius est, quam vulgo creditur. Universe autem festorum mobiliū sedem ambulatoriam pro quocunque anno definire, a tempore dependet, in quod anno quolibet Pascha incidit; cum hoc enim, ut jam §. 205. dictum est, mobilia festa omnia mox maturius mox serius redeunt. Digesserunt illa pro resurrectionis Dominicæ tempore vario, RABE, inprimis PILGRAM, alii, adjectis nominibus Dominicorum, quæ eis adhæserunt a primo verbo, vel etiam commate cantus, quem in illis ad exordium missæ ecclesia usurpaverat; e. c. *Circumdederunt me*, *Reminiscere*, *Exaudi* &c. quod hodieque bulis summorum Pontificum fieri nemo ignorat. Paschatos igitur die invento, basis inventa est & fundamentum totius Calendarii, quod pro anno dato construes, desigendo diligenter in eodem sedem dierum Festorum & Dominicorum, quorum perpetuo eadem est a die paschali distantia, adhibitis in auxilium Tabulis, quas nunc laudavi, quibusque adjutus sedem festi mobilis, quam indagas, facile deteges.

*) Exempla, quæ ita tractari ac resolui debent, & Codice diplomatico Regni Poloniæ sunt sequentia: Fœdus inter Ludovicum I. Hung. & Carolum IV. Bohemiæ Reges anno 1369. initum, datum est feria quarta cinerum; aliud Elisabethæ Reginæ diploma, in Vigilia (pridie) Pentecostes anno Domini 1386. — Aliud Regis Poloniæ, Datum feria secunda in crastino (i. e. postridie) Sanctæ & individuae Trinitatis, anno Domini 1462. Instrumentum Capituli Scepusiensis apud CAR. WAGNER l. c. p. 113. datum est anno incarnationis dominicæ 1225. in dominica, in qua cantatur officium: Invocavit. ibidem p. 115. datum in Octavis Paschæ anno Dom. 1300. — in quindenis Pentecostes, cet.

§. 215.

Omnibus, quos hætenus enucleavi, annos ^{Anni Regi-} diesque in chartis exprimendi modis, anti-^{minis.} quior est temporis, secundum annos regiminis definitio; neque quæquam alia nota temporis in Pontificum & Regum literis, ad nostrum usque ævum constantius retenta est. Etiam Hungariæ Reges consuetudinem istam, nimirum annis incarnationis Dominicæ subjungendi annos sui regiminis, mature adoptarunt a); qui, si præter Hungariæ & Regnorum ad Hungariam pertinentium, aliorum adhuc Regnorum sceptrâ tenebant, diserte adnotare obliti non sunt, quo quodvis Regnum anno adiverint. E multis unum exemplum adfero. Solemne diploma Sigismundi Regis apud DOGIEL I. 53. quo famosissimas Tabulas fœderis anno 1412. cum Wladislao Rege Poloniæ initi, in curia oppidi Kiersmark cum eodem agens; renovavit atque confirmavit, has temporis notas refert: *actum anno Domini MCCCCXXIII. feria tertia post dominicam Ramis Palmarum, Regnorum nostrorum anno Hungariæ trigesimo septimo, Roma-*
norum

norum tredecimo, Bohemiæ vero tertio. Est autem res multis persæpe difficultatibus obnoxia similes notas temporis inter se, & cum chartis & annalibus synchronis rite componere; quod Cancellarii interdum ab obitu antecessoris Regis *b)*, interdum ab electione regnantis *c)*, sæpius ab inauguratione *d)* istius, annos regni ejus duxerint; quod annum vulgarem, cujus parte aliqua Rex regnum adierat, regiminis, ut debebant, primum, at mox initium anni vulgaris proximi, jam etiam Regni *secundum* interdum dictaverint *e)*; & quod in tempore regiminis priscorum Regum accurate definiendo, diplomatum & annalium haud raro destituamur testimoniis. In bullis Pontificum illis, quas nunc breviam vocant, ad sæc. XVI. fere, rarissime anni ab æra vulgari, plerumque semper potius ab *annis Pontificatus* desumpti sunt. Ad facilitandum tandem diplomatum hujusmodi examen, & juvandam intelligentiam, digesserunt viri harum rerum periti, tabulas annorum regiminis, tam Pontificum romanorum, quam aliorum etiam Europæ Principum, ad quas tamen, sine omni formidine falsi, semper & ubique nemo prudens appellare poterit.

a) „ Anno — verba sunt diplomatis S. Stephani Regis — domin. incarn. MI. Indiæ. XV. *anno* Stephani primi Regis Ungarorum *secundo*, hoc privilegium scriptum & traditum est. “

b) Andreas II. in annis Regni sui indicandis, mox obitum Ladislai Regis pueri, mox obitum fratris sui Emerici, interdum fortassis etiam pacem cum hoc initam respexerit. KATONA V. 746: Etiam Bela IV. duplicem epocham ad denotandos annos regiminis sui adhibuisse videtur: alteram a morte patris, cui successit; alteram a tempore quo secundum in Regem Hungariæ inauguratus est. KATONA V. 760. VI. 55.

c) In

- c) In Matthiæ Corvini literis, post ejus inaugurationem editis, electionis & coronationis tempus rite distinguuntur; ita Decretum ejus primum „ datum „ est anno Domini 1464. octavo Idus Aprilis; *Regni „ nostri anno septimo, Coronationis vero primo.*“
- d) Ludovicus VII. junior Rex Galliarum († 1180.) quater coronatus est; inde quadruplex commemoratur Regni ejus exordium. *N. Lehrgeb. der Diplom.* IX. p. 86. Hungariæ Rex Carolus Rob. itidem ter coronatus incinctus, mortuus est anno 1342. 16. Julii, qui a prima coronatione erat 42dus, ab altera 33tius, anno a tertia coronatione 32do nondum expleto. KATONA IX. 249. In diplomatibus coronatio prima, terminus est, a quo regiminis sui annos Carolus repetit.
- e) Ita Ludovicus I. qui 16. Julii 1342. patri successit, quod reliquum ad anni 1343. initium usque erat, interdum pro anno integro reputat. KATONA X, 140. — Sed adsunt exempla vicissim, ut annus Regni præcedens (completus) pro decurrente non pridem incepto exponatur. THUROCZIUS Matthiam I. coronatum esse ait anno regni sexto (scil. completo) cum septimus jam verteretur. Conf. WAGNERI *Analecta Scep.* I. 54. Not. a.



* Specimina scripturarum Tab. II. & III. æri incisa, siquidem interprete opus habent, sic leguntor.

Tab. II. Nro. 1. IN NOMINE SANCTAE ET INDIVIDUAE TRINITATIS ANDREAS DEI ANNUENTE CLEMENTIA PANNONIORUM INVICTUS REX. Anno &c.

2. Specimen hoc e Belæ cæci Regis diplomate desumptum prælectione haud eget.
3. Desumptum est e diplomate Andreæ II. Regis, quod in Diplomatario quod jam sequitur Nro. IV. ex asse expressum est.
4. Etiam huic privilegio Ladislai Cum. Regis inter Formas var. dipl. Nro. VIII. locum tribui.
5. „ Omodeus Palatinus filius Comitis David, de genere Aba, Comes Scepusiensis. Omnibus Christi fidelibus, tam præsentibus quam futuris, præsens scriptum inspecturis, salutem in eo qui est vera salus. Humana adinvenit sollicitia, ut quod memoria dignum creditur, testimonio literarum commendetur. Eapropter ad universorum notitiam harum serie volumus pervenire, quod quandam possessionem nostram aquisitam Fellebès nuncupatam, in districtu de Sarus situatam, de consensu & permissione. ac benivolentia omnium filiorum nostrorum, cum universis utilitatibus, specialiter cum silvis & aliis suis pertinentiis, sub antiquis metis & terminis — anno Domini MCCC. septimo. “

Tab. III. Nro. 1. Inter diplomata quæ sequuntur XVII est.

2. In Bibliotheca R. Univers. Pest. specimen scripturæ Hung. hoc antiquissimum est, quod inveni „ Mykoron Lazlo Kyralne Anna Azzon ez velagbol ky mult Germök agyaba zenth Maria Magdolna Azzon nappya tayaba ezör ötzaz hatod extentöbe. “
3. „ Cum itaque perpetuum simplex beneficium ecclesiasticum Abbatia nuncupatum in parochiali seu alia Ecclesia Sancti Salvatoris Strigoniensis Diæcesis, quod sicut accepimus de Jure Patronatus Laicorum ex fundatione vel dotatione existit, & quod dictus Johannes Episcopus tempore promotionis de ejus persona ad Ecclesiam Varadinensem certo tunc expresso modo pastoris solatio destitutam per Nos apostolica auctoritate facto obtinebat, ex eo quod Nos illud per solam promotionem prædictam vacare decreverimus, juxta decretum hujusmodi vacaverit & vacet ad præsens; Nos eidem “ cet.

DIPLOMATARIUM MISCELLANEUM

CONTINENS

EXEMPLA VARIORUM DIPLOMATUM.

Nro. I.

Stephanus III. R. H. Farcaſſum quemdam libertate pratisque ac molendinis donat. anno 1162. — Ex autographo, quod ipſemet aliquando vidi, anonymus.

Notum ſit omnibus hominibus ſub ditione Regis Hungarię exiſtentibus, tam preſentibus quam futuris, quod ego Stephanus Dei gratia ſublimis ac triumphator Rex Ungarię, beate memorię Geyſe Regis filius, paterni Regni gubernacula Deo auxiliante obtinens, hunc hominem in Suprunienſis caſtri manentem, nomine Forcos, a civili jūgo ſubtraxi, tantaque dote libertatis ſublimavi, ut ubicunque vellet libere ac ſecurę famulari poſſet; cauſa videlicet quod fidelis mihi exiſtit in omnibus, et contra infideles illos, qui caſtrum illud, quod vulgariter Copuu a) dicitur, opugnare volebant, fideliter me inſtuit, et inſuper veniens infidelitatem illorum in ſerie manifeſtavit. Que cauſa ut rata permanere poſſet, coram quibusdam Primatibus mihi aſiſtentibus, videlicet Luca Strigonienſi archiepiſcopo, Micone Colochenſi archiepiſcopo, Machario Epico, Beloslao prepoſito; Heidrico Palatino Comite, Gabriele Curiale Comite, Ampudino Comite, Laurencio Comite, Rubeno Comite, F — Comite, Dionifio Comite, Vidone priſtaldo. Preterea predicto fideli meo dedi in villa K — unum pratum cum uno molendino, et in villa V — ſimiliter, in villa etiam V — unum bratum cum duobus molendinis; et per Notarium Bricenum ſcribi, ac per Sudam capelle mee magiſtrum ſigillo regiali muniri l. p. precepimus. Si quis igitur hoc inſtitutum regale infringere tentaverit, omnipotentis Dei iram, et Regię Majeſtatis anatema incurrat. Scripta eſt autem hæc cartula, anno dominice incarnationis M. C. LX. II.

II.

Joannes Archiep. Strig. libertinos quosdam servituti pincernariæ adscribit. 1209. Prostat inter MSS. GABR. HEVENESSI Tom. CC. seu X. pag. 107 — 109.

Joannes Dei Gratia Sanctæ Strig. Ecclesiæ Archiepiscopus. Omnibus in Christo fidelibus præsentem paginam inspecturis in vero salutari salutem et benedictionem: Ne rerum gestarum series diuturnitate temporum contingat obliterari, institutionis in præsentiarum factæ processum, ad memoriam scriptis præsentium duximus revocari. Nouerint quod tam præsens ætas quam secutura posteritas, nos emisse quindecim capita libertinorum de villa Szonok, a venerabili Fratre nostro C. Agriensi Episcopo, quibus cum liberum dedissemus arbitrium posse eligendi, in quo servitio Ecclesiæ B. Adalberti velint esse obligati, pincernariæ servitutis sibi elegerunt officium; quibus nos annuentes instituimus, ut inscriptum sibi Bachariorum de generatione in generationem exequantur officium, nec ad aliquod aliud compelli possint seruitium. Quorum nomina sunt hæc: Unuca, Vitalis, Thobias, Nicolaus, Rosend, Bud, Burla, Nichodemus, Leba, Marcel, Jonbos. Verum ne cujusquam machinatione, dolo, vel calumnia huic nostræ institutioni processu temporis possit derogari, seriem scriptis iussimus annotari. Anno Incarnationis Dominicæ Millesimo ducentesimo nono. Regnante glorioso Hungariæ Rege Andrea, me licet indigno sanctæ Strig. Ecclesiæ sedi præsidente, Boleslao Vacienfi, Petro Geurienfi Episcopis, Pocone Palatino et Comite Musunenfi, Mocone Posonienfi, Thoma Nitrienfi Comitibus. Petro Præposito Strigonienfi, Ubaldo Præposito Posonienfi, Benedicto Praeposito Sancti Thomæ, Jacobo Lectore, Dominico Cantore, Michaeli Custode, & ceteris quam pluribus Ecclesiæ loci Canonicis existentibus.

III.

Exemplum ritus explorandi veritatem per ferrum candens, anni 1211. — Ex autographo.

Quum que ad tempus fiunt labente temporis curriculo ab hominis memoria recedunt, pulcherrime usus

consuetudinis inolevit, ea sub litterarum privilegio memoriter retinere. Verbi gratia regnante glorioso Rege A. tercii Belæ Regis filio, anno ab incarnatione Domini M. CC. XI^{mo}, Abbas beati Martini Vros nomine, cum Comite Camere tunc temporis Gatk nomine causam iniens, terram Sala, cum silva que in insula Vag continetur, ad X. aratra pertinentem, iustitiam ecclesie beati Martini fuisse, injusteque ab ea ablatam asserens requirebat. E contra ille a Rege sibi traditam, et minime ad ius ecclesie prædictæ pertinere referebat. Abbati autem misericordiam Regis pro causa prefata obnixè deprecanti, utriusque tam Abbatis videlicet & Comitis prenominati causam, Archieleus Cholocensis Bertholdus N. Rege admonente suscepit discutiendam. Discussa vero utrorum causa uti iustitia exigebat, hominem ecclesie prefate ad candens ferrum in loco Budensi, mediante eis pristaldo Both nomine Bachienfi c nonico dijudicavit. In quem locum advenientes, & omnia secundum ritum ecclesiasticum celebrantes, per merita beati Petri principis apostolorum, ut iusticia beati Martini demonstraretur, homo ecclesie prædictæ ab omni penitus ferri rubigine atque combustione extitit liberrimus. Hujus autem rei testes Jacobus Budensis ecclesie Prepositus, Paulus Cantor, Johannes Custos, Decanus Moyse, Leo sacerdos, Teká sacerdos, Gervasius sacerdos, & alii quam plures ejusdem loci Canonici extiterunt.

IV.

Exemplum donationis Regiæ, e SPIESSII Collectaneis: Archivische Nebenarbeiten. P. I. p. 144. desumptum, collatum cum protographo.

In nomine sanctæ Trinitatis, et indiuidue unitatis. Andreas Dei gratia Hungarie, Dalmatie, Croatie, Rame, Servie, Galicie, Lodomirique rex in perpetuum. Commendanda regie nobilitatis liberalitas, licet precibus omnium iuste penitencium subuenire teneatur, illius maxime petitionem incunctanter debet admittere, quam in idem amoris consorcium, et in unum regie potestatis participium, matrimonii copulavit sa-

cramentum. Cum itaque nostra coniux Karissima, Regina *Yoles*, quandam puellam nomine *Ahalyz*, ex ingenui sanguinis parentibus oriundam, de remotis *francie partibus* secum in suis serviciis in Hungariam adduxisset, cuidam ex regni nostri nobilibus *Botez* nomine, tradidit in uxorem, cujus innumerabilia tam in mari quam in terra uxori nostre, ante quam ad nos de *Grecia* adduceretur, cum indefinente fidelitate exhibita servicia, de sue munificentie bonis digne remunerare satageret, pro ipsa terram quandam, quæ *Widhor* dicitur, ad sexaginta aratra in comitatu de *Wolkou* constitutam, a nobis humiliter postulavit. Cujus justam et idoneam esse considerantes petitionem, predictæ etiam *Ahalyz* pre oculis nostris habentes indefessam circa *filium nostrum Andream* sedulitatem, pro tot et tantis servitorum suorum meritis, eidem jam dictæ *Ahalyz*, ad preces dilectæ uxoris nostre Regine, terram illam in perpetuum contulimus, ita videlicet, quod maritus ejus nullam jurisdictionem in terra illa habere debeat, eandem A. cuicumque voluerit, sive suo marito, sive pro remedio anime sue plenam conferendi habeat potestatem. In possessionem igitur terre illius eam per *Ochiuz* tunc temporis *Sclavonie banum* precepimus introduci, cujus terre mete sic ordinantur. Prima meta progreditur de aqua *Boza*, scilicet de orto *Wrathusla*, et habet ibidem foris metam apud *ilicem*. Item aliam metam habet in exitu silve, et habet communem metam cum comite *Michaele* super arborem populi, et inde tendit ad arborem piri, *ubi fit congregacio puerorum in octavis pasce*, et ibi incipit meta *Cruciferorum*, et postea meta *Luder*, postmodum sub arbore tilie jungitur terre *Holmos*, et ducitur usque ad terram *Georgii*, que tendit ad magnam viam, ubi iungitur ad terram *Jardan*, et inde redit ad eandem silvam, & in medio silve jungitur terre *Micha*, que vadit ad *Mlaka*, et inde pervenit ad predium *Georgii*, que tendit usque ad *Boza* apud ortum *Miloia*, & sic metis circumdata terminatur. Vt autem hec a regie liberalitatis circumspecta deliberacione facta donacio, nullis vnquam

vnquam temporibus alicuiuscunque cauillationis in posterum subrepente versucia possit retrahari, ad maiorem huius facti prouidenciam, vt nostra donacio sit perhennior, & longioris temporis spacio viuacior, presentem concessimus paginam priuilegii nostri munimine in perpetuum confirmatam. Datum per manus Cleti aule regie Cancellarii, et agriensis prepositi. Anno dominice incarnationis M. CC. XX. Venerabili Johanne Strigonienſi, Reuerendo Ugrino Colocenſi, archiepiscopis existentibus. Desiderio Chenadiensem, Willelmo Ultraſiluanensem, Roberto Wezprimensem, Jacobo Wachienſem, Stephano Zagrabiensem, Bartholomeo Quinque eccleſienſem, Coſma Geuriensem, Alexandro Waradiensem, eccleſias feliciter gubernantibus. Nicholao filio Borz palatino & comite Suprunenſi, Ochiuz curiali comite Regine bano et comite Worostienſi, Neuka Woiauoda, Iula fratre Ratolth curiali comite Regis, comite keweienſi existentibus, Dionisio magistro thauarnicorum & Bachienſem, Iula maiore Budruguienſem et Zounukienſem, Mika Bichorienſem, Benedicto filio Samud noui caſtri, Demetrio Senescalco Woſuarienſem, Smaragdo Poſonienſem, Gregorio filio Bera Albenſem, Paulo Chenadiensem, Iohanne Nitrienſem, Botez Muſunienſem, Comitatus tenentibus. Regni noſtri anno ſeptimo decimo.

V.

Exemplum Diplomatis Confirmationis regiae. — Ex autographo.

Ladizlaus Dei gratia Hungarie, Dalmatie, Croatiae, Rame, Seruie, Gallicie, Lodomerie, Cumanie, Bulgarieque Rex. Omnibus Chriſti fidelibus ſalutem in omnium Saluatore. Ad uniuersorum notitiam harum ſerie volumus peruenire, quod dilectus et fidelis noſter Stephanus Magiſter Agasonum domine regine karissime matris noſtre, Comes Trinchinienſis, ad noſtram accedens preſentiam, optulit nobis priuilegium Domini Regis Stephani, bone memorie karissimi Patris noſtri, ſuper collatione Caſtri Agas, et trium villarum Kuta-

fou, Barkan, et Thor vocatarum ad idem Castrum pertinentium, et super collatione Iuris patronatus Monasterii de Paztuh, tempore Ducatus prefati Patris nostri confectum, petens cum instantia, vt idem priuilegium super premissis collationibus ratificare, et nostro dignaremur Priuilegio confirmare. Cujus talis est tenor:

Stephanus Dei gratia junior Rex Hungarie, Dux Transiluanus, et Dominus Cumanorum, omnibus Christi fidelibus presens scriptum inspecturis salutem in omnium Saluatore. Regie liberalitatis immensitas recto pensans libramine merita subsectorum, dum bene meritos dextre sue munifice consolatoriis confouet donatiuis, fidem et deuotionem insignibus quibusdam cumulis adauget, et ad potiora seruitiorum studia mentes incitat eorundem. Ad uniuersorum igitur notitiam tenore presentium volumus peruenire, quod attendentes eximie fidelitatis obsequia, que nobis Stephanus filius condam magistri Dominici, magister Agasonum Domine Regine junioris, karissime consortis nostre, in pluribus articulis, nobis & regno nostro necessariis exhibuit indefesse, variis et arduis, pro persona nostra et regno nostro, fortune casibus se exponens; qui propter fidelitatem nobis obseruandam Magistratum Agasonum et Comitatum Tawarnicorum Domine Regine maioris, karissime matris nostre, quingentas marcas, quas ab eadem domina karissima matre nostra annuatim ratione stipendii sui percipere debebat, et omnes possessiones suas quamplures, quas in terminis karissimi patris nostri habebat relinquendo, nos fideliter est secutus. Dampna etiam, ubi Chak Banus, dilectus et fidelis noster fuit captus, quam plurima pertulit et est passus, et omnia illa bene adscendunt ad summam tria milia marcarum que idem pro nobis reliquit et amisit; qui etiam declinantibus a nobis quam pluribus baronibus nostris, perfida prevaricatione et prevaricatrice perfidia, non sine manifesto prodicionis vitio, in expeditione paulo ante habita contra karissimum patrem nostrum deserentibus castra nostra; cum feruore summe deuotionis, et fidei inseparabiliter

nostris adhesit obsequiis, paratus pro nobis bellicos si oportuisset perferre sudores, et dubia Martis subire certamina, & postmodum inimicicias perpetuas totius generationis Aba obtinuit et incurrit, pro eo videlicet, quod propter fidelitatem nobis observandam, Ladizlaum filium Watha de genere Aba, nostrum et regni nostri infidelem captiuauit et caprum nobis duxit, qui, propter suam infidelitatem sicut diximus, fuit decollatus. Nos in aliqualem recompensationem seruitorum suorum, licet longe suis inferiorem meritis, castrum Agas, quod propter infidelitatem, et infidelem negligentiam venerabilis patris Job Episcopi Quinqueecclesiensis captum, in enorme et grauissimum nostrum et regni nostri dispendium, et amissum, et per nostram diligentiam non sine sumptuosis laboribus recuperatum, ad nostram collationem existit devolutum, cum tribus villis Kutasou, Barkan, et Thor vocatis, et cum omnibus aliis utilitatibus et pertinentiis suis, eidem magistro Stephano, et per eum suis heredibus heredumque successoribus perpetualementer duximus conferendum. Quarum quidem terrarum mete, sicut per literas Capituli Agricensis nobis constitit euidenter, hoc ordine distinguuntur. — — Item patronatum monasterii de Paztuh ad nos similiter pertinentem, ipsi magistro Stephano, et suis heredibus contulimus pleno iure. Ut igitur nostre collationis seu donationis series, robur optineat perpetue firmitatis, nec in aliquo cursu temporum per quempiam possit retractari, vel in irritum reuocari, presentes literas concessimus duplicis sigilli nostri munimine roboratas. Datum per manus Magistri Lodomerii aule nostre Vicecancellarii, dilecti et fidelis nostri, anno domini millesimo ducentesimo sexagesimo quinto. — Supplicauit etiam nobis idem Magister Stephanus, ut patentes literas iam dicti Patris nostri, quas sibi super eo, quod nullus Iudicum populos suos, et populos Monasterii de Paztuh, preter personam ipsius Magistri Stephani, valeat iudicare concesserat, ac presentibus inferri faceremus, easdem quippe literas exhibuit in hec verba: Nos Stephanus

Dei gratia Rex Hungarie, significamus uniuersis, quibus expedit, presentium per tenorem, quod nos Magistro Stephano filio Magistri Dominici concessimus ex nostra gratia speciali, quod populos suos, et populos Ecclesie de Paztuh, cuius patronus est, praeter personam ipsius Magistri Stephani, nec Palatinus, nec Iudex Curie nostre, nec Comes Noui Castri aut Neugradiensis, nec etiam aliquis Iudicum seu Comitum possit vel debeat aliquatenus iudicare; sed ipse idem predictos populos in omnibus causis suis iudicabit. Datum apud magnam Insulam, Feria quinta post festum beati Mauritii. Nos igitur petitionibus ipsius Magistri Stephani favorabiliter inclinati, consideratis seruitiis et fidelitatibus suis, regno et Corone Regie exhibitis et impensis, prescriptum priuilegium ratum habentes et acceptum, et de verbo ad verbum presentibus insertum, una cum predictis patentibus literis similiter presentibus insertis, de benivolencia Domine Regine karissime matris nostre duximus confirmandum, duplicis Sigilli nostri munimine roborando. Datum per manus Mag. Nicolai Prepositi Albenfis Ecclesie Transiluvane, Aule nostre Vicecancellarii, dilecti et fidelis nostri. An. Dni. 1272. indictione quintadecima. Kalendas Decembris, Regni autem nostri anno primo. Venerabilibus Patribus Philypo Strigonien. perpetuo Comite loci eiusdem Stephano Colocen. et Iohanne Spalaten. Archiepiscopis, Lamperto Agrien. Job Quinqueecclesien. Comite Mufunien. Philippo Vacien. Domine Regine karissime Matris nostre Cancellario, Paulo Vesprimien. Aule nostre Cancellario, Briccio Chanadien. Timotheo Zagrabien. Lodomerio Waradien. Dionysio Jaurinen. & aliis Episcopis Ecclesias Dei feliciter gubernantibus. Rolando Palatino, Joachino Bano tocius Sclavonie, Nicolao Woyawada Transiluvano Comite de Zonuk; Ladizlao Comite Posonien. Erney Magistro Tawarnicorum nostrorum Comite Worosdien. Alexandro Iudice Curie nostre, Emirico Comite Simigien. Paulo Bano de Zeurino, Ponith Bano Comite Zaladien. Omodeo Comite Castriferrei, Renoldo Magistro Dapiferorum nostrorum, Vgurino filio

filio Pous Magistro Agasonum nostrorum, Michaële Comite Nitrien. et aliis quam plurimis Comitatus Regni tenentibus, et honores.

VI.

Formula donationis regiae brevissimis verbis concepta. —

Ex autographo.

Nos Lad. Dei gratia Rex Hungarie significamus tenore presentium universis, quod ob notam infidelitatis, quam Symon filius Salamonis incurrit contra nostram Majestatem manifeste in eo, quod erecto vexillo, una cum Magistro Moys, contra nos procedere presumpsit; quasdam possessiones ipsius Magistri Moys, et Symon praenotati, Predynmyh, Iuretna, & Musuna vocatas, ab eisdem auferendo, Comiti Belus filio Belus duximus conferendas. Ergo volumus, quod nullus eundem ratione dictarum possessionum presumat molestare. Datum in Zolum, quinto die S. regis Stephani. (sine anno.)

VII.

Exemplum literarum inuestiturae, quas Statutorias appellamus. — Ex apographo.

Ladislaus Dei gratia Hungarie, Dalmatie, Croatiae, Rame, Seruie, Gallicie, Lodomerie, Cumanie, Bulgarieque Rex. Omnibus Christi fidelibus, tam presentibus quam futuris, presens scriptum inspecturis, salutem in Domino sempiternam. Ad universorum notitiam tenore presentium volumus pervenire. Quod Elias Comes Saxonum de Scepus ad nostram accedens presentiam, quandam terram nostram adiacentem terre Doman, et propinquam terre eiusdem, postulavit a nobis sibi dari: verum quia de qualitate & quantitate ipsius terrae veritas nobis non constat; Fidelibus nostris Capitulo Sancti Martini de Scepus dedimus in mandatis, ut vnum ex iis mitterent pro testimonio fide dignum, coram quo Ladislaus Comes de Scepus homo noster, reambularet ipsam terram, & statueret ipsi Comiti Elias, si non fuerit contradictum, contradictores autem, si qui forent,

rent, ad nostram presentiam euocarent; quod quidem Capitulum nobis postmodum rescripsit in hunc modum:

Excellentissimo Domino suo Ladislao Dei gratia illustri Regi Hungarie, Capitulum Ecclesie S. Martini de Scepus, orationes in Domino debitas & deuotas. Percepimus literas Serenitatis Vestre, in quibus precipiebatur, quod cum Ladislao de Scepus homine vestro, hominem nostrum transmitteremus pro testimonio fide dignum, coram quo idem homo vester reambularet quandam terram Elie comitis Saxonum de Scepus, adiacentem terre Doman, & propinquam terre eiusdem Comitis Elie. Nos itaque preceptis vestris fideliter obedientes vt tenemur, Decanum Ecclesie nostre cum homine vestro transmisimus: qui quidem homo vester presentibus commetaneis & vicinis, sub testimonio Decani nostri predicti, accessit super faciem predictae terre, sufficientem scilicet vsui dimidii aratri, vel parum amplius, & reambulauit eandem, & statuit Elie Comiti suprascripto, nullo contradicatore penitus existente. Cuius quidem terre mete seu termini, hoc ordine distinguuntur. Prima incipit a parte orientali circa pratum, et transit per pratum, et in prato est meta terrea, et sic tendit versus Occidentem per aliud pratum, et transit riuulum per pratum, & ibi circa arabilem terram prope riuulum est meta vsque viam, quae vadit in Leucham, et circa viam est meta terrea, et de via ascendit directe super montem vsque ad antiquas metas, et sic terminatur. Datum Sabbatho post Festum Apostolorum Petri et Pauli.

Nos igitur consideratis fidelitatibus, et seruitiis meritoriis ipsius Comitis Elie, que nobis in illis partibus semper fideliter exhibuit et devote, dictam Terram dedimus, donauimus, et contulimus ipsi Comiti Elie, et per eum suis heredibus heredumque successoribus iure perpetuo possidendam. In cuius rei memoriam perpetuamque firmitatem, presentes concessimus literas duplicis Sigilli nostri munimine roboratas. Datum per manus Magistri Bartholomei Aule nostre Vice-Cancellarii, dilecti et fidelis nostri. Anno domini Millesimo, ducen-

ducentesimo octuagesimo secundo. Regni autem nostri anno undecimo.

VIII.

Ladislai Cum. R. H. Priuilegium fori et nundinarum,
an. 1283. — Ex autographo.

Ladizlaus Dei gratia Hungarie, Dalmacie, Croacie, Rame, Servie, Gallicie, Lodomerie, Cumanie, Wulgarie-que Rex. Omnibus Christi fidelibus tam presentibus quam futuris presens scriptum inspecturis salutem in salutis largitore. Cum benemeritis favor debitus inpenditur, et sinus dilectionis panditur, fideliterque obsequentibus digna merces redditur, Deus placari creditur, et subditi ad fidelitatis studia exercenda provocantur, accendunturque spe et desiderio retributionis amplioris. Ad universorum igitur notitiam harum serie volumus pervenire. Quod nos consideratis fidelitatibus, et fidelium servitiorum preclaris meritis Dominici et Ladislai filiorum Stephani, Rorandi et Deseu filiorum Leustachii, Reynoldi et Nicolai filiorum Oliveri, magistrorum de genere Ratholth, dilectorum & fidelium nostrorum, nobis in diversis expeditionibus Regni nostri laudabiliter ac devote exhibitis et impensis, specialiter autem tunc, cum Comani temeraria et vesana presumptione induci, contra nostram Majestatem surrexerant, et nos levato exercitu nostro ad expugnandos, debellandos, & compescendos eosdem Comanos personaliter accesseramus, iidem Comani hostiliter contra nos et exercitum nostrum irruentes, nobiscum bellum inierunt: in quo bello seu pugna, iidem Dominicus, Ladislaus, Rorandus, Deseu, Reynoldus et Nicolaus magistri, tamquam leones intrepidi cum ipsis Comanis pugnaverunt, occidentes et vulnerantes quam plures de eisdem; ubi Laurentius frater eorundem, filius eiusdem Stephani laudabiliter debellando, vitam suam, pro fidelitate sacre corone regie debita, terminavit. Nos igitur quem jus admonet, equitas inducit, benignitas interpellit, et dignitatis officium exortatur, merita servitiorum cunctorum nobis fideliter famulan-

rium

tium oculo pietatis intueri, et unicuique iuxta meritum remunerationis premio respondere: considerantes et in memoriam nostre Maiestatis revocantes fideles famulatus, quos memorati Dominicus, Ladislaus, Rorandus, Deseu, Reynoldus, & Nicolaus Magistri, in expeditionibus regni nostri cum fervore sumptu fidelitatis nobis et regno nostro fideliter inpenderunt, et specialiter pro morte eiusdem Laurentii fratris eorundem, qui in exercitu nostro, ut premisimus, quem contra eosdem Comanos moueramus exitit interemtus, hanc gratiam specialem de benignitate regia eisdem duximus faciendam: ut populi seu Jobagiones ipsorum in possessionibus eorum Patha & Szenthgurg vocatis, in Comitatu Symigiensi existentibus, a iudicio et iurisdictione quorumlibet Comitum Symigiensium et regni Palatini, exempti penitus et excepti habeantur, nostro iudicio solummodo eosdem reservantes. Item concessimus eisdem, *ut deinceps et a modo, nullus Nobilis ex vicinis eorundem, seu de dicto Comitatu Symigiensi, usque spatium quod a mane incipiens ad horam prandii per equitem ambulando & trotando fieri possit, forum in possessione sua contra forum predictorum fidelium nostrorum, quod singulis hebdomadis in die Sabbati in prenominata possessione ipsorum Patha vocata celebrari consuevit, possit seu valeat celebrare et proclamare.* In cuius rei memoriam perpetuamque firmitatem, presentes concessimus litteras nostras privilegiales, duplicis sigilli nostri munimine roboratas. Datum in Peeeth, per manus discreti viri Magistri Bartholomei aule nostre vicecancellarii, dilecti et fidelis nostri. Anno Domini M. C. C. LXXX. tertio.

IX.

Testimonium loci credibilis de emtione et venditione ancillae pro sex marcis, an. 1290. KAPRINAI MSS. B. XVIII. Nro. 119. — Ex autographo SAM. SZEKELY.

Nos Benedictus Prepositus et Conuentus de Lelesz significamus uniuerfis quibus expedit, presentium per
teno-

tenorem, quod constituti coram nobis Hēnricus et Nicolaus filii Johannis de Comitatu de Ungh, qui etiam pro Petro fratre ipsorum responderunt, *quandam ancillam* eorundem Fata vocatam, quam in nostri presentia personaliter statuentes hereditariam esse dicebant, venderent Jacobo de Pank Comiti videlicet de Ungh, *pro sex marcis* perpetuo possidendam, quam pecuniam Jacobus supra dictus eisdem persoluit plenarie coram nobis. In cujus rei testimonium nostras literas concessimus, nostri sigilli munimine roboratas. Datum anno Domini M. CC. nonagesimo.

X.

Formula instrumenti confecti per Notarium auctoritate apostolica et imperiali publicum. — E KOLLERI *Hist. Episc. Quinqueecl.* T. II. pag. 293. et seqq.

In nomine Domini amen. anno eiusdem a natiuitate 1309. die 15. mensis Iunii, Pontificatus Domini Clementis PP. V. anno quarto. In maiori Ecclesia Sancte Marie de Castro Buden. Vesprimien. dioec. Reuerendo in Christo Patre & Domino, Domino Fratres Gentili tituli S. Martini in montibus presbitero Cardinali, Apostolice Sedis Legato, iuxta maius Altare ipsius ecclesiae Sancte Marie sedente, ac Venerabilibus in Christo patribus dominis T. Strigonien. archiepiscopo ad coronationis magnifici Principis Domini Caroli Ungarie Regis Illustris, et missarum solennia celebranda ante ipsum altare stante parato, et V. Colocen. archiepiscopo, E. Varadien, & I. Nitrien. Episcopis eidem Strigonien. Archiepiscopo assistentibus, Serafino Preposito Posonien. in Diaconatus, et Michaele Canonico Strigonien. in Subdiaconatus ordinibus prefato Strigonien. archiepiscopo administrantibus, ac Iohanne Preposito, Iohanne Cantore, Colino Custode, Petro, Stephano, Paulo, Iacobo, Iohanne et Nicolao Canonicis Ecclesiae Alben. dicte Vesprimien. dioec. regalia paramenta, ut moris est, supra altare ipsum preparantibus; nec non magnificis ac nobilibus viris Ungarie Regni Baronibus, videlicet
Homo-

Homodeo Palatin. pro se et filiis suis, Dominico Magistro pro se et fratribus suis Cocos & Lozcho, Demitrio Magistro filio Nicolai et Philippo de S. Geroldo pro se et pro Matheo Palatin. de genere Chaak, Stephano filio Bagim de Posega, Aladaro de Forro, Petro & Marco filiis Stephani de genere Chaak, Becca Magistro pro se et pro fratribus suis, Magistro Dionysio Aynardi, et Magro Benedicto pro se et pro Magro Ugrino, Magro Tauarnicorum Domini Regis Ungarie predicti, Ladislao Vernerii Comite Buden. ac Ven. in Christo Patre Fratre P. Archieppo Spalat. pro Paulo Bano Croatorum et Bosne, Domino Nicolao postulato ad Ecclesiam Iaurien. pro Magro Henrico Bano Sclauonie, et pro Magro Nicolao eiusdem Magri Henrici nepote, et Petro Archidiacono de Chasma in ecclesia Zagrabien. pro Stephano, Yuano, et Radislao filiis Bobonich magnis Comitibus Sclauonie, ante altare predictum astantibus. In prefata quoque ecclesia Sancte Marie Venerabilibus in Christo Patribus M. Agrien. Abba Vacien. P. Quinqueecclesien. B. Vespriemien. A. Zagrabien. B. Cenadien. L. Sirmien. et G. Bosnen. episcopis, ac P. Scepuacen. Preposito, aliisque Prelatis et Clericis, religiosis et secularibus, Ministro Minorum, et Prioribus Predicatorum et Heremitarum Sancti Augustini Prouincialibus, et eorum ac S. Benedicti, et aliorum ordinum fratribus; Nobilibus insuper, Ciuibus et popularibus Ciuitatum, Castrorum, et villarum atque locorum Regni Ungarie, in multitudine copiosa presentibus, prefatus Dominus C. Ungarie Rex in manibus prefati Strigonien. archiepiscopi, et mei Notarii infrascripti librum tenentium, flexis genibus ante altare predictum, et coram eodem Strigonien. Archiepiscopo, tactis et obsculatis Sacrosanctis Evangeliiis, infrascripta primo literaliter lecta, deinde in Ungarico exposita per se predictum Strigonien. Archiepiscopum, inuiolabiliter seruare iurauit; videlicet Deo subdi, legi eius obsequi, fidem Catholicam, quam uniuersalis Romana Mater Ecclesia predicat et docet tenere, eandem ecclesiam Romanam,

et

et prefatam Sancte Marie, et Sancti Adalberti, ceterasque Ecclesias in ditione sibi credita constitutas, et earum Episcopos & Praelatos cum omnibus illis legitime subiectis, et ex Deo sibi creditis, secundum Deum commendare, honorare, et defendere; Papam Romanum et Legatos ipsius Ecclesie Romane non impugnare, sed potius defendere, eiusque Ecclesie Romane iura non ledere, nec terras ad ipsam pertinentes, vel statuta seu ordinamenta ipsius in eisdem terris scienter violare; Regnum sibi commissum, & iura Regalia non minuere, nec alienare, sed potius augere, et male alienata hactenus, secundum datam sibi gratiam, ad ius pristinum reuocare. Nobiles Regni sui Ungarie in approbato et antiquo iure seruare, atque a Tirampnorum oppressione eripere; legitimo coniugio tantum uti et contentum esse, dicente scriptura: relinquet vir patrem et matrem suam, et adhaerebit uxori sue, et erunt duo in carne una, et quod Deus coniunxit, homo non separet; Populo Dei sibi ex Dei providentia commendato prodesse et non obesse, & neminem ex eis sine iusti legitimique iudicii examinatione condemnare et de terra delere, delectatus Psalmiste voce dicentis: beati, qui custodiunt iudicium, et faciunt iustitiam in omni tempore; promittens, spondens, atque pollicens coram Deo, Beata et gloriosa semperque Virgine Dei genitrice Maria, beato Adalberto martire atque Pontifice, et omnibus Sanctis, Prelatis, Baronibus, Nobilibus, Religiosis, et aliis supradictis, omnia predicta et singula firmiter et inuiolabiliter observare, in quantum divino fultus adiutorio fuerit, secundum scire suum et posse. Super quibus tam Barones predicti presentes ibidem, quam alii prenominati, nomine et pro parte absentium predictorum, a sepefato Strigonen. Archiepiscopo singulariter requisiti, tactis eisdem Sacrosanctis Euangelis, eadem omnia et singula suo iuramento firmantes, ipsumque Dominum C. recognoscentes in verum et legitimum Regem Ungarie, ac suum et dicti Regni Dominum naturalem, ipsi Regi, in sepedicti Strigonen. Archie-

chiepiscopi et mei predicti Notarii manibus ut predicatur librum tenentium, prestiterunt debite fidelitatis homagium, et solitum Ungarie Regi ab eiusdem Regni Baronibus iuramentum.

Et ego Guillelmus de Sangineto apostolica et imperiali auctoritate Notarius publicus, predictis omnibus presens interfui, ipsaque de mandato ac auctoritate prefati Domini Legati scripsi et publicaui, meoque signo consueto signavi, et ad maiorem predictorum roboris firmitatem ac memoriam futurorum, supradictus Dominus Legatus presens Instrumentum publicum fecit Sigillo proprio roborari.

XI.

Comitatus de Szatthmar Duellum pedestre inter litigantes decernit. KAPRINAI MSS. B. XVIII. Nro. 63. —

Ex autogr. SAM. SZÉKEL.

Nos Mark Comes de Zothmar vice magistri Michaelis, et alii quatuor iudices de eodem. Damus pro memoria, quod cum Iohannes filius Zacharie super subtractione rerum de ecclesia sua, contra Stephanum dictum Chyba, in Festo exaltationis S. Crucis, testes evidenciores coram nobis produxisset; idem vero Stephanus legitime interrogatus, idem iuramento testimonium noluisse; nos itaque partibus volentibus et sponte assummentibus, *Duellum pedestre iudicauimus inter partes*, ita, quod idem Stephanus propria in persona dimicabit, Iohannes vero producet pugilem quemcunque poterit meliorem. Duellum vero feria secunda proxima post Festum Galli confessoris coram nobis. Datum in Zothmar, secunda feria in Festo prenotato.

XII.

Idem Comitatus duello victum laqueo suffocare iussit, anno 1321. KAPRINAI l. c. Nro. 64.

Nos Martinus (Mark?) Comes de Zothmar, et alii quatuor iudices de eodem damus pro memoria, quod

quod secunda feria proxima Ioachimus filius Abraam contra Stephanum Chyba peditem duellum inhyendo, eundem Stephanum in area Duelli dimicando deiecit, et eundem pro poena patibulo suspendi ut furem manifestum eundem praecepimus, per eandem mortem merito est suffocatus. Datum in termino praenotato, anno Domini MCCCXX primo.

XIII.

Duellum equestre inter litigantes indicitur, an. 1329.

KAPRINAI XXXIX. B. Nro 28. — Ex autogr. SAM. SZÉKELY.

Nos Comes Nicolaus Vice iudex Magistri Wyllermi damus pro memoria, quod Dominicus filius Iacobi de Halagus, contra Iohannem, Petrum et Lukacium filios Fertes (ex quibus idem Iohannes personaliter comparuit in figura iudicii) egit proponendo in hunc modum: quod feria sexta proxima post diem cinerum, cuius vigesima reuolutio praeteriit annualis, praedictus Fertes pater ipsorum, Batiaz fratrem suum, in possessione sua Halagus vocata occidisset. E conuerso vero praedictus Iohannes patrem suum memoratum penitus haec fecisse denegauit, et in instanti, porrecto signo duelli, idem Iohannes pro se absque fratribus suis memoratis, videlicet producto testimonio, se super duello submisit, praedicto Dominico signo duelli in eodem instanti acceptante. Unde nos partibus volentibus & assignantibus, *duellum equestre adiudicauimus inter partes* tali modo: quod sexagesimo secundo die datarum praesentium, videlicet secundo die b. Luciae Virginis nunc venturo, praedictus Dominicus pugile congresso, et Iohannes pugile incongresso secum adductis, aut propria in persona, in area duelli coram Domino nostro (scil. dimicabunt) in Wyssul. — (Datum) secundo die quindenarum Beati Michaelis Archangeli, Anno Domini millesimo trecentesimo vigesimo nono,

Epigraphe: Pro Iohanne filio Fertes, contra Dominicum filium Iacobi, super duello equestri ad villam Wyssul; ad praesentiam Domini nostri, memoriale. hunc

XIV.

Vir nobilis furti accusatus, iurejurando se coram se de sacra excusat, adjutus juramento alterius conditione sibi paris, an. 1333. (KAPRINAI MSS. B. Tom. XVIII. Nro. 31. — Ex autographo SAM. SZÉKELY.)

Nos Magister Ioannes Praepositus Ecclesiae S. Georgii Martyris de Strigonio Canonicusque Ecclesiae Agriensis, Generalis Vicarius Venerab. in Christo Patris Domini Nicolai Dei et Apostolicae Sedis gratia Episcopi Agriensis, damus pro memoria, quod cum iuxta continentiam priorum literarum nostrarum, comes Petrus filius Iohannis de Panyila, *secundo se ac Nobili sibi simili* in Octavis S. Mychaelis Archangeli, contra Dominicam uxorem Georgii Clerici de Harfan, in capella eiusdem Domini nostri Episcopi, sacramentum praestare debuisset: adueniente ipso termino, dictus Comes Petrus cum praefato *coniuratore suo, videlicet nobili sibi simili*, contra dictam Dominicam praestitit Sacramentum super eo, quod ipse duo pecora, scilicet *unam vaccam et unum bouem, unam marcā valentes*, eiusdem Dominicae, ab ipsa Dominica non abstulisset, et in his contra eandem Dominicam penitus innocuus esset et immunis. Datum Agriae in crastino ipsius diei iuramenti, Anno Domini 1333.

XV.

Palatinus iudicium prorogat. — Ex apographo.

Nos Wylhelmus Drugeth Palatinus et Iudex Cumanorum damus pro memoria, quod causam, quam Gregorius filius Iohannis, et Petrus filius Pauli, ex quibus idem Gregorius pro se personaliter, pro ipso vero Petro, cum procuratoriis literis Capituli Ecclesie Scep-

Scepsienſis adſtitit, contra Gregorium filium Iremar, pro quo Iohannes filius Uz cum procuratoriis literis Prepoſiti & Conuentus de Jazow, in factu quorundam iugerum terrarum pro ſex groſſis eſtimatarum, in octauis Feſti Natiuitatis S. Iohannis Baptiſte mouere habebant coram nobis: de partium voluntate ad octavas feſti Sancti Michaelis Archangeli nunc venturas, ſtatu in eodem peremptorie duximus prorogandam, ſi partes medio tempore non potuerint concordare. Datum in Wiſſegrad, duodecimo die termini prenotati. Anno Domini M. CCC. XXXX. ſecundo.

XVI.

Ludovicus I. R. H. Comitatus Temeſienſis Comitem et Caſtellanum nouum indicit, an. 1371. (KAPRINAI MSS. B. HL. Nro. 28. a.)

Nos Ludovicus Dei Gratia Rex Hungariae, Poloniae, Dalmatiae &c. vobis Magiſtro Ladislao Filio Andreae Vice Caſtellano de Themesvár; item uniuerſis officialibus et tributariis Domini Ladislai Ducis Opuliae et Palatini, in dicto Comitatu et eius partibus inferioribus conſtitutis, nec non Nobilibus et alterius ſtatus hominibus, ac etiam villicis et jobbagyionibus noſtris uniuerſis, praesentibus declaramus, quod nos ipſum Comitatum, cum Caſtellanatu dicti Caſtri, ab eodem Domino Ladislao Duce Opuliae, proximo et Palatino noſtro, ſalua dilectione noſtra auferentes, ipſos Magiſtro Benedicte Filio Pauli Filii Heem, duximus pro honore conferendos. Quocirca vestræ Fidelitati firmis damus in mandatis, quatenus mox viſis praesentibus, vos Vice-caſtellanus, item Officiales tributarii dicti Domini Ladislai Ducis, exeatis de honoribus praenotatis, et ipſos honores eidem dicto Benedicte vel hominibus ſuis reſignetis pleno iure. Vos vero villici, populi, et jobbagyiones noſtri, eidem Benedicte Bano obediatis, et collectas vestræ ſibi adminiſtretis et extra-

detis, temporibus oportunis. Aliud non facturi gratiæ nostræ sub obtentu. Datum Vissegrad, in festo Beati Martini Episcopi & Confessoris. Anno Domini 1371.

XVII. *idem*

Litteræ metales Conuentus S. Crucis de Lelesz, anni 1379. — Ex autographo quod cupro incisum est Tab. III. Nro. 11.

Omnibus Christi fidelibus presentibus et futuris presens scriptum inspecturis, Dominicus Prepositus et Conuentus Sancte Crucis de Lelesz, salutem in salutis largitore. Ad uniuersorum notitiā harum serie volumus peruenire, quod Emerico filio Iohannis, Petro filio Stephani, Iacobo Andree, et Iohanne filiis Petri filii Iohannis Nobilibus de Tyuadarfalua ab vna; parte verò ex altera, Iohanne filio Pauli, Valentino, Benedicto, & Akus filiis Stephani pro se personaliter, pro Iohanne verò filio eiusdem Stephani, idem Iohannes filius Pauli totum factum expediendum sicut presentibus continetur, ad onus suum assumptum; Bartha et Thoma filiis Egidii pro se personaliter, pro Iacobo verò idem Bartha frater suus modo premissio factum ad onus suum expediendum assumptum; Nobilibus de Chatouhaza, coram nobis constitutis, confessum extitit per easdem partes unanimi voto pariter et relatum, qualiter pretextu iustificationis et metarum erectionibus inter ipsos sepe sepius discordie et lites seminate et ortæ fuissent. Tandem tamen ad ultimum, propter melius et utilius commodum possessionum predictarum, habita matura inter se deliberatione, ipsas possessiones Tyuadarfalua et Chatouhaza vocatas, his metis ab inuicem sequestrassent et distinxissent: quod primo incepissent a parte orientali, iuxta unam viam quæ ducit de villa Fraganfalua in villam Tyuadarfalua, iuxta quam versus meridiem erexissent duas metas terreas, a quibus, vt refertur, ten-

dit versus occidentem plagam per medium campum Fyzkusmezeu appellati, et cadit ad locum Zathvelge dictum; abinde transit ulterius per modicum spatium infra in eodem Zathvelge, et tandem salit de ipso ad terras arabiles versus meridiem, et venit ad siluam Lusuk dictam, in cuius latere a parte septentrionali existenti erexissent duas metas terreas; deinde currit in latere eiusdem silue ab eadem plaga adiacenti ad unam arborem ilicis, signo crucis consignatam, a qua transit per medium ipsam siluam ad unum locum scilicet voluptabrum porcorum Fertes dictum; deinde exit ad campum directe versus meridiem, et in exteriori latere eiusdem silue, ab ipsa plaga adiacenti dirigitur versus occidentem, et venit ad finem ipsius silue Lusuk, ubi exit unum er Sassas vocatum, et currit in eodem versus meridiem, ad aquam Told nominatam, et in eadem aqua transit paululum superius, et salit de ipsa aqua ad latus unius campi Belfemezey a parte orientali adiacens venit ad vnam arborem piri, sub qua sunt due mete terre erecte, ab istis transit in eodem campo per modicum spatium ad unam metam terream, a qua declinatur paululum ad plagam inter meridiem et occidentem, et anexit alteram arborem piri cruce consignatam, a qua tandem cadit ad unum Telgefer, et de ipso er dirigitur paululum ad occidentem, inde ad Belfemathara et inde in latere eiusdem a parte meridionali adiacenti, et salit de ipso latere ad fluxum aquæ Huzylazpataka vocatum, et in eodem transit paruum infra, et salit extra ad siluam Zarazerdeu, et in eadem silua currit ad vnam arborem Gyartansa cruce signatam, et de ipsa arbore currit in eadem silua ad vnum lutosum locum, ubi dumi viminis et arbores Egurfa habentur, inde currit ad aquam Afouan vocatam, in quarum coniunctione sunt duæ mete terre, inde in meatu ipsius aque currendo coniungitur cum alia aqua Bater vocata, et ibi metalis cursus dicitur terminari. Quarum quidem metarum a parte orientali terre adiacentes, cum omnibus earum utilitatibus et quibuslibet pertinenciis ad easdem spectantibus, pre-

dicte possessioni Chatouhaza deuenissent, residuis omnibus terris, similiter cum earum quibusuis utilitatibus et pertinentiis, quemadmodum ipse mete scindunt, a plaga occidentali adiacentibus, predictae possessioni Tyuadarfalua remanentibus, cuique parti iure perpetuo et inreuocabiliter possidere, tenere et habere. In cuius rei memoriam perpetuamque firmitatem, praesentes literas nostras, ad instanciam parcium, pendentis sigilli nostri duximus munimine roboratas. Datum die dominico proximo ante Festum beati Laurentii Martyris, anno Domini MCCCLXX nono.

XVIII.

Maria Regina ius succedendi in bonis masculos agentibus feminae largitur 1385. (Literae praefactionales) — KAPRINAI MSS. B. Tom. IV. Nro. 33.

Nos Maria Dei gratia Regina Hungariae, Dalmatiae, Croatiae &c. Memoriae commendamus per praesentes, quod sicut ad supplicationis instantiam fidelis nostri Baronis, Magnifici viri Nicolai de Zeech, Palatini regni nostri, pro Nobili Domina Clara vocata, filia Petri filii Pethew de Makwa, Comitatus Castri ferrei, consortis videlicet Nicolai filii Michaelis de Egerwar, nobis humiliter porrectae: sic non minus pro fidelitatibus et sincerissimis seruitiis Michaelis Literati, et Stephani, filiorum eiusdem Nicolai, nostrae Maestati per eosdem exhibitis, praedictam Nobilem Dominam, Claram nuncupatam, matrem ipsorum Michaelis Literati & Stephani, annuente et consentiente *fidei nostro Barone, Magnifico Viro Nicolao Zambo, Magistro Tavarnieorum nostrorum*, tam de omnibus iuribus possessionariis ipsius condam Petri filii Pethew, quam de possessionibus, hominis sine haerede decedentis, olim Serenissimus Princeps Dominus Lodovicus Rex Hungariae, et genitor noster carissimus, felicis recordationis, pro suis fidelitatibus et seruitiis, fecerat collationem, potissime quia idem condam Petrus filius Pethew, filiis et fratribus ac proximis,

ad

ad quos iura sua possessionaria devolvi possent, infra quartam lineam cognationis destitutus fore perhibetur; in univ[er]s[is] possessionibus; et possessionariis iuribus ipsius condam Petri, et Nicolai filii ejusdem, hominum absque haeredum solatio defunctorum, in quibuscunque Comitatibus, et partibus Regni nostri Hungariae existentibus, et habitis, et quouis nominis vocabulo vocitatis, verum haer[ed]em et legitimum successorem, in filium masculinum praefati condam Petri et Nicolai filii sui, ex beneplacita voluntate Excellentissimae genitricis nostrae charissimae instituimus, creavimus, et praefecimus, de plenitudine nostrae Regiae potestatis et gratia speciali, non obstante, si pro ipsa Nobili Domina ius quartale proprium, vel dotalitii, maternum, aut alienum habitum haberetur, vel receptum, de quibus eadem Nobilis Domina vice reciproca correspondere teneatur, quoniam eam nolumus gratia nostra frustrari, in casu hujusmodi autem sibi praeiudicium gravari in hac parte, imo ipsas omnes possessionarias portiones, et quaeque iura possessionaria praefati condam Petri, et Nicolai filii sui, etiam de consensu ipsius Magistri Nicolai Zambo in hac parte, adhibito, eisdem Nobili Dominae, filiis suis, ipsorumque haeredibus et posteritatibus univ[er]s[is], absque praeiudicio iuris alieni, in perpetuam adscribimus haereditatem, praesentium literarum nostrarum testimonio mediante. Quas sub magno nostro sigillo dari faciemus, dum nobis fuerint reportatae. Datum Budae in festo Beati Nicolai Confessoris, Anno Domini 1385.

XIX.

Jacobus Abrahæ Castelianus Bajmocensis, Hermanno Heckel Scultetiam Tuffinensem nomine Leustachii de Ilsva Palatini adscribit. 1393. (BELII Notitia nova R. H. Tom. IV. pag. 441.)

In Nomine Domini Amen. Omnia tempora singularum rerum personarumque finem habere coguntur.

tur. Ideo ne ea quae tempore solito suo more contrahuntur, tempore insolito ponantur, idcirco memoria sit tenendum omnibus tam praesentibus quam futuris quibus expedit uniuerfis. Quod cum nos Iacobus Abrahe, Castellanus Baimoczensis, ex gratia Sigismundi Dei gratia Regis Hungariae Illustrissimique Marchionis Brandeburgensis illud castrum gubernassemus regendo, loco Magnifici viri Domini Leustachii de Ilsva, pro tunc Palatini Regni Hungariae, ad nostram personaliter accedens praesentiam vir sagacis ingenii Hermannus dictus Heckel, Iudex de villa Fabri atque conciuus in Probna, Domino nostro Magnifico viro Leustachio atque nobis exhibuit nonnullas literas priuilegiales super emtione villicatus iudiciiue villae Fabri praetactae, in quibus quidem literis prope finem conclusionis priuilegii continebatur talis Articulus: etiam eidem Iudici ejusque posteris in futurum subsequenti-
bus damus et comittimus nostris in tenetis, quandam filuam densam iuxta fluuium dictum Tussina, extirpandam, obsedendam, populo aggregandam, retinendam omni in iure Teutonicali, ac modum libertatum et consuetudinis dictae villae nostrae Fabri, seu aliarum circumadiacentium. Hoc itaque articulo perlecto et priuilegio, idem praefatus Hermannus Heckel, sibi nouum priuilegium speciale a Domino nostro Leustachio cupiuit fieri, super eadem filua densa, superius villam Fabri, ipsam velle in nomine populorum extirpare. Itaque, ad ipsius preces inclinatus vir Magnificus Dominus Leustachius, adiudicauit ipsius fieri petitionem. Et quia tunc occupatus negotiis officii sui Palatinatus, nobis, videlicet Iacobo Abrahe commisit, sibi Hermannus desuper conficere priuilegium nostro sub sigillo, quod et fecimus, cuius priuilegii tenor sequitur in haec verba: Nos Iacobus Abrahe, Castellanus Baimoczensis pro tunc, de beneplacito Domini nostri Leustachii de Ilsva, Palatinique Regni Hungariae, memoriae commendamus uniuerfis et singulis, quibus expedit tam praesentibus, quam futuris, quod nos considerata probitate morumque venustate sagacis viri Hermannus Heckel,

Heckel, iudicis de Villa Fabri, et conciuvis in Probna, ad petitionem suam superius insitam, dedimus, et contulimus sibi, suisque filiis et posteris, vnam filuam densam iuxta fluuium Tussina superius Villam Fabri; a monte Kynberg ascendendo fluuium Tussinam, usque ad tenuta villae dictae Czitzmann, cum collateralibus montibus, de iure ad fluuium Thussina spectantibus; ex alia vero parte montis dicti Wyndgeburg, usque metas Villae Fabri praedictae, cum suis collateralibus extirpandam, obsedendam, populo aggregandam, in libertate XVII. annorum, omni sine datione permanendum, et in iure Teutonicali seruandum, omni in iurisdictione, qua fruuntur fideles hospites nostri in Villa Fabri. His itaque annis XVII. libertatis elapsis, Domino nostro Leustachio, et suis haeredibus, iuxta possibilitatem ipsorum, ad modum aliarum villarum Teutonicalium, tenebuntur censuare atque seruire. Deinde eosdem omnes populos ad plantationem Heckelschey dictam, in iure Corponensi volumus indemnes conseruare. Item, si aliquis forte causally ibidem in fugam conuersus fuerit, sicuti rixantes in tabernis, si fuerit pro re honorifica, ad triduum ipsi dabuntur tregae, donec forte aemulis suis possit reconciliari. Item damus eidem Hermanno Heckel, illud iudicium libere possidendum, cum duobus laneis, et libera curia, et una taberna, tria molendina, unum quodque cum una rota, etiam unam rotam ferrandi robora pro asseribus, pro aedificiis domorum. Etiam damus eidem iudici et suis omnibus posteris in filios filiorum illud iudicium seruandum, commutandum, vendendum, exponendum pro censu, si ipsis placuerit, omni sine contradictione. Insuper damus pro Ecclesia, si ibi fuerit, commode locanda, suum liberum laneum cum curia. Item, damus facultatem iudici et suis posteris conseruandum carnificem, fabrum, pistorem, sutorem, factorem. Item, damus iudici, quicumque fuerit, sextum laneum, et sextum jobagyonem, qui sibi deserviat et suae posteritati, cum omni censu, sicuti in Villa Fabri. Idem iudex plenam

plenam habeat facultatem iudicandi cum suis iuratis; omnes causas, præter has, furtum, cum stupro. Homicidium sibi non do, non iudicet sine me illum qui miserit ignem: in quibus nos indicabimus, una cum eo, et suis iuratis, ita, ut duæ partes tangant nos, iudicem vero tertia. Item, in anno tria iudicia legalia habebimus, iuxta consuetudinem aliarum villarum, in quibus nos, vel nostri delegati descendant iudicaturi, vestris in expensis, tam iudicis, quam ceterorum ibidem commorantium. In cuius rei testimonium, hoc privilegium nostro sub appenso sigillo diximus roborandum testimonio litterarum. Acta sunt hæc ab anno Domini millesimo, trecentesimo, nonagesimo tertio. XII. die Mensis Maii. Præsentibus testibus multis fide dignis. Scripta per manus Iohannis de Probna, Notarii publici.

XX.

Epistola querula Capituli Eccl. Bacsiensis ad Sigismundum R. de Ladislao de K. χαρτοφάγω, an. 1410. KAPRINAI MSS. B. Tom. IV. Nro. 58.

Serenissimo Principi et Domino, Domino Sigismundo Dei gratia inclyto Regi Hungariae, Dalmatiæ, Croatiae, &c. Domino ipsorum naturali: Capitulum Ecclesiae Bacsiensis perpetuæ fidelitatis constantiam orationibus cum devotis. Regum Excellentissime, mortaliumque metuende, Domine noster naturalis! Præsentibus cogimur humiliter vestrae exponere Majestati: quomodo feria secunda proxima post festum Sanctæ Trinitatis, Ladislaus de Kerezturn, de Comitatu Bacsiensi, una cum Domina matre sua, in Capitulo coram nobis literis procuratoriis est confessus; ubi in continenti quidam familiaris, et procurator Ladislai de Szilagy personaliter adstans, quandam literam nobis demonstravit, quæ iura possessionaria Nobilis Dominae Catharinae, consortis ipsius Ladislai de Szilagy, concernere dignoscebantur; quæ inquam iura et possessiones pro præsentis dictus Ladislaus de Kerezturn apud

apud manus suas habere perhibetur. Quo facto dictus Procurator Ladislai de Szilagy, et Nobilis Dominae Catharinae consortis suae, ibidem praefatum Ladislaum de Keresztúr, et Dominam matrem suam, iuxta contenta ipsius literae, ab ulteriori detentione, (et) fructuum perceptione possessionum earundem, facie ad faciem prohibuit coram nobis. Tandem Ladislaus de Keresztúr praedictus paria ipsius literae nobis praesentatae, sibi a nobis dari postulavit: nos quoque petitionibus suis inclinati, de consensu partis alterius paria eiusdem dicto Ladislao de Keresztúr dare promiseramus, literam eandem de manibus nostris ad manus Magistri Stephani de Agria, Socii et Concanonici nostri, propter absentiam Notarii nostri, dedimus et assignavimus. Demum ipso Magistro Stephano, versus curiam suam transeunte, ipse Ladislaus de Keresztúr eum insecutus fuit, et in eadem curia sua ipsum Magistrum Stephanum coram se sedere fecit, et nomina Procuratorum coram nobis factorum, per ipsum scribi postulavit, ipseque Magister Stephanus dictam literam Ladislai de Szilagy sinistra manu fortiter tenens, dictus Ladislaus de Keresztúr graviter suspiravit, eandem literam de manu ipsius Magistri Stephani violenter diripiens, et hinc una cum famulo suo gladium arripiens, ipsam literam idem Ladislaus dentibus suis in minutas partes discerpens et dilanians, sigillum eiusdem literae cum quadam particula papiri mox deglutiit, et alta voce clamavit: quod siue jam in continenti moriatur, quia quod optaverat explevisset; et nisi eundem Magistrum Stephanum familiares sui defendissent, dictus Ladislaus de Keresztúr ipsum miserabiliter jugulasset, ubi quidam familiaris ipsius Magistri Stephani, Michael nomine, in manu exitit vulneratus per Ladislaum memoratum. Ad quos tumultus alii ex nobis celeriter concurrentes, in curiam ipsius Magistri Stephani, ubi tantum facinus commiserat, pro omni moda probationis veritate dictum Ladislaum de Keresztúr, dictae literae particulas de terra colligentem, et minores in particulas dentibus suis dilanantem cer-

nentes, una cum famulo suo praedicto deprehendimus, deprehensumque juxta modum et consuetudinem hujus Comitatus Bacsiensis, primo et ante omnia ad manus Iudicis Nobilium duximus assignandum. Quod inquam malum, et abusiua, praetensio, hanc sanctam Ecclesiam Dei Bacsiensem et Vestrae Celsitudinis, non tamen ista vice hoc affecit, sed etiam alias, quem propter innuentem vigorem nostri Gubernatoratus, pro tempore, ut potuimus, propensius supportauimus. Quare nunc supplicamus Vestrae Celsitudini humiliter et devote, quatenus huiusmodi pravae temeritatis incursum, remedio opportuno propensius dignemini obviare. Datum feria sexta proxima post festum Beati Urbani Papae, Anno Domini 1410.

XXI.

Statuta Contubernii textorum panni in tribus Sceptis Urbibus, an. 1416. — Ex protographo; saltem exemplo synchrono.

In dem Jare alz man schribet noch Gotes Geburt virczenhundert Jar und in dem sechczenden Jare, di Ersamen Meister des Hentwerkes der Wullenweber, alle gemeine, rich und arm, jung und alt, in den Ezchen in den dryen Steten, Lwcz, Keszmark unde Lubicz, vil Ezit und Tage mit groser Vornunft und Vorsichtikeit nicht dorch Nydes noch Hasses willen, nicht czu Schaden noch Beswernis andere Erberre Lemte, sundern dorch gutes alders willen Richtikeit unde Bestetunge yres Hentwerkes gesunnen und gedocht haben, wi si esliche Stucke di si noch aldyin Gelubde czu Norddorff yres Hantwerkes mit Wisheit begrife möchten, di do in groß Vorsichtikeit stete und ganz gehalten sint bi yren Eldern und Vorbaren alz yn Got genode, di do von Worte zu Worte beschreiben woren, und vorstoret und czubrochen sind in eslichen Sachen yn Ronyhe unde Ungenoden unde Feuers halben des Landes unde Pylage Gotes des almechtigen, wenne den Meistern Gemeine in den Ezchen in den dryen Steten vorgeschriben die Errunge yres Hantwerkes und Uneintrechtikeit di si hatten undereinander

die

die Meister Gemeine czu Herren nemen, und sunnen
 Nacht und Tag die vorloren zubrochen Stücke und
 vorstorten alden Gelubde yres Hantwerkes weder czu
 vernemen unde stetlich czu halten si Gemeine unde yre
 Nochtomelinge ane alle Rede und Wedersprechunge di
 hi nochvolgen in desen Worten. Ezw dem ersten sie
 gelibet und nach dem alden Gelubde yrer Vorvaren und
 Väter si stetlich halde wullen, das kein Meister rich noch
 arm nicht mer Lerknechte habe sal wen einen; derselbe
 Lerkneth sal usgenommen werde mit Wissen der vir Mei-
 ster in sulch mase, das man derkenne mit groß Vorsichti-
 keit, ab her frum si vnd geborn von erbern Leuten, der-
 selbe Lerkneth sal sich vorbinde usczudinen sine Leri-
 ar volkomelich VI. Jar, usgenommen ab her nicht lert
 w'ten, zo sal her bliben bi iij Jaren, ab her in
 den VI. Jaren virsil wolde mit sinem Meister und von
 ym ginge ader lyse, vnd yn XIII. Tagen nicht weder
 queme zu sinem Meister, zo sal her in dem Lande
 kein Recht habe uf dem Hantwert, sundern also begriffen,
 ab ein Meister czu kurz thu wolde sinem Lerkneth mit
 redelichen Sachen das her es nicht gelide mochte, zo
 sal der Lerkneth es kunt thu den III. Meistern, di
 sullen es derkenne noch den Rechten, und wen der Lerkneth
 usgedinet sine Leri- ar, zo sal in sin Meister von ym wise
 mit Gewande, nicht mit dem besten noch mit dem ergi-
 sten, das her selber macht, noch sinem Vornuge, und
 wen der Meister von ym gewiset sinen Lerkneth das her
 bei ist, zo hat her eine Willekór ab her wandern wil
 ader nicht; wil her wandern ein Jar ader zwei, ab es ym
 not thut, her mag sich czin an sine Gerechtfkeit das her
 sine Leri- ar usgestanden und gedinet hat alz ein frumknecht;
 ab her aber blibe wil und stelle zu Narunge, zo wullen
 die Meister Gemeine noch dem alden Gelubde, das
 her ein Jar dine sal einem Meister ume einen genanten
 Lon, das andere Jar erbete ume Geld, dornoch ab
 her sich helt frömlich und yn Eberkeit das her begert
 Meister zu werden, zo sal her usgenommen werde czwischen
 Winachten und Wasnacht und nicht zu einer andern Ezit
 in

in dem Jare, mit der Gerechtikeit alz si haben vnder
 yn die Meister Gemeine. Als ym Got gehüft vnd sine
 Fromheit das her usgenommen wirt czu einen Meister,
 zo sal her erbete ym selber und nicht vme Lon als ein
 anderer Kneht; ab ym di Erbert zu meisten wird und
 nicht berhwinde mag und zu kurz an dem Gelde, zo
 sal her helffe enen andern Meister und her ym weder
 helffe czu seiner Erbert, aber nicht vme Lon keinem Meister.
 Ab sich es geburte das ein Verkneht neme zu der Ee eine
 Witwe di do vor gehabt hette einen Meister, vnd nicht
 sine Veriar usgestanden hette, der sal gar keine Meisterschaft
 tribe, sundern der fulle die czwei Veriar und dornoch der
 Zitbrawe erbeten vme Lon uf di Ezit das her Meister wirt
 zwusschen Winachten und Pasnacht vorbenennet; hat her
 aber usgestanden sine Veriar und gedinet, zo sal her vri
 si der czwen Jar und dorezu nicht gebunden. Muth
 noch dem alden Gelubde: ab ein Kneht griffe czu der Ee
 mit eines Meisters Tochter, dem sal abe gehn ein Jar
 noch seiner Wilkor her si sin geweldig. Muth, ab ein
 Meister lyze einen Jun vnd her wolde czu dem Hentwerk,
 der sal genyse seines Vaters, und vri si, nicht gebunden
 czu den VI. Jaren, sundern her mag sich voreyne mit
 eynen erbern Meister uf eine Ezit alz yn bedersit suget
 dornoch czu warten seines besten alz in yre Gerechti-
 keit underwiset. Muth noch dem alden Gelubde: ab
 ein erber Man ein fremder queme czwusschen uns, es
 were in welche Stad es were under den drien Steten, vnd
 worbe in dy Ezeche und begerte Meister zu werden, und
 bewerte in seiner Gerechtikeit das her vor Meister were,
 der sol genyse sin Erberkeit, vnd sal usgenommen werde
 in die Ezeche, zu welchen Eziten her sinbegert in dem
 Jare an alle Hyndernz und Wederrede. Di alden
 Gelubde vnd Stücke hi beschreiben czu Nordorf des
 Hentwerkes habe wir Meister Gemeine in den Ezechen
 in den drien Steten Lucza, Resmark vnd Lubicz gelibet
 stetlich czu halden, mit den Werken czu volbringen, wir
 vnd alle vnser Nachkomelinge ane alle Rede und We-
 dersprechunge, yn sulchem Bunde, ab indert ein Man ader
 Mei-

Meister, jung oder alt, reich oder arm, in den drien Steten vorgennet, vaders Hantwerkes dorweder were, mit Worten oder mit Werken, der sal seinem Meister gut genug sin zu seinem Mitpruder, uf dem Hantwerk, wenne wir es gemeintlich gelibet haben in wolbedachtem Mute.
Datum ut Supra.

XXII.

Formula mandati, quod inhibitorium dicitur. —

Pro Genealogia Ioan. de Hunyad. — Ex apographo.

Ioannes de Hunyad Regni Hungariae Gubernator, uniuerſis et ſingulis Dominis Praeſatis, Baronibus, Comitibus, ſignanter autem in caſtris Hunyad et Hatzeg conſtitutis Caſtellanis, alteriusque cuiusuis ſtatus et praeeminentiae Homi-nibus, praesentes haſce noſtras viſuris ſalutem cum fauore. Dicit nobis Egre-gius Woyik de Chionok frater noſter condiuſionalis, in ſua pro Ladislai et Sandrini filiorum ſuorum, nec non Daan filii Iarizlo de dicta Chionok perſonis, quomodo complures forent Nobiles et Caſtellani, qui ipſos in diuerſis ſeruitiis, daciis, collectis, et exercituali-bus expeditionibus nimium aggrauaſſent, aggrauarentque etiam de praesenti, contra noſtram gratiam authoritate noſtrae Gubernationis ipſis factam. Unde nos praesen-tibus hiſce noſtris requirimus Dominationes veſtras et Fraternitates, quatenus praefatos Egre-gium Woyik de Chionok, ac Ladislaum et Sandrinum filios eiusdem, nec non Daan filium Iarizlo, poſteritatesque ipſorum uniuerſas, in ipſorum poſſeſſionibus, puta Chyonok praedicta in Hatzek, et Doboka in Hunyad diſtricti-bus habitis, nullo modo impedire et impedire facere dignemini: ſed eosdem, ac poſteritates eorum uniuerſas, ab omni exercituali expeditione, ſeruitiorum colle-ctis, et daciis quibusuis volumus habere exemptos, immo eximimus et ſupportamus, praesentium per vi-gorem. Pro eo quicumque Regni Hungariae ſucceſſo-res, ſignanter Caſtellani Caſtrorum Hunyad et Hatzeg praedictorum, praescriptam noſtram gratiam infringere attentauerint, indignationem Dei omnipotentis, ſuae-que

que Genitricis Virginis gloriosae, Sanctorum Petri et Pauli Apostolorum, ac omnium Sanctorum incurrant; ac eo facto anatemati sint. Datum in Karansebes, feria tertia proxima ante festum decollationis Iohannis Baptistae, anno Domini Millesimo Quadringentesimo quadregesimo octauo.

XXIII.

Privilegia Urbis Soproniensis per Matthiam I. Regem transumpta, et aurea bulla confirmata, anno 1464.
e MSS. L. B. ALEX. de TOTH-PRONA.

Mathias D. G. Hungariae Dalmatiae, Croatiae, Ramae, Seruiae, Gallitiae, Lodomeriae, Comaniae, Bulgariaeque Rex. Omnibus Christi fidelibus, praesentibus pariter et futuris, praesentium notitiam habituris, salutem in omnium Salvatore. Decet Regiam Maiestatem, ut preces bene meritorum suorum clementer exaudiat, et eos tanto liberalius fauoribus suis prosequatur, quanto ad obsequia sua cognouerit promptiores. Proinde ad uniuersorum notitiam harum serie volumus peruenire; quod Maiestatis venientes ad conspectum, fideles nostri, prouidi et circumspecti viri, Ioannes Ioachim magister ciuium, Nicolaus Phettr Judex, et Leonardus Aniwey, ac Caspar Schottel, Iurati ciues, nec non Ioannes Czigler, Notarius Ciuitatis nostrae Soproniensis, in ipsorum, ac uniuersorum aliorum ciuium, hospitum, et incolarum praefatae ciuitatis nostrae Soproniensis nominibus et personis: exhibuerunt et praesentauerunt nobis diuersas literas, tam nostras, quam aliorum plurium Regum Hungariae, praedecessorum videlicet nostrorum, sub sigillis ipsorum duplicibus, super nonnullis libertatibus, eisdem concessis, priuilegialiter emanatas, et supplicauerunt Maiestati nostrae humiliter et deuote, ut ex eisdem literis et priuilegiis, articulos omnium libertatum ipsorum, quibus iidem ciues, hospites, et inhabitatores praefatae Ciuitatis nostrae Soproniensis, per praefatos diuos Reges, ac nos gratiose condonati sunt, in summam recolligi,

et excerpti, excerptosque sub compendio literis nostris inferri facere, ac eosdem pro ipsis ciuibus, hospitibus, et inhabitatoribus adnotatae ciuitatis nostrae Soproniensis, *sub bulla nostra aurea* gratiose confirmare dignaremur. In quorum quidem priuilegiorum *primo*, videlicet Domini Caroli Regis, de anno Domini millesimo trecentesimo tredecimo, tredecimo Kalendas Nouembris, per manus discreti viri Magistri Ioannis, Albenfis Ecclesiae Praepositi, aulae suae Vice-Cancellarii et Archi-Diaconi de Kükellew dato, confirmatur per eundem Dominum Carolum Regem priuilegium olim Domini *Ladislai*, similiter Regis Hungariae, de anno Domini *millesimo ducentesimo septuagesimo septimo*, per manus venerabilis viri Magistri Thomae, electi Ecclesiae Albenfis datum, continens in se articulos sub his verbis: Volumus, quod iidem Ciues a iurisdictione, et potestate, ac iudicio omnium Baronum nostrorum, et specialiter Comitum Soproniensium, pro tempore constitutorum, exempti penitus et excepti habeantur; ita quod omnes causas, tam minores quam maiores quoque, super effusione sanguinum vel homicidii inter ipsos emergentes, Villicus ipsorum pro tempore constitutus, quem iidem Ciues communiter in Festo S. Georgii elegerint, iudicet et decernat, more ciuium Albenfium, et aliorum hospitum, in Regno nostro existentium. Et si idem Villicus in facienda iustitia negligens fuerit; non reus, sed Villicus ad nostram praesentiam euocetur, et nos personaliter decernemus de causa eorundem. Item volumus, quod si aliqui nobiles vel quicunque liberae conditionis homines, ad ipsum Castrum nostrum Sopronium conuenire voluerint, libere veniant et secure commorentur, et nobiles possessiones eorum in libertate ciuium praedictorum valeant conseruare. Et si qui de ipso Castro recedere voluerint, saluis rebus omnibus, venditis aedificiis, iusto terragio persoluto, recedere valeant de eodem. Ad haec volumus, quod medietatem tributi Ferthew, quam Bela auus noster, et Stephanus pater noster inclyti Reges Hungariae, pro

reparatione et conseruatione turrium in eodem Castro stantium, eisdem ciuibus concesserunt, iidem percipere valeant pacifice et quiete.

Item in alio Priuilegio eiusdem condam Domini Caroli Regis, de anno Domini 1317. 13. Kal. Nouembris, per manus discreti Magistri Ioannis, Alben. Ecclesiae Praepositi, Aulae suae Vice-Cancellarii, et Archi-Diaconi de Kükellew dato, confirmante priuilegium olim Domini Andreae Regis de anno Domini 1297. 15. Kal. Novembris, per manus discreti viri magistri Gregorii, Alben. Ecclesiae electi datum, continetur iste articulus, videlicet: hanc eisdem hospitibus nostris de Sopronio gratiam specialem duximus faciendam, vt iidem hospites, et quilibet ex ipsis, ab omni solutione tributi, sicuti ciues Alben. et Buden. per totius Regni nostri clymata, tam super aquam Danubii, et aliis fluuiis in Regno nostro existentibus in descendendo aut ascendendo quoque super terram, liberi et immunes penitus sint et exempti. Volentes, auctoritate praesentium uniuersis tributariis in quouis loco tributi in Regno nostro constitutis, sub amissione rerum et tributi, firmiter imponimus, vt de rebus dictorum hospitum de Sopronio vel quorumlibet ex ipsis, aut mercibus eorundem, contra formam gratiae eis per nos factae, nullum tributum recipere audeant vel praesumant. Sed eis, et cuilibet ex ipsis, cum rebus et mercibus eorum liberum transitum praebeant et securum, materia impedimenti, molestiae, aut nocumenti non obstante.

Praeterea in priuilegio *tertio* condam Domini Sigismundi Regis de anno Domini 1436. 6. Idus Martii, per manus Venerabilis Matthiae de Gathalocz, Praepositi Quinqueecclesiensis, Aulae suae summi Cancellarii dato, confirmatur priuilegium condam Serenissimi Domini Ludouici Regis, de anno Domini 1365. 8. Kal. Augusti, per manus Domini Nicolai Archi-Eppi Jadrensis, Cancellarii sui datum, iterum confirmans similiter priuilegium Domini Caroli Regis Hungariae, de anno Domini 1346. 16. Kal. Febr. per manus honorabilis et discre-

discreti viri Magistri Thathameri Alben. Ecclesiae praepositi, Aulae suae Vice-Cancellarii datum, quo continetur articulus: Annuentes, libertates ipsorum eatenus, quatenus a sacris progenitoribus nostris eis donatae et concessae exstiterant, dictis ciuibus nostris in nomine Domini restituimus, et restauramus; ac ex gratia uberiori et specialis dilectionis affectu, quem erga dictos ciues habemus, hac noua institutione, eadem libertatis praerogatiua, qua dicti ciues Albenenses et Budenses gratulantur, perpetua firmitate statuimus et ordinauimus, praedictos ciues Sopronienses, dilectos nostros et fideles, pacifice et quiete fruituros.

Item in priuilegio nostro de anno 1463. in Nandor Alba, in festo decollationis Beati Ioannis Baptistae dato, continetur iste articulus, videlicet, quod nos grata pensantes consideratione, multimoda seruitiorum genera, quae Ciuitas nostra Soproniensis huic Regno nostro Hungariae ex illa parte pro muro existens, ac eius ciues ac inhabitatores, praedecessoribus nostris Regibus, et Regno Hungariae, ac eius Sacrae Coronae constanter exhibuerunt; et quamuis saepius a prauis, Regios Honores et Statum persequentibus viris, impugnationes grauissimas, damna rerum, et pericula personarum, ac alias diuersas calamitates, et multas temporum iniurias susceperint et pertulerint: nunquam tamen a verae fidei semita visi sunt deuiasse; sed eo clarior eorum fides euasit, quo incommoda susceperunt grauiora. Pridem etiam in facto praefatae Sacrae Coronae Regni, et eius recuperatione e manibus Serenissimi Domini Principis Friderici Romanorum Imperatoris, solliciti exstiterunt, et oratoribus nostris pro ipsa Sacra Corona laborantibus, ob reuerentiam nostrae Regiae dignitatis, magnam reuerentiam fidelitatemque ostenderunt. Unde dictam Ciuitatem nostram Soproniensem consequenterque ciues et inhabitatores eiusdem, ac communitatem pro tempore constitutam, de nostra auctoritate et potestatis plenitudine, hac libertatis praerogatiua duximus libertandos ac decorandos, immo libertamus et decoramus, praesentium per

vigorem, vt ipsa Ciuitas Soproniensis a modo in posterum, omnium rerum venalium, et mercimonialium, ac bonorum, tam per aduenas et forenses, quam etiam Regnicolas nostros, ab externis partibus in hoc Regnum nostrum Hungariae, vel e contra ex hoc Regno nostro extra metas eiusdem ad partes alienas per Comitatum Soproniensem deferentium, pro communi loco cambii habeatur, teneatur, et reputetur; ac omnibus illis libertatibus et praerogatiuis, quibus ceterae ciuitates in hoc Regno nostro Hungariae existentes, in hoc specialiter per diuos Reges Hungariae, nostros scilicet praedecessores, dotatae sunt et libertatae, aut quomodolibet de iure et consuetudine vsae sunt et gausae, vt possint et valeant. Ceterum in quinto priuilegio similiter nostro, de eodem anno, loco, et die, quo supra dato, continetur iste articulus: Quod nos dictam Ciuitatem nostram Soproniensem, ac hospites, et inhabitatores eiusdem uniuersos, in omnibus illis antiquis libertatibus, gratiis, honoribus, consuetudinibus, exactionibus, et priuilegiis, quibus eadem Ciuitas nostra Soproniensis, consequenterque dicti nostri ciues et inhabitatores eiusdem, temporibus diuorum Regum Hungariae, nostrorum scilicet praedecessorum, vsi fuissent et gauisi; vti, frui, et gaudere, tenereque et conseruare volumus, et promittimus. —

Nos igitur supplicationibus praefatorum Iohannis, et Nicolai, Leonardi, Gaspar, et alterius Iohannis Regia benignitate exauditis clementer et admissis, praefatosque articulos ex huiusmodi dictorum Regum huius Regni, nostrorum scilicet praedecessorum, et nostris excerptos, ac pariter uniuersas literas, ex quibus videlicet huiusmodi articuli excerpti existunt, eatenus, quatenus eadem rite et legitime emanatae existunt, acceptamus, approbamus, et ratificamus, eosdemque, simul cum libertatibus in iisdem clarius expressatis, pro praefatis ciuibus, hospitibus, ac inhabitatoribus, ac tota communitate praefatae ciuitatis nostrae Sopron. praesentibus et futuris innouantes, perpetuo valituros confirmamus, praesentis scripti nostri patrocinio mediante.

diant. Decernentes vigore praesentium, ut ubicunque praesens priuilegium nostrum *aureae bullae nostrae* munimine consignatum, in iudiciis vel extra, pro parte dictorum ciuium exhibitum fuerit, nunquam ad exhibenda originalia supratactorum Regum praedecefforum nostrorum, aut etiam nostra, compelli inuiti aut cogi valeant. Sed huic praesenti priuilegio nostro, ubique et semper, perinde ac si omnia praetacta originalia priuilegiorum exhiberentur, plena fides adhibeatur. In cuius rei memoriam firmitatemque perpetuam, praesentes concessimus literas nostras priuilegiales, *aureae bullae nostrae* munimine roboratas.

Datum per manus Reuerendissimi in Christo Domini Stephani Colocensis et Bachiensis Ecclesiarum Archiepiscopi, Aulae nostrae summi Cancellarii, fidelis nostri dilecti. Anno Domini Millesimo quadringentesimo sexagesimo quarto, pridie Idus Aprilis, Regni nostri anno septimo, Coronationis vero primo. Venerabilibus in Christo Patribus, Dominis Dionysio de Zéch Cardinali, Strigonienfi, eodem Domino Stephano Colocensi Archiepiscopis; Ladislao Agriensi, Ioanne Varadiensi, Nicolao Transiluanienfi, Zagrabiensi sede vacante, Ioanne Quinqueecl. Alberto Vesprimien. Augustino Jaurien. Vincentio Vacienfi, Alberto Chanadien. Thoma Nitrien. Bosnenfi sede vacante, Urbano Syrmien. Marco Thininien. Segnien. sede vacante, Nicolao Modrusienfi Ecclesiarum Episcopis, Ecclesias Dei feliciter gubernantibus. Item Magnificis Michaelae Orzagh de Gwth Regni nostri Hungariae praedicti Palatino, Emerico de Zapolya Regni Bosniae gubernatore, Nicolao de Ujlak et Ioanne Pangracz de Dengelegh Vajuodis Transiluanis, Comite Ladislao de Palocz Iudice Curiae nostrae, eodem Emerico de Zapolya Dalmatiae, Croatiae, et Sclauoniae Regnorum nostrorum, et praefato Nicolao de Ujlak Machouiensi Banis, honore Banatus Zewrinienfi vacante, Ioanne de Rozgon Tauernicorum, Benedicto de Turocz Ianitorum, Andrea Pangracz de Dengelegh praefato Pincernarum, Stephano de Peren et Ladislao de Bathor Dapiferorum,

Paulo de Dombo et Ladislao de Wefen Agasonum nostrorum Magistris, Petro de Zokol Temesien. Andrea Pankircher Posonienfi Comitibus, aliisque pluribus Regni nostri Comitatus tenentibus et honores.

XXIV.

Matthias I. Rex H. Capitulo Ecclesiae Agriensis sigillum authenticum restituit. an. 1467. — Ex apographo DAN. CORNIDES.

Commissio propria Domini Regis.

Nos Matthias Dei gratia Rex Hungariae, Dalmatiae, Croatiae &c. memoriae commendamus tenore praesentium significantes, quibus expedit, uniuersis. Quod licet Capitulum Ecclesiae Agriensis, propter proscriptionem, quam ratione emanationis quarundam falsarum Litterarum, in Iudicio generali Comitatus Heuesiensis, de nostra commissione, per fidelem nostrum Magnificum Michaëlem Orszagh de Gutth, dicti Regni nostri Hungariae Palatinum novissime celebrato, incurrerat, Sigillum eorum quo utebantur, de jure et consuetudine nostri Regni, amiserint: tamen nos tum accepta supplicatione fidelis nostri Reuerendissimi in Christo Patris, Domini Iohannis, Archiepiscopi Strigoniensis, Apostolicae Sedis Legati nati, Summi et Secretarii Cancellarii nostri; tum vero ex eo, ne Ecclesia ipsa Agriensis, cuius nos Patroni sumus, temporibus nostris, in praerogativis suis a Sanctis Regibus donatis, detrimentum patiatur, quin potius amissa recuperet; eidem Capitulo Sigillum huiusmodi, duobus punctis ex utraque parte imaginis Sancti Iohannis consignatum, de gratia nostra speciali, ac consilio et deliberatione Praelatorum et Baronum nostrorum duximus restituendum; decernentes, omnes et quaslibet Litteras sub eodem Sigillo emanandas, illius esse vigoris, firmitatis, et auctoritatis, cujus ante proscriptionem emanabantur; immo reddimus et decernimus, harum nostrarum, quas in futuram et perpetuam rei memoriam, secreto Sigillo nostro communiti fecimus, vigore et testimonio

Litterarum mediante. Datum Agriae, die Dominico proximo ante festum Beati Laurentii Martyris, Anno Domini 1467. Regni nostri anno decimo, Coronationis vero quarto.

XXV.

Magistratus Budensis adiudicatoriae, an. 1489. — Ex autographo.

Commissio Dominorum in Consilio.

Nos Thomas, Meyngos dictus, Iudex iuratique ciues Castri noui montis Pesthienſis, memorie commendamus tenore presentium significantes quibus expedit uniuerſis, quod licet superioribus hys diebus prouidus Philippus Sellator conciuſis noſter, et honesta domina Katherina, consors ejusdem, quasdam particulas domus habitationis eorundem, in vicinitate egregii Stephani de Ragusio et Iacobi Bombardiste familiarium Regie Maiestatis ſite et habite, in aliis literis nostris specificè expressatas, circumſpecto Georgio Chyzar et domine Ele. consorti ſue legitime, pro flor. auri centum et viginti ſex, ac una vinea in promontorio Ciuitatis Lygethwelge dicto habita vendiderit et assignauerit: tamen prenotatus Stephanus de Ragusio, juxta noſtram judicariam deliberationem, depositis primitus preſtatis centum et viginti ſex florenis auri, perſolutis denique quatuordecim florenis auri, valorem ſcilicet predictæ vinee, una cum tredecim florenis, per annotatum Georgium Chyzar, ad reformationem predictarum particularum domus expoſitis, ratione vicinitatis, eundem Georgium Chyzar a poſſeſſione et ulteriori tentione talium particularum, domus, requirentibus ciuitatis noſtre libertatibus, excluſit. Quo factò antedictus Stephanus nobis attente ſupplicare curauit, ut nos ſibi de legitimâ ſtatutione ac appropriatione ipſarum particularum domus prenotate providere dignaremur. Nos itaque accepta ſupplicatione eiſdem Stephani de Ragusio, eidemque prout iuſte facta benigne inclinati, eaſdem particulas prenotatarum domus et orti cum omnibus

earum utilitatibus et pertinenciis quibuslibet ad easdem spectantibus, nemine penitus contradicente, dicto Stephano de Ragusio suisque heredibus et posteritatibus uniuerſis duximus appropriandas, ymmo appropriamus et in hereditatem perpetuam ascribimus. Statuentes insuper eundem Stephanum de Ragusio, uniuerſosque heredes et posteritates ejusdem, in perpetuum domynium earundem particularum domus et ortus, easdem jure perpetuo possidendi tenendi pariter et habendi in ususque suos beneplacitos conuertendi. In cuius rei memoriam firmitatemque perpetuam, presentes nostras literas Sigilli nostri munimine roboratas duximus concedendas, promittentes priuilegialibus literis nostris confirmare, dum nobis eedem in specie fuerint reportate. Datum Bude, feria secunda infra octauas ascensionis Domini, anno eiusdem Millesimo Quadringentesimo Octogesimo Nono.

(Sigillum in tergo literarum ceræ rubræ inpressum, scutum fasciatum cordiforme habet, cum perigraphæ: S. CIVIUM BVDENSIVM.)

XXVI.

Formula salui Conductus Regii. (Zingaris concessi). —
Ex apographo.

Uladislaus D. G. Rex Hungariæ et Bohemiæ &c. Fidelibus nostris uniuerſis et singulis, Praelatis et Baronibus, Comitibus, Castellanis, Nobilibus, ipsorumque Officialibus. Item Ciuitatibus, Oppidis et Villis earundemque Rectoribus, Iudicibus scilicet et Villicis; præterea Tricesimatoribus, Tributariis, ac tricesimarum, tributorum, teloniorumque Exactoribus, et omnibus subditis nostris præsentem literas visuris, salutem et gratiam.

Quia nos ad supplicationem nonnullorum fidelium nostrorum, Maiestati nostræ nobis propter ea factam, agilem Thomam Bolgar, Vajvodam Pharaonum, una cum aliis Pharaonibus sub viginti quinque tentoriis, et conductu siue comitiua sua vagantibus,

ab aliorum Vajvodarum Pharaonum in hoc Regno nostro Hungariae vagantium contubernio et societate segregauimus, atque pro faciendis globulis pixidum, siue aliis instrumentis ad belli usum necessariis, ad seruitia fidelis nostri Reuerendissimi in Christo Patris Domini Sigismundi Episcopi Ecclesiae Quinqueecclesiensis deputauimus; cui etiam simul cum comitiua sua, ubique in terris et dominiis potestati nostrae subiectis, iter tutum et expeditum dare volentes: mandamus Fidelitatibus Vestris, et cuilibet vestrum, harum serie firmissime, vt quodocunque ac quotiescunque idem Thomas Bolgar Vajvoda, cum comitiua viginti quinque tentoriorum, ac rebus et bonis suis, ad terras, possessiones et oppida, ac vestri in medium, sed et tricesimarum, tributorum, teloniorumque vestrorum loca applicauerit, eundem simul cum comitiua sua, viginti quinque duntaxat tentoriorum, libere stare, morari, et facta sua expedire permittere, et permitti facere debeatis et teneamini. Secus igitur non facturi gratiae nostrae sub obtentū. Praesentibus perlectis exhibenti restitutus. Datum Budae, Feria quinta proxima in octaua Festi Sanctissimi Corporis Christi, anno eiusdem 1496. Regnorum nostrorum Hungariae anno 6. Bohemiae vero 26.

XXVII.

Wladislaus II. auctoritatem Capituli Bosnensis restringit. 1498. (KAPRINAI MSS. B. Töm. XXV. Nro. 17.

Wladislaus Dei gratia Rex Hungariae et Bohemiae &c. Memoriae commendamus tenore praesentium, significantes quibus expedit uniuerfis. Quod quamuis superioribus diebus, per uniuersitatem Regnicolarum nostrorum, in Diaeta nouissime in campo Rakos celebrata conclusum, et per Majestatem quoque nostram literis etiam id concessum fuerit, ut Capitulum Ecclesiae Bosnensis testimonium suum ubique per totum Regnum nostrum Hungariae, ad quascunque executiones fiendas mittere possit: tamen ut ex
que

querelis fidelium nostrorum, uniuersitatis Nobilium totius Regni Sclauoniae intelleximus, cuiusmodi concessio nostra ipsis in eo potissimum officeret, quia in illo Regno nostro Sclauoniae tria Capitula essent, quae ad facta illius Regni nostri et regnicolarum nostrorum satis et superficientes sunt; nam propter multa loca credibilia variae fallitates in eo potissimum committerentur, quia aliquando personae ignotae loco Nobilium ad passionem destinarentur, et bona talium per fraudem fatentium; quod non fieret, si in aliquo duntaxat Capitulorum illius Regni nostri Sclauoniae, et non aliis remotis locis tales falliones fierent. Quapropter supplicatum extitit Maiestati nostrae in personis eorundem exponentium, ut ipsos ab huiusmodi contingentibus periculis eripere dignaremur. Nos igitur, qui inter alias curas et sollicitudines nostras ad ea potissimum intendere debemus, quae statui et commodo fidelium nostrorum conducerent; admissa igitur supplicatione praefatorum exponentium, nolentes vel juribus, vel antiquis consuetudinibus illius Regni nostri per huiusmodi concessionem nostram derogare; id eisdem regnicolis nostris gratiose duximus cedendum et annuendum, ut a modo praefatum Capitulum Bosnense, ad aliud (illud?) Regnum nostrum Sclauoniae, ad cuiusuis instantiam, vigore concessionis nostrae huiusmodi, nullum testimonium mittere, aut aliquas in eo executiones facere ullo unquam tempore possit et valeat. Decernentes quod omnes literae passionales, statutoriae, et causales ejusdem Capituli, cujuscunque generis existentes, pro parte ipsorum regnicolarum nostrorum emanatae, nullius sint vigoris et firmitatis; imo annuimus et concedimus atque decernimus, harum nostrarum secreto sigillo nostro, quo ut Rex Hungariae utimur, impressiue consignatarum vigore et testimonio literarum mediante. Datum Budae, in Dominica Inuocauit. Anno Domini 1498. Regnorum nostrorum Hungariae &c. anno octauo, Bohemiae vero vigesimo octauo,

XXVIII.

*Wladislaus II. Urbis Cassoviensis insignia et sigillum
auget. an. 1502. KAPRINAI MSS. B. Tom. XXIX.
Nro. 32.*

Commissio propria Domini Regis.

Wladislaus Dei gracia Rex Hungariae et Bohemiae
&c. Fidelibus nostris, prudentibus et circumspcctis
Iudici et juratis ceterisque ciuibus et toti communitati
ciuitatis nostrae Cassoviensis salutem et gratiam. Cum
ad Regiae dignitatis Celsitudinem eiusque Majestatem
Augustam, cujus ad exemplum ut plurimum subdi-
torum animi componuntur, hoc inprimis pertineat,
ut suorum merita, virtutes, et seruicia, semper aequa
lance perpendat, ut neque delinquentibus nimia in-
dulgentia se facilem semper praebeat, quo ex impu-
nitate licentia, et ex ea audacia delinquendi crescat;
neque bonorum egregiis facinoribus, rebusque prae-
clare gestis, immortalisque gloriae memoria dignis,
praemium desit: quorum altero malorum impro-
borumque petulancia et insolencia refrenatur coer-
ceturque; altero vero bene merentium animi, et his
virtutum igniculi insiti excitantur inflammanturque,
omnium denique malorum et periculorum constanti
fortique animo in rebus duris et aduersis perpeffo-
rum, non solum immemores, sed etiam imposterum,
ad quaevis aggredienda, tolerandaque aduersa, ex
quo virtuti omnia parent ceduntque, maiori studio
zeloque alacriores redduntur. Quod cum natura ipsa
in rebus humanis ita redditum comparatumque sit,
et ut etiam praeter haec, ex Regiae dignitatis nostrae
officio, sincerum priuati publicique muneris tenorem
servaremus; jam saepius illa fidelitatis et constanciae
vestrae argumenta, quo semper in hoc Regno nostro
Hungariae unice claruistis, animo nostro repetentes,
nolentes ea obscuritate quadam neglecta jacere, se-
pultaque tegi, aut obliuione e memoria mortalium
intercipi, sed potius etiam posteris omnibus, perpetua
nominis et famae vestrae testacione signari; aliqua sal-
tem,

tem, vel hisce literis, quae in felicì nostra exaltatione, et in ingressu ad hoc Regnum nostrum pulcherrime edidistis, commemorare statuimus, et inprimis laudandam illam, et nullo unquam saeculo delendam constanciam vestram, quam tunc nobis, et huic Regno nostro declarastis, recensendam duximus. Nam dum superioribus his annis, et in principio regiminis nostri, varii motus variaque bella potiundi huius Regni gracia orti fuissent, et inter alios Principes, Serenissimus Princeps quondam Dominus Albertus Poloniae Rex, Frater noster charissimus felicis memoriae, tunc solummodo Dux existens, cum valida manu ac numerofo exercitu contra nos et hoc Regnum venisset, hocque ipsum Regnum ambiens, inter alia loca, quae iam in deditionem suam deuenissent, etiam ciuitatem illam Cassoviensem occupare volens, ipsamque ob id dura obsidione cinxisset; vos tunc reuocatis in animo pristinis vestris virtutibus, quas semper, et potissimum in aduersis huius Regni, diuis Hungariae Regibus Praedecessoribus nostris, sincera fidelitate magnaue integritate, more progenitorum vestrorum ostendistis, statuistis consueta vestra grauitate, et fidei firmitate, omnia extrema potius perpeti, quam a nobis et Sacra huius Regni nostri Corona desciscere, labeque aliqua infidelitatis candorem nominis vestri contaminare, hostiumque circumfusorum vos prae ceteris omnibus ambientium, nunc blandas appellaciones, pollicitaciones multas, nunc minas feroces fortissime spreuistis. Tandem cum obsidione longa et dura cincti essetis, muri que vestri variis tormentorum generibus quaterentur prosternerenturque, quid virtus in aduersis valeat, vos speciosissimo exemplo declarastis. Nam nec fame, ferro, vigilia, neque ullius rei penuria, neque labore ullo fracti estis; sed huiusmodi longae et saevae obsidionis incommoditates, quae vos sine intermissione premebant, semper invicto animo, vel in anni parte saevissima, propriis sumptibus, non sine gravi sanguinis effusione pertulistis, corporibusque vestris pro custodia stationeque murorum die noctuque obiectis,

hostium terribiles impetus, tela aduersa, infestos ictus, vulnera crebra, pericula multa, semper erecto animo, pectore aduerso excepistis; et quod admirabilius est, non modo tot ipsorum hostium impetus fortiter sustinulistis, verum etiam in tantis vestris laboribus, saepe numero in hostium stationes magno animo irrumpentes, pulchram inde victoriam, cum ingenti hostium clade et spolio reportastis, nec ullis modis ac viis ad dedicionem compelli potuistis, quin forti animo tam gravem obsidionem ferentes, quousque nos tandem vos inuictos athletas e manibus hostium ductu et auspicio nostro liberavimus, ruptisque obicibus, et portarum vestrarum repagulis, quae diu clausae hostium conatibus nulla via parire, redditusque vobis conspectus noster, quo miro desiderio tenebamini, nos una cum Prelatis, Baronibus et Proceribus Regni nostri, hilari vultu, animo laetissimo, facie sincera, fide inviolata excepistis, vobisque dies ille ingressus nostri, omnium merito pulcherimus, gratissimus, et lucidissimus effulsit, talique ac tam memorabili, et praeclaro facinore, dum pro defensione et conseruatione illius auspiciatissimae Urbis nostrae, quae huius Regni nostri in eo loco singulare existit propugnaculum, animo infracto acerrime decertastis, nobis abunde illam eximiam vestram fidelitatem, constanciam invincibilem, quibus semper maiores vestri claruerunt, testatam reliquistis. Ut igitur tantam virtutem vestram, quae in aduersis semper clarior enitescit, perpetua laudis et gloriae vestrae testificatione, immortalitati commendaremus, utque vestra merita amplissimo praemio digna, vestraque praeclara facta, etiam testimonio nostro locupletissimo, omnibus Hungariae Regibus successoribus nostris comprobaremus, posterisque omnibus vestra constancia, fidelitas summis efferenda laudibus clarissime innotesceret, haec Arma, videlicet Angelum veste auro intexta coloris amethystini succinctum, flavam et calamistratam comam strophio siue ferto gemmato pressam, in cuius fronte ex huiusmodi corolla capitis diademati crux aurea prominet,

utraque ala Angeli coloris cœlestini micis aureis interlucet, tenens ambabus manibus scutum insigne, summum ejus in formam metæ euerfæ effigiatum, imum vero in modum turbinis fastigiatum, in scuti angulo gemino superiore, ex utroque latere galea aureis fibulis locata, ex quarum summitate flores penduli variorum colorum veluti vento agitati sparguntur, utrique galeæ corona aurea imposita, ex coronis singulis singulæ alæ prominent, quarum plumæ et pinnulæ tenuiores brachia alarum vestientes sunt coloris cœlestini, punctis aureis splendentibus, pennæ vero protensiores longioresque et extremæ, in altumque prorumpentes, sunt coloris crocei; in medio vero singularum alarum sunt singula lilia aurea; scuti autem pars suprema est coloris cœlestini, continens per longitudinem tria lilia aurea: in medietate autem scuti pene usque ad infimum est campus ruber, in quo fluunt stagnandoque labuntur quatuor flumina nominatissima: Danubius, Tybiscus, Dravus, Savus, primaria specialiaque huius Regni nostri insignia, suo colore depicta, quæ ipsis, tamquam defensoribus et propugnatoribus eiusdem Regni nostri, per nostros Prædecessores Hungariæ Reges gracie collata existunt, quibus usque in præsentiam usi fuerunt. In medio autem ipsius campi rubri quatuor fluminum præfatorum est aquila media stans erectaque, collo tamen et capite integra, coronam auream capite gestans, rostro aurato, pedeque sinistro ungulorumtenus aurato, lingua exerta vibranteque, a cuius pectore linea aurea ad sinistram alam usque protracta, summitasque eiusdem lineæ figura trifurca terminatur, quæ est insigne nostrum gentilitium et auitum, quo vos ex singulari favore nostro Regio ornauimus, quem jam tempore felicitatis nostri regiminis sibi immortalibus facinoribus peperistis. Scuti autem pars inferior, in campo coloris cœlestini, linea satis ampla rubra, quatuor tessellis aureis intextis sejugata, a primo dextro angulo in imum angulum sinistrum descendens interfecatur, supra quam lineam, in eodem campo, est

est liliū unicū aureū ; infra autem eandem lineam in eodem campo sunt duo lilia aurea, quae quidem illustris Domina Anna consors nostra charissima, ex beneplacita voluntate sua, ex suis propriis armis, eisdem fidelitatibus vestris, ob perpetuam rerum, bene feliciterque pro defensione Regni huius et conseruacione istius Ciuitatis nostrae Cassovienſis, gestarum memoriam, benigne fauorabiliterque concessit; prout haec omnia in capite seu principio praesentium literarum noſtrarum, pictoris non indocta manu, suis caracteribus et figuris et coloribus facta et depicta sunt; vobis animo deliberato et ex speciali gracia nostra Regia, et plenitudine authoritatis noſtre, eciam consensu et beneplacito praefatae Serenissimae Dominae Annae Reginae coniugis nostrae charissimae, cuius armorum certam partem in his inseri, et innecti volumus, dandum duximus et concedendum, vosque et omnes posteros vestros huiuscemodi laudis et virtutis testimonio sempiterno ornandum, imo ex abundantiore plenitudine nostrae specialis graciae damus, concedimus, et praesentibus elargimur, ut vos vestrique haeredes et posteritates uniuersae, praescripta arma et virtutis vestrae insignia, a modo in posterum ubique, in praeliis, bellis, Troiis, et aliis quibusuis rebus et exercitiis militaribus, nec non sigillis, velis, cortinis, papilionibus, et in uniuersum in quarumlibet rerum et expeditionum generibus, uti possitis et valeatis, vestrique haeredes in signum et testimonium paternarum virtutum; a quibus simili dono et gracia nostra regia provocati studeant non degenerare, ferre gestareque possint et valeant, eisdemque nomine communitatis perpetuo uti, frui, et gaudere, tantoque vehementiori studio in posterum nobis et Regibus Hungariae successoribus nostris, et sacrae Coronae Regni Hungariae, totis viribus, summa fidelitate, praecipua constancia, instar virtutum maiorum suorum, inseruire contendant, quanto se largiore amplioreque praemio, et gracia nostra Regia donatos et ornatos esse conspexerint. In cuius rei memoriam firmitatemque perpetuam, praesentes literas nostras, secreto
figil-

figillo nostro, quo ut Rex Hungariae utimur, impendenti communitas, vobis ac heredibus et posteritatibus vestris uniuersis duximus concedendas. Datum Budae, in festo conceptionis Virginis gloriosae, anno Domini millesimo quingentesimo secundo, Regnorum nostrorum Hungariae &c. anno tredecimo, Bohemiae vero tricesimo tertio.

XXIX.

Wladislaus II. R. H. Conuentui sacrarum virginum de Vdsárhely Sigillum authenticum confert, an. 1511.
(KAPRINAI MSS. B. Tom. III. Nro. 32.)

Wladislaus Dei gratia Hungariae, Bohemiae, Dalmatiae, Croatiae &c. Rex, nec non Slesiae et Lucemburgensis Dux, Marchioque Moraviae et Lusatae &c. Ad futuram perpetuamque rei memoriam. Quum ad officium ac potius pietatem Principis catholici, religionemque ac cultum diuinum, summi Creatoris laudem propagare cupientis, pertinere arbitremur, personas Deo dedicatas, et maxime eas, quae reclusae et rebus mundanis exemptae, jugem impendunt Domino famulatum, liberalitate religiosa ac munere perpetuo amplecti atque prosequi; mentis nostrae oculos, in Collegium Deo devotarum Sanctimonialium, sub titulo Beatissimae Mariae Virginis, Ordinis Praemonstratensium, in claustro in oppido Vasarhel fundato degentium, quas nos prioribus Monialibus Ordinis S. Benedicti, — — — — — inde regia nostra autoritate, salutaribus ac iustis ex causis, ordine Juris observato, eiectionis et expulsionis, in earum locum collocari et imponi fecimus, conjicientes: easdem quo feruentius diligentiusue Deo Creatori omnium in Christi fidelium salutare exemplum seruire possint, proque nostra erga sanctitatem et Religionis earum observantiam deuotione et affectu, tituloque et nomine stabili et omni aevo permanente decorandas, et fulcendas duximus. In cuius quidem nostri muneris signum et indicium, eidem Conuentui seu Collegio ipsarum Sanctimonialium, animo deliberato et ex certa nostra
scien-

scientia, Praelatorumque et Baronum nostrorum ad id accedente consilio et deliberatione, Sigillum cum sculptura siue simulacro imaginis gloriosissimae ac intermeratae Dei Genitricis, semperque Virginis Mariae, Filium suum unigenitum sub figura pueri in ulnis tinentem et amplectentem, in circumferentia eiusdem sigilli, cum characteribus latinis, hunc titulum in se continens: *S. Conventus Monialium de Vaserhel*, in argento, aut in cupro, vel alio ad id apto metallo parand' et fabricand', et sculpend' duximus annuendum et concedendum, ut scilicet ipse Conventus Monasterii praedicti, ipso sigillo, quod in perpetuum authenticum esse volumus, uti, frui, et gaudere, ac ad instar aliorum similium Conventuum Sanctimonialium, sigilla authentica habentium, cum ipso Sigillo, per nos ut praefertur concessio, Literas passionales, procuratorias, testimoniales, ac alias quascunque, de more signare et communire, ac demum eadem libertate in dandis literis, et aliis rebus per illud conficiendis, quibus ceteri Conventus Sanctimonialium cujuscunque Ordinis, de Jure vel consuetudine utuntur, uti et frui perpetuo valeant atque possint. Nos autem nihilominus omnes Literas, quae per ipsum Conuentum sub Sigillo praedicto, quibuscunque legitime concessae fuerint, praesentibus auctorizantes, tanti vigoris esse decernimus, quanti aliorum Conuentuum, eiusdem vel alterius cujuscunque Ordinis Literae habentur. In cuius rei memoriam firmitatemque perpetuam, praesentes Literas nostras authenticas, Secreti Sigilli nostri, quo ut Rex Hungariae utimur, munimine roboratas, eisdem Sanctimonialibus Praemonstratensibus, praesentibus et futuris, duximus concedendas. Datum Budae, in festo Assumptionis Beatissimae Mariae Virginis, anno Domini millesimo quingentesimo undecimo. Regnorum Hungariae anno vigesimo primo, Bohemiae vero quadregesimo primo.

XXX.

Ludovicus II. R. H. Conventui Ord. Praemonstr. Chornensi ius gladii concedit. HEVENESSI MSS. Tom. FF. seu XXII. p. 281.

Nos Ludovicus Dei gratia Rex Hungariae & Bohemiae &c. Memoriae commendamus tenore praesentium significantes, quibus expedit uniuersis. Quod cum intelligamus ex supplicatione Fidelis nostri, Magistri Ladislai de Kaniza, Patroni Ecclesiae de Chorna, ipsam Ecclesiam Chornensem, post foundationem olim progenitorum suorum, ex annuentia Divorum Regum Hungariae, nostrorum scilicet Praedecessorum, ea semper libertate ad haec usque tempora usam fuisse et gauisam, ut omnes nociui et peruersi homines, in bonis dictae Ecclesiae, in maleficiis videlicet deprehensi, per iudices et officiales Praepositi et Conventus eiusdem Ecclesiae, in eisdem bonis constituti, pro demeritorum qualitate puniri debuerint: tamen nunc Vice- Comes Comitatus Jaurinensis, et alii nonnulli in Comitatu ipso, contra praemissam antiquam consuetudinem et libertatem, dictam Ecclesiam, et eius officiales, ac iudices et iobagiones turbare et opprimere niterentur et vellent, in eiusdem Ecclesiae praepudicium, et damnum manifestum. Quapropter Nos, tum admissa et intellecta praemissa supplicatione praefati Ladislai de Kaniza, tum vero volentes pro quiete et tranquillitate subditorum nostrorum providere; ut in terris nostro Dominio subiectis pax et securitas praebeatur, malefactorumque et nocivorum hominum perversitas deleatur; id Nos quoque de mera nostrae Regiae potestatis plenitudine, et gratia speciali, praefatae Ecclesiae Chornensi denuo, et ex novo, gratiose annuendum et concedendum, ad hocque plenam auctoritatem nostram dandam et attribuendam duximus: ut ipsi officiales et iudices Praepositi et Conventus dictae Ecclesiae Chornensis, praesentes scilicet et futuri, ubilibet in bonis dictae Ecclesiae in hoc Regno nostro habi-

habitis constituti, ubi scilicet tales malefactores, puta praedones, fures, latrones, vespiliones, incendiarios, intoxicatrices, homicidasque et alios quoslibet malos et peruersos homines, in maleficiis et latrociniiis deprehendere poterunt, modo quo deprehenderunt, captiuare, iudicare, ac laqueis destinare, rotare, decollare, aliisque dignis poenis, pro Regni hactenus nostri antiqua consuetudine, punire et inquirere libere valeant atque possint; imo annuimus et concedimus, et attribuimus, praesentium per vigorem. Quo circa Vobis Fidelibus nostris, Comiti, Vicecomiti, et Iudicibus, ac Uniuersitati Nobilium Comitatus Jaurinensis, harum serie firmissime committimus et mandamus, quatenus a modo praefatam Ecclesiam Chornensem, Praepositumque et Conuentum, atque officiales, et iudices, et iobagiones eorundem, contra formam huiusmodi antiquae libertatis et consuetudinis eorundem, praemissamque annuentiam et concessionem nostram novam, in praemissis turbare, opprimere, damnificare, et vos ad praemissa quoquomodo ingerere et intromittere, nusquam et nequaquam praesumatis, neque ausi sitis modo aliquali gratiae nostrae sub optentu. Praesentibus perlectis exhibenti restitutis. Datum Budae, in Festo Beati Ladislai Regis et Confessoris, anno Domini millesimo quingentesimo vigesimo; Regnorum nostrorum Hungariae et Bohemiae anno quinto.

XXXI.

Ferdinandus I. R. H. Iosepho Luka spem (expectativam) 100. Colonorum largitur. an. 1547. KAPRINAI MSS. B. XXVIII. Nro. 117. Conf. ISTVANI Hist. Lib. XVI. ad an. 1547.

Nos Ferdinandus &c. Quod nos considerando fidelitatem et fidelia seruitia fidelis nostri Iosephi Luca Quinqueecclesiensis, quae ipse sacrae primum Regni nostri Hungariae Coronae, et deinde Maiestati nostrae, tum antea semper, sed maxime in praeterita expedi-

tione nostra Saxonica, strenue et fideliter exhibuit et impendit. Nam cum Sacra Caesarea Maiestas, Dominus et frater noster charissimus, Joannem Fridericum Ducem Saxoniae Electorem, suae Maiestatis et nostrum rebellem et contumacem hostem, nobiscum una armis persequeretur, eumque cum toto suo exercitu fugientem, in campo patenti, Marte aperto profligasset; ipse Iosephus Luka, cum aliis fidelibus et strenuis nostris militibus Hungaris, profligatum et fugientem hostem persecutus, Deo et fortuna ita ei favente, praefatum *Joannem Fridericum Ducem Saxoniae, virtute et agilitate sua cepit, et sic aliisque nonnullis ornamentis eum exuit.* Cuius virtute et militia factum est, ut postea Dux ipse, in praesentiam Sacrae Caesareae Maiestatis, captus, barbaque sanguine, ex vulnere quod in facie acceperat, concreta, ductus fuerit. Ob haec igitur servitia et virtutem militarem, volentes ipsum Iosephum Luka, ac per eum Joannem similiter Luka, fratrem suum uterinum, nostra Regia gratia et liberalitate prosequi; eosdem ex gratia nostra Regia in eo duximus asscurandos et certificandos, ipsisque in verbo nostro Regio promittentes, quod ubi primum in dicto Regno nostro Hungariae partibusque ei subiectis, in quocunque Comitatu, aliqua bona, seu iura possessionaria, quocunque nomine vel titulo de jure vacare, ad nostramque Regiam collationem devolvi et descendi contingeret, eadem ex eis ipsis Iosepho et Ioanni Luka, eorumque haeredibus et posteritatibus uniuersis, non obstantibus quibuscunque literis aliis nostris, harum in contrarium cuiuspiam forte datis vel dandis, quibus omnibus eos praeferri volumus, centum colonos, sive possessiones jobagyionales, simul cum cunctis earum utilitatibus et pertinentiis quibilibet, jure perpetuo et irrevocabiliter conferen'; imo asscuramus et certificamus harumstrarum vigore et testimonio literarum. Datum Pragae, 14. Julii, anno Domini 1547. Regnorum nostrorum Rom. 17. aliorum vero 21.

XXXII.

Ferdinandus I. R. H. Marcum Horvath Stansfyt nobilitat, 1548. KAPRINAI MSS. B. XXVIII. Nro. 110.

Nos Ferdinandus &c. memoriae commendamus tenore praesentium quibus expedit uniuerlis. Quod nos cum ad nonnullorum fidelium nostrorum humillimam supplicationem Maiestati nostrae tactam, tum vero consideratis fidelitate et seruitiis fidelis nostri Marci Horvath Stansfyt, quae ipse Sacrae primum Regni nostri Hungariae Coronae, et deinde Maiestati nostrae, pro locorum et temporum varietate, juxta suae possibilitatis exigentiam exhibuit et impendit, (et) annis superioribus, sub Capitaneatu fidelis nostri Specabilis et Magnifici Thomae de Nádasd, Comitis perperui Terrae Fogaras, Judicis Curiae nostrae, et supremi Regni nostri Hungariae Capitanei &c. in quodam certamine cum Turca inito, cum duobis Thureis congregiendis, et utrumque capiendis, certorum fidelium nostrorum fide digno testimonio exhibuisse dicitur. Volentes itaque horum intuitu eum nostra gratia Regia et munificentia prosequi, eundem a conditione civili et ignobili, in qua natus hactenus perstitit, de plenitudine nostrae Regiae potestatis, et gratia speciali exemptum; in coetum et numerum verorum Regni nostri Hungariae nobilium duximus cooptandum, annumerandum et adscribendum. Annuentes et concedentes, ut ipse, et eius haeredes atque posteritates uniuersae, a modo in posterum, omnibus illis priuilegiis, juribus, libertatibus, praerogatiuis, et immunitatibus, quibus caeteri veri et nati nobiles dicti Regni nostri Hungariae, ab antiquo, de jure vel consuetudine usi sunt et gauisi, uti, frui, et gaudere possint et valeant. In cujus quidem nostrae erga eum exhibitae clementiae testimonium, veraeque nobilitatis signum, haec arma, sive nobilitatis insignia, scutum videlicet erectum, caesio colore, quod gryphus alis in dextra laevaue parte extensis, lingua exerta, capite et toto corpore sursum erectis, antero-

ri dextro gladium tenens ancipitem, laevo vero pedibus Turcae caput pectore cum humeris apparens, rubro pileo Turcico et veste tectum, posteriori item sinistro pede alterius Turcae caput a corpore abscissum pressans. Supra scutum serata est galea, eam circumdant laciniae fulvo et caesio coloribus; galeae impositum est diadema Regium, ex eo prominet dimidiatus gryphus, dextro pede gladium, sinistro diadematis cornu tenens, prout haec in capite, siue principio literarum nostrarum praesentium, pictoris arte, suis coloribus depicta esse visuntur, eidem Marco Horvath, ipsiusque haeredibus et posteritatibus utriusque sexus uniuersis, dedimus et contulimus. Decernentes, ut ipse eadem arma, seu Nobilitatis insignia, more aliorum Nobilium regni nostri Hungariae, armis et insignibus militaribus utentium, a modo in posterum ubique, in praeliis, hastiludiis, torneamentis, duellis, monomachiis, et aliis omnibus exercitiis nobilitaribus et militaribus, nec non velis, sigillis, cortinis, signis, annulis, aulaeis, domibus, et generaliter in quibuslibet rerum et expeditionum generibus, sub meræ et sinceræ nobilitatis titulo, quo eum ab uniuersis et singulis, cuiuscunque status, conditionis, dignitatis et præminentiae homines existant, insignitum dici, nominari, teneri, et reputari volumus, ferre, uti, gestare, et gaudere possit et valeat, haeredesque et posteritates ipsius utriusque sexus uniuersae possint et valeant. In cuius rei memoriam firmitatemque perpetuam, praesentes literas nostras, secreto sigillo nostro, quo ut Rex Hungariae utimur, pendenti communitas, Eidem Marco Horvath, ipsiusque haeredibus et posteritatibus utriusque sexus uniuersis duximus dandas et concedendas. Datum per manus Reuerendissimi Domini Nicolai Olahi, Episcopi Zagrabiensis, Compatriis et Consiliarii, Secretarii que, et in Regno nostro Cancellarii nostri, fidelis nobis sincere dilecti, in Ciuitate nostra Posoniensi, 18. Novembris, anno Domini 1548. Regnorum nostrorum, Roman. XVIII. aliorum vero XXII.

*) Familiam de Rege et Regno optime meritam, nuper admodum tumulo intulit BALTHASARUS HORVATH STANSITH de GRADETZ; mortuus mense Decembre anno 1801.

XXXIII.

Gabriel Bathori Princeps Transilvaniae conditiones conuentionis cuiusdam, factae inter ciues de Nagybanya et Gerardum Lisibona fodinarum praefectum, ratas habet. KAPRINAI MSS. B. XVI. Nro. 24.

Nos Gabriel Dei gratia Transilvaniae, Walachiae Transalpinaeque Princeps, partium Regni Hungariae Dominus, et Siculorum Comes &c. Memoriae commendamus tenore praesentium significantes, quibus expedit uniuerlis, quod pro parte et in personis fidelium nostrorum prudentum et circumspectorum, Benedicti literati Iudicis primarii, caeterorumque Juratorum ciuium nostrae ciuitatis Nagibania; item generosi Gerardi Lisibonae, fodinarum dictae ciuitatis nostrae Nagibania et oppidi Felsöbania Praefecti, exhibiti sunt nobis et praesentati quidam Articuli, Ungarico idiomate confecti, super differentiis et difficultatibus inter ipsos motis et vertentibus, per certos nostros Commissarios ad id delegatos conclusi, tenoris inscripti, supplicantes nobis humillime, quatenus nos eosdem Articulos, omniaque et singula in eisdem contenta, praesentibus literis nostris inferi et inscribi faciendo, acceptare, approbare, ratificare, ac tam pro se ipsis, quam pro posteritatibus et successoribus uniuerlis in perpetuum valituros, gratiose confirmare dignaremur, quorum quidem Articulorum tenor talis est: Elsöben, az réz és on pénz in perpetuum tollatassék közzülök. Masodzor, az Miveseknek minden Kántoron jó pénzvel megfizessen; el kezdvén az Kántort zámlalni a prima die July proxime affuturi, excepto tamen tempore belli, ki miat az Baniazók nem mivelhetnének; alioquin el telvén az Kántor, ha meg-nem fizetne, a Profont-is tollatassék. Harmadzor, az malommal cziak az maga Profontia zükségére álljen. Negyed-

zer, mindenféle Profont zabados légyen nékie; de senkire profontiát erővel ne kösse, hanem az ki hol akar vásárolni, zabadoson ott vásárolhasson. Ötöd-zör, az magyar mivefeket, kik az ő Profontiával nem akarnak élni, ne degradálhassa. Hatadzor és utolsor, juxta contenta priuilegiorum Nagibaniaiensium, Perk mester eligaltassék, és az előtt Praefectus Uram in quibusuis causis tartozék meg-felelni, per se vel per Procuratorem. — Nos igitur praemissa eorum supplicatione, nobis, modo quo supra, porrecta, clementer exaudita, et fauenter admissa, praescriptos Articulos, modo praemisso nobis praesentatos; omniaque et singula in eisdem contenta, de verbo ad verbum, sine diminutione et augmento aliquali, praesentibus literis nostris inferi et inscribi facientes, acceptamus, approbamus, ratificamus, ac tam pro praedictis Judice et juratis ciuibus ciuiatis nostrae Nagibania, Gerardoque Lisibona, quam etiam pro posteritatibus successoribusque ipsorum uniuersis, in perpetuum valituros, gratiose confirmauimus. Et nihilominus sub grauissima indignatione nostra eisdem indicimus, ut ipsi heredesque et posteritates successoresque ipsorum uniuersi, praescriptos Articulos, omniaque et singula in illis contenta, a modo deinceps successiuis semper temporibus observare debeant et teneantur. Datum in ciuitate nostra Cibiensi, die vigesima septima mensis Maii, anno Domini millesimo sexcentesimo duodecimo.

Gabriel Princeps m. pp.

XXXIV.

Exemplum praecepti Turcici; e KAPRINAI MSS. A. Tom. XV. accurate descriptum.

My az hatalmas es győzhetetlen vitezkedő Török Csaszarunknak, Szecsényi, Holokj, Bujaki, es Hatvanj Veghvarainak Praesidiuminak mostani fő heltartojanak, az Tekintetes es Nagysagos vitezlő Ibrahim Bafanak Kajmokanya Kepebeli embere vitezlő Balj Bek &c. (L. subscr. & S.) Ti vasaros Paloitaj, Kürtöfj,

Sztraczinj, Szentpeterj, es több falusi birak polgarok. Ezen czimeres parancsola függő levelünkett latvan, azt eszettekben vegyitek, hogy a hir mondasal tartoztok ide be Szecseny várában mind addigh, a migh Szecsenyben. Török lakik. ertettük, hogy Korponaj Kapitany Balassa Balint Groff Ur ő Nagysaga tilalmazza a hirt meghhordanj ide közinkben Szecheny varaban; azért ti az eő Nagysaga ebbelj parancsolattyat elő ne vegyitek, mert ti magatoknak kart teszte, mivel ha meghertendgyük hogy Katona jar köztetek falujtokban, es a' hirt megh nem hozzatok; kizs a karo, nyarsban szaratok megh. Isten velünk. Szecseny, 1668. die 18. May.

Idem qui supra.

Inscriptio hæc erat: *Az megh irt falusi es több szomszajunkbelj falusi biraknak; hodolt jamboroknak adafsek.*

*) In Tabulario ill. Gentis Szechenianae literae supersunt ad Archiepiscopum Strigonientem Georgium Széchenyi, a quodam ferociente Bassa Turcico datae, quarum haec esse dicitur epigraphæ: *Szécsényi Györgynek, a' Kristus Papjának, a' Német Császárr barátjának, az eb adtának, adafsek.*

XXXV.

Leopoldus I. R. H. Baronem Sigismundum Pettheö de Gherse ad Comititis dignitatem euehit, an. 1666.
KAPRINAI MSS. B. Töm. XVIII. Nro. 85.

Leopoldus divina favente clementia electus Romanorum Imperator, semper Augustus, ac Germaniae, Hungariae, Bohemiae, Dalmatiae, Croatiae, Sclavoniae, Ramae, Seruiae, Galliciae, Lodomeriae, Cumaniae, Bulgariaeque &c. Rex, Archidux Austriae, Dux Burgundiae, Brabantiae, Styriae, Carinthiae, Carnioliae, Marchio Moraviae, Dux Lucemburgae, ac superioris ac inferioris Silesiae, et Wirthembergae et Thecae, Princeps Sveviae, Comes Habsburgi, Tyrolis, Ferreti, Kiburgi, et Goritiae, Landtgravius Alsatiae, Marchio Sacri Romani Imperii supra Anasum,

Bur-

Burgoyiae, ac superioris et inferioris Lusatiae, Dominus Marchiae Sclavonicae, Portus Naonis, et Salinarum &c. Tibi fideli nostro, nobis dilecto, Magnifico Sigismundo Pettheö de Gherse, partium Regni nostri Hungariae superiorum Vice-Generali, ac praesidii nostri Onodiensis supremo Capitano, Camerario et Consiliario nostro, salutem et gratiam, ac clementiae nostrae Caesareae et Regiae continuum erga Te incrementum. Si laude digni habentur ii, qui ex re tenui et angusta ad virtutem et gloriam enituntur, non minus nostro iudicio laudandi celebrandique sunt illi quoque, qui partum virtute maiorum Nobilitatis decus, et vitae splendorem, insignesque titulos et honores, in se non modo non patiuntur consenescere, quin potius infracto virilique animo, nihil humile, nihil abjecti cogitantes, quin virtutem sibi sequendam proponentes, non nisi alta spirare, capeendisque et aggregandis magnis ac splendidis quibusvis rebus et actis sese adaptare consueverunt, non enim minori cum difficultate, cura, atque labore, transmissi ad posteros tituli et honores retinentur: Ita sane plurimum celebrandi sunt ii, qui domestica gloria non contenti, suo quoque Marte, et propria industria, genus et familiam suam, alioquin vetustam et celebrem, maioribus honorum et gloriae titulis illustrare condecorareque student. Et licet quidem hos ipsa virtus remuneret: quoniam tamen Deus Optimus Maximus, Principum, ac eo magis nostrum, quem omnium Potentatum Christianorum summum constituit Monarcham, inter alia non postremum voluit esse officium, virtutis nempe, et honestatis, ac fidelitatis cultores fovere, ornare, ac in exemplum aliorum remunerare, atque ad altiora evehere. Officio tali nostro, peculiari quodam naturae nostrae instinctu, a primis Imperii Regnorumque nostrorum regiminis, ac felicitis inaugurationis exordiis, hucusque semper propense respondere conati sumus; nihil antiquius habentes, quam ut eos, quorum singularis erga nos et sacrum diadema nostrum fides est conspicua, praeclaris honorum titulis, in perennem rerum a se gestarum memoriam, cohonestemus. Quod ipsum in Te quoque

Sigismunde Pettheo de antelata Gherse, libenter facimus, et tanto quidem propensius, quo intelligimus Te antiqua et celebri ortum profapia, cuius utpote majores etiam et progenitores, generis ac virtutum suarum eximia meruisse testimonia perhibentur. Sicut et tritavus quoque Tuus, Magnificus quondam Johannes Pettheo de dicta Gherse, per Serenissimum olim Uladislauum, aequae Regem Hungariae et Bohemiae, ubi Serenissimam quondam Dominam Annam, felicibus auspiciis sibi in conjugem thalamique sociam charissimam elegisset, adducique curasset, ipsis statim primis adventus illius diebus, et in Magistrum Curiae, exigentibus id meritis ac virtuosis suis qualitatibus, deligi meruit; quo in officio se apud eundem, usque ad supremum ipsius diem, summa fide, prudentia, et dexteritate gessit: qua tandem e medio sublata, et divina Majestate ita disponente vita functa, in Magistrum Curiae charissimorum dictae quondam Regiae Majestatis liberorum, quibus nil charius, nihilque pretiosius habuit, deputatus exstitit, ita ut dum alii fideles eius partim bona et redditus Regios curassent, partim thesaurum et supellectilem amplissimam conservassent ruitique fuissent, is rem omni prorsus thesauro omnique supellectili pretiosiores, ipsos videlicet liberos charissimos, sub sua cura et custodia habuit; quo in officio se ita semper gessit, ut nihil amplius in eo desiderari, aut requiri potuerit. Unde neminem etiam alium sibi honoris seu muneris ejusdem participem, sive collegam habuit. Ut autem propensa illius olim Johannis Pettheo in praetitulatum quondam Regem ac Dominum suum charissimosque ejus liberos, illustres utpote Ludovicum Ducem et Annam filiam, fidelitas, ac in omnibus rebus agendis integritas et constantia, non solum in se, verum universam stirpem et cognationem Vestram diffunderetur, ac haeredibus et posteritatibus Vestris decori et ornamento foret, utque amor ejusdem quondam Regiae Majestatis, quo ipsum ob praescriptas suas virtutes ac merita compledebatur, omnibus innotesceret; ad illa vetusta familiae Vestrae insignia,

signia, scutum videlicet instar turbinis, in supremo latum, in imo acuminatum, in quator campos lineis duabus transversis, sese invicem in medio scuti interfecantibus divisum, quorum quidem duos, superiorem nempe, et inferiorem, per transversum se habentes rubri coloris, duo animalia occupant: nam in superiori campo, Leo, ferocissimum et generosissimum animal, naturali colore depictus, ex ipsius lineae summitate caudatenus emergens, aperto et hianti rictu linguam exertam vibrans, fremebundus, primis pedibus erectis ac diuaticatis, capite coronam auream gestans, cauda in sublime elevata, et quasi caput ipsum contingenti, in extremo reflexa conspicitur; in inferiori vero campo, rubri similiter coloris, stat Draco elatus, lingua itidem exerta ac vibrante, ignem ore vomens, vertice cristato, corpore maculis resperso, cauda deflexa, et in nodum ligata, corpus ipsum subeunte, pedibus innixus, ad certamen et dimicationem paratus, qui nisi quod linea supradicta a Leone dirimitur, procul dubio cum ipso Leone, sibi naturali quodam instinctu exosissimmo, certamen inire conatur. Porro reliquae duae scuti partes, linearum, ut praemittitur, intercurso, a praememoratis distinctae, caelestini sunt coloris: quarum una superior, utpote duos frutices herbaceos in prato et gramine viridi surgentes et succrescentes, et anatem terrestrem, unius illorum fruticum folia decerpentem continet; in altero campo similiter caelestino inferiori, luna sup pallida sui que coloris, ad instar arcus tensi, cornibus in se revolutis, duo splendidissima sydera intra orbis ambitum et circumferentiam inclusa continere cernitur. Supra quam quidem totalem formam scuti est galea suo colore depicta, et flores varii circumquaque sese diffundentes, et scutum undique omni-que ex parte ambientes. Ad haec igitur pristina, et avitae Vestrae stirpis ac stemmatis majorum Vestrorum insignia, haec adiungenda duxit, eadem olim sua Majestas Regia, supra illam videlicet scuti et galeae totalem formam, ac florum lepidissimam dispersionem, personam suam Regiam, in solio aurato sedentem, dextra

dextra paululum ad pectus elevata, pomum cruce insignitum, sinistra autem sceptrum Regale, peculiare omnium Christiani nominis Regum insigne tenentem, caesarie demissa, capite corona ac diademate Regio redimito, altera corona desuper in campo aëreo, quasi in aëre pendente, et quodammodo in ipsum verticem coelitus descendente; ad cuius quidem solii aurati latera, duo infantes Regii, liberi videlicet antelati praerecensitae quondam Suae Majestatis Regiae suavissimi, stare, ac manibus ipsum solium contingere conspiciuntur; a latere quidem dextro Dux Ludovicus, filius charissimus, sceptrum similiter Regale in dextra tenens, capillulis albis, coronam ac diadema Regium capiti impositum, altera corona desuper itidem imminente; a latere vero sinistro stat Anna Reginula filia jucundissima, pomum similiter aureum sinistra tenens, coma flava sparsa, et per lactea colla fluente, unica duntaxat corona capite redimito. Quae quidem singulari ac peculiari suae munificentiae dono collata insignia, eadem olim sua Majestas Regia, ipsi quondam tritauo Tuo potissimum convenire putabat, ut cum charissimorum ejus liberorum Magistrum Curiae ageret, eoque munere fidelissime simul ac diligentissime fungeretur, inde potissimum insignia, virtutisque suae clarissimae monumenta haberet, ubi omnem operam, curam, ac sollicitudinem collocarat, simulque, ut quemadmodum in insignibus et armis suis eandem Majestatum gestaret effigies: ita in animo quoque, et cordis arcano, veram illam et incomparabilem, iis debitam fidelitatem, medullitus infixam gereret, prout haec omnia in aliis, eiusdem quondam Regiae Majestatis literis, coram nobis in specie productis, suis appropriatis coloribus, pictoris edocta manu effigiata, et distinctius expressata esse conspiciuntur, ipsi tritavo Tuo, vestrisque haeredibus, et posteritatibus universis danda duxit et concedenda. Alter autem Johannes Pettheö de praelibata Gherse, avus utpote Tuus, per Sacratissimum quondam Principem ac Dominum Ferdinandum, similiter Romanorum Imperato-

rem,

rem, ac Germaniae, Hungariae, Bohemiae &c. Regem, Infantem Hispaniarum &c. ejusdem in aula a teneris annis educatus, ob egregia sua facinora, imprimis quidem Supremi Comitis, Capitaneique Comitatus Soproniensis, nec non pocillatoris honoribus seu officiis condecoratus evasit; deinde vero ad maiora animum intendens, in Flandriam profectus, ubi sub auspiciis gloriosissimi, felicissimi, et Augustissimi quondam Principis, Caroli Quinti Romanorum Imperatoris beatae recordationis, cum honore ac laude militiae tyrocinium deposuit, indeque ad praetitulatam quondam suam Majestatem Caesaream ac Regiam redux factus, variis ejusdem in expeditionibus, nimirum in bello Germanico, omnium grauissimo et maximo, ac per dictum olim Carolum Quintum Imperatorem, una cum ipsa quondam Caesarea Regiaque Majestate, feliciter confecto, Babolchienisque ac Szigethiensis, penes Serenissimum quondam Principem similiter Ferdinandum Archiducem Austriae, filium utpote illius charissimum, contra exercitum Turcarum Imperatoris gesto, eorum Supremi Capitaneatus officio fungens, optimi militis et Capitanei gloriam est consecutus. Ultimo tandem, quo posteris quoque suis praeclarissimum domesticae laudis exemplum, ac sempiterna memoria remaneret, dignitatem Magistratus Cubiculariorum in Hungaria, cum solito, et ab antiquo consueto eius salario, omnibusque iurisdictionibus, conditionibus, autoritate, praerogativis, et honoribus, quibus caeteri Magistri Cubiculariorum usi sunt et gausi, utunturque et gaudent, fuit adeptus. Denique vetus et clarissima Domus haec Vestra Pethöiana, quae nullo unquam tempore, aliqua infidelitatis labe, vel laesae Maiestatis crimine notata et obfuscata fuisse reperiretur, alios quoque viros complures, a singulari prudentia et autoritate, primariis in functionibus cum dignitate sustinendis, excitatos, et domi forisque celebres, produxisse dignoscitur. Quorum laudabilibus vestigiis Tu quoque Sigismunde Pettheö de attacta Gherse, inhaerere semper contendens, virtutem-

tutemque Tibi sequendam proponens, spreto vitiorum ac desidiae illecebris, laboribus et corporis exercitiis temet dedens, ut Sacrae imprimis Regni nostri Hungariae Coronae, Augustaeque Domui nostrae Austriacae, debitae fidelitatis et constantiae zelo ac alacritate, inservire posses; hinc statim in ipsa adolescentia Tua, amore patriae, eiusque ab hostilibus infestationibus, perennium et naturalium christiani nominis hostium, Turcarum tutandae studio, ac de praefata Augusta Domo nostra benemerendi desiderio, militari disciplinae Te applicasti, ac ubi et quamprimum tumultus ac intestinae seditiones, sub felici regimine Suae Sacratissimae Caesarcae et Regiae quondam Maiestatis paternae, per Georgium olim Rakoczy seniore, Transsylvaniae Principem suscitati, ac exorti fuissent, succrevissentque et viguissent; licet eorum multi Regnicolarum, partim metu perculsi, partim novitate rei pellecti, a constantia, fideque et fidelitate Deo imprimis, ac deinde eidem quondam suae Maiestati Sacraeque Regni nostri praedicti Coronae debita, leviter ac temere deflexissent et descivissent, atque contra legitimum Regem, et publicum Regni bonum arma sumpserint: Tu tamen Sigismunde Pertheo de antedicta Gherse, auitae virtutis, constantiae, et fortitudinis memor, infraeto et excelsso animo, pro dignitate et authoritate legitimi Regis ac Domini Tui observanda, nullos labores, sed nec vitae ac Tuorum impendentia pericula pertimescendo, vel facultatibus expensisque Tuis parcendo, cum iactura et amissione etiam omnium bonorum ac fortunarum Tuarum, Temet, ad illibate contestandum Tuam fidelitatem et obsequia, inde ad hasce partes contulisti, et cum ad commune huiusmodi exortum incendium restinguendum vires undique colligerentur, Tu quoque inter alios fideles nostros praesto fuisti, ac in castra animose descendisti, sub auspiciisque praelibatae quondam paternae Maiestatis, contra exercitum Rakocianum sedulam et fidelem operam impendisti; solutis demum castris, sedatisque belli procellis, primum quidem Onodien-

dienſis Capitaneatus officio, quod etiamnum benigna noſtra cum ſatisfactione adminiſtras, inſignitus, ad omnem occaſionem, ſtrenuum et cordatum ducem et militem pariter temet exhibuiſti, multisque et variis Turcarum excuſſionibus reprimendis, dimicationibus, ac praeliis in perſona interfuſti, Teque ibidem ſtrenue ac militariter geſſiſti, iugique felicitate ſemper victoriam reportaſti; deinde vero ad officium Vicegeneralatus Caſſovienſis, quo in praefentiarum quoque ſumma cum laude fungeris, promoveri meruiſti. Ad quam quidem animi Tui fortitudinem, et declaratam haecenus in rebus agendis dexteritatem, aliis quoque ingenii laudabilibus qualitatibus ac virtutibus accedentibus, omnino Te dignum iudicauimus, qui in numerum quoque fidelium noſtrorum Camerariorum et Conſiliariorum Hungarorum ſimul et ſemel adſciſcereris. Quorum omnium tam praemiſſorum, quam etiam aliorum per Te maioresque ac progenitores Tuos, domi et militiae laudabiliter ac utiliter praefitorum factorum, ac antecellorum quoque Tuorum gratia, motu proprio, animo deliberato, ex certa noſtra ſcientia, et poteſtatis noſtrae plenitudine, Te Sigismundum Pettheö de praenotata Gnerſe, ex ordine et numero ſupra dicti Regni noſtri Hungariae Magnatum, in quo haecenus Tu, ac maiores progenitoresque Tui ſemper verſati eſtis, benigne eximentes, ac per Te Annam Paczoth conſortem, nec non Franciſcum, Sigismundum, Ladislaum, et Stephanum filios, item Claram, Evam, Chriſtinam, Juditham, ac Eliſabetham filias Tuos, haeredesque et poſteritates Veſtros utriusque ſexus univerſos, veros Comites, vulgo a Germanica natione Graff nuncupatos, fecimus, creavimus, et Comitibus titulo decoravimus, ac inſigniuimus; vosque ac haeredes et ſucceſſores veſtros, numero coetuique aliorum verorum ac indubitatorum Comitum aggregauimus et adſcripſimus, gratiarumque, libertatum, praerogativarum, et dignitatum Comitibus debitarum, capaces et conſortes fecimus, ac tenore praefentium, motu, animo, ſcientia, et poteſtate praedictis, vos haeredesque et ſuc-

successores vestros, veros et indubitatos Comites creamus & constituimus, ac ad statum verorum ac indubitatorum, ut praemittitur, Comitum evehimus et promovemus, eorumque numero et consortio, praeprecificata quoque antiqua Vestra insignia confirmantes, aggregamus, habilesque et capaces facimus gratiarum, libertatum, praerogativarum, et dignitatum. Et hanc quidem benignitatis nostrae propensionem, ac singularem gratiam, erga Te Sigismundum Pettheo de toties fata Gherse, exhibere et declarare volumus, quo Tuo exemplo, aliis etiam fidelibus subditis nostris, praecipue vero haeredibus et posteris Tuis, similia bene merendi studia Tua, et fidelia obsequia amplectendi et imitandi caleat, et maius quodammodo incitamentum addatur. Decernentes eadem auctoritate nostra, et hoc edicto nostro statuantes, ut de caetero Tu Sigismunde Pettheo de praetitulata Gherse, ac per Te consortes, filii, ac filiae Tui praedicti, haeredesque et successores Vestri utriusque sexus uniuersi, perpetuis futuris temporibus, veri et indubitati Comites, vel tamquam de genere Comitum procreati, a Nobis nostrisque successoribus, ac uniuersis et singulis aliis, cuiuscunque praeminentiae, status, conditionis, aut dignitatis existant, teneri, dici, nominari, et ubique locorum ac terrarum haberi debeant, titulo consueto Spectabilis et Magnifici, caeterisque praerogatiuis, ut supra, nec non praedeclaratis insignibus Vestris, in aevum uti, frui, et gaudere possitis ac valeatis. Mandantes uniuersis et singulis Maiestatis nostrae Regnorum et Prouinciarum subditis, ac fidelibus nostris, cuiuscunque dignitatis, praeminentiae, status, gradus, ordinis, et conditionis existant, ut Te Sigismundum Pettheo de toties repetita Gherse, consortem, item filios ac filias Tuos antelatos, haeredesque et successores Vestros, pro veris ac indubitatis Comitibus habeant, reputent, nominent, et honorent, eoque titulo et praerogatiuis iugiter uti, frui, et gaudere sinant, nec aduersus illa, et hanc nostram concessionem, gratiam, et indultum impendant, mole-

stent et perturbent, nec ab aliis impediri, molestari, et perturbari sinant quovis modo. Si quis vero ex nobis subiectis id attentare praesumpserit, nostram successorumque nostrorum noverit indignationem se incursum. In quorum fidem et testimonium, hasce literas nostras, manus nostrae subscriptione, et sigillo duplici, quo ut Rex Hungariae utimur, impendenti roboratas, emanari commisimus. Datum per manus fidelis nostri, nobis sincere dilecti, Reuerendissimi in Christo Patris, Domini Georgii Szelepchényi, Archiepiscopi Ecclesiae Metropolitanae Strigoniensis, locique et Comitatus ejusdem supremi ac perpetui Comitis, Primatis Hungariae, Legati nati, summi Secretarii et Cancellarii, ac Consiliarii nostri intimi, in Ciuitate nostra Vienna Austriae, vigesima prima mensis Aprilis, Anno Domini millesimo sexcentesimo sexagesimo sexto. Regnorum nostrorum, Romani octauo, Hungariae et reliquorum undecimo, Bohemiae vero decimo. Reuerendissimo, ac Venerabilibus, in Christo Patre ac Domino, dicto Georgio Szelepchényi, praefatae Metropolitanae Strigoniensis Archiepiscopo, Colocensis et Bachiensis ecclesiarum canonice unitarum Archiepiscopatu vacante; Thoma Pálffy ab Erdöd electo Agriensis, Petro Petretich Zagrabienensis, Episcopatu Nitriensi similiter vacante, Georgio Bársony Varadiensis, itidem Georgio Széchényi electo Jaurien. Francisco Folnay electo Transiluanien. Stephano Sennyei de Kis-Sennye electo Wesprimien. Francisco Szegedi Vaczien. Fratre Hyacintho Macripodáry Chyanadien. altero fratre Joanne Salix Quinquaecclesien. pariter Joanne Szmolyanovich electo Segniensis et Modrusiensis; Sedibus Episcopatum Sirmiensis et Samandriensis vacantibus; Francisco Gorub electo Noviensis, Matthæo Szentthamásy electo Corbaviensis, Sedibus Episcopatum Scopiensis, Tininienensis, et Scardonensis similiter vacantibus; tertio fratre Matthæo Benlich electo Boznensis, et Georgio Berdoczy electo Rosonenensis Ecclesiarum Episcopis, Ecclesias Dei feliciter gubernantibus. Item Spectabilibus et Magnificis, Comite Francisco Vesselényi de Hadad perpe-

perpetuo in Murány, praespecificati Regni nostri Hungariae Palatino, Comite altero Francisco de Nádasd perpetuo Terrae Fogharas, Iudice Curiae nostrae Regiae, Comite Petro perpetuo a Zrinio, annotatorum Regnorum nostrorum Dalmatiae, Croatiae, et Slavoniae Bano; Comite Adamo Forgách de Ghymes, Tavernicorum, Comite aequae perpetuo Adamo a praenotato Zrinio, Agasorum, Comite Nicolao Pálffi a praelibata Erdöd, Cubiculariorum, Comite itidem Nicolao Dráskovicz de Trakoštyán, Janitorum, Comite Georgio Illyésházi perpetuo a Trenchin, Dapiferorum, officio Pincernarum vacante; Comite Paulo Eszterházy de Galantha Curiae nostrorum Regalium in Hungaria Magistro, ac memorato Comite Nicolao Pálffi a memorata Erdeod, Comite Posonienſi, caeterisque quam plurimis saepeſati Regni nostri Hungariae Comitatus tenentibus et Honores.

Leopoldus m. pp.

Georgius Szelepchényi m. pp.
Archiepiſcopus Strigonienſis.

Stephanus Orbán m. pp.



CD Schwartner, Martin von
59 Introductio in rem diplomati-
H8S3 cam aevi intermedii, praecipue
1802 Hungaricam Ed. 2.

PLEASE DO NOT REMOVE
CARDS OR SLIPS FROM THIS POCKET

UNIVERSITY OF TORONTO LIBRARY

